



ЭМИЛЬ ЗОЛЯ

ҲАМАЛ

(Жерминаль)

МАҲМУД ЯҲЁЕВ
таржимаси

Золя Эмиль.

Ҳамал, М. Яҳёев тарж. — Т.: Адабиёт ва санъат нашриёти,
1981. — 544б.

Қаҳратон қиш соғуғида ҳам, баҳорнинг пилч-пилч палласида ҳам ёғоч бошмоқларини тўқиллатиб, кўмир конларига бориб келаётган заҳматқашлар ҳаёти нақадар аянчли... Қоронғи ер остидаги огир меҳнат, қашшоқлик, ҳукмрон синфнинг золимлиги шахтёрларда норозиликни кучайтириб, уларни ёруғ келажак учун курашга отлантиради, бироқ уларнинг уюшқоқсизлиги туфайли кураш барбод бўлади, аммо шахтёрлар ёрқин келажак учун курашни давом эттириш орзуси билан яшай бошлайдилар.

Бу воқеалар улуғ француз ёзувчиси Эмиль Золянинг «Ҳамал» («Жерминаль») романида кенг ёритилган.

Золя, Эмиль. Жерминаль. Роман.

И (Фр)

70304 — 80
3 ————— 130 — 81 4703000000
М 352 (04) — 81

© Гафур Гулом номидаги Адабиёт ва санъат нашриёти, 1981 й.,
(Тарж.)

БИРИНЧИ ҚИСМ

I

Юлдузсиз зим-зиё тун қўйнида, лавлагикорликлар орасидан ўтадиган, Маршьенндан Монсуга тўша-тўғри олиб чиқадиган ўн километрчалик катта кўчадан ёлғиз йўловчи борарди. У ҳатто йўлни кўрмасди ҳам; бийдай даладан кетаётганини сезарди холос; бу поёнсиз ялангликда муздек денгиз изғиринларини эслатувчи март шамоли эсиб, тақир ер ва ботқоқликларни шипириб ўтарди. Қоронги тунда бирон туп дарахт ҳам кўринмайди; тош ётқизилган бу йўл гўё портдаги тўлқинтўсар иҳота сингари ҳеч нима кўринмайдиган тун қаърига сингиб кетгандай эди.

Йўловчи Маршьенндан соат иккиларда чиққанди. У катта-катта қадам ташлаб бораркан, эгнида ип газламадан тикилган эски камзул, чийдухоба шим бўлгани учун изғиринда жунжиб қалтирарди. Катак-катак рўмолчасига ўралган тугуңча халақит берар, ҳадеб тугунчани у қўлидан бу қўлига олар, шарқ шамолида совқотиб, қонталаш бўлиб кетган қўлларини чўнтагига тиқиш осон бўлсин учун тугунчани қўлтиғига қисиб олишга ҳаракат қилар эди. Бу беиш, бошпанасиз одам шояд тонг ёриши билан кун исиб кетса, деб умид қиларди. Шу кўйи бир соатдан мўл юрди ва ниҳоят Монсудан икки километр чамаси берида, чап томонда қизил оловни кўриб қолди; гўё осмонда кўмирлари лангиллаб ёнаётган учта манқал осиб қўйилгандек. Аввалига у чўчиб кетди, бир тўхтаб ҳам олди, бир лаҳза бўлса-да, қўлимни иситиб оларман-ку, деган изтиробли истақ ғолиб келди.

Иўл сойликка тушиб борарди. Бирдан оловлар гойиб бўлди қолди. Унг томонда кетганча тахта девор, нарғидан темир йўл изи ўтади, чап томондаги нишабликни ўт-ўланлар босиб кетган; қўйида томларига черепица ёпилган бир хил пастак-пастак уйлардан иборат қишлоқ — посёлка кўзга элас-элас чалинади. Иўловчи яна икки юз одимча юрди. Муюлишга етиши биланоқ рўпарасида яна оловлар кўринди. Дастлаб у зим-зиё тунда оловларнинг худди туман ўраган ойдек бунчалик баландда қандай ёниб туришига тушуна олмади. Шу чоқ унинг нигоҳи бошқа бир манзарага тушди: пастда гуж қилиб қурилган аллақандай биноларнинг қораси кўринди; улар тепасида фабриканинг улкан трубаси қорайиб турарди; хира деразаларнинг айримларида чироқ милтилларди; ташқаридаги ҳавозаларда беш-олти фонарь ёқиглиқ бўлиб, улкан маҳлуқларга ўхшаган қора ходалар қатори элас-элас кўринарди. Тутун ва зулмат қўйнидаги бу бесўнақай бинодан фақат биргина товуш-кўринмас буғ машинасининг қудратли, чўзиқ ҳарсиллашигина эшитилиб турарди.

Иўловчи билдики, бу — кўмир кони. Ногаҳон у уялиб, у ёққа бориб нима қиламан, бари бир иш топилмайди-ку, деган андишани хаёлидан ўтказди. У кон бинолари томон юриш ўрнига уч баҳайбат чўян манқалда тошкўмир ловиллаб, иш жойини иситиб ва ёритиб турган тепаликка тирмашиб чиқди. Ишчилар бу ерда ярим тунгача ишлардилар, чулки шахтадан ҳамон кўмир чиқиндиларини олиб чиқишаётгандилар. Шу пайт йўловчи излардан ғилдиратилаётган вагонеткаларнинг тақир-туқирини эшитиб, ҳаракат қилаётган сояларни аниқ кўра бошлади: одамлар вагонеткаларни ўт ёнига олиб келиб, ағдариб кетишарди.

— Салом! — деб қўйди у оловлардан бирининг ёнига келиб.

Бу ерда пуштиранг фуфайка, қуён терисидан тикилган телпак кийган бир аравакаш чол орқасини оловга тутиб, исиниб турган эди. Катта тўриқ от ҳозиргина ўзи судраб келган олти вагонетканинг бўшашини сабр-тоқат билан кутарди. Ориқ, сап-сарик, паканагина бир одам вагонетка дастагини беихтиёр босиб, аравачаларни бўшатарди. Тепада эса совуқ ша-

мол худди пичан ўраётган чалғининг шириллашига ўхшаб ғувилларди.

— Салом! — жавоб берди чол.

Орага сукунат чўкди. Йўловчи аравакашнинг шубҳали нигоҳини пайқаб, дарров исмини айта қолди:

— Менинг отим Этьен Лантье, механикман... Менга шу ерда иш-пиш топилмасмикан?

Аланга уни ёритиб турарди; йигирма бир ёшларда бўлса керак. Қора соч, чиройли, пақанароқ бўлса ҳам жуда бақувват кўринарди.

Аравакаш унинг гапидан кўнгли жойига тушиб, йўқ дегандек бошини қимирлатиб қўйди.

— Механикка ишми? Йўқ, қайда. Кечаям иккитаси иш ахтариб келувди. Иш йўқ.

Шамол ғувиллаб уларнинг гапини бўлди. Кейин Этьен тепа этагида қорайиб кўринаётган биноларга ишора қилиб:

— Анови шахта шекилли, шунақами? — деб сўради.

Чол дарров жавоб беролмади: қаттиқ йўтал тутиб қолди. Ниҳоят оғир бир йўталиб, тупурди; бир парча балғам тушган жой аланганинг қизғиш шуъласида қора доғ бўлиб кўринди.

— Ҳа, Ворё шахтаси шу... Ҳув анави посёлка. Қаранг-а! — деди чол тун қўйнида ётган қишлоққа ишора қилиб; йўловчи бу черепицали томларни боя кўрган эди.

Энди вагонеткаларнинг олтови ҳам бўшатиб бўлинганди; чол чурқ этмай бод касалига чалинган оёқларини зўрға-зўрға босиб, аравачалар орқасидан жимгина кета бошлади. Катта тўриқ от темир йўл излари ўртасидан вазмин қадам ташлаб, вагонеткаларни ўз ҳолича судраб бораркан, шамол бир ғувиллаб, унинг тукларини ҳурпайтириб юборди.

Энди Ворё шахтаси гўё зулмат қўйнидан чиққандек аниқ кўрина бошлади. Эсиз, боя олов яқинига борганда совуқдан ёрилиб, қонталаш бўлиб кетган қўлларини иситиб ҳам олмапти. У шахтадан кўзини узмай, ундаги ҳар бир нарсани аниқ кўра бошлади: ана, томи қора мой билан сувалган саралаш саройи, шахтага тушаверишдаги минора, кўтарма машина учун қурилган катта бино ва ниҳоят сув насослари

жойлашган тўртбурчакли минора. Сойликдаги тутун чиқадиган трубалари сўррайиб, баҳайбат шохга ўхшаб турган, гиштин иморатлари пастак бу шахта Эъён кўзига дунёни ютишга шайланиб, писиб ётган еб тўймас махлуққа ўхшаб кўринди. У ҳар бир нарсани синчковлик билан кузатар экан, ўзини, мана бир ҳафтадан бери иш ахтариб юрганини, дайдилардек кун кечираётганини ўйлади; темир йўл устахонасида ишлаётганида бошлиқнинг юзига шапалоқ тортиб юрганини, Лилдан ҳайдалиб, кейин ҳамма ёқдан қувилганини эслаб кетди. Шанба куни у Маршьеннга келди; металлургия заводларида иш бор дейишганди; лекин на у ердаги заводлардан, на Сонневиллдан бирор иш тополди; аравасозлик устахонаси омборларида тахлаб қўйилган хода, тахталар орасида биқиниб, якшанбани ўтказишга тўғри келди: лекин кечаси соат иккиларга борганда қоровул кўриб қолиб, ҳайдаб юборди. "Энди унинг ҳеч вақоси йўқ: на бир су пули, на бир тишлам нони бор; катта кўчаларда санқиб юришдан не фойда; совуқ шамоллардан қочиб қаерга бекинишини билмаса? Шундай қилиб у тошкўмир конига келиб қолди; яккам-дуккам ўрнатилган фонарлар ёруғи тушиб турган тоғ-тоғ кўмир уюмларини кўрди; эшик очилганда эса буғ қозонлари тагида ловиллаб ёнаётган оловга кўзи тушди. Эъён насосларнинг даҳшатли махлуқнинг бўғиқ хириллашига ўхшаган бетиним, узлуксиз вишиллашини эшитди.

Вагонеткаларни ағдарган ишчи букчайиб турар ва ерга тушган тугунини олиш учун энгашган Эъёнга бирор марта ҳам қарамас эди. Шу чоқ қаттиқ йўтал эшитилиб, аравакаш келаётганидан дарак берди. У қоронғилик қўйнидан чиқиб, аста-секин кўрина бошлади, кетидан янгидан тўлатилган олти вагонеткани судраб келаётган тўриқ от кўринди.

— Монсуда фабрикалар борми? — сўради Эъён.

Чол йўталиб, қоп-қора нарса тупурди-да, шамолнинг ҳуштагига жўр бўлиб деди:

— Э, фабрикалар бу ерда кўпликка кўп-а. Буларни уч-тўрт йил бурун кўрганингда эди! Ҳамма трубалардан тутун чиқиб турарди, ишчилар етишмасди, одамлар ҳам роса пул ишлашарди-да, ўша пайтларда... Энди иш яна кетга кетяпти. Билмадик, бу балолар қай-

дан келди: ишчиларни чўмичда қоқишяпти, бирин-кетин устахоналар ёпиляпти... Императорнинг-ку, айби йўқдир-а, лекин у нима учун Америка билан уруш қилади? Мол-ҳолга ҳам, одамларга ҳам вабо тегиб, қирилаётганини айтмаса ҳам бўлади.

Иқковлари у ёқ-бу ёқдан ҳасратлашишга тушиб кетишди. Этьен бир ҳафтадан бери хору сарсон бўлиб юрганини гапирар, наҳотки оч-наҳор ўлиб кетсам, деб зорланарди. Бунақада ҳали замон ҳамма йўлларни гадой босиб кетади-ку. Ҳа, охири бахайр бўлмайди, дерди чол, шунчадан-шунча бандаларини кўчага ҳайдаб қўйиш худога хуш келмас.

— Энди гўштни ҳам ахён-ахёнда кўрасан.

— Лоақал нонга тўйсанг ҳам шукр қиласан!

— Рост, ишқилиб нондан қисмасин!

Ўқтин-ўқтин эсан шамолнинг ҳазин ноласи суҳбатга халақит бериб, уларнинг овозини босиб кетарди.

— Бу ёққа қаранг!— қичқирди аравакаш жануб томонга юзланиб.— Монсу ҳув ўша томонда...

У қўлини чўзиб кўрсатаркан, қоронғида кўринмаётган жойларнинг номларини айта бошлади. У ёқда, Монсуда Фовеллнинг қанд заводи ҳозирча гумбурлаб ишлаб турибди, лекин Готон қанд заводи бўлса, ишчилар сонини қисқартиришга ҳам улгурди. Дютийелдаги вальцовкали тегирмон қолди холос, ҳа, яна конлар учун арқон етказиб берадиган Блэздаги арқон фабрикаси ҳам бор. Фақат шулар ишлаб турибди ҳозир. Кейин у шимол томон юзланди-да, уфқнинг роса ярмини англатадиган ишора билан тушунтира кетди: Сонневиллдаги устахоналарга одатдаги буюртмаларнинг учдан бири ҳам тушаётгани йўқ; Маршъенндаги металлургия заводининг учта печидан биттаси ишламайди, ниҳоят Гажбуадаги шиша заводи иш ташлаш олдида турибди, чунки унда иш ҳақи камаярмиш, деган мишмишлар юрибди.

— Биладан, биладан,— дерди йигит ҳар бир гапга жавобан,— ўзим ҳозиргина ўша ёқдан келяпман.

— Биз бир амал-тақал қилиб ишлаб турибмиз,— қўшиб қўйди аравакаш.— Аммо кўмирни илгаригидан кам чиқаряпмиз. Рўпарангиздаги Ғалаба заводига бир қаранг-а, унда иккита кокс печи ишляпти холос.

У тупуриб, мудраётган отини бўш вагонеткаларга қўшди-да, яна судралиб, от орқасидан кетди.

Энди Этьен бутун бир вилоят ҳақида тўлиқ тасаввурга эга бўлди. Ҳаммаёқ аввалгидек зим-зиё, лекин кекса ишчининг қўли имо-ишоралар билан бу қоронғиликни бахтсизликнинг улкан тимсолларига тўлдириб ташлаганди, йигит шу лаҳзада қаерга борса, ҳамма ерда ҳам шу нажотсизликни аниқ ҳис қилгандек бўлди. Гўё бу бийдай далада март шамоли билан бирга очлик ноласи ҳам эсаётган эди. Гоҳ қутурган шамол шиддати меҳнатга қирон келтирса, гоҳ очлик кўплаб одамларни гўрга тиқар, гоҳ бесаранжом нигоҳини ўйнатиб, қоронғилик қаърига киришга ҳаракат қилар эди. Юраги орқасига тортиб кетган Этьен ҳаммаёқни ўз кўзим билан кўрармиканман, деб илҳақ эди. Лекин чор атроф зим-зиё тун пардасига ўралган, фақат узоқ-узоқлардаги домна ва кокс печларининг қорасини зўр-базўр ажратиш мумкин эди.

Диоганал бўйича қурилган иншоотлар узра юксалган сон-саноксиз трубалар қип-қизил тилларини ўйнатиб, ловиллаб ёнарди; чап томондаги иккита минора кўк олов пуркаб, гўё баҳайбат машъалдек очиқ ҳавода ёниб турарди. Булар даҳшатли шафаққа ўшарди; тошкўмир ва темир ўлкасининг зиёсиз осмони гумбазида милт этган юдуз кўринмасди — фақат тунги ўт-оловларгина ловиллаб турарди.

— Сиз тасодифан Бельгиядан эмасмисиз? — Этьен орқа томондан эндигина қайтиб келган аравакашнинг овозини эшитди.

Бу сафар у учта вагонетка билан келди. Юкни туширишга шошмаса ҳам бўлади: кўтарма машина кажавасидаги қандайдир гайка синиб, иш роса чорак соат тўхтаган эди. Паст жимжит бўлиб қолди, одатда вагонеткалар бўшатилаётганда тўсинларгача зирилларди, ҳозир эса бу гурс-гурслар йўқ. Шахта қаъридан тунукага урилаётган болғанинг товуши келади холос.

— Йўқ, мен жанубданман, — жавоб берди йигит.

Ишчи вагонеткаларни бўшатиб бўлгач, танаффуздан хурсанд бўлди шекилли: ерга ўтирди. Этьен қовоғини солиб, миқ этмай ўтирар ва бу мунча сергап-а, деб ажаблангандек катта-катта нурсиз кўзларини аравакашга ташлаб қўяр эди. Аслида аравакаш жуда камгап эди. Лекин бу сафар нотаниш йигитнинг турқи таровати унга ёқиб тушганидан тили қичиб, худди ўзи

билан ўзи гаплашадиган чоллардек, гапга тушиб кетди.

— Мен эса, Монсуданман, — гапида давом этди у, — мени Улмасвой дейишади.

— Бу лақабингизми? — сўради Этьен хайрон бўлиб.

Чол мамнун илжайди.

— Ҳа, ҳа... — деди у Ворё томонни кўрсатиб. — Мени у ёқда уч марта ўлим чангалидан чалажон ҳолда қутқариб қолишган, бир сафар аъзойи баданим куйиб, терим шилиниб тушган; иккинчи дафъа ҳиқилдоғимгача тупроққа кўмилиб қолганман, учинчи сафар сувга чўкиб, қорним қурбақанинг бақбақасидек шишиб кетибди... Ана ўшандан кейин унча-мунчага ўладиган анойи эмаслигимни кўришиб, ҳазиллашиб, мени Улмасвой дейишади.

У яна ҳам қувнаб кетди, лекин кулгиси мойланмаган арава ғилдирагининг ғижирлашига ўхшади-ю, охири йўтали қаттиқ тутиб қолди. Манқалдаги олов унинг сочи сийраклашиб қолган каттакон калласини, кўкимтир доғлар босиб кетган рангсиз япалоқ юзини ёритиб турарди. Ғўлабир, гардани гавс, болдиру товоилари ғудда-ғудда бўлиб ётибди; калта-калта йўғон бармоқли узун қўллари тиззасига тушиб туради. У шамолни писанд қилмай, бир жойда қимир этмай турган оти каби тошдек қотган кўринади; гўё изгиринга ҳам, гирдоб хуружларига ҳам парво қилмасди. Йўтал томоғини қириб, кўкрагини тилка-пора қиларди. Йўтали босилгач, манқал олдига тупурди, балгам тушган ерда яна бир парча қора доғ кўринди.

Этьен аввал чолга, кейин ердаги доғга қаради.

— Қонда анчадан бери ишлайсизми? — сўради у. Улмасвой қўлларини кенг ёзди.

— Анча ҳам гапми?! Алмисоқдан бери деяверай. Мен биринчи марта шахтага тушганимда саккиз ёшга ҳам тўлмаган эдим, худди мана шу Ворё шахтасига тушгандим. Мана эллик саккизни ҳам уриб қўйибман. Ўзингиз ҳисоблаб кўринг-а... Аввалига кончининг ёрдамчиси бўлиб ишладим, кейин куч-қувватга тўлиб, вагонетка торта оладиган бўлганимда мени кўмир ташувчи қилиб олишди, сўнг ўн саккиз йил кончи бўлиб ишладим, кейин манави лаънати оёқларим туфайли у ердан бўшатишди, то кон босиб, тупроқ ос-

тида қолгунимча темир йўл кўтармаси қуриб, галереяларни маҳкамлаб юрдим; доктор уларга, энди ер остига туширманглар буни, тагин кой ичида қолиб кетмасин, дебди. Мана мени аравакаш қилиб қўйишганига ҳам беш йил бўлди... Хўш, бунга нима дейсиз? Чакки эмас, а? Шахтада эллик йил, шундан қирқ беш йили ер остида ўтибди-я!

Чол гапирар экан, вақти-вақти билан манқалдан парчаланиб тушаётган лаққа тошкўмир чўғларининг яллиғи унинг рангпар юзини қизғиш тусда кўрсатар эди.

— Уларга қолса-ю, мен дам ола қолсам-а,— давом этди чол,— лекин мен истамайман-да, мен улар ўйлаган анойи эмасман!.. Яна бир амаллаб икки йил, олтамишга тўлгунимча ишлайман, сўнг бир юз саксон франкдан нафақа олиб ётаман. Агар мен улар билан ҳозир хайрлашсам, менга бир юз эллик франк пенсия беришади. Жуда айёр-да улар! Бунинг устига ҳали жуда бақувватман, фақат оёқларимни демаса, Оёгимнинг бу дардга чалинишига сабаб терим остида жуда кўп сув йиғилгани: у ёқда, ер тагида устингдан доимо сув қуйилиб туради. Баъзи кунлари панжаларимни қимирлата олмай қоламан, оғригига чидолмай дод девораман.

Яна йўтали тутиб, гапи бўғзида қолди.

— Йўталингиз шундан экан-да? — сўради Этьен.

Чол йўқ ишорасини қилиб, бошини чайқади. Йўтали босилиб, ўзига келгач, деди:

— Йўқ-йўқ, ўтган ойда шамоллаб қолдим. Илгари йўтал нималигини билмасдим, энди бўлса, бу лаънатидан қутула олмаяпман. Айтишга осон, тинмай йўталганим-йўталган.

Бўғзига балғам тўлиб, яна қора нарса туфлади.

— Қон туфляяпсизми? — сўрашга журъат этди Этьен.

Чол бамайлихотир қўлининг орқа томони билан оғзини артди.

— Еу кўмир... Бу зормандадан ичимда шунча кўпки, ўла-ўлагунимча мени иситиб туришга етади. Ер остига тушираганимга мана беш йил бўлиб қолди, лекин кўратим кўмир омбори бўлиб кетганидан беҳабар эканман. Майли, шундан куч оламан-да.

Орага сукунат чўкди. Кон қаъридан бир маромда урилаётган болганинг товуши кулоққа чалиниб қолади; шамол гўё тун қаъридан келаётган очлик ва ҳорғинлик нидоси каби текислик узра гувиллаб эсарди. Ловиллаётган аланга ёритаётган чол овозини пастлатиб давом этди; ҳа, эсига тушди. Ҳа-а! Ўзи ҳам, хонадони ҳам Монсу ширкатига қарашли тошкўмир конларида кечадан бери ишлаётгани йўқ, балки кон очилган кундан бери ишлашади; бунга жуда кўп йиллар бўлиб кетган,— ўшанга юз йилдан ошибди. Унинг бобоси, Гийом Маэ, ўша йиллари ўн беш ёшли ўспирин бўлиб, Рекийярдаги тошкўмир конини топган эди. Фовелл қанд заводи ёнидаги Ширкатнинг ўша биринчи шахтаси ҳозир ишдан чиққан. Буни ҳамма билади; шахтани бобоси очгани боисидан унинг шарафига «Гийом шахтаси» деб аташган. Ўзи бобосини кўрмаган, лекин унга айтиб беришган: Гийом баланд бўйли, жуда кучли сдам бўлган экан, олтмиш ёшида оламдан ўтган экан. Кейин отаси — Малла лақабли Никола Маэ ишлаган; отаси Ворёда туриб қолиб, бор-йўғи қирқ ёшида ҳалок бўлган экан. У замонларда Ворёда ер қазиларди: ўпирилиш рўй бериб, замин бирдан чўкиб кетган; ер унинг қонини ичган, суякларини эса, тошлар мажақ-мажақ қилиб ташлаган. Сўнгра унинг икки тоғаси билан уч укаси ҳам шу ерда вафот этган, аммо булар анча кейинроқ ўтишган. Ўзи, Венсан Маэ, ҳаммасидан омадли чиқди,— оёқлари ҳисоб эмас; уни уддэбурон дейишлари ҳам шундан. На чора? Ишлаш керак-да, ахир. Уларнинг оиласида бу удум ҳам бошқа касблар синғари отадан ўгилга ўтиб келаверади. Ҳозир пастда унинг ўғли, Туссен Маэ, набиралари, оиласининг ҳамма аъзолари ишлашади, улар рўпарадаги қишлоқда туришади. Бир авлод кетидан иккинчиси, болалар оталари кетидан,— шу йўсин бир юз олти йилдан бери ўша битта хўжайин учун ишлаб келишди. Хўш, қалай, а? Ўз хонадони шажарасини шунчалик биладиган буржуйлар кўп дейсанми?

— Ушанда ҳам тирикчилигинг ўтиб турса яхши-я,— деди Этъен.

— Мен ҳам шуни айтаман-да: нонга қорнинг тўйиб турибдими, демак, яшаш мумкин.

Ўлмасвой уларнинг чироқлари ёна бошлаган қишлоқ томон ўгирилиб, жим бўлиб қолди. Монсу қўнғи-

роқхонасида тўрт марта занг урилди; совуқ яна кучайди.

— Ширкатларингиз бойми? — сўради Этьен.

Чол елкасини учириб қўйди-да, кейин худди тилла тангалар тагида қолгандек букчайиб деди:

— Э, бўлмаса-чи!.. У қўшимиз Анзендаги Ширкатчалик бой бўлмаса ҳам, бунинг миллионлари ҳам ҳар қалай кам эмас. Санаб етолмайсан... Ун тўққиз шахта, шундан ўн учтаси ишлаб турибди: Ворё, Ғалаба, Кручина, Миру, Сен-Тома, Мадлена, Фетри-Кантель ва бошқалар, кейин Рекийярга ўхшаб, ишлатиб бўлинган ёки вентиляция учун очиб қўйилган яна олти кон... Ун минг ишчи, олтмиш етти коммунадаги концессиялар, худонинг берган куни беш минг тоннадан қазиб чиқариб турибди, ҳамма шахталар орасида темир йўллар, устахона-ю, фабрикаларни айтмайсанми!.. Эҳ-ҳе! Уларнинг пули кўп!

Арава изидан келаётган вагонеткаларнинг тарақтуруғини эшитган тўриқ от сергакланиб қулоғини динг қилди. Кўтарма машинанинг кажаваси туватилди, қабул қилувчилар яна ишга киришиб кетишди. Отни қайтадан қўшиб, яна йўлга ҳозирланаётган аравакаш эркалаган оҳангда деди:

— Сафсаталарга қулоқ солиш яхши эмас, ярамас дангаса! Вақтингни бунақа бекор ўтказаетганингни жаноб Энбо билиб қолса, нима бўлади?

Этьен қоронғиликка хомуш тикилиб турарди.

— Бундан чикди, бу шахта жаноб Энбога қарар экан-да? — сўради у.

— Бе, қайда, жаноб Энбо — бош директор холос, — тушунтирди чол. — У ҳам бизга ўхшаб ойликка ишлайди.

Йигит узоқларга ишора қилиб сўради:

— Буларнинг ҳаммаси кимга қарайди бўлмаса?

Лекин Улмасвой бир муддат жавоб беролмади: яна йўтали тутиб, шундай бўғдики, нафас ололмай қолди. Ниҳоят балғам тупуриб, лабларидаги қора кўпикни арти. Шамол кучайди.

— Ҳм!.. Буларнинг ҳаммаси кимга қарайди дейсизми? Ҳеч ким билмайди. Одамларга-да.

У шундай деди-ю, қўлини чўзиб, ҳамма Маэлэр юз йилдан ортиқ ишлаб келган конлар жойлашган зимистон қўйнидаги узоқ ерларга ишора қилди. Унинг

овозида тақводорларга хос қироат бордек, гўё у ичида хўппасемиз, еб тўймас худо макон қурган қўл етмас ибодатхона ҳақида гапираётгандек бўларди, уларнинг барчаси шу худога жисму жонини қурбонликка олиб келади-ю, лекин бирон марта ўзини кўрмайди.

— Жиллақурса нон бемалол бўлса,— деди Этьен учинчи марта, гарчи гапи ножоизлигини билса ҳам.

— Ҳа, бўлмаса-чи! Қани энди ҳамиша нонга сероб бўлсак, дуруст бўларди-я!

От жилди; кетидан аравакаш ҳам дардчил оёқларини оғир босиб жўнади. Жойида қолган ишчи қимир этмас, иягини тиззалари орасига тикиб, катта нурсиз кўзларини бўшлиққа тикканча ўтирарди.

Этьен тугунини ердан кўтариб олган бўлса ҳам кетишга шошилмасди. Шамол белини музлатиб юборган, кўкрагини эса ўт қиздирган эди. Балки ҳар эҳтимолга қарши бу конларда иш бормикан, деб сўрасамикин? Буни чол билмаслиги ҳам мумкин; ҳар қалай, нима иш бўлса ҳам қилаверишдан бошқа иложи йўқ. Ишсизликдан очлик балосига йўлиққан бу мамлакатда у қасққа боради-ю, нима юмуш қилади? Дайди итдек девор тагида ўлиб кетса-я? У иккиланиб қолди, бийдай дашт ўртасида тун зулматига бурканиб ётган бу Ворё шахтаси юрагига ваҳима соларди. Шамолнинг шиддати тобора зўрайди; у гўё поёнсиз ялағликдан эсаётгандек эди. Қоп-қоронғи кўк саҳнида милт этган зиё кўринмайди; бу зимистонда домна ва кокс печларигина ҳеч нимани ёритмай, чўғдай қизариб ёниб турарди холос. Фақат Ворё аввалгидек, худди инида тин олаётган ваҳший ҳайвондек пастликда ер бағирлаб ётибди ва инсон наслини ҳазм қилмоқчидек зўр бериб ҳарсиллаб, пишқирипти.

II

Бугдойзор ва лавлаги экилган далалар ўртасидаги икки юз Зағизгон қишлоғи қора тун оғушида уйқуда эди. Тўрт улкан маҳалланинг тўғри бурчакли шакллари билан казарма ёки касалхона биноларини эслатадиган уйлар тўдасини аранг ажратиб олиш мумкин эди. Улар параллель равишда қатор-қатор қурилган бўлиб, ораларидан ўтган учта кенг йўл қишлоқни бир

хилдаги боғ-роғли участкаларга ажратиб турарди. Бийдек далада шамолнинг ҳуштаги-ю, деворга урилаётган синиқ панжаранинг овози ҳукмрон эди.

Иккинчи маҳалланинг ўн олтинчи уйида турадиган Маэлар хонадони жимжит эди. Юқори қаватдаги ягона хона қоп-қоронғи бўлиб, бу зулмат ўз оғирлиги билан ухлаб ётганларни гўё эзаётгандай эди; ҳаммалари ҳориб-чарчаб келишганидан оғизларини очиб, бирга ухлаб қолишганди. Ташқари изгирин бўлишига қарамасдан хона дим ва иссиқ эди,— бундай хоналар нечоғлик озода тutilмасин, кўп одам ётанлиги учун ҳайвонлар ҳароратию инсон ҳидига тўлиб кетганидан ҳавоси оғир бўлади.

Паст қаватдаги хонанинг каккули соати тўртга занг урди, лекин ҳеч ким қимир этмади; фақат хушоҳанг хуррак жўр бўлаётган ҳуштаксимон оғир нафас саслари эшитилиб турарди. Катрина тўсатдан уйғониб кетди ва одатича, пастдаги соат зангини эшитиб, тўртгача санади; аммо у шунчалик қаттиқ чарчаганидан уйқусини бутунлай қочира олмади. Кейин оёғидан кўрпани олиб ташлади, тимирскиланиб гугуртни топди-да, шамни ёқди, лекин туришга ошиқмади; боши шу қадар оғирлашиб кетаётгандики, у мудроғини енга олмай яна ётиб олди.

Ёқилган шам учта каравот қўйилган икки деразали квадрат хонани ёритиб юборган эди. Уйда яна шкаф, стол, ёнғоқдан ясалган иккита стул ҳам бор эди, бу стуллар сап-сарик девор ёнида қоп-қора доғлари билан ажралиб турарди. Девордаги михга қўйлақ осиглиқ эди, ерда кўза, юз-қўл ювиш вазифасини ўтаётган қизил тоғорача турарди — бошқа ҳеч нима йўқ. Чап томондаги каравотда катта ўғли, йигирма бир ёшли йигит Захария ухлаётипти; ўн бир яшар укаси Жанлен у билан бирга ётибди; иккита кичиги — Ленора билан Анри бир-бирини қучоқлаб ухларарди, — бирининг ёши олтида, иккинчисиники тўртда; учинчи каравотда Катрина синглиси Альзира билан ётади: агар бу кичкина майибнинг букриси унинг биқинига ботиб турмаганида, балки тўққиз ёшли нимжон қизалоқнинг бор-йўқлигини сезмасди ҳам. Ойнабанд эшик очик эди. Зинапоя билан тўрттинчи каравот қўйилган торгина йўлак кўриниб турибди; унда ота билан

она ухлашарди, эндигина уч ойлик бўлган қизалоқлари Эстелланинг беланчаги ҳам шу ерга қўйилганди.

Катрина зўр бериб уйқусини ўчиришга уринарди. Керишиб икки қўллаб пешонаси, энсасига тушиб турган сариқ сочларини тузатди. Ўн бешга кирган бўлса ҳам жуссаси ниҳоятда кичик кўринарди, торгина кўйлак этагидан худди кўмир билан чизилгандек моматалоқ бўлиб кетган оёқлари, қора совун билан доимо ювинаверганидан сўлинқирав синиқиб қолган юзидан ўзининг сутдек оппоқлиги билан ажралиб турган нозик қўллари кўзга ташланарди. Катрина охириги марта хомуза тортди — оғзи бир оз каттароқ, тишлари чиройли, милклари рангсиз ва қонсиз, уйқуга тўймаган, изтиробли, қайғули кулранг кўзларида ёш пайдо бўлди; унинг яланғоч вужуди бутунлай ҳорғин кўринарди. Зинадан аллакимнинг тўнғиллагани эшитилди; Маэ жаҳл билан гўлдиради:

— Жин урсин! Вақт бўпти-ку... Чироқни сен ёқдингми, Катрина?

— Ҳа, дада... Пастда ҳозиргина занг урди.

— Сал чаққонроқ бўлсанг нима қиларкан, ишёқмас! Кеча камроқ ўйин тушганинда, бизларни вақт-лироқ уйғотармидинг... Дангаса!

У койишда давом этди; лекин уни яна уйқу босди-ю, сўкишни тўхтатди, яна хуррак овози эшитилди.

Қиз яланг оёқлари билан полни босиб, кўйлакчан хонада у ёқдан-бу ёққа юра бошлади. Анри билан Ленора каравоти олдидан ўтар экан, сирғалиб тушиб кетган кўрпаларини олиб, ёпиб қўйди; улар болаларча маъсумлик билан қимир этмай, мириқиб ухлашарди. Альзира кўзлари очиқ бўлса ҳам чурқ этмай, опасининг иссиқ ўрнига ўтиб ётди.

— Ҳой, Захария! Сен ҳам, эй, Жанлен! Турларинг!

— такрорларди Катрина ака-укаларининг каравоти тепасида; улар ёстикқа бошларини бурқаб, мук тушиб ётишарди.

У акасини елкасидан ушлаб силкита бошлади, — у сўкди; шунда Катрина улар устидан кўрпани тортиб ташлади. Бу ҳол уни қувонтириб юборди, айниқса, болаларнинг яланғоч оёқларини тигилган кўрпани кўриб, кулиб юборди.

— Аҳмоқлик қилма, мени ўз ҳошимга кўйсанг-чи.

тўнғиллаб деди Захария, туриб ўринда ўтирар экан; унинг кайфияти бузуқ эди.— Бунақа қитмирликни ёмон кўраман... Вой худойим-ей, ҳечам тургим кел-маяпти-да!

Ориқ, беўхшов, юзи чўзинчоқ, соқоли сийрак, оқиш сочли бу йигит ҳамма оила аъзолари каби камқонли кўринади. У қорнига чиқиб кетган кўйлагини уялганидан эмас, совуқ еганидан тушириб олди.

— Пастда тўртга занг урди,— қайтарди Катрина.— Тезроқ бўла қолинглар, қани! Дадамнинг жаҳли чиқяпти.

Жанлен гужанак бўлиб олиб:

— Йўқол, мен ухлаяпман!— деди-ю, тагин кўзларини юмди.

Қиз яна шарақлаб кулиб юборди. Жанлен ушоққина бўлиб, ингичка қўл ва оёқларининг бўғинлари сариқ касалидан шишиб кетган эди. Катрина уни осонгина кўтариб олди; бола типирчилаб, тепкилай бошлади, унинг кўзлари кўк, қулоқлари катта бўлиб, жингалак сочлари ўраб турган маймунникига ўхшаш нурсиз юзи жаҳли чиққанидан оқариб кетди; шу қадар ориқлигидан ўзининг ҳам жони чиқарди. У индамасдан опасининг ўнг кўксини тишлади.

— Ҳаҳ, чаён!— деди Катрина бақиршдан аранг ўзини тийиб, кейин уни ерга туширди.

Альзира ҳам уйғонган бўлса-да, кўрпани иягигача тортиб, индамай ётар, энди ухламас эди. У мажруҳларга хос зийрак кўзлари билан кийинаётган опаси ва ака-укаларини кузатарди. Ювинадиган тоғора тепасида яна жанжал кўтарилди; ака-укалар Катринани итариб, ҳайдаб юборишди, чунки у узоқ ювинди. Улар ҳали уйқусираётган, кўйлакчан, худди бирга ўсган кучукларга ўхшаб, уялмай-нетмай, бемалол ҳожатларини қилардилар. Катрина ҳаммадан олдин кийиниб бўлди. У кўмир қазувчилар шимини, бўз блузка, бошига эса мовий чепчик кийди: ишчилар кийимида у худди ўғил болага — ўспиринга ўхшар, фақат сонларининг хиёл лорсиллашидан қизлиги сезилиб турарди.

— Чол қайтиб келганда ўрин музлаб қолган бўлади,— жаҳл билан пўнғиллади Захария.— Жуда хурсанд бўлади-да... Сен совитиб кетганингни айтаман.

«Чол» бу Улмас бобо эди. У кечалари ишлаб, кундузи ухлар, шу сабабдан тўшак асло совимасди: ўринда доимо кимдир хуррак отиб ётарди.

Катрина жавоб бермай кўрпани кўтариб, ўринни йиғиб қўйди. Деворнинг у ёғидан, қўшниникидан шовқин эшитилди. Ширкат ниҳоятда тежамкорлик билан қурган бу гиштин уйларнинг деворлари шу қадар юпқа эдики, нариги ёғидаги секингина овоз ҳам бемалол эшитиларди. Қишлоқдаги одамлар зич туришарди; уйдаги бирор ишни ҳатто болалардан ҳам пинҳон тутиш мумкин эмасди. Зинадан оғир қадам товушлари, кейин ниманингдир юмшоққина тушгани, сўнг ҳузур қилиб хўрсиниш саси эшитилди.

— Чакки эмас-а!— деди Катрина.— Левак чиқиб кетди, хотинининг олдига эса Бутлу келди.

Жанлен қиқирлаб кулди, ҳатто Альзиранинг ҳам кўзлари ўйнаб кетди. Улар ҳар куни эрталаб бу уч кишилик эр-хотинни мазах қилиб кулишарди: Кончининг уйда ремонтчи ишчи ижарага турарди, шу боисдан хотиннинг эри иккита бўлиб, бири тунги, иккинчиси кундузги эди.

— Филомена йўталаяпти,— деди Катрина.

У Левакнинг катта қизи тўғрисида гапирди. Ун тўққиз яшар бу қиз Захариянинг ўйнаши бўлиб, ундан иккита боласи ҳам бор эди; у ўпкаси заиф бўлгани учун ер остида ишлай олмай сараловчи бўлиб ишларди.

— Бўлмаган гап,— эътироз билдирди Захария.— Филомена дунёни сув олса, тўпиғига чиқмайди, ухлагани-ухлаган!.. Киши молга ўхшаб соат олтигача ухларканми!

Захария шимини кийди, кейин бир нарсани ўйлагандек, деразани очди. Қишлоқ уйғониб, деразаларда чироқ милтирай бошлаганди. Ака-сингил яна баҳслашди; Захария бошини чиқариб, рўбарўдаги Пьерронлар уйдан катта назоратчи чиқиб қолмасмикан, деб пойлаб турди. Мишмишларга қараганда у Пьерроннинг хотини билан дон олишиб юраркан; Катрина бўлса, Пьеррон кеча юк ортиш бўйича кундузги навбатчиликни бошлади, шунинг учун Дансарт бугун уларникида тунаши мутлақо мумкин эмас, деб ишонтиришга уринарди. Хонага совуқ ҳаво кирди, лекин

ака-сингил баҳсга берилиб кетганидан совуқни сезишмади: ҳар бири ўз тахминининг тўғрилигини исботлашга уринарди. Аммо бирдан чинқирик ва йиги эшитилди: бу беланчақда совқотган Эстелланинг овози эди.

Маэ шу заҳоти уйғонди. Нега у шунчалик дармонсиз экан, а? Мана у яна учига чиққан бекорчихўжага ўхшаб ухлаб қолди! Кейин у жаҳл билан шундай сўкиндик, болаларнинг нафаси ичига тушиб кетди. Захария билан Жанлен жуда чарчаган одамлардек секин ювиниб бўлишди. Альзира ҳамон кўзларини катта очиб ётарди. Икки кичиги — Ленора билан Анри бир-бирларини қучоқлаб аввалгидек қимир этмай, шовқин-суронга қарамай, осуда нафас олиб ётишарди.

— Катрина, шамни олиб кел! — қичқирди Маэ.

Қиз блузкасини тугмалаб, йўлакка шамни олиб чиқди.

Ака-укалар эшикдан тушиб турган хира ёруғда ҳамон кўйлаklarини қидиришарди. Ота сапчиб ўрнидан туриб кетди. Катрина тўхтамасдан пайпасланиб, дағал жундан тўқилган пайпоқда зинадан пастга тушди, пастги хонада бошқа шамни ёқиб, кофе қайнатишга тутинди. Ҳамма оёқ кийимлар буфетнинг тагида эди.

— Учир овозингни, ярамас! — деди Маэ ҳали ҳам овулмаган Эстелланинг дод-фарёдидан жони чиқиб.

У ҳам Улкас бобо каби ўрга бўйли бўлиб, унга ўхшаб, йўғон, боши катта, оппоқ юзи япалоқ, оқарган сочлари калта қирқтирилган эди. Отаси тепасига келиб, катта, чандир қўлларини силкита бошлагач, бола кўрқиб, баттар бақириб додлади.

— Тинч қўй уни, биласан-ку, бари бир тийилмайди, — деди Маэнинг хотини ўрнида керишиб.

У ҳам ҳозиргина уйғонган бўлиб, мириқиб ухлагани сира қўйишмайди-я, дея зорланиб қўйди. Наҳотки ими-жимиди кетиша олмаса-я! У кўрпага шундай ўралиб ётардики, қўполроқ бўлса ҳам гўзаллик излари сақланиб қолган чўзинчоқ юзигина кўриниб турарди: у эндигина ўттиз тўққизга чиққанига қарамай, донмий муҳтожлик ва етти бола туфайли сўлиб қолган эди. У шифтга қараганича секин гапирарди; эри эса кийнарди. Йиглаб жигар-бағри хун бўлаётган болага на ота, на она парво қиларди.

— Биласанми, бир тийин пулсиз ўтирибман, бугун душанба, ойликка ҳали олти кун бор... Бу ёрига нима қиламиз? Ҳаммаларинг бир бўлишиб, тўққиз франк олиб келасизлар. Қанақа қилиб еткизама? Ун жон бўлсак, ахир.

— Ҳо! Энди тўққиз франкка тушдими!— хитоб қилди Маэ.— Мен билан Захария уч франкдан оламиз: мана сенга олти франк ...Катрина билан дадам икки франкдан: мана сенга тўрт франк: тўрту олти — ўн... яна Жанлен бир франк олади: мана сенга ўн бир.

— Ун бирликка ўн бир-а, байрамлар билан прогуллари ҳисобга олмайсанми, айтяпман-ку, ҳечам тўққиздан ошган эмас!

Маэ ердан чарм белбоғини излаш билан овора бўлиб жавоб бермади. Кейин энгашиб, гўлдираб қўйди.

— Нолишининг ҳожати йўқ, мен ҳали соғ-саломатман. Қирқ икки ёшдагиларнинг қанчадан-қанчаси ремонт ишларига ўтиб кетади.

— Эҳтимол, балки шунақадир, чол, лекин ундан нонимиз кўпаяётгани йўқ-ку. Нима қилай энди, ўзинг айт инсоф билан? Сенда ҳеч вақо йўқми?

— Икки су бэр.

-- Майли, ўзингда турсин, бир кружка пиво олиб ичарсан... Вой худойим-ей! Мен нима қиламан энди? Яна олти кун-а — қачон етамизу маошга?! Баққол Меградан ҳам олтмиш франк қарзмиз. Ўтган кун мени ҳайдаб солди, на чора, бугун яна бораман олди-га. Борди-ю, яна қайсарлик қилиб, қарзга бермаса...

Хотини бошини бурмай, хира шам нуридан баъзан кўзларини юмиб-очиб, ҳазин товуш билан гапида давом этди. У уйда ҳеч нарса йўқлигини ва болалар нон сўраб безор қилаётганини, кофе йўқлигини, қуруқ сув оч қоринга жиз этиб тегишини, яна бир неча кун оч қоринни қайнатилган карам билан алдашга мажбур эканликларини гапириб ётди. Борган сари қаттиқроқ гапиришга тўғри келарди, чунки Эстелланинг чинқириғидан сўзлар эшитилмаётганди. Чинқириққа чидаш мумкин бўлмай қолди. Гўё Маэ боланинг чинқиригини энди эшитгандай бирдан асабийлашиб, уни беланчакдан шартта олди-да, каравотга, онаси олдига улоқтирди-ю, ғазаб билан деди:

— Ма, ол бунингни, бўлмаса бир уриб, майиб қилиб қўяман... Бола ҳам шунақа бўладими, ўзинг кечир, худойим! Ҳеч нимага зор бўлмаса, эмиб ётса ҳам ҳаммадан кўпроқ бақиради-я!

Ҳақиқатан ҳам Эстелла шу ондаёқ эмишга тушиб кетди. Кўрпага ўралиб, ўрин иссиқлигидан овулган қизалоқ энди тамшаниб-тамшаниб қўярди.

— Пиоленалик жаноблар сенга, олдимизга кел, деб айтишмадими? — сўради ота бир оз сукутдан сўнг.

Она тараддудланиб, лабларини маъюс қимтиди.

— Ҳа, мен уларни учратдим, улар камбағалларнинг болаларига кийим-кечак олиб келишган экан... Ростданам бугун уларнинг олдига Ленора билан Анрини олиб бораман. Лоақал юз су беришса ҳам ҳарна!

Яна орага сукут чўкди. Маэ кетишга тайёр эди. Бир минутча турди-да, сўнг синик овозда деди:

— Нима ҳам қилардинг? Пешонага ёзилгани шу экан-да... Ҳеч бўлмаса суяқ ош қилгин... Ишимга борай энди, қуруқ гап қулоққа ёқмас.

— Тўғри айтдинг, — жавоб берди хотини. — Шамни пуфлаб кет, қоронғида хаёл сурсам ҳам бўлаверади.

Маэ шамни ўчирди. Захария билан Жанлен зинадан пастга тушиб кетишаётган эди, ота улар кетидан юрди; ёғоч зинапоя уларнинг жун пайпоқли оёқлари остида ғижирларди. Зина йўлаги билан хонани яна қоронғилик босди. Болалар ухлашарди, ҳатто Альзира ҳам кўзларини юмди. Фақат она қоронғи уйда кўзларини очиб ётарди. Эстелла мушук боласидай пишиллаб, иштаҳа билан унинг пучайиб қолган сийнасини сўрарди.

Пастда Катрина даставвал ўт ёкди; ўртаси чўян панжара, икки четида печь трубаси ўрнатилган каминда доимо тошқўмир ёниб турарди. Ширкат ҳар бир хонадонга оинга саккиз юз литрдан кўмир берарди. Штольнялардан териб олинган бу кўмир қаттиқ, ёниши қийин бўлгани учун қиз чўғи турсин дея, кечқурун оловни кўмиб қўярди, эрталаб эса чўғларни тўдаларди-да, сараланган майдароқ кўмирдан ташларди. Катрина панжара устига котелокни қўйди-да, буфет ёнига чўнқайди.

Пастки қаватдаги хона анчагина катта эди. Деворлари яшил рангга бўялган, плита ётқизилган пол ювилиб, оқ қум сепилган. Бу ерда фламандча озодалик

хукмрон эди. Хонанинг мебели, сирланган қайрағоч буфетдан бўлак, ҳаммаси яна шунақа стол-стуллардан иборат эди. Деворга Ширкат тарқатадиган император ва маликанинг расмлари, солдатларнинг ҳамда авлиёларнинг ёрқин, аммо дағал зарҳалли суратлари ёпиштирилганди. Буларнинг ҳаммаси қуп-қурук, ранги очик деворда кўзга яққол ташланарди. Бу хонада буфет устида турган пуштиранг картон қутича билан циферблати расво қилиб бўялган соатдан бўлак безак йўқ эди. Соатнинг чиқиллаши баралла эшитилиб турарди. Зина йўлагига очиладиган эшик ёнида эшикча бўлиб, у ертўлага олиб тушар эди. Хона озода бўлишига қарамай кечаги пиёздоғ ҳиди димоққа урилади; бўғиқ, оғир ҳавода доимо тошқўмирнинг аччиқ иси сезилиб туради.

Катрина очик буфет олдида чўнқайиб ўтирганича хаёл сурарди. Ноннинг четлари-ю, анчагина пишлоқ бор, лекин мой жуда оз қолган эди; шулардан тўрт кишига бутерброд тайёрлаши керак. Ниҳоят ишга киришиб, нонни юпқа-юпқа қилиб кесди, бири устига пишлоқ қўйди, иккинчи парракка мой суртди, пишлоқ ва мойли парракларни жуфтлаб чиқди; ишчилар ҳар куни шахтага олиб кетадиган бундай мою пишлоқли бутерброд «чақмоқтош» эди. Тезда ана шундай бутербродлардан тўрттаси тайёрланиб дастурхонга қўйилди. Уларнинг ҳажми ҳар хил. Энг каттаси дадасига, энг кичиги Жанленга эди.

Катрина гўё бутунлай рўзгор ишларига берилиб кетгандай эди; лекин бари бир катта назоратчи билан Пьерроннинг хотини ҳақида боя Захария айтган гаплар хаёлидан кетмасди; эшикни қия очиб, ташқарига қаради. Шамол аввалгидек қутуради; қишлоқнинг пастак уйларидаги деразаларнинг кўпида чироқ кўринарди, субҳидам шовқини эшитиларди. Дам-бадам эшиклар очилиб-ёпиларди; ишчилар қаторлашиб, тун қоронғисида олислаб боришарди. Совуқда нима азоб: юкловчи-ку ахир, бемалол ухлайверса бўлади, албатта, ишга соат олтида боради-ку! Шундай бўлса ҳам қиз боғчанинг нариги томонидаги уйга қараб тураверди. Эшик очилди, Катринанинг қизиқиши янада ортди. Йўқ, бу Лидия-ку, Пьерроннинг кичик қизи, ишга кетяпти.

Бугнинг вишиллаши Катринани қайрилиб қарашга мажбур этди. У эшикни шартта ёпиб, ўчоқ бошига чопқиллаб келди: сув қайнаб, олов устига тушибди. Кофе тамом бўлгани учун кечаги шаманинг устига дамлашга мажбур бўлди; чойнакка шакар солди. Шу чоқ отаси билан ака-укаси пастга тушишди.

— Э, жин урсин!— сўкинди Захария кружкасидан ҳўплаб.— Бунақа ювиндидан кейин бошинг ҳам айланмайди!

Маэ итоаткорона елкасини қисди.

— Нима қипти! Иссиқ, шунисига ҳам шукур.

Жанлен нон ушоқларини териб олди-да, ичаётган идишига солди. Катрина ичиб бўлиб, чойнакда қолган кофени тунука флягаларга қуйди. Тўрттовлари тик турганча, ёниб тамом бўлай деган шамнинг хира нурида апил-тапил кофеларини ичиб олишди.

— Бугун бўласанларми ўзи! — хитоб қилди ота.— Сенларни кўрган киши бойвачча, деб ўйлаши мумкин.

Тепадан овоз келди,— зинапоя эшиги очиқ қолган экан. Она қичқириб:

— Ноннинг ҳаммасини олинглар, менда болалар учун бир оз вермишель бор,— деди.

— Хўп, хўп!— жавоб берди Катрина.

У оловни кўмди-да, суюқ ош қолган котелокни соат олтида ишдан бобом келса, иссиққина олиб ичар, деб панжара бурчагига қўйди. Улар буфет тагидан ёгоч бошмоқларини топиб кийиб, канопга боғланган флягни елкаларига ташлашди-да, нон бурдаларини белларига, кўйлаклари билан блузкаларининг орасига тиқиб қўйишди. Кейин улар йўлга тушишди: эркаклар олдинда, қиз кейинда; қиз кета туриб, шамни ўчирди ва кулф бурнидаги калитни буради. Уйни яна қоронгилик босди.

— Хой, шошманглар! Бирга кетамиз,— деди қўшни уйнинг эшигини кулфлаётган киши.

Бу Левак бўлиб, ёнида ўғли — Жапленнинг қадрдон ўртоғи ўн икки ёшли Бебер ҳам бор эди. Катрина ажабланиб, пиқ этиб қулиб юборишга сал қолди.

— Бу қанақаси бўлди?— деди у Захариянинг қулоғига.— Бутлу Левакнинг кетишини ҳам кутмабди-да!

Энди қишлоқдаги чироқлар ўча бошлади. Сўнгги эшик ҳам тарақлаб ёпилди; ҳаммасёқ яна уйқу оғушига чўмди; бўшаган каравотларга ўтиб ётган хотинлар ва болалар туннинг қолган қисмида ором олиб

ухлардилар. Жимжит бўлиб қолган посёлкадан оғир-оғир пишиллаётган Ворё томонга турнақатор соялар гизгизон шамолда секин-аста борарди: булар бир-бирларини туртиб ишга боришаётган кўмир қазувчилар эди; улар қўлларини қаерга яширишни билишмай кўкракларига чалиштириб олишганди; ҳар бирининг беллида яцириб қўйган бир бурда нони дўппайиб турарди. Юпқа бўз блузка кийганлари учун совукдан қалтирасалар ҳам, ошиқишмасди; оломон йўлда худди подадек босиб-янчиб, тартибсиз борарди.

III

Этьен ниҳоят тепаликдан пастга тушиб, Ворё томон йўл олди. Иш борми деб сўраган кишилари бошларини сарак-сарак қилишар ва унга бош штейгерни кутинг, дея маслаҳат беришарди. Этьенни ҳеч ким тўхтатмади, шу боисдан равоқлари кўп нимқоронғи бинолар орасида айланиб юрди; кўп қаватли бу бинолар ораси жуда чалкаш эди. У қоронғи, шалағи чиққан зинадан юқорига кўтарилиб, омонат бўлиб қолган кўприкчадан ўтгач, саралаш хонасига келиб қолди; бу ер ниҳоятда қоронғи бўлганидан Этьен бирор нарсага урилиб кетмаслик учун қўлини олдинга чўзиб бораверди. Ногаҳон рўпарасидан, қоронғиликдан лов этиб икки улкан сарик кўз чиқди. Этьен минора тагига, қабулхонага, шундоққина шахтага тушадиган жойга келиб қолганди.

Штейгерлардан бири, жандармларга ўхшаб кетадиган, оқ мўйловлари тиккайиб турадиган семиз Ришомм амаки шу пайт бу ёққа чиқиб, қабулхонага кетаётганди.

— Бу ерда ишчи керак эмасми, майли, қандай иш бўлса ҳам бари бир? — сўради Этьен.

Ришомм «йўқ» демоқчи эди-ю, лекин бу фикридан қайтиб, нарироққа боргач, бошқалар сингари жавоб қилди:

— Бош штейгер жаноб Дансартни кутинг.

Рефлекторли тўрт фонарь ёниб турибди; уларнинг нурлари шахтага тушиладиган жойга қаратилган; яхши ёритилган темир панжаралар, сигнал аппаратлари ва тормозларнинг дасталари, қалин тахталар орасида

бориб келаётган кўтарма машинанинг икки кажаваси кўриниб турарди. Улкан иморатнинг қолган қисми черков ичига ўхшаган бўлиб, ғира-шира эди, у ерда катта соялар ғимирларди. Чуқурликдаги лампахонагина ёруғ бўлиб, қабулхонада эса гўё сўнаётган юлдузга ўхшаб кичик чироқ ёниб турарди. Пастдан кўмир узатиш ҳозиргина бошланганди. Кўмир ортилган вагонеткалар чўян плиталар устидан тарақ-туруқ қилиб юрарди; улар кетидан вагонеткаларни итариб келувчиларнинг букчайган узун қоматлари кўриниб турибди; бу умумий говур-ғувурда гўмбурлаётган нарсалар ва шакллар тўхтовсиз ҳаракат қиларди.

Этьен бир мигнутча қимир этмай туриб қолди; бу ғала-говур уни гангитиб, кўзини тиндирган эди. У жуда совуқ еди, чунки ҳаммаёқдан муздек ҳаво оқими уриб турарди. Кейин у бир неча қадам босди: Эътиборини пўлат ва мис қисмлари ярақлаб турган машина тортган эди. Машина шахтага тушаверишдан йигирма беш метрча наридаги анча баланд бинода эди. У тўрт юз от кучига тенг бўлган бутун қувватини ишга солиб зўр бериб ишлар, каттакон шатуни бир меъёрда кўтарилиб-тушар эди; машина ғиштин супага шу қадар мустаҳкам ўрнатилган эдики, бино деворларининг зириллаши асло сезилмасди. Машинист регулятор дастасини ушлаб, шахтанинг турли қаватлари кўрсатилган жадвалдан кўзини узмай, сигнал қўнғироқларига қулоқ соларди; жадвални кесиб ўтган тик новдан юқорига кўтарилиб, пастга тушаётган ипга осиглик соққачалар кўтарма машина кажавасини акс эттирарди. Кажавани жўнатаётган пайтда машина ишга тушиши биланоқ ҳар бирининг радиуси беш метрдан келадиган улкан барабан айлана бошларди; уларнинг ғилдираклари иккита пўлат арқонни бир-бирига қарама-қарши томонга ўраб-бўшатиб турарди; улар шу қадар тез айланардики, худди кулранг чапг устунига ўхшарди.

— Эй, эҳтиёт бўл! — қичқиришди улкан нарвон олиб келаётган уч юккаш.

Этьенни пачақлаб юборишларига оз қолди. Унинг кўзлари қоронғига кўника бошлади; кейин у узунлиги ўттиз метрдан зиёд арқонларнинг пўлат лентадек осмонда сирғалаётганини кўрди; пўлат арқонлар минора

тепасига кўтарилиб, шкивлардан ошиб тушар, кейин эса учига боғлаб қўйилган кўтарма машина кажавалари билан шахтага тушиб кетарди. Шкивлар худди қўнғироқхоналардаги стропилларга ўхшаган темир стропилларга маҳкамланган эди. Арқонлар учаётган қушдек овозсиз ва равон сирғаларди; бу улкан йўгон симнинг шиддатли ҳаракати тинимсиз кўтарилиш ва тушишдан иборат бўлиб, секундига ўн метр тезлик билан ўн икки минг килограмм юкни кўтара оларди.

— Ҳей, ким у? Эҳтиёт бўл!— яна қичқиришди юккашлар; улар нарвонни нариги томонга қўйиб, чап томондаги шкивни текширмоқчи эдилар.

Этъен секин-аста қабулхонага қайтди. У боши узра чарх ураётган бу салобатли парвозлардан ҳанг-манг бўлиб қолганди. У ғуриллаб турган шамол изғиринидан қалтираб, кўтарма машина кажавасининг ҳаракатини томоша қилди; вагонеткаларнинг гумбур-гумбури қулоқларини қоматга келтирди. Шундоққина шахтага тушаверишда сигнал аппарати — дастакли оғир болға ишлаб турибди; пастдан арқон тортилса, болға зангга урилади. Бир зарб — тўхташни, икки зарб — пастга тушишни, уч зарб — кўтаришни билдирарди; бу оғир зарб садолари умумий гала-говурда тинимсиз эшитилиб турарди; ҳар зарбдан кейиноқ қўнғироқчанинг жарангли товуши дарҳол эшитилади. Кўтарма машина ҳаракатини бошқараётган қабул қилувчи карнайдан машинистга ҳар хил топшириқлар беравериб, шовқинга шовқин қўшарди. Мана шу тўс-тўпалонда кажавалар дам кўриниб, дам пастга тушиб кетарди, уларни бўшатишарди, юк ортилган кажавалар яна кўтариларди. Этъен бу мураккаб ишни кузатиб, акли шошиб қолди.

У фақат бир нарсани тушунди: шахта тинимсиз равишда бирваракайига йигирма-ўттизталаб одамни комига тортарди: бу иш шундай осон кўчардики, бутунлай сезилмасди ҳам. Ишчиларни пастга тушириш соат тўртдан бошланганди. Улар бараклардан яланг-оёқ, лампочкаларини кўтариб келишган, тўпланишиб, одам кўпайиб, кажаватўлишини кутишарди. Кажава худди тунда писиб келадиган ваҳший ҳайвондек билдирмай оҳиста қоронғиликдан чиқиб келар, тормоз бериб, тўхтар эди. Тўрт қаватли кажаванинг ҳар қаватида иккитадан кўмир тўлдирилган вагонетка бор эди. Юккашлар уларни алоҳида кўприкчалар орқали итариб

туширишар, бўшлари ёки олдиндан тахта ортиб қўйилганлари билан алмаштириб туришар эди. Бўш вагонеткаларнинг ҳар бирига беш ишчи туриб олади; баъзан агар ҳамма бўш вагонеткалар эгалланса, бир йўла қирқтача одам туширилади. Карнай орқали бақриб берилаётган буйруқ бўғиқ, ноаниқ гўлдираб эшитиларди; пастга кетган сигнал арқонини тўрт марта тортишди, бу «мол гўшти кетяпти!» дегани бўлиб, одам жўнатилаётгани тўғрисидаги огоҳлантириш эди. Кажава бир силкиниб, чуқурга отилган тошдек пастга товушсиз тушиб кетар, кетидан эса титраб, пастга шувиллаб кетаётган йўгон арқондан бўлак ҳеч нарса кўринмас эди.

— Чуқурми? — сўради Этьен ёнгинасида ўз навбатини кутиб, уйқусираб турган бир шахтёрдан.

— Беш юз эллик тўрт метр, — жавоб берди шахтёр. — Лекин кон тўрт қават, биринчи қавати уч юз йигирма метр чуқурликда жойлашган.

Икковлари ҳам кўтарилаётган арқонга тикилиб, жим қолишди.

— Борди-ю, узилиб кетса, нима бўлади? — сўради Этьен.

— Узилиб кетсами...

Шахтёр гапини имо-ишора билан яқунлади. Унинг навбати келган эди; кажава яна енгил ва равон кўтарилди. У бошиқа ўртоқлари билан бирга кажавага кирди; кажава пастга шўнгиб кетди, тўрт минут ўтар-ўтмас одамларнинг янги тўпини ютгани яна қайтиб чиқди. Шу йўсинда шахта ярим соатгача гўё бутун бир халқни ҳазм қилмоқчи бўлган еб тўймас махлуқдек баҳайбат ичакларини тўлдириш учун шахтёрлар тушиб ишлайдиган қаватнинг чуқурлигига қараб, гоҳ тез, гоҳ секин, аммо тўхтовсиз одамларни ютиб туради. Кажава кетма-кет тўлиб, тушиб-чиқаверди, қоронғилик эса бояги-боягидек зим-зиё эди, кажава бўлса, ер қаъридан ҳеч нима кўрмагандек бешовқин ва очкўзлик билан чиқиб келаверарди.

Вақт ўтиб борарди, Этьен эса боя қиямаликда турганидагидек яна ташвишга тушиб қолди. Нимадан ҳам умид қиларди? Катта штейгер ҳам унга ҳамма айтган гапни қилади-да. Беихтиёр ваҳима босиб, қўқисдан уни қайтиб кетишга мажбур қилди; у қозонхо-

на олдига келгандагина тўхтади. Қозонхона эшиги ланг очик, Этьен еттита қозон билан иккита ўтхонани кўрди. Тирқишлардан вишиллаб чиқаётган паға-паға оппоқ буғ орасида ишлаётган гўлаҳ ўчоқлардан бирига кўмир ташлаяпти; иссиқ остонагача гупиллаб уриб турарди. Исиниб олиш мумкинлигидан қувониб кетган Этьен яқинроқ боришга жазм қилувди ҳамки, шахтага йўл олган кўмир қазувчиларнинг янги-бир гуруҳини кўриб қолди. Бу Маэллар хонадони билан ота-бола Леваклар эди. Этьен ҳаммадан олдинда келаётган, хушмуомала ўспиринга ўхшаб кўринган Катринага кўзи тушиши билан, қани бир ирим қилиб шундан ҳам охирги марта сўрай-чи, деган фикрга келди.

— Айтинг-чи, ўртоқ, бу ерда бирерта ишчи керак эмасмикин? Қанақа иш бўлса ҳам майли эди.

Қоронғиликда тўсатдан янграган бу овоздан сал чўчиган Катрина ҳайратланиб унга тикилди. Лекин унинг орқасидан келаётган Маэ ҳам бу овозни эшитганди; у жавоб бериб тўхтади-да, Этьен билан гаплашиб қолди. Йўқ, бу ерда ҳеч ким керак эмас. Иш қидириб бир жойдан иккинчи жойга сарсон бўлиб юрган бечора ишчи уни қизиқтириб қолди. Маэ у билан ажралишгач, бошқаларга деди:

— Ҳа! Бу қора кун ҳар кимнинг ҳам бошига тушиши мумкин... Шикоятнинг ҳожати йўқ, қайга қарасанг — ишсизлар, очдан ўлсанг ҳам биров ҳам емайди...

Ишчилар барак томон йўл олди. Бу жуда кенг, наридан-бери сувоқ қилинган бино эди. Деворлар ёнида осма қулф билан беркитилган шкафлар; ўртада қопқоқсиз печкага ўхшаган чўян ўчоқ чўғдек қизиб ётипти: ўчоққа кўмир тўлдириб қаланганидан парчалари чирсиллаб ерга тушиб туради. Барак шу ўчоқдаги олов билан ёритилади; унинг қирмизи шуълалари шкафларнинг яғири чиқиб кетган ёғочларида, шифтгача қоп-қора чанг босиб ётган деворларда титрайди.

Маэ оиласи иссиққина баракка кирганда қаттиқ кулги кўтарилди. Ўттиз чоқли ишчи орқаларини оловга бериб, мириқиб исинишарди. Ер тагига тушишдан олдин ҳамма зах шахтада тетикроқ ишлаш учун яхшилаб исиниб олгани бу ёққа кирар эди. Ўша тонг палласида баракда ҳазил-мазах авжида эди. Ишчилар ўн саккиз ёшли юккаш Мукетта деган қизнинг жиғига тегишарди: Мукеттанинг кўкраги билан сони шу

қадар катта эдики, блузаси билан лозими тирсиллаб ёрилиб кетай дерди. У Рекийярда отаси — кекса отбоқар Мук ва юккаш укаси Муке билан турарди; аммо уларнинг иш соатлари турлича бўлганидан шахтага бир ўзи келарди. У худди шу ерда ёзда — жавдарзорга кириб олиб, қишда — бирон тўсиқ орқасига ўтиб, нари-берисини суриштирмай ҳар ҳафтада ўзгариб турадиган навбатдаги маъшуқи билан дон олишиб юрарди. У шахтёрларнинг ҳаммаси билан бўлган; бу чиндан ҳам барчага баробар, қўлдан-қўлга ўтиб юрадиган беминнат ҳожатборар эди. Бир куни кимдир Мукетта Маршьенн михсозлигидаги бир темирчи билан юрипти, деб таъна қилган эди, балога қолди; кўмир қазувчилардан бўлак бирор йигит билан юрганимни ҳеч ким, ҳеч қачон кўрган эмас, агар шуни биров исбот қилса, майли қўлимни кесишсин, ғинг демайман, деганди.

— Нима, ҳозир найнов Шаваль билан юрмаяпсанми? — сўради шахтёрлардан бири мийиғида кулиб. — Анави бақалоқни илинтирдингми, дейман, а? Унга нарвон қўйиш керак-ку. Икковларингни Рекийярнинг нарёгида кўрувдим; у тош устига чиқаётганди!

— Хўш, кейин нима бўпти?! — соддадиллик билан жавоб берди, Мукетта. — Сенга нима-я? Мени чиқариб қўй, деб сени чақирмаган-ку.

Бунақа қўполроқ, беозор ҳазиллар ишчиларнинг қаҳқаҳасига сабаб бўлар, улар оловга тобланган елкаларини силкитиб, мириқиб кулишар эди. Думалоққина, шипинқираган тўла баданини сириб турган кулгили кийимдаги Мукетта улар орасида уялинқираб, у ёқдан-бу ёққа юраркан, хахолаб куларди.

Лекин Мукетта Маэга энди Флёранса хоним, найнов Флёранса энди келмаслигини айтиши биланоқ ҳазил-мутойиба таққа тўхтади: кеча ўрнидан унинг ўлигини топишипти; баъзилар юраги ёрилиб ўлипти, деса, бировлар қораарча ароғининг бир литрини шартта ичиб ўлипти, дерди. Маэ мушкул аҳволда қолди: яна иш юришмайдиган бўлди — у юккашларнинг биридан айрилган бўлиб, ҳозирнинг ўзида унинг ўрнини босадиган киши йўқ эди. Маэ артелда ишларди, артелда эса тўртта қончи: ўзи, Захария, Левак ва Шаваль бор эди. Агар фақат Катринанинг ўзи юккаш бўлиб қолса, ишга зиён етади. Бирдан у қичқариб юборди:

— Эй, тўхтанглар! Иш қидириб юрган йигит қани?
Барак олдидан Дансарт ўтиб борарди. Маэ унга бўлган воқеани айтиб, шу кишини ишга олиш учун рухсат еўради; у Ширкатнинг ўзи ҳам Анзендагидек юккаш аёлларни эркаклар билан алмаштиришга мойилку, деб туриб олди. Бош штейгер аввалига кулди: хотинларни ишдан бўшатиш ҳақидаги лойиҳа даставвал кўмир қазувчиларнинг ўзлари томонидан зарбага учрарди, улар бўшаган жойга ўз қизларини тиқиш ғамини ердилар; ахлоқ-одоб, озодалик масалалари уларни кам қизиқтирарди.

Ниҳоят, Дансарт бир оз иккиланиб тургач, инженер Негрелнинг қатъий рухсати олинсагина рози эканлигини изҳор қилди.

— Нима фойдаси бор? — деди Захария. — Ҳеч қаердан иш тополмаганидан кейин бирон ёққа жўнаб қолган бўлса керак!

— Йўқ, — эътироз билдирди Катрина, — мен ҳозиргина унинг қозонхона олдида тўхтаганини кўрдим.

— Ундай бўлса, чопиб бориб, айтиб кел, иш ёқмас! — қичқирди Маэ.

Қиз чопиб кетди. Бу орада кўмир қазувчилар оқими ўт олдидаги ўрнини бошқаларга бўшатиб, шахтага йўл олди. Жанлен отасини кутиб ўтирмай, семиз, соддагина Бебер деган ўспирин ва ўн ёшли нимжонгина қизча Лидия билан бирга ўз лампочкасини олиб келгани кетди. Мукетта уларнинг олдида борарди; қопқоронғи зинапояга етганда уларни, вой шумлар-эй, деб қойиди-да, агар яна чимчилашадиган бўлсаларинг, қулоқ-чаккаларингга тортиб юбораман, деб пўниса қилди.

Этьен ҳақиқатан ҳам қозонхонада экан; у ўчоққа кўмир ташлаётган гўлаҳ билан гаплашиб турарди. Яна шу қора тунда қаёқларда изғиб юрар эканман, деган фикр унинг аъзойи баданини музлатиб юборётганди. У энди кетаман деб турган ҳам эдики, елкасига биров қўлини қўйганини сизди.

— Қани, мен билан юринг-чи, — деди Катрина. — У ерда сизбон бир нарса чиқиб қолди.

Аввалига у тушунмади. Кейин бутун вужуди қувончдан яйраб кетди-ю, қизнинг қўлини маҳкам сиқди.

— Раҳмат, ўртоқ... Ростини айтсам, ўзингиз ҳам ажойиб йигитча экансиз-да!

Катрина ўчоқдаги оловнинг қип-қизил яллиғида унга разм солиб кулиб юборди. Йигит уни ўғил бола деб ўйлагани қизга нафа қилди,— қиз жуда ҳам ориқ бўлиб, узун сочларини чепчиги бекитиб турарди. Эъен ҳам шодлигидан кулар, икковлари рўбарў туриб олишиб, қувноқлик билан хахолашарди; икковининг ёноғи ёнар эди.

Шу маҳал баракдаги шкафи олдида чўнқайиб ўтирган Маэ пойабзали билан дағал пайпоқларини ечарди. Эъен келгач, улар икки оғиз сўз билан келишиб олишди: кунига ўттиз су; иш оғир, лекин тезда кўникиб кетади. Кончи Эъенга ковушингизни ечманг, деб маслаҳат берди-да, бошини зарбалардан сақлаш учун чарм қалпоғини узатди; ота-бола бунақа эҳтиёткорликдан ҳазар қилишарди. Кейин шкафчадан асбоблар олинди; Флёрансанинг белкураги ҳам шу ерда экан. Шундан кейин Маэ шкафга пойабзал билан пайпоқларини ва Эъеннинг тугунини солиб, беркитиб қўйди-да, бирдан тутақиб кетди.

— Қаёққа йўқолди шу пайтда бу ярамас-қирчанги Шаваль? Яна тошларнинг устига бирорта қизни босгандир-да!.. Шундоқ ҳам бугун ярим соат кеч қолдик ўзи.

Захария билан Левак орқаларини бамайлихотир иситишарди. Ниҳоят, биринчиси деди:

— Нима, сен Шавални кутяпсанми?.. У биздан олдин келган, ҳозиргина шахтага тушиб кетди.

— Қанақасига? Шунни билиб туриб, шу чоққача айтмапсан-да менга! Юринглар! Тезроқ!

Қўлини оловда иситаётган Катрина улар билан бирга кетишга мажбур бўлди. Эъен уни олдинга ўтказвориб, ўзи кетидан юрди. У яна қингир-қийшиқ зиналар ва қоронги ўтиш жойларига келиб қолди, яланг оёқлари бу ерда тўзиган туфлидагидек юмшоқ босиб борарди. Лампахона ниҳоятда ёруғ; бу ойнабанд хона бўлиб, устунларида кеча текширилиб, тозаланган юзлаб Деви лампочкалари қатор-қатор ёниб турарди; ҳаммаси гўё ярақлаган бутхонадаги шамлардек ловиллайди. Туйнукдан ҳар бир ишчи ўз номери ёзилган лампочкани олади-да, текшириб кўргач, ўзи бекитиб қўяди, стол ёнида ўтирган табелчи эса рўйхат дафтарига шахтага тушиш вақтини қайд қилиб қўяди. Маэ янги юккашига ўзи лампочка топиб беришга мажбур

бўлди. Кейин яна бир расмиятчилик бор эди: ишчилар лампалар яхши бекитилганини текширадиган махсус назоратчи олдидан ўтишарди.

— Вой-вуй!.. Бу ер унча иссиқ эмаскан, — деб бидирлади Катрина совуқдан дағ-дағ титраб.

Эъён фақат бошини қимирлатиб қўйди. Улар шамол гуриллаётган кенг хона ўртасидаги шахтага тушиладиган ерга келиб қолишди. Эъён ўзини мард одамлардан ҳисоблаб юрарди, лекин шундай бўлса-да, атрофида вагонеткаларнинг гумбур-гумбури, сигнал болғасининг гум-гум урилиши, карнайнинг бўғик наъраси яна янграб, кўтарма машина барабанларига тезлик билан ўралиб чуваланаётган пўлат арқонларнинг тинимсиз гизиллаб ўтиб туришини кўргач, ваҳимага тушиб, юраги қисилди. Кажавалар худди тунда писиб келган йиртқич ҳайвондек товуш чиқармай сирғалиб, кўтарилиб тушар, тўп-тўп одамларни олиб кетарди; гўё шахта уларни ўз комига тортаётгандек эди. Энди навбат унга етди; совуқ суяқ-суяғидан ўтиб кетган бўлса-да, тишини тишига қўйиб, чурқ этмасди. Захария билан Левак унинг ҳолидан кулардилар: бу одамнинг ишга олиниши уларга хуш келмаганди, айниқса Левак менинг олдидан ўтишмадиям, деб ўпкаланар эди. Отаси Эъёнга машина қурилишини тушунтиришга киришганини кўриб, Катрина қувониб кетди.

— Мана, қаранг: кажава устига парашют қурилган, агар арқон узилиб кетгудек бўлса, манави темир тишлар ёғоч тўсинга гарчча ботади. Э, бунақа воқеа ҳар замонда бир бўлади... Шахта қудуғи уч қисмга бўлинган; улар бошдан-оёқ тахта билан ажратилган; ўртада кажава ҳаракат қилади, чап томондан эса зина тушади...

Лекин гап шу ерга келганда, у тушунтиришдан тўхтаб, овозини унча баландлатмай, вайсаб кетди:

— Бу ерда нима қилиб уймалашиб ўтирибмиз, жин урсин! Одамларни бунчалик совуққоттириш инсофдан эмас!

Тўрсиз лампочкани чарм қалпоғига қўндириб олган штейгер Ришомм ҳам шахтага энди тушаман, деб турувди, Маэнинг вайсашини эшитиб қолди.

— Секинроқ! Деворниям қулоғи бор, эҳтиёт бўл! — оталарча меҳрибонлик билан деди у; бу кекса шахтёр штейгер бўлган эса-да, ўз яқинлари учун ҳамон ўртоқ

эди...— Ҳаммаси ўз навбати билан боргани маъқул... Мана энди биз ҳам тушсак бўлади; ҳаммаларинг ўтиринглар.

Дарҳақиқат, улар олдига темир қоқилган, ёнлари-га панжара тutilган кажава келди, кажава тўхтаб уларни кутарди. Маэ, Захария, Левак ва Катрина пастдаги вагонеткалардан бирига чиқишди, унга беш киши жойлашиши лозим бўлганидан Этьен ҳам уларга қўшилди. Бироқ ҳамма яхши жойлар банд бўлганидан у қизнинг олдида туриб қолди, Катринанинг тирсаги йигитнинг қорнига тиралиб борарди. Лампочка унга халақит берарди; кимдир лампочкани блузкасининг тугмасига тиркаб қўйишни маслаҳат берди. У гапни эшитмади, гарчи ноқулай бўлса ҳам лампочкани қўлида ушлаб кетарди. Юк кўпаяверди, одамларни молдек тикишарди-ю, лекин кажавани жўнатишмасди. Нима бўлди ўзи? Этьен назарида жуда узок кутаётгандек бўлди. Ва ниҳоят кажава силкиниб, ҳаммаёқ қоронғи бўлиб кетди, атрофдаги буюмлар сузиб ўта бошлади, тез тушилаётганидан боши айланиб, кўнгли айниб, қусворай-қусворай дерди. Улар икки қаватли қабулхонадан ўтиб, ёруғ жойдан кетишаётганда ҳам Этьеннинг кўнгли айниб турди, атрофларидаги ҳамма нарса чир айланиб, пўлат арқонлар гўё шувиллаб кетаётгандек эди. Кейин кажава шахтанинг зим-зиё қаърига шўнғиди. Этьен тамомила ўзини йўқотган, қандай ҳис-туйғуларни кечирганини ўзи ҳам билмас эди.

— Мана жўнадик, — деб қўйди бамайлихотирлик билан Маэ.

Ҳамма ўзини ҳеч нима бўлмагандек ҳис этарди. Этьен бўлса баъзан пастга тушишаётганларини ҳам, кўтарилишаётганларини ҳам тушунмасди. Гоҳо қимир этмай туришгандек туюларди; бу ҳол кажава ёнидаги тўсинларга тегмасдан тўғри тушиб бораётганда рўй берарди; кейин эса қаттиқ силкинишлар бошланарди, гўё кажава тахталар орасида лопиллаб ўйнаётгандек бўларди-ю, Этьен ағдарилиб тушишдан қўрқарди. У лампочкаларнинг хира нурида гулж бўлиб олишган гавдаларнигина зўр-базўр кўра оларди. Фақат қўшни вагонеткадаги штейгернинг ёруғ лампочкасигина машғалдек порлаб турарди.

— Бу ернинг диаметри тўрт метр, — тушунтиришда давом этди Маэ. — Қопламаси анчадан бери ремонтга муҳтож, ҳамма ёғидан сув чиқиб кетяпти... Мана! Биз худди мана шу жойга етдик, эшитяпсизми?

Этьен шу шовқин қаердан келаётганини билолмай гаранг эди, — худди ёмғир шариллаб қуяётганга ўхшарди. Дастлаб гўё жала бошланишидагидек йирик томчилар кажава томига тушди; кейин бу ёмғир тобора кучайиб, чинакам селга айланди. Афтидан кажава томи тешилган бўлса керак, сув шириллаб Этьеннинг елкасига тушиб, кийимларини жикқа ҳўл қилиб юборди. Совуққа чидаш мумкин бўлмай қолди; кажава зах чоҳ қаърига тушиб борарди. Мана, улар кўзи олдидан ногаҳон одамлар ҳаракат қилиб юрган ён-ёруғ гор чакмоқдек ялт этиб ўтиб, яна ҳаммаёқ қоп-қоронғи бўлиб қолди.

— Бу биринчи қават, — деди Маэ. — Биз уч юзу йиғирма метр чуқурликдамиз... тезликни қаранг!

У лампочкасини кўтариб поезд тагидаги изга ўхшаб жуда тез ўтиб кетаётган ён томондаги тўсинлардан бирини ёритди; бундан бошқа аввалгидек ҳеч нима кўришмайди. Ёритилган қаватлардан яна учтаси липлиб этиб ўтди. Зулматда ёмғир шариллаб турарди.

— Мунча чуқур! — гўлдираб кўйди Этьен.

Унга ер остига тушиш гўё бир неча соатга чўзилгидек туюлди. У заррача қимирлай олмаганидан азобланарди, бунинг устига Катринанинг тирсаги тинчлик бермасди. Қиз миқ этмасди. Этьен унинг шундоқ ёнида турганини ҳис қилар, шундан баданига илиқлик югурар эди. Кажава ниҳоят, беш юз эллик тўрт метр чуқурликда тўхтади, пастга тушиш учун роппа-роса бир минут кетганини билган Этьен жуда ҳайратда қолди. У сурма вулфинларнинг шарақ-шуригидан, оёғи қаттиқ ерга текканидан севишиб кетди; шунинг учун у ҳазиллашиб Катринага сансираб гапира бошладди:

— Ваданинда нима бор ўзи, мунча ҳароратинг пўр? Қорининг тирсагинг тегиб турган жойи ҳалиям гилати бўлиб турибди.

Қиз ҳам хоҳолаб кулиб юборди. Вой, мунчаям гўл бўлмаса, ҳалиям мени ўғил бола, деб юрипти-я! Нима било, кўзи йўқми?

— Узингнинг кўзларинг ғалати экан,— деди қиз кулиб.

Иигит ажабланди-ю, лекин яна ҳеч нарса тушунмади.

Кажава бўшади, ишчилар кўмир ортиладиган хонага ўтишди. Бу қояни ўйиб, гиштин гумбаз билан мустаҳкамланган каттагина зал бўлиб, эҳтиёт тўри тутилмаган учта катта лампочка ёритиб турарди. Юкловчилар чўян плиталар устидан кўмир уйиб ортилган вагонеткаларни шоша-пиша ғилдиратиб кетишди. Деворлардан ертўла, намшуш селитра иси анқирди; дамбадам қўшни отхонадан иссиқ ҳаво келади. Бу ердан тўрт томонга кети кўринмас йўлақлар кетганди.

— Бу ёққа келинг,— деди Маэ Этьенга мурожаат қилиб.— Сиз ҳали ўз жойингизда эмассиз, яна икки километрдан зиёдроқ юришимиз керак.

Ишчилар гуруҳларга бўлинишиб, секин-аста қоронги йўлақларга кириб гойиб бўлишарди. Ун беш чоғли киши чап томонга жўнади. Этьен энг кейинда Маэнинг орқасидан борарди; олдинда эса Катрина, Захария, Левак. Бу жуда яхши ер ости йўлағи бўлиб, арава ғилдиратишга қулай эди. Каттиқ ердан қавланган йўлакнинг баъзи жойларигагина тиргақлар қўйиб мустаҳкамланганди. Улар чурқ этмай бирин-кетин боришарди, лампочкалар йўлни зўр-базўр ёритарди. Иигит ҳар қадамда қоқилиб тушар, рельслар юришга халақит берар эди. У узоқдан келаётган бўрон товушига ўхшаган бўғиқ шовқинга ташвиш билан қулоқ соларди; шовқин тобора зўрайиб, гўё ер қаъридан чиқиб келаётгандек туюларди. Балки бу уларни ёруғ дунёдан ажратиб турган бошлари устидаги қалин қатламли парчалаб юборадиган ўпирилишнинг гумбурлашидир? Мана, қўққисдан гор ичида нимадир жимирлаб кетди-ю, Этьен ернинг зириллаётганини сизди. Этьен ва унинг ҳамроҳлари девор тагига ўтиб, қатор бўлиб туришди, олдиларидан катта оқ от ўтди; у вагонеткалардан тузилган поездни тортиб борарди. Олдинги вагонеткада жилов тутган Бебер ўтирибди, яланг оёқ Жанлен эса, охирги вагонеткага тирмашиб олиб, чопиб борар эди.

Улар яна юришди. Бир неча мuddатдан сўнг, чорраҳа кўринди; ундан икки янги йўлак ажралиб чиқ-

қанди. Ишчилар яна ҳам майдароқ гуруҳларга бўлиниб, шахтанинг иш олиб борилаётган йўлакларига тарқалиб кетишди. Бу ердаги йўлакнинг ҳаммаёғи маҳкамланганди; унинг тахта қоқилган бўш равоғини эман тиргаклари тутиб турарди. Тахталар орасидан слюда ялтираб турган шифер хира, гадир-будир, оғир қумтош қатламлари кўзга ташланади. Улар олдидан дам юк ортилган, дам бўш вагонеткалар тарақ-туруқ қилиб ўтиб туради, вагонеткалар поезди бир кўринарди-ю, қоронғилик қаърига кириб кетарди; уларни тортиб бораётган отлар худди шарпаларга ўхшарди. Бир ерда йўл иккига бўлинади. Бу ерда тўхтаган поезд худди пинакка кетган қора илондек мудрайди; от пишқиради; қоронғида уни кўриш қийин: унинг гавдаси равоқдан узилиб тушган улкан тошга ўхшайди. Дам-бадам вентиляция эшиклари очилиб, секин ёпилиб турарди. Кўмир қазувчилар олға силжиган сари йўлак тобора торайиб, пастлаб борарди; шифти нотекис бўлганидан доимо эгилиб юришга тўғри келарди.

Эъён бошини қаттиқ уриб олди. Агар чарм қалпоғи бўлмаганида мияси тешилиб кетган бўларди. У олдинда кетаётган Маэнинг ҳар бир ҳаракатини диққат билан кузатиб бора бошлади; унинг хира сурати лампочкаларнинг заиф нурида кўриниб қоларди. Ишчилардан ҳеч ким ўзини уриб олмади,— улар ёғоч тиргакларнинг ҳар бир тўсинини, туртиб чиққан ҳар бир тошни аниқ билишар эди. Оёқ остидаги тупроқнинг сирғанчиқлиги Эъённи қаттиқ қийнарди; юрилган сари лой пилчиллаб борарди. Лекин уни кўпроқ ҳайратга солган нарса ҳароратнинг кескин ўзгариб туриши эди. Шахта чоҳининг тагида ҳаво тоза эди, йўлакда эса ҳаво оқими ўтиб тургани учун шиддатли совуқ шамол тор деворлар орасидан худди бўрондек чиққириб эсарди. Улар вентиляторлардангина озгина ҳаво кираётган бошқа штольняларга ўтиб, пастга тушганлари сари шамол тиниб, иссиқдан бўғилиб лоҳас бўлишарди.

Маэ индамасди. Фақат ўнгга, янги йўлакка қайриларкан, деди:

— Гийом қатлами шу.

Шу қатламда уларнинг шериклари ишларди. Биришчи қатламлариданоқ Эъён боши билан тирсагини

уриб олди. Нишаб шифт шу қадар паст эдики, Эътен йигирма-ўттиз метрча масофадан икки букчайиб юришга мажбур бўлди.

Сув тўпиққа чиқади. Улар шу қўйи икки юз метрча юришди ва бирдан гўё рўбарўдан чиққан тор ёриқ ютиб юборгандай Левак, Захария, Катриналар ғойиб бўлиб қолишди.

— У ёққа кўтарилишимиз керак, — деди Маэ. — Лампочкани тугмангизга боғлаб қўйинг-да, ходани ушлаб юқорига чиқинг.

Ўзи ғойиб бўлди. Эътен унинг кетидан бориши лозим эди. Қатламдаги бу ёриқ кўмир қазувчилар учун йўлак хизматини бажарарди; ундан ён томондаги барча штольняларга ўтиш мумкин эди. Ёриқ кўмир қатламининг ўзидан катта бўлмай, зўр-базўр олтмиш сантиметрга борарди. Яхшиямки, Эътен ориққина, шунга қарамай ўрганмагани учун олға силжишда жуда кўп куч сарфлади. У ғужанак бўлиб, елкалари, сонларини деворга уриб олар, хомага ёпишар эди. Улар ўн беш метрча кўтарилишгач, биринчи ёнлама йўлакка етишди; лекин яна юришга тўғри келди: Маэ ва унинг ўртоқлари ишлайдиган жой олтинчи қатламда, — улар тили билан айтганда, нақ жаҳаннамнинг ўзида эди. Штольнялар ҳар ўн беш метр оралиқда биринкетин жойлашган бўлиб, бу чоҳнинг охири кўринмасди. Юқорига кўтарилаверишдан бел билан кўкрак зирқираб оғрир эди. Эътен дармондан кетди, гўё тоғ жинслари бутун оғирлиги билан унинг гавдасини эзиб ётгандай; қўллари мўматалоқ бўлиб кетди, оёқлари зирқирарди, бунинг устига нафаси қайтиб, бошига қон қуйилаётганини сизди. Штольнялардан бирида у букчайиб вагонетка гилдиратиб кетаётган икки кишини ғира-шира кўриб қолди, — бири ниҳолдек ориқ, иккинчиси семиз: булар ишларини бошлаб юборган Лидия билан Мукетта эди. Эътен эса яна икки қатлам кўтарилиши керак! Тер қуйиб, кўзини очгани қўймасди, у зўр бериб, ҳамроҳларига етиб олишга ҳаракат қиларди, лекин уларнинг эпчил гавдалари қатлам устидан сирғаниб бораётгандек туюларди.

— Мана, етиб ҳам келдик! — Катринанинг овози эшитилди. Лекин у маррага етиб келган ҳам эдики, штольня қаъридан қичқирган бошқа бир овоз эшитилди:

— Нима гап ўзи? Бошқалар ўлиб кетсаям ишларинг йўқ экан-да? Мен Монсудан икки километр наридан келсам ҳам, ҳаммаларингдан оддин иш жойидаман!

Бу қичқирган Шаваль бўлиб, йигирма беш ёшлардаги, ориқ, баланд бўйли, қоқсуяк, чеҳраси жиддий йигит эди. У куттириб қўйишгани учун жаҳли чиққанди.

У Этъенни кўриши биланоқ ҳайрат ва нафрат оҳангида сўради:

— Бу нимаси яна?

Маэ унга бўлган воқеани айтиб бергач, у тишларини гичирлатиб деди:

— Шундай дег. Демак, энди йигитлар қизларнинг новини туя қиладиган бўлишибди-да!

Этъен ва Шаваль тўсатдан лов этиб кетган беихтиёр қазаб билан бир-бирига қарашди. Этъен мулоҳаза қилиб ўтирмай, ўзини ҳақоратланган деб ҳис қилди. Орага жимлик чўкди; кейин ҳамма ишга киришди. Секин-аста йўлаклар тўла бўшлади, одамлар гуруҳ-гуруҳ бўлиб, қатламларда, ҳар бир штольнянинг охирида ишлашарди. Очофат шахта ҳар кунги насибаси — етти юзга яқин ишчини ютганди. Энди уларнинг ҳаммаси бу улкан қумурсқа инида меҳнат қилишар, ҳаммаёққа йўл очишар, қўртлар ғалвирак қилиб ташлаган чарик дарахтдек уни буйдалашарди. Улар юракни сиқувчи сукунатда чуқур қатламларни бурдалардилар. Қўйга қулоқ тутиб, бу ҳашарот — одамларнинг ҳаракатини, нўлат арқон қўштагини, кўмир билан чиқиб-тушаётган кажаваларнинг шақирлашини, энг чуқур йўлакларда кўмир қазинётган қуролларнинг овозини эшитиш мумкин эди. Тасодифан орқасига қайрилган Этъен яна Катрина билан рўнарама-рўпара бўлиб қолди. Лекин бу сафар у қизнинг етилиб келаётган сийналарининг дўппайиб турганини пайқади-да, у баданини текканда бутун вужудини ловиллатган ҳароратнинг қердан чиққанлигини дарров тушунди.

— Ис, қиз боламидинг? — деди у секингина, ғоят ажабланиб.

Қиз қизирмай, қувноқлик билан жавоб берди:

— Пулмаси-чи!.. Дарров била қолмадинг-а, роса гўл экансан да!

Кончилардан тўрт киши бирин-кетин жойлашиб, кўмир қазиладиган жойни тепасигача эгалладилар. Уларни бир-биридан ажратиб турадиган нарса илгакли тахта бўлиб, ушатиб олинган кўмир унга қуйиларди; ҳар бир ишчи узунасига тахминан тўрт метрча жойни эгаллаганди. Кўмир қатлами жуда юпқа бўлиб, мана шу жойда зўрға эллик сантиметрга етарди; кончилар тиззалари, тирсақлари билан силжишар, равоқ ва девор орасига қапишиб, ҳар бир бурилишда елкаларини қаттиқ уриб олардилар. Улар шахтада ишларканлар, ёнбошлаб ётиб бўйнилларини чўзишар, қўлларини кўтариб, чўкични ишга солар эдилар.

Захария пастда эди; унинг тепасида Левак билан Шаваль жойлашганди, ва ниҳоят, энг тепада Маэ ишларди. Улар чўкич билан шифер қатламидан марза қилишар, кейин кўмир қатламини икки еридан тик кесишарди-да, юқори қисмини темир курак билан кўчириб олардилар. Кўмир ёғли эди, тоғ жинси уваланиб кетиб, ишчининг қорни ва оёқларига тўкиларди. Бу бўлаклар тахта тутилгани учун уларнинг оёқлари остида уйилиб, кончи худди тор кавакка тиқиб қўйилгандек кўринмай қоларди.

Ҳаммадан ҳам Маэга қийин эди. Тепада ҳарорат ўттиз беш даражага етарди, ҳаво кирмасди, димликка чидаб бўлмасди. Иш жойини ёритиб турсин учун у лампочкасини боши тепасига осиб қўйганди; бу чироқ бошини шу қадар қиздирардики, бор қонни ёндирувчи лавадек аъзойи баданида югурар эди. Лекин намлик ёмон азоб берарди. Худди Маэнинг тепасидан, юзидан бир неча сантиметр нарида ер ости суви сизиб чиқиб, йирик-йирик томчилар қандайдир бир маромда бир жойга тушарди. Бўйнини буриш ҳам, бошини орқага ташлаш ҳам фойда бермасди: сув тинимсиз томиб, юзини юварди. Чорак соатдан кейин у тер ва сувдан шалаббо бўлиб кетди; кийимларидан худди кир ювилаётганда чиқадигандек буғ кўтарилар эди. Уша тонг палласида чолнинг кўзига бир томчи сув тушгач, у ҳатто сўкиниб ҳам қўйди. Маэ ишни ташлагиси келмай, чўкични шу қадар зарб билан урардики, аъзойи бадани дағ-дағ титрарди. Икки кў-

мир қатлами орасида ётган Маъ қалин китоб орасига тушиб қолиб, гўё ҳозир эзилиб кетадиган ўсимлик битига ўхшарди.

Ҳеч ким чурқ этмасди. Ҳамма ишларди; атрофда худди узоқдан келаётгандек бетартиб, бўғиқ-гурсиллаган овозлар эшитиларди. Товушлар қилт этмай қолган ҳавода ақс садо бермай аниқ янграрди. Қоронғилик учиб юрувчи кўмир чанги ва газдан яна ҳам қуюқлашиб, кўзни толдирарди. Сим тўр билан қопланган лампочкалар хирагина қизғиш нур сочарди. Ҳеч нарсани ажратиб бўлмасди; юқорига қараб кетган штольня ясси ва қийшиқ бўлиб, бир неча йилдан бери қалин қурум босган кенг печка трубасига ўхшаб кўришиб турарди. Қоп-қоронғи труба ичида аллақандай гавдалар куйманишарди. Заиф, милтиллаган нур қоронғиликда гоҳ сўлқилдоқ сонга, гоҳ чайир қўлга, гоҳ гўё талонга бораётган ёвуз махлуқники сингари таниб бўлмас даражада суркалиб кетган, ғазабнок башарага тушарди. Баъзан қоронғиликда қўққисдан ёритилган катта кўмир бўлақлари, тахта тўсиқлари, худди кристалл қирраларидек ялтираган кўмирлар кўришиб қоларди. Яна ҳаммаёқни зулмат босарди; фақат чўкичларнинг тўқир-тўқири, шахтёрларнинг чидаб бўлмайдиган димлик ва ер ости сувларидан қийналиб, оғир-оғир нафас олишаётгани-ю, жаврашлари эшитиларди холос.

Якшанбадаги ичкиликбозликдан сўнг латтадай бўшашиб қолган Захария тезда тиргаклар қўйишни баҳона қилиб, ишни тўхтатди; бу эса унга ором олиш имконини берди; у паришонхотирлик билан қоронғиликка тикилганча оҳиста ҳуштак чалиб ўтирди. Кончилар орқасида уч метрча бўм-бўш жой қолганди; шунга қарамай иш вақтини қизганган ишчилар хавфхатарни унутиб, кавланган жойни мустаҳкамкамлашни ўйламаган эдилар.

— Ҳой, олифта! — кичқирди ёшгина йигит Этьенга. — Қани, тиргакларни бу ёққа келтир!

Белкурак билан ишлашни Катринадан ўрганиб олган Этьен кечадан қолган тахталарни элтиб бера бошлади. Тахталар ҳар бир кўмир қатламининг қалинлигига мослаб кесилган бўлиб, уларни бу ёққа одатда эрталаб туширишарди.

— Тезроқ қимирласанг-чи, ҳе жин урғур, дангаса! — деб қичқирди Захария, янги юккашнинг кўмир уюмлари орасидан тўртта чорқирра эманни кўтариб шалвиллаб келаётганини кўриб.

Кончи чўкич билан равоқ ва деворни ўйди, кейин улкан тошни ушлаб турадиган чорқирра тиргакларни икки томондан қўйиб қўйди. Тушликдан кейин ремонтчи ишчилар йўлакларни тозалаб, қазиб олинган қатлам ўрнини ёғочлар билан тўлдириб, арава ғилдира тиш учун юқориги ва пастки йўлакларнигина қолдириб кетишарди.

Маэ вайсашдан тўхтади. У ниҳоят улкан бир тош-кўмирни кўчириб олди. У қўйиб келаётган терини епги билан артди-да, орқасидаги Захария нима қилаётганини билиш учун қайрилиб қаради.

— Қўй,— деди у. — Нонуштадан кейин қараб қўямиз. Ишнинг пайдан бўлайлик, бўлмаса, мўлжалдаги вагонеткаларни тўлдира олмай қоламиз.

— Гап шундаки,— ғўлдиради йигит,— бу ер чўкаётганга ўхшайди. Қара, ёрилибди ҳам. Босиб тушмасайди деб кўрқаман.

Аммо отаси елкасини қисиб қўя қолди. Арзимас иш-ку! Босиб қолмайди! Қолаверса, улар бунақа ҳодисани биринчи марта кўришлари эмас-ку, бир иложи қилинар. Ниҳоят, жаҳли чиқиб кетди-да, ўғлини штольнянинг ичкарасига юборди. Лекин бошқалар ҳам ишни тўктатишган эди. Чалқанчасига ётган Левак тош тушиб, қонатиб юборган чап қўлининг бармоғига қараб сўкинарди. Шаваль шамол тегсин деб, жон-жаҳди билан кўйлагини ечди-да, белигача яланғоч бўлиб олди. Ҳаммалари кўмир чангидан қоп-қора бўлиб кетишганди; кўмир гарди тер билан қоришиб, юзларидан қорайиб сизиб оқарди. Биринчи бўлиб ишга Маэ киришди. Унинг боши қазилаётган тоғ жинслари билан баробар бўлиб қолганди: сув пешонасига чакиллаб томиб, ахири бошини тешадигандек туюларди.

— Уларга эътибор қилиш керак эмас,— деди Катрина Этьенга.— Улар доим гижиллашгани-гижиллашган.

Қиз яна илтифот билан ўргатишга киришди. Тепада пайдо бўладиган ҳар бир вагонетка махсус жетон билан белгиланган бўлиб қабул қилувчи шунга қараб

уни артель ҳисобига ёзиб қўярди; шунинг учун ҳам ҳар бир вагонеткани синчиклаб тоза кўмир билан тўлдириш керак, акс ҳолда вагонеткаларни қабул қилмасликлари мумкин.

Қоронгиликка кўзлари ўрганиб бораётган йигит қизнинг оппоқ, қонсиз юзларига тикилди, Этьен унинг ёшини аниқлай олмай гаранг эди; кўринишидан ўн икки ёшда дейиш мумкин,— қиз шу қадар нимжон эди. Шунга қарамай, анча ёшга бориб қолгандек туюлар, ўзини эркаклардек тутар, содда, шарттаки эди; бу эса Этьенни бир оз хижолатга соларди. Унинг болаларниқига ўхшаш боши, чепчиги чаккаларига тушиб турган рангсиз бир бурда юзи Этьенга ёқмади. Лекин бу қизнинг кучлилиги, тиришқоқлиги ва чапдастлиги Этьенни ҳайратда қолдирар эди. Қиз унга қараганда, курагини бир маромда енгил ишлатиб, вагонеткани тезроқ тўлдирадди; кейин запти билан бир итарарди-ю, аравани қияликкача текис ғилдиратиб борарди, ҳеч қаерга урмасдан пастак равоқлар остидан осонгина ўтарди. Этьен эса, ҳар қадамда қоқилар, вагонеткаси рельсдан чиқиб кетавериб, роса хуноб бўлар эди.

Сирасини айтганда, йўл ноқулай эди. Унгирдан қияликкача олтмиш метрча бўлиб, ишчилар ҳали уни кенгайтиришга улгуришмаганди, йўл худди хандаққа ўхшаб, равоқлари нотекис, у ер-бу ери дўнглик эди. Юк ортилган вагонетка баъзи жойлардан зўрға ўтар, шунда юккаш бошини уриб олмаслик учун чўккалаб юришга мажбур бўларди. Бунинг устига тиргаклар эгилиб, баъзилари ёрилиб кетган эди. Улар ўртасидан ёрилган бўлиб, баъзи жойда синиқ қўлтиқтаёқдек қўққайиб турарди. Бирон ерини тимдалаб кетмаслиги учун ниҳоятда эҳтиёт бўлиб ўтиш керак эди; ўз оғирлиги билан йўгон эман ёғочларини парча-парча қилиб юбориши мумкин бўлган чўккан жинслар остида одамлар доимо ажалим етмаганмикан, дея юракларини ҳовучлаб эмаклаб борардилар.

— Яна! — кулиб деди Катрина.

Этьеннинг вагонеткаси энг қийин жойда издан чиқиб кетди. У нам ерга ботиб кетган рельсдан сира тўғри ғилдиратиб бора олмасди; хуноби ошиб сўкинар, бор кучини сарфлаб, ғилдиракни изга қўяман, деб беҳуда уриниб ҳалак бўлар эди.

— Э, тўхтаб тур,— гапида давом этди қиз.— Жуноб бўлаверсанг, ҳеч нарса қила олмайсан-да.

У лиц этиб вагонетка тагига кирди-да, бир зўр бериб, аравани кўтарганча изга қўйди; вагонетка етти юз килограмм эди. Қойил қолган ва уялиб кетган Этьен бир нималар деб кечирим сўради.

Катрина унга йўлакнинг икки томонидаги тирговчуларга оёқни қандай тираш кераклигини кўрсатди. Гавда олдинга эгилган, қўл шундай чўзилган бўлиши керакки, вагонеткани қўл ва оёқлар қувватини йиғиб итариш мумкин бўлсин. Ана шундай боришларнинг бирида Этьен унинг кетидан юриб, қизнинг бутун гавдасини букиб, қўлларини паст тушириб кетаётганини кўрди, шу туришида қиз худди циркларда ўйнайдиган митти одамлардек эмаклаб юрганга ўхшарди. Қизнинг юзларидан тер қуйиб, ҳансирар, бўғинлари қирсиллар, лекин у асло зорланмай ишлар, гўё эмаклаб юриб ҳаёт кечириш — биз бахти қароларнинг қисмати, дегандек парво қилмас эди. Этьен эса ишни удалай олмасди. Бошмоқлари қисар, бошини эгиб, букчайиб юришга мажбур бўлганидан аъзойи бадани зирқирар эди. Бир неча минутдан кейин бу аҳвол чинакам азобга, чидаб бўлмас қийноққа айланди; шунда у бир лаҳза бўлса ҳам ором олгани, белининг чигалини ёзгани тиз чўкиб ўтирди.

Енлама штольняда Этьенни янги иш кутарди: Катрина вагонеткаларни бир-бирига қандай улашни ўргата бошлади. Қиямаликнинг пастиди ҳам, юқорисида ҳам штольнядаги ҳамма қатламларга хизмат қилувчи биттадан ёрдамчи ишчи турарди,— биттаси вагонеткани тепадан туширар, иккинчиси уни пастдан кутиб олар эди. Бу ўн икки ва ўн беш ёшли жулдирвоқи ўспиринларнинг оғзидан боди кириб, шоди чиқарди; уларни огоҳлантириш учун батарроқ сўкиниб, бақирини керак эди. Пастда бўш вагонетка пайдо бўлиши биланоқ қабул қилувчи дарҳол сигнал берар, юккаш аёл тўла вагонеткани иларди, қабул қилувчи дастакни босарди, шундан кейин тўла вагонетка ўз оғирлиги билан бошқасини — бўшини юқорига кўтариб, ўзи пастга тушар эди. Пастки йўлакларда юк ортилган вагонеткалар поезд бўлиб кетарди; уларни отлар кўтарма машина ёнига тортиб келишарди.

— Эй, шайтонлар! — қичқирди Катрина тўсинлар билан мустаҳкамланган узунлиги юз метрча келадиган йўлакни бошига кўтариб, унинг ҳар бир сўзи гўё улкан карнайда айтилаётгандек қаттиқ-қаттиқ эшитиларди.

Афтидан, ёрдамчи ишчилар дам олишаётган бўлса керак — ҳеч ким жавоб бермади. Ҳамма қатламларда юк ташиш тўхтаган. Би боланинг ингичка овози эшитилди:

— Ростини айтсам, ҳаммаси Мукетта билан ўйнаш-япти.

Ҳаммаёқдан гулдурос қаҳқаҳа эшитилди, бутун шахтадаги юккаш аёллар биқинларини ушлаб, қотиб-қотиб кулишарди.

— Ким у? — сўради Этъен Катринадан.

Катрина бу Лидия, ҳар балони кўрган қиз, деб жавоб берди; қўллари қўғирчоқникидек нозик бўлса ҳам вагонеткаларни ғилдиратишда катта хотинлардан қолишмайди. Мукетта бўлса, бир йўла бир неча йигит билан юриши мумкин.

Мана, қабул қилувчининг овози яна янгради; у вагонеткани илиб юборинглар, дея қичқирди. Пастдан штейгер ўтганга ўхшайди. Тўққиз қатламнинг ҳаммасида иш қизиб кетди: фақат ёрдамчи ишчиларнинг бир хилдаги жавоблари-ю, юккаш аёлларнинг пишиллашлари эшитилади холос; ниҳоятда оғир ишдан тинкалари журиган бу аёллар бияларга ўхшаб кўпикка ботиб, йўлакка етиб келишди. Уларнинг шу туриш-турмушида ҳайвоний бир нима бор эди; эркакча шимда сонлари тирсиллаб, орқалари семиз отнинг сағрисидай дўппайиб, эмаклаб ишлаётган қизларни кўрган шахтёрларнинг дафъатан эркакликлари қўзиб кетар эди.

Этъен ҳар қайтганида ўнгирининг дим ҳавосидан лоҳас бўларди, чўкичларнинг тинимсиз бўғиқ тўқ-тўқини, ишдан силласи қуриган кончиларнинг чуқур ва оғир ҳансирашларини эшитарди. Тўртови ҳам ечиниб олган, қоп-қора лойга айланган кўмирга бошидан-товонигача буланган эди. Юк босиб қолган Маэни бир марта қутқариб олишди; тахтани кўтариб, кўмирни тушириб юборишди. Захария билан Левак тобора қаттиқлашиб, ишни кундан-кунга оғирлаштириб юбораётган кўмир қатламини сўкишарди. Шаваль бўл-

са баъзан қайрилиб қарар, чалқанча ётиб олиб, Этьенни сўкиб кетарди, уни кўрди дегунча жини қўзирди.

— Сувилоунинг ўзи!.. Оддий бир қизчалик ҳам кучи йўқ!.. Вагонеткамни шундоқ тўлдириб юборавераман, деяпсанми? А? Сен қўлингни аяяпсан... Менинг гапим эсингда турсин! Агар сенинг шарофатинг билан бирорта вагонетка қабул қилинмай қолгундай бўлса, сендан ўн суни чегириб оламан!

Ҳигит бир оғиз ҳам жавоб қайтармас, жилла қурмас мана шу оғир ишни топганидан суюниб юккаш билан кекса ишчининг қўпол сўкишларига тишини тишига қўйиб чиқарди. Лекин энди қимирлашга унинг ҳоли йўқ эди: оёқлари шилиниб, қонаб кетган, аъзойи бадани дағ-дағ титрар, гавдасини аллақандай темир камар қисаётгандек эди. Унинг бахтига соат ўн бўлиб кончилар овқатланишга қарор қилиб қолишди.

Маэнинг соати бўлса ҳам унга қарамас эди. У зимзиё қоронғиликда ҳеч қачон, ҳатто беш минутга ҳам янглишмасди: ҳамма кўйлак билан блузкаларини кийиб олди. Улар штольнядан тушиб, тирсақларини тиззаларига тираб, тағларига тош ёки ҳода қўймасдан шахтёрчасига чўнқайиб ўтиришди. Кейин ҳар бири ўзича катта бурда нондан секин тишлаб, попушта қила бошлади; аҳён-аҳёнда кўмир қазувчилар бир-икки оғиз сўз ташлаб, эрталабки иш ҳақида гаплашиб қўйишарди. Катрина тик турганича кавшаарди; бирпасдан кейин нарироқда, рельслар орасидаги тиргакка суюниб ётган Этьеннинг олдига келди. Бу ер деярли қуруқ эди.

— Сен ҳеч нима емаяпсанми? — сўради қиз оғзи тўлалигидан зўрға галириб, унинг қўлида бир бурда нон бор эди.

Бирдан унинг эсига Этьеннинг тун бўйи бир тийинсиз ва балки бир бурда нонсиз юриб келганлиги тушиб кетди.

— Хоҳласанг, борини баҳам кўрамиз?

Этьен очликдан товуши титраб ҳеч нима егим келмаяпти, дея уни ишонтиришга уринди. Шунда Катрина қувноқлик билан деди:

— Э, агар ҳазар қилаётган бўлсанг... Шошмай тур! Мен фақат бир томонидан тишладим, сенга бўлса, бу ёғидан ушатиб бераман.

У нонни ўртасидан бўлди. Йигит ўз улушини олди, лекин ҳаммасини оғзига тикиб, бирданига ютиб қўйишдан ўзини зўр-базўр тийди; у қалтираётганимни қиз билиб қолмасин, дея қўлини ёнига қилиб турарди. Катрина яхши ўртоқдек хотиржамлик билан қорнини ерга қилиб, йигитнинг ёнига чўзилди-да, бир қўлини иягига тиради, иккинчи қўлида эса бутерброд бўлиб, дам-бадам тишлаб ерди. Ораларидаги лампочка уларни ёритиб турарди.

Катрина индамай Этьенга разм солди. Афтидан, унга йигитнинг қора мўйловли нафис, нозик юзи ёқар эди.

Қиз жилмайиб қўйди.

— Шундай қилиб, механикман, дегин, темир йўлдан ҳайдаб юборишибди-да. Нима учун?

— Бошлиқнинг юзига тарсаки тортиб юборганим учун.

Бундай жавобдан Катрина ҳанг-манг бўлиб қолди: у итоат этишни ва сўзсиз қулоқ солишни мерос қилиб олган эди.

— Очиғини айтсам, мен ўшанда маст эдим, — давом этди Этьен, — кўп ичганимда эса қутуриб, ўзимни ҳам, бошқаларни ҳам еб қўйсам дейман... Ҳа, икки рюмка ичсам, бас, одамни ғажигим келаверади... Кейин икки кунгача касал бўлиб юраман.

— Ичиш керак эмас, — деди қиз жиддий.

— Хотиржам бўл, мен энди ўзимни биламан!

Этьен бошини чайқаб қўйди. У ароқни ўлгудек ёмон кўрар эди, аъзойи бадани ичимлик билан оғуланган бутун бир алкашлар авлодининг ёш вакили қалбида қайнаган нафрат бор эди унда; ҳар бир томчи ароқ унинг учун заҳарга айланарди.

— Фақат ойимни ўйлаб, кўчага ҳайдалганимга ачинаман-да, — деди у оғзидаги нонни ютиб. — Онамнинг тирикчилиги оғир, мен нима бўлса ҳам аҳён-аҳёнда оз-моз пул юбориб турардим.

— Ойинг қаерда туради?

— Парижда... Гут-д Ор кўчасида. Кир ювади.

Орага сукунат чўкди. Этьен онасини эслаб, шундай фалокатга йўлиқишга ўзим сабабчи бўлдим-а, энди ҳолим нима кечаркин, деб ўйлаган сари уни ғам-ғусса босарди-ю, қора кўзлари ёшга тўларди. У бир лаҳза кўзларини, қоронғи штольня қаърига тикди.

Мана энди шу ерда, мана шу чоҳ тубида, ер огирлигини солиб турган шу дим жойда унинг кўзи олдидан ёшликда кўрганлари ўта бошлади: отаси ташлаб кетган онаси ёш, чиройли эди, онаси бошқа эрга теккандан кейин отаси яна онаси олдига қайтиб келганди; икки эркак орасидаги турмуш онасини абгор қилди; бечора она улар билан ичишавериб, тобора расволик ботқоғига ботиб борарди. Этьен ўзлари яшайдиган кўчани ва ҳамма тафсилотларни: кирхонадаги ифлос кийимлар, сурункали мастлик, ёноқ суякларини қарсиллатувчи шапалоқларни эслади.

— Энди,— деди у оҳиста,— ўттиз судан орттириб, қандай ҳам ёрдам қилардим. Оч қолиб, ўлиб кетса керак.

У умидсизликка тушиб, елкасини қисиб қўйди-да, яна нонидан тишлади.

— Ичасанми?— сўради Катрина фляганинг қопқоғини очар экан.— Бунда кофе бор, сенга зиён қилмайди. Қуруқ ноннинг ўзини есанг, томоғинг қақраб қолади.

Лекин Этьен кўнмади; ноннинг ярмини олганим ҳам бўлар, деб ўйлади. Катрина қистайверди ва ниҳоят одатдаги қувноқлиги билан деди:

— Яхши, шунчалик сертакаллуф бўлсанг, майли аввал ўзим ичаман... Аммо энди қўлимни қайтаролмайсан, агар қайтарсанг, ношукурлик бўлади.

Кейин Катрина чўккалаб туриб, унга флягани узатди. Шунда Этьен икки лампочка ёритиб турган бу кизни жуда ҳам яқиндан кўрди. Нима учун илгари уни хунук деб ўйлаган экан? Энди бутун юзини қора кўмир гарди қоплаган пайтда қиз унинг кўзига айниқса жозибадор бўлиб кўринди. Гўштдор лаблари ним очик; оппоқ тишлари чўзинчоқроқ қора юзини бўрттириб, ярақлаб турарди; йирик кўзлари мушукники сингари кўкиш ёнарди, чепчигидан чиқиб турган бир тутам малла сочи қулоқларини қитиқларди шекилли, қиз қиқирлаб куларди. Энди у сира ёш қизчага ўхшамас, бемалол ўн тўрт ёшда дейиш мумкин эди.

— Шу билан кўнглинг тўладиган бўлса майли,— деди у бир-икки хўплаб, флягани Катринага қайтариб бераркан.

Қиз бир хўплади-да, уни ҳам шундай қилишга

мажбур этди, искимизга ҳам баб-баравар тегсин, деди; фляганинг мўъжазгина оғзи лабдан лабга бориб келиши уларни қизиқтириб қолди. Бирдан унинг миясига кизни бағрига тортиб, ўпиб олиш фикри келди. Қизнинг кўмирдан қорайган қонсиз-қизғиш дўрдоқ лаблари йигитни гижгижларди. Лекин у ҳайиқиб, журъат қилолмади. Эъён Лиллда фоҳишалар билан, бунинг устига энг расво аёллар билан муносабатда бўлган эди, шу боисдан ишчи билан, бунинг устига ота-она бағридан чиқмаган қиз билан қандай муносабатда бўлишни билмасди.

— Ун тўртларда бўлсанг керак-а?— сўради Эъён яна нондан тишларкан.

Қиз хафа бўлишига оз қолди. Йигитнинг бу гапи кизни ажаблантирди.

— Нега ўн тўрт бўларкан энди! Ун бешга тўлдим!.. Тўғри, бўйим паст, биз томоннинг қизлари ўзи шунақа, жуда секин ўсишади.

Йигит сўрайверди, қиз бўлса, мақтанчоқлик ва андишанинг юзига бормай айтиб бераверди. Афтидан, қиз эркаклар билан хотинлар ўртасидаги алоқалардан яхши хабардор бўлса керак, лекин айни чоқда Эъён қизнинг бокиралигини, у ҳали маъсума бўлиб, носоғлом шароитда яшаётгани учун ўсмай қолганини сизди. Эъён Катринани уялтириш мақсадида яна Мукетта ҳақида гап очган эди, қиз унга оҳиста, очилиб-сочилиб жуда ҳам антиқа воқеаларни гапириб берди. Ҳа! Мукетта бунақа ишларга устаси фаранг! Йигит ундан ўзининг ҳам маъшуқанг бордир, деб сўраганида эса, Катрина ҳазил қилиб, оймларни хафа қилгим келмайди, лекин бир кун эмас бир кун бу савдо менинг ҳам бошимга албатта тушади, дея жавоб берди. У тердан ҳўл бўлган кўйлаги этини жунжитганидан букчайиб олди ва шароитга, одамларга бўйсинишга тайёрман дегандек итоаткорона, мулойим нигоҳ ташлади.

— Ҳамма билан бирга турганингдан кейин ўзингга маъшуқ топиб олиш осон, а, шундай эмасми?

— Албатта.

— Қолаверса, буни ҳеч кимга зиёни ҳам тегмайди. Бу ҳақда руҳонийга ҳам гапириб ўтирмайсан.

— Руҳонийга бало борми, тупурдим мен унга!.. Лекин бу ерда ўзимизнинг Қоравойимиз бор.

— Қоравойнинг ким бўлди яна?

— Битта кекса шахтёр-да, у шахтага келади-да, адашган қизларнинг адабини беради.

Эъён мени мазах қиялпсанми, дегандек қизга қаради.

— Сен ҳам шунақа бемаъни гапларга ишонаверсанми? Демак, сен ҳали ҳеч нимани билмас экансан-ку!

— Нега энди, мен ўқишни ҳам, ёзишни ҳам билман. Бу бизга фойдали; лекин дадам билан ойимларни ёшликларида ўқитишмаган.

Очигини айтганда, қиз жуда дилбар эди. Эъён қиз бутербродини еб бўлиши биланоқ уни қучоқлаб, қипқизил, қалин лабларидан ўпиб олишга жазм этди. Лекин у ҳайиқди, зўрлик қилиш ҳақидаги фикр унинг томоғини бўғарди. Бу бокира қиз устидаги эркакча костюм, куртка ва чолвор Эъённинг ҳисларини қўзғар ва хижолат қилар эди. У охирги тишламни ютди. Флягадаги кофедан ҳўплади-да, уни ичиб қўй дегандек қилиб, қизга узатди. Энди ҳал қилувчи лаҳза келди; Эъён ўтирган кўмир қазувчиларга хавотирланиб, кўз қирини ташлаб чиқаётган ҳам эдики, қўққисдан чоҳ ичида аллакимнинг қораси кўринди-да, йўлакни тўсиб қўйди.

Шаваль бир неча минутдан бери уларни кузатаётган эди. У яқинлашиб келди-да, Маэ кўрмаётганига ишонч ҳосил қилгач, ерда ўтирган Катрина олдига борди, қизнинг елкасидан тутиб, бошини орқасига энгаштирди-да, қўполлик билан ўпиб, қизнинг оғзини ёпди. Шаваль ўзини гўё Эъённи пайқаманликка солиб, бу ишни жуда бамайлихотир қилди. Унинг бўса олишида хусусий мулк эгасининг туйғуси, рашқдан туғёнга келган қатъият бор эди. Қиз ғазабланди.

— Қўйвор мени, қўйвор, деяпман!

Шаваль қизнинг бошини ушлаб тураркан, унинг кўзларига тикилди. Сариқ мурти билан даккам-дуккам соқоли унинг танқайган катта бурни қўнқайиб турган қора юзида сузиб юргандек туюлди. Ниҳоят, у қизни қўйиб юборди-да, индамай нари кетди.

Эъённинг аъзойи бадани жимирлаб кетди. Ниманидир кутиб жуда аҳмоқлик қилди-да. Турган гапки, у энди қизни ўпмайди: Катрина яна Шаваль сени жи-

гинга тегиш учун мени ўпди, деб юрмасин тагин. Иззат-нафси огриган Этьен аламига чидолмай тўлғарди.

— Нега ёлгон гапирдинг?— сўради Этьен оҳиста,— ошигинг шуми?

— Йўғ-с, худо урсин!— деди қиз хитоб қилиб.— Орамизда ҳеч қандай гап йўқ. Бир кулги бўлсин деб шундай қилди-да... У ҳатто ўзи бу ерлик ҳам эмас, Па-де-Каледан келганига ярим йилча бўлди холос.

Яна ишга киришни керак эди; иккови ҳам ўрнидан турди. Катрина унинг тумтайганини кўриб, хафа бўлгандай бўлди. Қиз, шубҳасиз, Этьенни Шавалдан чиройлироқ, деб билар, балки ундан афзал ҳам кўрар эди. Эркаловчи бирор сўз айтиб, уни овутиш иштиёқи Катринага тинчлик бермасди; у йигитнинг кенг оқиш нарса ичида кўкиш ёнаётган лампочкасига таажжубланиб қараб турганини кўриб лоақал унинг кўнглини кўтариб қўймоқчи бўлди.

— Юр, мен сенга бир нарса кўрсатаман,— дўстона оҳангда деди қиз.

Қиз йигитни ўнгирининг энг ичкари жойига олиб борди-да, унга кўмир қатламидаги ёриқни кўрсатди. У ерда нимадир тақилларди, қушларнинг чуғур-чуғурига ўхшаган заиф товуш эшитилиб турарди.

— Қўлигини тут, шабадани сезяпсанми?.. Бу — конгази.

Этьен ханг-манг бўлиб қолди. Э, ҳамма нарсани кўпориб, кўкка совурадиган даҳшатли нарса бу ёқда экан-да! Қиз бу сафар газининг кўплигини, лампочкаларнинг мовий рангда ёниши ҳам шунданлигини кулиб-кулиб гапириб берди.

— Жим бўласанларми-йўқми, ишёқмаслар!— ўшқирди Маэ.

Катрина билан Этьен шоша-пиша вагонеткаларини тўлдириб, энгашганларича штольнянинг қинғир-қийшиқ устунлари орасидан эмаклаб, араваларни қиялик томонга итариб кетишди. Икки марта бориб-келганларидан кейин улар қора терга ботиб, яна суяклари қирсиллай бошлади.

Шахтада кончилар ишни бошлаб юборишди. Улар шамоллаб қолмаслик учун кўпинча нонуштани чўзиб ўтиришмасди; қуёш нури тушмайдиган жойда ейилган бутербродлар ошқозонга тошдек ботарди. Енбошлаб

олган ишчилар иложи борича вагонеткалардан кўпроқ тўлдириш иштиёқида ёниб, тобора шиддат билан кўмир қатламларини кесардилар. Шундай оғир меҳнат туфайли кўпроқ пул топиш иштиёқи қаршиқисида бошқа ҳамма нарса уч пул эди. Кўмир қазувчилар қўл-оёқларини шишириб юборадиган сув оқиб тушаётганини ҳам пайқамас, ноқулай ҳолатда туриб ишлашдан баданлари уюшиб қолаётганини, дим қоронғилиқда ер остидаги ўсимлик каби сўлиб бораётганликларини ҳам сезишмас эдилар. Лекин вақт ўтган сари ҳаво лампочкаларнинг исидан, баданлардан чиқаётган бугдан, газдан кўпроқ заҳарланиб борарди, худди ўргимчак уясидек кўзни тўсарди,— бу ҳавони фақат кечаси вентиляторгина тозалай оларди. Кўмирчилар эса торгина инларида ётиб олганларича, ер оғирлиги остида эзилиб, ичлари ёниб-куйиб, ҳамон қазиганлари-қазиган эди.

У

Маэ соатини блузасининг чўнтагида қолдириб келгани учун тусмоллаб деди:

— Соат бир бўлиб қолди... Бўлдингми, Захария?

Иигит тиргакларни маҳкамлашга ҳозиргина киришган эди. Ишнинг энг қизғин пайтида у чалқанча ётганича у ёқ-бу ёққа қараб, кеча қандай соққа ўйнаганини эслаётган эди. У ҳушёр тортиб жавоб берди.

— Ҳа, бугунга етар, эртага яна кўрамиз.

Кейин у ўзининг ўнгирдаги жойига қайтди. Левак билан Шаваль ҳам чўкичларини ташлашди. Танаффус бошланди. Ҳаммалари яланг қўллари билан юзларини сидириб артишди-да, қатлам-қатлам бўлиб осилб турган тошкўмир қоясига қарашди. Ҳамма фақат ўз ишини гапирарди.

— Бахтимизни қара-я,— деди Шаваль,— нақ кулаб тушай деб турган қатламга дуч келибмиз-а!.. Пудратга олаётганимизда буни ҳисобга олмамиз ҳам.

— Муттаҳамлар!— вайсади Левак.— Доим бизга фириб беришни ўйлашади.

Захария кулиб юборди. У на ишни ва на бошқа нарсани ўйларди, аммо Ширкатни сўка бошлашса, ҳамиша ҳузур қиларди. Маэ тоғ жинсларининг сифати ҳар йигирма метрда ўзгариб туришини бамайли-

хотирлиқ билан тушунтирди. Одилона айтиш керакки, олдиндан ҳеч нарсани кўриш мумкин эмас. Лекин анави иккови бошлиқларни сўкаётганлигидан хавотирланиб, у ёқ-бу ёққа қараб олди-да, деди:

— Секин, ҳей! Бўлди!

— Тўғри айтасан,— деди Левак ҳам овозини пайсайтириб,— бу хавфли.

Гўё акционерларга қарайдиган бу кўмир қатламларининг ҳам қулоғи бордек, улар шу ерда, шу чоқ тубида ҳам қақимчилардан безиллашарди.

— Нима бўлса, бўлсин,— деди баланд овозда Шаваль хезланиб,— агар шу чўчқа Дансарт яна менга анави сафардагидек муомала қилгундай бўлса, қорнига гишт билан тушираман... Ахир мен у топган пулини нозикбадан хонимчаларга сарфлашига халақит бермаяпман-ку?!

Бу сафар ҳам Захария ичаги узилгундек бўлиб кулди. Бутун шахта бош назоратчи билан Пьерроннинг хотини орасидаги ишқий хангомаларни гап-сўз қилиб юрар эди. Ҳатто штольня тубида белкурагига суяниб турган Катрина ҳам кулавериб, биқинини ушлаб қолганди; у Этьенга гап нимадалигини икки оғиз сўз билан тушунтирди. Бу гаплардан кўрқиб кетган Маэ дарғазаб бўлиб қичқирди:

— Учир овозингни!.. Шошмай тур, ҳали қўлимга тушиб қоларсан!

У гапини тугатмасиданоқ юқориги штольнядан қадам товуши эшитилди. Шу ондаёқ конларнинг мудифи инженер Негрель,— уни ишчилар ўзаро кичкинтой Негрель дейишарди,— бош штейгер Дансарт билан бирга келиб қолди.

— Мен нима дедим сенларга?— пичирлади Маэ.— Худди ер остидан лоп этиб чиққандек пайдо бўлишадия!

Поль Негрель жаноб Энбонинг жияни бўлиб, йигирма олти ёшларда, ориқдан келган, жингала соч, қора мўйловли, чиройлиқкина йигит эди. Қирра бурни билан ўйноқи кўзлари уни сассиққузанга ўхшатса, мулойимлиги ва бир оз шубҳачилиги эса ишчилар билан гаплашганида уни қатъий ва такаббур қилиб кўрсатарди. У ҳам ишчиларга ўхшаб кийинган, ўшалар сингари кўмирга беланган эди. Одамлар орасида ҳурмат қозониш учун Негрель ҳайратомуз жасорат кўр-

сатишга ҳаракат қилар — энг хавфли жойларга борар, шахтанинг босиб қолиши-ю, кон газининг портлашидан тап тортмас эди.

— Шу ерда, а, тўғрими, Дансарт? — деб сўради у.

Юзи лўпчи, бурни гўштдор, белгиялик катта штейгер сезгир одам бўлиб, ўта хушомадгўйлик билан жавоб берди:

— Ҳа, жаноби Негрель... Ҳув ана, бугун эрталаб ишга олган одамимиз.

Иккови штольня ўртасига тушди. Этьенга яқинроқ келишни буюришди. Инженер ўзининг лампочкасини кўтариб, унинг юзига тикилди, аммо ҳеч нима сўрамади.

— Яхши, — деди у ниҳоят. — Кўчада юрган нота-ниш кишиларни ишга олишса, жоним халқумимга келади... Марҳамат қилиб, бундан кейин бунақа иш бўлмасин.

Негрель ишнинг характери; юккаш аёлларни эркаклар билан алмаштириш зарурияти ҳақидаги гапларга қулоқ ҳам солмади. Кончилар яна чўкичларига ёпишишди, Негрель эса штольня равогини кўздан кечира бошлади. Бирдан у қичқириб қолди:

— Э, Маэ, менга қаранг, нима, жонларингдан тўйганмисизлар, дейман? Ахир ҳаммаларинг шу ерда кўмилиб қоласизлар-ку, жин ургурлар!

— Ҳечқиси йўқ, босиб қолмайди, — хотиржам жавоб берди ишчи.

— Қанақасига босиб қолмайди? Қатлам чўкаяпти-ку, сизлар эса тиргакларни икки метрдан ортиқ масофага қўяяпсизлар, ўшанда ҳам истар-истамас. Ҳаммангиз ҳам бир гўрсиз — мия пачоқ бўлса, бўлсин, аммо бир минутга ҳам қазишни тўхтатиб, равоқни мустаҳкамлайлик, демайсизлар. Дарҳол ҳаммаёғига тиргак қўйилсин! Тиргаклар икки ҳисса кўпайтирилсин, эшитяпсанларми?

Кўмир қазувчиларнинг, ҳаётимизга ўзимиз хўжайинимиз, дея қилган эътирозлари инженерни қутуртириб юборди.

— Шундайми ҳали! Бошларингдан айилгудек бўлсаларинг, оқибатига ҳам жавоб берасизларми? Албатта, йўқ! Бунинг учун Ширкат чув тушади, ўзларингни ёки хотинларингни боқиб ётади... Яна қайтараман,

мен сенларни яхши биламан: бир кунда ортиқча икки вагонетка кўмир қазийман, деб жонларингдан кечишдан ҳам тоймайсизлар.

Маэ ғазаби қайнаб кетишига қарамай, секин деди:

— Бизга етарли ҳақ тўлаганларида эди, биз ҳам тиргакларни яхшироқ кўядиган бўлармидик.

Инженер индамай елкасини қисди. У штольнянинг охиригача борди-да, пастдан қичқирди:

— Бир соат вақтларинг қолибди, ҳаммаларинг ишга тушинглар; огоҳлантириб қўйиңки, артедларингиз уч франк жарима тўлайди.

Инженернинг бу сўзларига жавобан ишчилар ҳасрат-надомат билан тўнғиллаб қўйишди. Шахтёрларни фақат нитизом — ҳамманн, ёрдамчи ишчидай тортиб, бош назоратчингача бир-бирига итоат этишга мажбур қиладиган харбий нитизомгина тутиб турарди. Шунга қарамай, Шаваль қаҳру ғазабини яшира олмади; Маэ ўқрайиб, уларни босишга ҳаракат қиларди, Захария бўлса, масхарабозлик билан елкасини учуриб қўйди. Бу жаҳаннамга тушганидан бери унда пинҳоний ғазаб уйғонган эди. У итоатгўй, мункайиб турган Катринага қараб қўйди. Бу қандай бедодликки, мангу қоронғилик қўйнида жонингни жабборга бериб ишласангу ҳатто нонга етадиган қақа ҳам тополмасанг?

Бу орада Негрель нуқул бошини иргитиб, маъқул ишорасини қилаётган Дансарт билан анча жойга бориб қолган эди. Кўп ўтмай яна уларнинг овози эшитилди; улар шахтёрлар ишлатаётган жойдан ўн метр пастда тўхташиб, тирговичларни кўздан кечира бошлашди.

— Айтяпман-ку сизга, оламини сув олиб кетса, тўпигига чиқмайди буларнинг! — қичқирди инженер. — Ўзингиз ҳам жуда яхши-да, жин урсин сизни! Демак, ҳеч нимага қарамас экансиз-да, а?

— Нега энди, нега қарамас эканман, — гўлдираб қолди бош штейгер, — доим қараб юраман. Битта гапни уларга минг марта айтишга тўғри келади.

Негрель қаттиқ бақирди:

— Маэ, Маэ!

Ҳамма пастга тушди. Инженер давом этди:

— Бу ёққа қаранглар. Шу тутиб турарканми?..

Қўл учида қилинган! Бу тиргович ҳеч нимага ярамай-

ди: шошмашошарлик билан қўйилгани кўриниб турибди. Ремонт бизга нега қимматга тушишини мана энди тушундим. Мендан кетгунча, эгасига етгунча қабилда иш тутасизлар! Кейин ҳаммаси қулаб тушадигу, Ширкат бир гала ремонтчи ишчиларни сақлашга мажбур бўлади... Мана бу ёққа қаранглар! Ахир бу ўлимнинг нақ ўзи-ку!

Шаваль бир нима демоқчи эди, лекин Негрель унинг оғзига урди.

— Қўйинг, нима демоқчи бўлганингизни биламан. Сизларга кўпроқ пул тўлашин, а, шундоқми? Хўп майли, фақат огоҳлантириб қўяйки, сизлар Правлениени тиргак қўйганликларинг учун алоҳида ҳақ тўлашга мажбур этсаларинг, у ҳам шунга мутаносиб равишда ҳар бир вагонеткага тўланадиган пулни камайтиради. Кўрамиз, бу иш сизларга манфаатли бўлармикин... Аммо ҳозирча ҳаммасини дарҳол қайтадан қўйиб чиқинглар. Мен эртага келиб кўраман.

У дўқ-пўписа қилиб, ҳамманинг юрагига гулгула солиб кетди. Унинг олдида хушомадгўйлик қилган Дансарт бир неча лаҳза тўхтаб, кўрслик билан ишчиларга деди:

— Мана, сенлардан келадиган иш шу-да, мени шарманда қилдинглар... Мендан уч франк жарима билан қутулиб бўсанлар! Энди эҳтиёт бўлинглар!

У кетиши билан Маэ ҳам ўз навбатида захрини сочди:

— Ҳа, ноинсоф, адолатсизлик ҳам йўли билан-да, худо беҳабар! Мен ётиғи билан гаплашишни яхши кўраман, фақат шу йўл билан келишиб олиш мумкин; бунақада одамни қонига ташна қилиб юборади-ку... Эшитдиларингми? Вагонеткаларга тўлашни камайтириб, тиргак қўйишга алоҳида берар эмиш! Пулимиздан шилиб қолишнинг янги усули бу!.. Эҳ, инсофсиз шайтонлар!

У кимдан аламини олишни билмай аланглади-ю, бирдан бекор турган Катрина билан Этьенга кўзи тушиб қолди.

— Сенлар менга тахта олиб берасанларми ё йўқми? Еки бу гаплар сенларга тегишли эмасми? Қараб туринглар ҳали, сенларни шундай ўйнатайки!

Этьен бу кўрсликка асло хафа бўлмасдан тўсин олиб келгани кетди, фақат бошлиқларнинг гапларидан

даргазаб бўлиб, шахтёрларнинг мўмин-қобиллигига ҳайрон қолди.

Левак билан Шаваль сўкина-сўкина жим бўлишди. Ҳамма, ҳатто Захария ҳам жон-жаҳди билан штольняни маҳкамлашга киришди. Ярим соат давомида фақат тўқир-тўқир зарбалару ёғочларнинг ёрилгани эшитилиб турди холос. Улар чурқ этишмас, фақат оғир-оғир нафас олишарди: улкан кўмир қояси уларнинг жигига тегар, агар иложини топишса, уни ағдариб, яна елка билан бир туртиб, жойига қўндиришни истар эдилар.

— Бўлди-е, — деди ниҳоят газаби қайнаб, чарчаб абжағи чиққан Маэ. — Бир ярим соат-а... Қанақа кун бўлди ўзи? Биз эллик су ҳам ололмаймиз!.. Мен кетаман, ҳаммаси жонимга тегди.

Иш тугашига ҳали ярим соат қолган бўлса ҳам Маэ кийина бошлади. Бошқалар ҳам унга эргашишди. Штольняни кўришнинг ўзиёқ уларнинг жинини қўзғарди. Юккаш аёл яна ишга киришган эди, уни чақирди; аёлнинг зўр бериб ишлаши уларнинг жаҳлини чиқарди: кўмирнинг оёғи бўлса, ўзи чиқиб келарди-я. Шундан кейин олтовлари асбобларини қўлтиқларига қисиб, аввалги йўлдан кўтарма машина томон юра бошладилар; у ергача икки километрча юриш керак эди.

Штольнянинг тор йўлагига етганда Катрина билан Этьен тўхташиб, пастга тушиб кетаётган кончилардан орқада қолишди. Улар кичкина Лидияни учратишди; қиз йўлнинг ўртасида тўхтаб, уларга йўл бўшатди-да, Мукеттанинг ғойиб бўлганини айтди; боя бурнидан қон келибди, қон жуда кўп оққанидан латта ҳўллаб босгани чошиб кетибди — шундан бери мана бир соат ўтибди, ундан дарак йўқ эмиш, қаёққа ғойиб бўлганини билмасмиш. Улар ўтиб кетишган, ҳаммаёғи булганган қиз чиллакдек оёқ-қўлларига зўр бериб, кучаниб аравани итаришда давом этди; у шу топда кучи етмайдиган нарсага ёпишган қора чумолига ўхшарди. Этьен билан Катрина эса пешоналарини чақа қилишдан чўчиб, елкаларини букчайтирганларича чалқанчасига сирпаниб тушишарди; улар шахтёрларнинг баданлари силлиқ қилиб юборган қоядан гизиллаб тушар эканлар, кончилар айтганларидек, орқалари ёниб кет-

маслиги учун вақт-вақти билан ёгочлар олдида тўхташарди.

Пастда ҳеч ким йўқ эди. Узоқда қизғиш чироқлар милтиллаб, йўлак муюлишида кўздан гойиб бўлади. Қиз-йигитнинг қувончидан асар қолмади, шу боисдан улар оғир ва ҳорғин едим ташлаб боришарди,— Катрина олдида, йигит кейинда. Лампочкалар тутарди. Этьен гира-ширада Катринани зўрга кўрарди. Бу ҳали қиз бела, деган фикр унга ноҳуш туюларди; мен аҳмоқ, ўзим ўнмасдан, Бировга ўптириб ўтирибман-а, деб хуноб бўларди. Шубҳасиз, Катрина уни алдаган: ҳалиги йигит унинг ўйнаши, у хилват жойларда йигит билан дон олишган; қадам олишининг ўзи ноҳўя. Этьен гўё қиз алдагандек ундак ўнқаланарди. Лекин шунга қарамай қиз минут сайин қайрилиб қараб, хавфли жойларни айтиб турар, гўё хушмуомалада бўлишга даъват этар эди.

Атрефда жон зоти йўқ,— аини ўйнаб-куладиган пайт-да! Ниҳоят улар йўлакнинг темир из ётқизилган жойига чиққанда Этьен аллақандай азобдан қутулгандай хўрсиниб қўйди; қиз бўлса, унга охири марта маъкс нигоҳ ташлади, унинг бу нигоҳида афсус, бахтдан бенасибмиз, деган ўкинч бор эди.

Уларнинг теграсида ер ости ҳаёти жўш урарди, штейгерлар у ёқдан-бу ёққа олиб-югуришарди, от қўшилган поездлар орқага-олдинга бориб-келарди. Зимистон ичра ҳарён лампочкалар милтиллайди. Минут сайин штольня деворига суяниб, одам ва отларга йўл бўшатишга тўғри келади, уларнинг иссиқ нафаси юзларга урилади. Ўз поездди орқасидан оёқ яланг чопиб бораётган Жанлен қичқириб, улар шаънига алланима деб сўкинди, лекин гилдиракларнинг тақир-туқуридан ҳеч нима эшитмадилар. Улар ҳамон йўлда давом этардилар. Қиз чурқ этмасди; Этьен эса эрталаб ўтган йўлларнинг эгри-бугри жойларини ҳам, йўлакларни ҳам танимасди, назарида Катрина уни ер остига борган сари чуқурроқ олиб тушаётгандек эди. У ҳаммадан ҳам совуқдан азият чекар, юқорига чиққан сари суяк-суякдан ўтиб борар эди. Этьен шахта қудуғига яқинлашган сари қаттиқроқ қалтирай бошлади. Тор тош йўлакларда яна шамолнинг ҳуштаки ва увиллаши эшитилди. Йигит тоқати тоқ бўлиб, ёруғ дунёни кўриш

йўқ экан-да, деб турган ҳам эдики, мутлақо кутилмаганда кўтарма машина ёнига келиб қолишди.

Шаваль оғзини шубҳали қийшайтириб, Этьен билан Катринага кўз қирини ташлади. Бошқалар ҳам шу ерда эди; ҳаммалари терга ботган, Этьенга ўхшаб қаҳру ғазабга тўлганча совуқ елвизакда индамай турардилар: улар жуда вақтли келишганди, ярим соатдан кейингина кўтаришлари мумкин, бунинг устига худди шу чоқда отни туширишга тайёргарлик кўриляётганди. Юк ортувчилар вагонеткаларни созлашарди; темирнинг қулоқни қоматга келтирувчи шарақ-шуруғи эпитилдида, кажавалар ёмғир шариллаб уриб турган қора тешиқдан юқорига физиллаб кўтарилди. Пастда чуқурлиги ўн метр келадиган оқова тўпланадиган ўра бўлиб, бу ўра тўла эди; ундан ҳам нохуш ҳовур кўтарилиб турарди. Одамлар шахта қудуғи ёнида уймаллашиб, тинмай сигнал арқонини тортишар, дасталарни босишарди; уларга сув зарралари сачраб, кийимларини шалаббо қилар эди. Ихота тўрлари тутилмаган учта лампочкадан тушиб турган қизғиш нур узун-узун кимирловчи соялар ташлаб, бу зиндонни ёнида тоғ шалоласи шариллаб турган қароқчилар ини, йўлтўсарлар қароргоҳига ўхшатар эди.

Маэ охирги чорани қўллашга мажбур бўлди. У кечки сменага ишга келган Пьеррон ёнига яқинлашди.

— Ҳой, менга қара, бизни кўтаришни буюрсанг нима қилади, сенга мумкин-ку.

Лекин чиройли, миқтидан келган хушфеъл юкчи йигит қўрқиб, рад этди.

— Мумкин эмас, штейгердан илтимос қилинглр... Менга жарима солишади...

Ғазабни ичга ютиб, жим бўлишга тўғри келди. Катрина энгашиб, Этьеннинг қулоғига шивирлади:

— Юр, отхонани кўрамиз. Жуда ажойиб жой-да!

Улар ҳеч кимга сездирмай отхонага лип этиб ўтишди, чунки у ёққа кириш тақиқланган эди. Отхона чап томонда, калта йўлакнинг охирида эди. Бу қоядан ўйиб, равоғи гишт билан мустаҳкамланган, узунлиги йигирма беш, баландлиги тўрт метр келадиган гор бўлиб, унга йигирма от сиғиши мумкин эди. Ҳақиқатан ҳам бу ер яхши эди: ҳавоси ҳайвонлар ҳарорати билан исиган, остларидаги тўшамаси тоза. Ягона лам-

почка худди тунги ёритгичдек хира нур сочиб турарди. Дам олаётган отлар бошларини буриб, болаларники сингари маъсум, катта кўзлари билан қарашди-да, кейин яна сулини еяверишди,— ҳамма севган соғлом бу ҳайвонлар худди тўқдек емларини секин чайнар эдилар.

Катрина рух тахтачаларга ёзилган, охурлар тепасига қоқилган отларнинг номларини ўқиди; бироқ қўққисдан вой деб юборди: оғилхона тўрида аллақандай бир гавда кўтарилди,— бу Мукетга эди, у пичан уюми ичида ётган бўлиб, жойидан чўчиб чиқиб келаётган эди. Душанба кунлари якшанбадаги маишатбозликлардан ҳориган Мукетга бурнидан қон келиши учун одатда пешонасига қаттиқ урарди, кейин худди сувга кетгандай штольнядан жўнаб қоларди; аслида эса отхонага кириб олиб, отлар орасидаги иссиққина тўшамада ётарди. Отаси уни яхши кўрганидан, гарчи бир балога йўлиқишини билса ҳам индамасди.

Шу чоқ кекса Мук кириб қолди; у ёши элликларга борган, калта оёқ, кал, семиз бўлиб, бунақа семиз унинг ёшидаги шахтёрлар орасида кам учрарди, у жуда ҳорғин эди. Отхонага ўтказишганидан бери у тамаки чайнашга шундай ружу қилдики, милклари қорайиб, қонайдиган бўлиб қолди. У қизи билан яна икки кишини кўриб аччиғланди.

— Бу ерда нима қилиб санқиб юрибсизлар? Ҳой, айёрлар, нега эркак кишини бошлаб келдиларинг?.. Ярамас ишларингни менинг похолом устида қилганими, а?

Бу гап Мукетгага жуда кулгили туюлди шекилли, қорнини ушлаб хахолаб кулди. Этьен эса уялиб нари кетди. Катрина унга қараб жилмайди. Учови қабул хонасига қайтиб келганида вагонеткалар поездида Бебер билан Жанлен ҳам келишганди. Вагонеткалар кўтарма машинага маҳтал бўлиб қолди. Қиз отларнинг ёнига келиб, уларни силаб эркаларкан, ҳамроҳига мақтади. Бу шахтанинг энг кекса Уктам лақабли оти эди; бу оқ отнинг ер остига тушганига ўн йил бўлганди. Отнинг шу чоҳда, бир оғилда яшаб қоронғи ерости йўлакларига доимо битта ишни қилаётганига ўн йил бўлибди, шундан бери у ёруғ дунёни кўрмабди. Семириб кетган, силлиқ юнглари ялтиллаб турган, кўз-

лари беозор Уктам ер юзидаги ғаму ташвишлардан йироқда, авлиёлардек осойишга кун кечирарди. Сирасини айтганда, қоронгиликда узоқ қолиб кетган бу от жуда фаросатли эди. У юрадиган йўлларни жуда яхши биларди, вентиляция эшикларини боши билан ўзи очарди, у у ер-бу ерини уриб олмаслик учун паст жойлар келганда эгилиб ўтарди. У ҳам, неча марта бориб-келганини ҳисобга олиб қўярди албатта; у неча марта лозим бўлса, шунча марта бориб-келгандан кейин юрмай туриб оларди, уни огилхонага олиб боришга тўғри келарди. Энди қариб бораётган отнинг мушукникига ўхшаган кўзларини ғам пардаси дам-бадам тўсиб турарди. Балки у ана шу зимистон қўйнида тушларида Скарп дарёси бўйидаги ватани Маршённи, ям-яшил либосга бурканган, шабадада тебраниб турадиган тегирмонни кўраётгандир. Осмонда алланарса — улкан машғала ёняпти — бунинг нималиги отнинг хотиридан фаромуш бўлган эди. У бошини қуйи солганича, қариликдан титраётган оёқларининг дам унисини, дам бунисини кўтариб босиб, қуёшни эслашга беҳуда уринар эди.

Бу орада кўтарма машина олдида иш давом этарди; сигнал болғаси тўрт марта урилди, — отни тушира бошлашди. Бу ҳамиша ташвишли бўлади, чунки жуда қўрқиб кетган от пастга тушгунча ўлиб қоларди. Юқорида тўрға ўралашган от тайсаллаб, ўзини ҳарёнга урарди, лекин оёқлари остидаги замин кетишини сезиши биланоқ гўё тинчиб, қотиб қолди; эти қимир этмас, чақчайган кўзлари бақрайиб турарди. Бу галги от жуда катта бўлиб, кўтарма машина кажавасига сиғмасди; унинг бошини ёпиб, ётқизиб, кажава устига жойлаштиришга тўғри келди. Эҳтиёти шарт деб, секин-аста туширишди; бу иш уч минут давом этди.

Пастдагиларнинг хавотирлиги тобора ортди. Нима гап ўзи? Наҳотки бечора от қоп-қоронғи чоҳда осилиб тураверса? Ниҳоят тошдек қотган от кўринди; қўрқанидан отнинг кўзлари бақрайиб қолганди. Бу уч ёшга бориб қолган Карнай лақабли тўриқ бия эди.

— Эҳтиёт қилинглар! — қичқирди Мук бобо. Отни қабул қилиб олиш унга топширилганди. — Авайлаб туширинглару, лекин ҳозирча ечманглар.

• Кўп ўтмай Карнайни худди нимталанган гўштдек

кўтариб, чўян плита устига олиб қўйишди. От қимир этмай ётар, бу қоронғи, тубсиз чоҳ даҳшатларидан, кенг-мўл қабул қилиш хонасидаги гала-говур ва тарақтуруқлардан ҳамон ўзига келолмасди, чоғи. Уни еча бошлаганларига бояқишнинг олдига ҳозиргина аравадан чиқарилган Уктам келди; у бўйини чўзиб, ер устидан шахтага туширилган янги шеригини ҳидлай бошлади. Ишчилар четга чиқишиб, ҳазиллашди: «Хўш, қалай? ҳушбўй эканми?» Лекин Уктам гўё бу ҳазил-мазахларни эшитмас эди. У безовта бўлиб қолди. Уктам ажойиб мусаффо ҳаво, қуёш ва ўтларнинг эрдан чиққан ҳидларини искаб, бирдан каттиқ кишнаб юберди,— лекин унинг бу кишнашида илтижо, нола оҳанги бор эди. Афтидан, янги келган жонивор унга салом олиб келгандай эди; бу аввалги ҳаёт қувончларининг шабадаси, ер юзига фақат ўлиги чиқишга маҳкум этилган зиндон отининг гамгин ҳасрати ҳам эди.

— Оббо ярамас, Уктам-ей! — кичқиришди ишчилар сеvimли отларининг қилиқларидан завқланиб. — Янги шериги билан гаплашишини қаранглар-а.

Аммо Карнай счиб қўйилганига қарамасдан ҳамон қимир этмасди. У қўрқувдан ғужанак бўлиб, ёнбошлаб ётар, гўё ўзини ҳамон тўр ичида ҳис қиларди. Ниҳоят ганиб, дағ-дағ титраётган отни қамчилаб турғизишди. Мук бобо иноқлашиб қолган иккала отни етаклаб кетди.

— Хўш, бизга ҳам навбат келадими ўзи? — сўради Маэ.

Кажаваларни бўшатиш керак, бундан ташқари иш тугашига ўн минут бор эди ҳали. Ўнгирлар секин-аста бўшаб қолди, ҳамма штольнялардан кўмир қазувчилар қайтишаётган эди. Элликка яқин киши йиғилиб қолди. Ҳаммалари ивиб шалаббо бўлишган, зотилжам бўлиб қолмасак, деган донмий қўрқув билан совуқда дағ-дағ қалтирашарди. Сиртидан бинойидек кўринган Пьеррон штольнядан барвақтроқ кетгани учун қизини бир шاپалоқ туширди. Захария бўлса, исиниш учун билдирмасдан Мукеттани чимчилаб оларди. Бу орада норозилик кучайиб кетди. Шаваль билан Левак инженернинг ҳар бир вагонетка учун бериладиган ҳақни камайтириб, тиргаклар учун алоҳида пул тайинлайман, деб қўрқитганини гапириб беришди. Бу режага қарши

одамлар шовқин-сурон кўтаришди; торгина чоҳ тубида, ер юзидан олти юз метр чуқурликда одамлар қаҳр-ғазабга тўлиб-тошаётганди. Энди сўзловчилар торти-ниб ўтиришмади; ҳаммаёқлари кўмир бўлиб кетган, кута-кута тоқатлари тоқ бўлган шахтёрлар Ширкатни ўз ишчиларининг ярмини ер остида ҳалок қилади, қолган ярмини эса очдан ўлдиради, дея айблардилар. Бу гапларни эшитаётган Этьен дағ-дағ титрарди.

— Тезроқ-тезроқ,— деди штейгер Ришомм юкловчи-ларга қараб.

У ҳа, кўтар, дея шошилтирар, жиддий чоралар кўришни хоҳламай, ўзини ҳеч нарса эшитмаётганга соларди.

Аммо гала-говур шу қадар кучайиб кетдики, у аралашишга мажбур бўлди.

Орқа томондагилар, бу аҳвол мангу давом этиши мумкин эмас, бир кун эмас, бир кун бу дўкон кунпая-кун бўлиб кетади, деб бақирарди.

— Сен дид-фаросатли одамсан,— деди у Маэга му-рожаат қилиб.— Уларнинг овозини ўчир. Ҳаммадан кучли бўлолмаганингга яраша жилла қурса, ҳаммадан ақлли бўл.

Эндигина тинчиган Маэ яна ташвишлана бошлади; лекин унинг аралашувига ҳожат бўлмади. Ҳамма жим бўлиб қолди: йўлакдан бирига кираверишда Негрель билан Дансарт кўринди, улар штольняларни айланиб келишаётган, бошқалар каби қора терга ботишган эди. Интизомга ўрганиб қолган ишчилар четга чиқиб туришди, инженер улар ёнидан ўтаркан, бир калима ҳам сўз демади. У бир вагонеткага, катта штейгер бошқасига ўтирди; сигнал арқони беш марта тортилди — бу — «пўшт, семиз гўшт коляпти!» деганлари бўлиб, бошлиқларга ишора эди, — кажава ҳазин сукунат қўйнида юқорига кўтарила бошлади.

VI

Тўрт шахтёр билан бирга кажавада кўтарилаётган Этьен яна оч-наҳор йўлларда сарсон бўлишни маъқул кўрди. Бари бир эмасми: ҳаром ўлиш ё бўлмаса ҳар куни бу жаҳаннамга тушиш, ўшанда ҳам ейдиган нонингга лойиқ пул ишлай олмасанг? Катрина юқори-роқдан жой олганди. У энди Этьеннинг пинжига су-

қулмас, шунинг учун Этьен қизнинг элитувчи ҳароратини ҳис қилмас эди. Этьен майда-чуйдалар ҳақида ўйлаб ўтирмасдан бошқа ёққа жўнашни аъло кўрди. Этьен нисбатан зукко одам бўлганлигидан бу оломондек тақдирга тан бериб юравермайди; бир кун эмас, бир кун бошлиқлардан битта-яримтасини бўғиб ўлдириб қўяди.

Бирдан кўзлари қамашиб кетди. Кўтарилмиш шу қадар тез бўлдики, кундузги нурни унутаёзган Этьен ер юзига чиқиши биланоқ ҳанг-манг бўлиб қолди; у беихтиёр кўзларини қисди, қабул қилувчилардан бири эшикни очгач, енгил тортди: ишчилар вагонеткалардан стилиб чиқишди.

— Менга қара, Муке, — Захария қабул қилувчининг кулогига шивирлади. — Бугун кечқурун «Вулқон»га борамиз, а?

Монсудаги кафешантани* «Вулқон» деб аташарди. Муке чап кўзини қисиб, оғзини катта очиб ишшайди. Бу йигит отасига ўхшаб паст бўйли, йўғондан келган, сурбет эди; унинг ҳамма нарсага тайёрлиги ва эртанинг гамини емаслиги кўриниб турибди. Улар билан бирга Мукетта ҳам тушди, акалик меҳри жўшиб турган Муке унинг елкасига шап этиб уриб қўйди.

Этьен эрталаб фонарларнинг хира нурида кўзига қоп-қора бўлиб кўринган баланд қабулхонани зўрға таниди. Бу оддий, қип-яланғоч, ифлос хона экан. Ҳанг босган деразалардан қовоғи солиқ кун кўриниб турарди. Фақат машинанинг мис қисмлари ялтираб кўринадди; қуюқ мойланган пўлат арқонлар худди сиёҳга богириб олинган ленталардек чўзилиб кетган; тепадаги шкив ва панжаралар, кажавалар, вагонеткалар, вақт ўтиши билан қорайиб кетган бошқа кўплаб металл қисмлар хонани ивирситиб юборганди. Ғилдираклар гумбурлаб чўян плиталар устидан тўхтовсиз ўтиб турарди; вагонеткаларда олиб келинаётган кўмирдан кўтарилаётган гард қора парда бўлиб полга, деворларга минора пештоқидаги тўсинларга инарди.

Шаваль қабул қилиш идорасининг ойнабанд хонасига осиб қўйилган табелга қаради-ю, жон-дони чиқиб кетди. Уларнинг иккита вагонеткаларини қабул қи-

* Қаҳвахона.

лишмапти: биттасидаги кўмир белгиланган миқдордан кам, иккинчисидаги кўмир эса унча тоза эмас экан.

— Тозаям кунимиз туғди-ку!— Хитоб қилди у.— Яна йигирма су пулдан айрилдик! Қўли косовга ўхшаган ишёқмасларни олмаслик керак эди.

У гўё сўзларига илова қилгандек Этьенга ҳўмрай-иб қаради. Этьен унга яхшилаб мушт туширгиси келди. Лекин у, бари бир кетаману нима кераги бор, дея бу фикридан қайтди.

— Биринчи кунданоқ ҳамма ишни дўндириш мумкин эмас-ку,— мурасасозлик билан эътироз билдирди Маэ.— Эртага яхшироқ ишлайди.

Ҳамманинг ҳам жаҳли чиқиб, жанжалга баҳона тополмай турган экан. Левак лампочкани топшираркан, яхши артилмапти, деб лампочкачи билан уришиб олди. Улар доимо печь бозиллаб турган баракка кирганларидагина бир оз ҳовурдан тушишарди. Кўмирни жуда кўп солишганга ўхшайди: ўтхона қип-қизил чўғ бўлиб, деразаси йўқ катта хона аланга ичида қолганга ўхшарди; деворларда қирмизи шуълалар ўйнайди. Ҳамма оловга орқасини ўгириб, хушчақчақлик билан вайсаша-вайсаша исинишга тутинди. Баданларидан гўё қайноқ шўрвадан кўтарилаётгандай буғ чиқарди; белдан иссиқ ўтгач, қоринларини ўтга тута бошладилар. Мукетта кўйлагини қуриштиш учун ҳеч кимдан тап тортмай иштонини туширди. Йигитлар аския қилиб кетишди, ҳамма хахолаб кулди, чунки Мукетта бирдан уларга орқасини кўрсатганди; у ниҳоятда жаҳли чиққанда нафратини шундай изҳор қиларди.

— Мен кетаман,— деди Шаваль асбобларни шкафчага солиб бекитаркан.

Ҳеч ким жойидан қўзғалмади. Фақат Мукеттагина икковлари Монсуга боришларини баҳона қилиб, унинг кетидан шошилиб чиқди. Лекин бу ҳол яна пичингларга сабаб бўлди холос: Шавалнинг унда кўнгли совиганини ҳамма биларди.

Бу орада Катрина нимадандир хавотир олиб, отасининг олдига келди-да, пичирлаб, унга бир нималар деди. Маэ аввалига ҳайрон бўлди, кейин маъқуллаб бошини қимирлатди; у Этьенни ёнига чақирди-да, қўлига тугунни бериб, деди:

— Менга қаранг, агар пулингиз бўлмаса, ойнинг

Ўн бешинчисигача очдан ўласиз... Хоҳласангиз, бирор ердан қарз топиб бераман, майлими?

Иигит аввалига хижолат тортди. У ҳозиргина бугун ишлаган ўттиз су пулини олиб, кетмоқчи эди. Лекин бундай қилгани қиздан уялди. Қиз унга тик боқиб турарди; қиз уни ишдан қўрқяпти, деб ўйласа-я?

— Албатта топиб бераман, деб ваъда қилолмаман, — давом этди Маэ. — Эҳтимол, бизга беришмас ҳам.

Этьен розилик беришга қарор қилди. Балки қарз беришмас. Сирасини айтганда, ундан нима кетди, — бир оз пул олиб, хоҳлаган пайтида кетиши мумкин. Лекин кейин рад этмаганига пушаймон қилди: Катринанинг суюнганини айтмайсизми, қиз йигитга дўстона тикилиб, шундай назокат билан табассум қилдики, асти қўясиз, Этьенга кўмаклашганидан гоят бахтиёр эди. Лекин бунинг боиси нима экан?

Кўмир қазувчилар исиниб бўлиб, пойабзалларини олиб, шкафчаларини қулфлаб, баракдан чиқа бошладилар; энг кейин Маэларнинг ҳаммаси чиқишди. Этьен уларнинг кетидан юрди; Левак ўғли билан уларга қўшилди. Улар саралаш хонаси ёнидан ўтишаётганда, шиддатли сўкишишни эшитиб тўхташди.

Кўмирни саралайдиган бўлим катта саройга жойлашган бўлиб, унинг тўсинлари кўмир кукунидай қорайиб кетган, катта-катта деразаларига темир панжара тutilган, хонада доимо елвизак гизиллаб турарди. Кўмир ортилган вагонеткалар қабулхонадан тўппатўғри шу ерга келтириларди; уларни узун темир тарновларга ағдаришарди, тарновнинг икки томонидаги пиллапояларда турган сараловчи аёллар белкурак ва хаскаш билан тошларини ажратиб олиб, кўмирни тозалар эдилар; сараланган кўмир воронка орқали рельс билан тўппа-тўғри шийпон тагига келтирилган темир йўл вагонларига тушарди.

Сараловчилар орасида нозик, рангсиз, кўзлари итоткорона боқувчи қиз Филомена Левак ишларди; у қон тупурарди. Бошини зангори жун лахтак билан танғиб олган, қоп-қора қўллари тирсагигача очиқ. У билан ёнма-ён Пьерроннинг қайнонаси. Ашаддий лақабли алвасти кампир ишларди. Бу жуда даҳшатли хотин бўлиб, кўзлари уккиникига ўхшарди; лаблари эса хасининг ҳамёнидек маҳкам юмилган. Жанжаллашаётганлар шулар эди: ёш жувон кўмирларимнинг сарасини

териб оляпсан, бунақада тен ўн минутда ҳам саватимни тўлдиролмайман, деб кампирни айблар эди. Уларга сараланган кўмир саватига қараб ҳақ тўлардилар; шунинг учун доимо жанжал чиқарди. Икковларининг ҳам сочлари тўзгиган, қизариб кетган юзларида панжаларнинг қоп-қора изи бор эди.

— Ур, бошлаб лунжигатушир! — қичқирди Захария маъшуқасига тепадан туриб.

Барча сараловчи аёллар халоқ кулиб юборишди. Даргазаб бўлган Ашаддий энди ёш йигитга ёпишиб кетди:

— Ҳе, яшшамагур! Ундан кўра туғдириб қўйган болаларингни тан ол аввал!.. Ун саккиз ёшга бориб қолибди-ю, зўрға юради-я, қилтириқ!

Захарияни тийиш учун Маснинг аралашишига тўғри келди, бўлмаса у саралаш хонасига тушиб, бу шум кампирнинг (Захария уни шундай деб сўқарди) роса адабини бермоқчи эди. Назоратчи келиши билан хасқашлар яна ишга тушиб, кўмирни саралай бошладилар. Тарновлар ёнида яна аёлларнинг эгилган қомати кўринди, улар жон-жаҳдлари билан бир-бирларининг олдиларидаги сархил кўмирларни тортиб олишарди.

Шамол тинган, ҳаво булутли, совуқ ёмғир шивалаб турипти. Кўмирчилар қоматларини ростлаб, қўлларини кўкракларига чалиштириб, чайқалиб, ҳар қайсиси ўзича боришарди; чурук сурп остидаги кураклари билиниб турарди. Кундузги ёруғда улар негрларга ўхшарди. Баъзилари ейилмаган нонушталарини қайтиб олиб кетишяпти; кўйлак билан блуза орасига тиқиб қўйилган бир парча нон ўркакдек дўппайиб турарди.

— Қаранглар! Ана, Бутлу келяпти, — масхарабозлик билан деди Захария.

Левак тўхтамай, уйда ижара турган сочи тимқора, ўттиз беш ёшлардаги новча, очиқ, хушрўй йигит билан гаплашди.

— Хўш, Луи, овқат борми?

— Бўлса керак?

— Демак, хотиним ийиб кетибди-да, а?

— Назаримда ийиб кетди.

Бошқа шахтёрлар — ремонт ишчилари — тўда-тўда бўлиб келишиб, секин-аста ер тубига кетишарди. Кундузги сменада ишловчилар соат учдан бошлаб пастга туша бошлардилар; шахта бу одамларни ҳам комига

тортарди, улар ҳам тўда-тўда бўлишиб, ҳозиргина кончилар ишлаган штоल्याларга бўлиниб кетишарди. Шахта ҳеч қачон бўш қолмасди, одамлар лавлаги экилган далалар тагида, олти юз метр чуқурликда кечасию кундузи чумолидек ер қазиб, меҳнат қилишарди.

Ешлар олдинда боришарди. Жанлен Беберга тўрт сулик тамакини қандай қилиб қарзга олишинг мураккаб режасини тушунтирарди. Улардан анча орқада Лидия, кейинроқда Катрина Захария ва Этьен билан келарди.

Ҳаммалари жим келишарди.

«Авантаж» қовоқхонаси олдига келганларида Маэ билан Левак уларга етиб олди.

— Мана, етиб ҳам ёлдик, — деди Маэ Этьенга мурожаат қилиб: — Биз билан кирмайсизми?

Этьен Катрина билан хайрлашди. Қиз тўхтаб, булоқ сувидек шаффоф ва йирик-йирик ферузаранг кўзларини сўнгги бор йигитга тикди: бу кўзлар унинг қорайган юзида яна ҳам қаърига тортгандай кўринарди. Кейин у жилмайиб қўйди-да, бошқалар билан бирга қишлоққа олиб борадиган йўлдан узоқлашиб кетди.

Қовоқхона қишлоқ билан кон оралиғидаги икки йўл чорраҳасида эди. Бу икки қаватли ғиштин бино бўлиб, оҳак билан оқланган, кенг ҳаворанг ҳошияли деразалари катта-катта эди. Эшик тепасига сариқ ҳарфлар билан: **АВАНТАЖ — РАСНЕРНИНГ ИЧИМЛИКЛАР ДУКОНИ** деб ёзилган тўртбурчакли лавҳа қоқиб қўйилганди. Уй орқасида буталар билан ихота қилинган кегельбан кўриниб турарди. Ширкат ўзининг кенг-мўл мулки ўртасига суқулиб кириб қолган ана шу бир парча ерни қўлга киритиш учун нималар қилмади, лекин уддалай олмади; далалар ўртасида қаққайиб турган қовоқхона Ворёга кириш биланоқ кўзга ташланиши ширкатчи корчалонларнинг жигига тегарди.

— Киринг, — такрорлади Маэ Этьенга мурожаат қилиб.

Мўъжазгина ёп-ёруғ залдаги ҳамма нарса-оппоқ деворлар, учта стол атрофидаги бир дўжна стулдан тортиб, идиш-товоқ қўйиладиган ошхона шкафидек келадиган қарағай пештахтагача тозалигидан ярақлайди. Пештахта устида ўнтача кружка, уч шиша ликёр,

графин ва усти рухланган, қалайи жўмракли пиво бочкаси турарди; булардан ташқари залда ҳеч нима—суратлар ҳам, токчалар ҳам, қимор ўйнайдиган стол ҳам йўқ эди. Сирланган ва ялтираб турган чўян ўчоқда тошкўмир лангиллаб, бир маромда ёниб турибди. Полга ҳўл тупроқнинг намини шимиб оладиган оқ кум юпқа қилиб сепилганди.

— Бир кружка пиво,— буюрди Маэ семиз, малла қизга: бу баъзан келиб залда хизмат қиладиган қўшни хотиннинг қизи эди.— Раснёр шу ердами?

Қиз пиво қуйиш учун жўмракни буради-да, хўжайин ҳозир келиб қоладилар, деди. Кўмир қазувчи томоғига ўтирган чангни кетказиш учун секин симириб, кружкани яримлатди. У ҳамроҳини меҳмон ҳам қилмади. Залда улардан бошқа яна битта одам бўлиб, у ҳам ҳаммаёғи ҳўл, ифлос кўмир қазувчи эди; у четроқдаги столча ёнида чурқ этмай, чуқур хаёлларга чўмганича, пиво ичиб ўтирарди. Кейин яна бир ишчи кирди, имо қилиб, бир кружка пиво буюрди-да, ичиб, пулини тўлади-ю, ҳеч нима демасдан чиқиб кетди.

Мана, ўттиз саккиз ёшлардаги тўладан келган, силлиқ қиринган юзи юмалоқ, хуштабассум киши кўринди. Раснёр шу эди; илгари у кончи бўлиб ишлаганди, лекин уч йил бурун, бир ишташлашдан сўнг Ширкат уни бўшатиб юборганди. У жуда яхши ишчи бўлиб, сўзамоллиги билан ажралиб турар ва ҳар сафар ишчилар талабини баён этувчи вакилларга бош бўлиб, бошлиқлар олдига борарди; шу йўсинда у норозиларнинг бошлиғига айланиб қолди. Унинг хотини илгари ҳам бошқа кўпгина шахтёрларнинг аёллари сингари дўконча очиб, баққолчилик қиларди, Раснёр ишдан қувилгач, майфурушлик қилишга аҳд этди, бир оз пул топиб, Ширкатдан аламини олиш учун нақ Ворё рўпарасида қовоқхона очди. Унинг ишлари юришиб кетди; «Авантаж» қовоқхонаси кўмир қазувчиларнинг севимли жойига айланди; Раснёр пулни сузаркан, секин-аста собиқ ўртоқлари қалбидаги норозилик оловини пуфлайверди.

— Манави азаматни бугун эрталаб ишга олдим,— дарҳол унга маълум қилди Маэ.— Сенда бўш хона йўқми? Кейин у мояна олгунча қарз бериб тура олмайсанми?

Раснёрнинг юмалоқ юзи дарҳол ўзгарди. У Этьенга шубҳаланиб разм солди, кейин, лоақал ачинаётганини айтишни лозим топмай, деди:

— Иккала хонам ҳам банд. Мумкин эмас.

Йигит шундай рад жавоби олишни кутган бўлса ҳам, лекин тўсатдан бу ердан кетишга мажбур бўлаётганига афсусланди. Ҳа, нима ҳам қилсин, ўттиз су пулини олиши биланоқ кетади.

Елғиз ўзи пиво ичган кўмир қазувчи кетди. Бошқа пивохўрлар ҳам киришарди-ю, томоқларини чайқашиб, бўшашганларича чиқиб кетишарди. На хурсандчилик, на мириқиб кайф қилиш бор,— фақат томоқ чайиш холос, оддий эҳтиёжни қондиришдан ўзга ҳеч гап йўқ.

— Демак, ҳеч гап йўқ, дегин?— аллақандай бир оҳангда сўради Раснёр пивони майдалаб ичаётган Маэга мурожаат қилиб.

Маэ хонага назар ташлаб, Этьендан бўлак ҳеч ким йўқлигига ишонч ҳосил қилгач, деди:

— Йўқ, анча тўполон қилишди... Ҳамма гап ўнгирларга тиргович қўйиш хусусидан чиқди.

Маэ нима бўлганини гапириб берди. Майхоначи ҳаяжондан қизариб кетди: ёноқлари ловиллаб, кўзлари ёнарди.

— Шунақа! — деди у ниҳоят.— Фақат шунақа аблаҳларгина маошни камайтириш ҳақида ўйлаши мумкин.

Афтидан, у Этьендан ҳайиқди, шекилли, лекин шунга қарамай, кўз қирини ташлаб, гапида давом этди. Раснёр имо-ишора, чала-чулпа гаплар билан чекланди. У директор Энбо, унинг хотини, жияни — тирранча Негрель ҳақида, бирортасининг ҳам номиң айтмай гапирди; у такрорлаб, бу аҳвол узоққа чўзилмаса керак, яна бир неча кундан кейин жиддий тўполон кўтарилиши керак, деди. Муҳтожлик ҳаддан ташқари кучайди. Раснёр қанча фабрика ва заводлар ёпилгани, қанчадан-қанча ишчилар кўчага ҳайдалганини санаб кетди. У мана бир ойдирки, ҳеч вақоси йўқларга ҳар куни олти қадокдан нон улашиб келади. У кеча қўшни шахтанинг эгаси Денелен кризиснинг олдини қандай оламан, деганини эшитди. Бундан ташқари Лиллдан олган хатида кўпгина ваҳимали гаплар ёзилганди.

— Биласанми,— деди у пичирлаб,— бу гапларни

менга бир кунни кечқурун сен шу ерда кўрган одам ёзиб юборипти.

Залга кириб келган Раснёрнинг баланд бўйли, озгин, бурни узун, ёноқларида қизгиш доғи бор шаддод хотини гапга араланди. У сиёсатда эрига қараганда анча кескин фикр юритар эди.

— Плюшарнинг хати-чи?— деди у.— Агар унинг ўзи шу ерда бўлиб, ишга раҳбарлик қилганида, ҳаммаси жойида бўларди!

Бу гапларга қулоқ солиб турган Этьен ҳаммасига тушунди; муҳтожлик ва интиқом ҳақидаги фикрлар уни ҳаяжонга солган эди. Бехосдан айтилган ном уни сескантириб юборди. Кейин у беихтиёр айтиб юборгандай эшиттириб:

— Плюшарни мен биламан,— деди.

Ҳамма унга тикилиб қолгач, Этьен тушунтира бошлади:

— Гап шундаки, мен механик, у эса менинг Лиллдаги энг яқин бошлигим эди... Жуда қобилиятли киши, мен у билан жуда кўп суҳбатлашганман.

Раснёр Этьенга яна разм солди; унинг чеҳраси дарров бошқа қиёфага кирди, юзида тўсатдан меҳр-шафқат акс этди.

Ниҳоят у хотинига деди:

— Бу йигитни Маэ бошлаб келди, унда юккаш бўлиб ишлар экан. Юқорида бўш хона йўқмикин, маош олгунча қарз бериб турмасмикансизлар, деб сўраяпти.

Иш осон битди. Тепада бўш хона бор экан: у ерда турган одам эрталаб кетибди. Майхоначи тобора ҳаяжонланаркан, ҳаммага эшиттириб, мен бошқаларга ўхшаб хўжайинлардан эришиш қийин бўлган нарсани сўраётганим йўқ, фақат иложи бор нарсаларнигина талаб этаман, деб гапира бошлади. Хотини елкасини қисиб, ўз ҳақ-хуқуқларингизни қаттиқ туриб ҳимоя қилишларинг керак, деб қўйди.

— Соғ бўлинглар,— уларнинг гапини бўлиб деди Маэ.— Бу тадбирларинг бари бир одамларнинг шахтага аввалгидек тушиб ишлашларига тўсқинлик қилмайди; модомики одамлар шахтада ишлар эканлар, уларнинг қийналиб ўлишдан бошқа иложлари йўқ... Ўзингга бир қара, шахтадан кетиб, уч йилда ўзингга келиб, бинойидек одам бўлиб қолдинг.

— Ҳа, анча семирдим,— ўзидан-ўзи мағрурланиб тасдиқлади Раснёр.

Этъен кўмир қазувчини эшиккача кузатиб, саъйи ҳаракатлари учун унга миннатдорчилик билдирди; лекин Маэ бошини иргатди-да, ҳеч нима демади. Йигит остонада туриб, Маэнинг посёлка йўлидан битта-битта қадам ташлаб кетаётганини кузатди. Раснёрнинг хотини мижозлар билан банд бўлгани учун, бир оз кутиб туринг, хонага ўзим олиб кириб қўяман, деди. Шу ерда қолса бўлармикин? У яна шубҳага тушиб қолди. У дайдилардек эркин ҳаёт кечиришдан маҳрум бўлаётганига ачинди; ўзингга ўзинг хўжайин бўлсанг, очлик ҳам қўрқинчли эмас. Этъенга чиқитлар уюми устига чиққан ўша гавжум тундан то ер остида, қоронги йўлакларда эмаклаб юриб ўтказган вақтидан бери ордан бир неча йил ўтгандек туюлди. Яна шу ҳаётни бошдан бошлашни ўйласа, энсаси қотарди. Бу адолатсизлик ва шафқатсизлик ахир, ҳайвон қаторида кўзини боглаб, ўзини молдек ишлатишларини ўйлаши билан инсонлик орияти қўзиб, тугён урарди.

Шундай фикрлардан ўртанаркан, Этъен ўйноқи кўзларини бепоён текисликка югуртирди; секин-аста ундаги ҳамма нарсани кўриб, билиб олди. Қизиқ: Улмасвой зим-зиё тунда кўрсатганида унинг бунақалигини тасаввур ҳам қилмаган экан. Шундоқ рўбарўсида, торгина сойликка жойлашган, иморатлари ёғоч ва гиштан қурилган Ворё шахтаси: смола сурилган саралаш саройи, томига тоштахта ёпилган минора, машина бўлими ва баланд қизгиш труба кўриниб турибди. Буларнинг ҳаммаси гўж бўлиб турганидан хунук кўринарди. Аммо ана шу иморатлар атрофида қора кўлга ўхшаган катта бўшлиқ ястаниб ётгани хаёлига ҳам келмаган эди, ҳаммаёқда салга уваланиб кетадиган тошкўмир уйилиб ётарди. Улар орасидан баланд темир йўл кўприклари ўтганди, майдоннинг бир бурчагини қурилиш материаллари омбори эгаллаганди — гўё бу ерда ёғоч-тахта кесишгандек эди. Унг томонини улкан баррикадани эслатадиган чиқитлар уюми тўсиб турарди. Аввал ҳосил бўлган чиқитлар уюмини ўт-ўланлар босиб ётипти, бошқа томони эса қип-яланғоч; ҳаммасини бир йилча давом этган ер ости ёнғини ямлаган; шу кулранг шифер ва қумтош қатламларини зангла-

тиб, ер бетига қуюқ тутун ёйиларди. Ундан у ёғига буғдой ва лавлаги экиладиган поёнсиз далалар ёстаниб ётарди, бу далалар ҳозир ширяланғоч; қамиш босган ботқоқликнинг у ер-бу ерида нимжон толлар ўсганди; узоқда — қатор-қатор ингичка тераклар билан ажратилган яйловлар. Уларнинг нарёғида эса шаҳарлар оқариб кўринади: шимол томонда Маршьенн, жанубда Монсу; шарқ томонда эса, Вандам ўрмонларининг баргсиз дарахтлари бинафшаранг чизик бўлиб уфққа туташиб кетган. Қиш шомининг ғираширасида гўё бутун Ворёнинг қора қурумлари, учиб юрувчи кўмир гарди текислик узра ёпирилиб, дарахтларга инган, йўлларни босган, экинзорларни қоплаганга ўхшарди.

Этъен ҳамон қараб турарди. Унинг эътиборини ҳамма нарсадан ҳам кўпроқ анави канал тортган эди, уни кечаси пайқамаган экан, — бу каналга айлантрилган Скарп дарёси эди. Канал узунлиги икки лье келадиган хира кумуш лентадек Ворёдан Маршьеннгача чўзилиб, гўё хиёбондек дарахтлар ҳайқириб ётган кўм-кўк сохиллар орасидан олисларга кетарди. Сузиб бораётган баржаларнинг акси бўзарган сувда кўринади; уларнинг қуйруғи қизилга бўялган. Шахтадан сал нарида пристань бор эди; унинг ёнгинасида тўхтаган кемаларга тўппа-тўғри кўприкчалардан келадиган вагонеткалардаги кўмир юкланарди. Кейин канал бурилиб, ботқоқликни қиясига кесиб ўтарди. Кенг текислик оралаб ўтган шу сув гўё воҳанинг жони бўлиб, кўмир ва темир ташилаётган катта йўлга ўхшарди.

Этъен нигоҳини каналдан узиб, посёлкага қаради: тепалик орқасидаги посёлка иморатларининг қизил черепицали томларигина кўриниб турарди. Кейин у яна Ворё томонга қаради. У тупроқ тепа этакларида шу ерда тайёрланиб, шу ерда пиширилган ғиштларнинг катта-катта уюмларини пайқади. Деворнинг нарёғидан, Ширкат томонидан конларга хизмат қилиш учун солинган темир йўл изи ўтганди. Ҳозир ремонтчи ишчиларнинг охиргилари ҳам пастга тушиб кетган бўлишса керак. Одамлар вагонлардан бирини итаришган эди, у қаттиқ ғижирлаб кетди. Сирли зулмат, мавҳум гумбурлаш, аллақандай чироқлар энди маълум бир маъно касб этган эди. Узоқдаги баланд-баланд

домна ва кокс печлари кун ёругида хиралашиб кетганди. Фақат ҳаво насосигина гувиллаб турарди; у тўхтовсиз ишлар, боягидек оғир ва чуқур нафас олиб, еб тўймас бу баҳайбат маҳлуқ комидан кулранг буг пуркар эди.

Шундан кейингина Этьен қолишга қатъий қарор қилди. Балки у посёлкага кетган Катринанинг кўзларини эслагандир; балки бунга Ворёда тугёнга келаётган ғазаб сабаб бўлгандир. Буни унинг ўзи ҳам билмасди — у шунчаки изтироб чекиш, курашиш учун яна шахтага тушишни ихтиёр этди; у Улмасвой айтган кишилар ҳақида, борлигини билдирмай минглаб очнаҳорларни комига тортиб турган мечкай маҳлуқ тўғрисида ўйлаб кетди.

ИККИНЧИ ҚИСМ

I

Грегуарларнинг Пиоленадаги қўрғони Мойсунинг шарқ томонида икки километр нарида бўлиб, Жуазелга борадиган йўл бўйида эди. Бу ўтган аср бошларида бирор услубга риоя қилинмасдан қурилган каттагина тўртбурчакли иморат эди. Бир вақтлар кенг-мўл бўлган бу мулкдан эндиликда девор билан ўралган ўттиз гектарлик ер қолганди холос. Бу ерда хўжалик ишларини олиб бориш қулай эди. Айниқса боғ билан полизнинг донғи кетганди; бу ерда унган мевалар, сабзавотлар бутун округда энг яхши ҳисобланарди. Қўрғон олдидаги дарахтзор парк вазифасини ўтар эди. Уч юз метрча жойда қапа бўлиб турган қари арғувонлар хиёбони девордан зинагача чўзилган бўлиб, бу қип-яланғоч текисликнинг файзи, кўрки ҳисобланарди, чунки Маршьенндан Боньгача бўлган ерлардаги катта дарахтлар санокли эди.

Ўша куни Грегуарлар эрталаб соат саккизда уйғонишди. Одатда улар бир соат кечроқ туришарди, чунки мириқиб ухлашни яхши кўришарди; лекин кечаси билан қутуриб чиққан бўрон уларга халақит берди. Жаноб Грегуар довул зиён қилмадимикан, дея хабар олгани шу захоти боғ айланиб кетди. Бу орада яктанусха фланель кўйлакдаги Грегуар хоним туфлисини кийиб, ошхонага ўтди. Урта бўйли, тўладан келган, эллик саккиз ёшдаги бу аёлнинг оппоқ сочлари тушиб турган юзида болаларга хос ҳайрат аломати бор эди.

— Мелани,— деди у ошпаз аёлга қараб,— хамир

етилипти, ёғли булка қилиб, дарров печкага қўйсангиз бўларди. Бекача ярим соатлардан кейин туради, шоколад билан ейди. Унга ажойиб совға бўлади!

Грегуарларга ўттиз йил хизмат қилган ориққина ошпаз кампир кулиб юборди:

— Рост, жуда зўр совға бўлади!.. Печкага ўт қўйганман, духовка ҳам қизиб қолгандир. Онорина менга қарашворади.

Болалигидан Грегуарлар қўлида тарбияланган Онорина ҳозир уларга оқсочлик қиларди. Бу икки аёлдан ташқари яна Франсис деган кучер ҳам бўлиб, ҳамма икир-чикир ишларни ўша бажарарди. Боғбон билан унинг хотини экин-тикинга, гулзорга қарашар, қушларни боқишар эди. Хизматкор хотин узоқ замонлардан бери шу ерда яшарди; хуллас, бу гўшада тотувлик ва осойишталик ҳукмрон эди.

Грегуар хоним ҳали ўрнидан турмасданоқ қизимни бир ёғли булка билан хурсанд қилай, деб ўйлаб қўйганидан ҳамирни печкага қандай қўйишларини кузатиш учун ошхонага чиққан эди. Ошхона жуда кенг эди, ундаги орасталик, саранжом-саришталик, ҳар хил кастрюлкалар, идиш-товоқлар ва бошқа асбоб-анжомларнинг тартиб билан териб қўйилганлигидан ҳам унинг хонадон ҳаётида қандай ўрин тутишини билиб олиш мумкин. Бу ердаги барча нарса хонадон аҳлининг яхши еб-ичишидан далолат берарди. Сандиқлару шкафлар озиқ-овқат масаллиқлари билан тўла эди.

— Энг муҳими, ҳушёр бўлиб туринг, булочка яхши қизарсин, — тайинлади Грегуар хоним емакхонага чиқар экан.

Хона қизиган ҳаво билан иситилишига қарамасдан, каминдаги кўмир чарсиллаб, гур-гур ёнарди. Лекин умуман емакхонада ортиқча зеб-зийнат йўқ-эди: катта стол, стуллар, қизил ёғоч буфет; фақат иккита чуқур кресло бу уйдагиларнинг саранжом-саришталикни, узоқ ўтириб, ҳузур қилиб таомни сингдиришни яхши кўришларини билдириб турарди. Овқатдан кейин ҳеч ким меҳмонхонага ўтмасди; хонадондагиларнинг ҳаммаси емакхонада узоқ ўтириб қоларди.

Қалин пахмоқдан тикилган калта камзул кийган жаноб Грегуар — олтмиш ёшли, кенг юзи қип-қизил, тетик, хотини сингари сипо, хушфёъл, жингалак сочлари оппоқ чол емакхонага хотини билан бир вақтда

кириб келди. У богбонни ҳам, кучерни ҳам кўриб қайтганди: хайрият, бўрон унча зиён келтирмапти, печканинг трубаши қулабди холос. Жаноб Грегуар барвақт туриб, Пиоленани айланиб келишни севарди: унинг мулки хўжалик ташвишларини орттирадиган даражада катта бўлмаса-да, ҳар қалай помешчиклик ҳаётининг нашъу намосидан баҳраманд бўлиш учун ҳамма имконият мавжуд эди.

— Сесиль қани? — сўради у. — Бугун турармикан ўрнидан?

— Тушунмадим, нима гап ўзи? — жавоб берди хотини. — Назаримда унинг уйдан аллақандай шовқин эшитгандай бўлдим.

Дастурхон тузоқлик эди; оппоқ дастурхон устида учта идиш турарди. Оноринани бекача тезроқ келармикан, деб билиб келгани юборишди. Шу ондаёқ қайтиб келган қиз кулгисини зўр-базўр босиб, гўё тепада, Сесиль хонасида тургандек овозини пасайтириб деди:

— Вой, қани энди сизлар ҳам бекачанинг ётганларини бир кўрсаларинг эди!.. Ухлаб ётибди... Худди чақалоқ ухляпти дейсиз... Буни тасаввур ҳам қилиш қийин. Томоша қилиб тўймайсиз.

Ота билан она ийиб, бир-бирларига қараб олишди-да, Грегуар жаноблари табассум билан хотинидан сўради:

— Сен бориб қараб келасанми?

— Узимнинг қизалоққинам! — деди она. — Албатта бораман-да.

Улар биргаликда тепага кўтарилишди. Қизларининг хонаси бу бинодаги энг ораста хона эди. Эрка қизнинг раъйига қараб, деворларга зангори парда тортилганди, оқ-мовий йўл-йўл, сирланган мебель билан жиҳозланганди. Дарпардалари туширилган нимқоронғи хонада қиз яланғоч билагини ёноғи остига қўйиб, қордек оппоқ ўринда ухлаб ётарди. Бу соғлом, дуркун қиз ўн саккиз ёшига нисбатан эрта етилганди. Ҳусни унча бўлмаса ҳам бадани гўзал, силлиқ ва оппоқ, сочи қўнғир, юзи думалоқ, бурни чимчиб олгандек, ёноқлари лўппи эди. Устидаги кўрпа сирғалиб тушиб кетибди; қиз шу қадар оҳиста нафас олардики, унинг дуркун кўкраги қимир этмаётгандек туюларди.

— Лаънати шамол кечаси билан уйқу бермаганга ўхшайди, — пичирлаб деди она.

Ота ишора қилиб хотинини жим бўлишга мажбур этди. Иккови ҳам каравот устига энгашиб, қизлик ла-тофатини кўз-кўз қилиб ётган фарзандига меҳр-муҳаббат билан тикилиб қолди; улар қиз кўришни жуда ишташганди, қиз эса жуда кеч, улар умидларини узган пайтларида туғилди. Грегуарлар назарида бу қиз мукамаллик тимсоли эди: улар қизларининг сўмириб кетаётганини сезишмас, — боёқиш тўлишиб кетмаяпти-да, деб ўйлашарди. Сесиль ота-онаси бошига келиб, уни томоша қилаётганини сезмай ҳамон ухларди. Лекин шу пайт унинг ҳаракатсиз юзи хиёл лип этиб қўйди. Ота-она қизимиз уйғониб кетмасин, деб оёқ учида юриб хонадан чиқишди.

— Секинроқ! — шивирлади жаноб Грегуар эшикни ёпар экан. — Кечаси билан ухламаган бўлса, майли, уйқуга тўйиб олсин.

— Ором олиб ухласин қизалоққинам, — таъкидлади Грегуар хоним. — Биз кутиб турамыз.

Улар емакхонага тушиб, креслоларга ўтиришди. Хизматкор хотин ойимқизнинг уйқучилигидан кулди-да, ади-бади қилмай плитада иссиққина турсин, деб шоколадни олиб чиқиб кетди. Грегуар жаноблари газетани кўлига олди, хотини эса катта жун адёлни тўқишга тутинди. Уй жуда иссиқ эди; тиқ ётган товуш эшитилмасди.

Грегуарларга ҳар йили қирқ мингга яқин франк даромад келтирадиган мулк Монсудаги тошкўмир конининг битта акцияси эди. Улар Ширкат бунёдга келган даврдан бошланадиган бу акция тарихини ифтихор билан сўзлаб беришни яхши кўришарди.

Утган асрнинг бошларида Лиллдан тортиб Валансьенгача бутун областни бирдан тошкўмир вазвасаси босган эди. Кейинроқ Анзен Ширкатини таъсис этишган концессионерларнинг муваффақияти ҳамманинг бошини айлантириб қўйганди. Ҳар бир коммунада тупроқ текширилар, бир кечада ширкатлар тузилар, концессиялар вужудга келар эди. Уша пайтдаги тиришқоқ, ишбилармонлар орасида айниқса ўз билимлари ва қаҳрамонона фидойилиги билан барон Дерюмо ажралиб турарди. У доимий тўсиқларга қарамай, қирқ йил тинмай кураш олиб борди. Унинг дастлабки изланишлари муваффақиятсизликка учради, янги очилган конларни ойлаб ишлатиб, ташлаб кетишга тўғри

келарди: ё шахта босиб қолар, ё қўққисдан юз берган тошқин туфайли ишчилар ҳалок бўлар, юз минглаб франк пул елга совуриларди. Бунинг устига маъмурийят ва ваҳимага тушган акционерлар билан бўладиган муомала қийинчиликлари, қирол концессияларини тан олишни истамай, корхона эгаларидан олдинроқ биз билан шартнома тузинглар, деб талаб қилувчи ер эгаларига қарши кураш тинкани қуритар эди. Ниҳоят Монсудаги тошқўмир қатламларини қазиб оладиган «Дерюмо, Фокенуа ва К° жамияти»ни ташкил қилди. У очган конлар унча-мунча даромад бера бошлади. Лекин қўшни шахталар: граф Куньига қарашли Куньи шахталари билан «Корниль ва Женар жамияти»га қарашли Жуазель конлари кескин рақобат қилиб, бутун ишни барбод этишига оз қолди. Ҳаммаларининг бахтларига 1760 йилнинг 25 августида учала кон эгалари келишиб, мулкларини бирлаштиришди-да, «Монсудаги тошқўмир конлари Ширкати»ни туздилар. Ҳали-ҳали ана шу Ширкат ишлаб турибди. Мол-мулкни бўлиб олишни осонлаштириш учун унинг қиймати ўша пайтдаги пулга чақилиб, йигирма тўрт пайга ёки ўша давр тили билан айтганда, йигирма тўрт «су»га баҳоланди. Ҳар бир «су» ўн икки «денъе»га бўлиниб, жами икки юз саксон саккиз «денъе»ни ташкил қиларди; ҳар бир «денъе» қиймати эса ўн минг франк, деб белгиланганди. Шундай қилиб, Ширкатнинг жами маблағи уч миллион франкка боради. Дармонсизланган бўлса ҳам, голиб келган Дерюмо тақсимотда олти «су» ва уч «денъе» олди.

Ўша йиллари барон Пиоленани қўлга киритди; унда уч юз гектар ер бор эди. Барон Леон Грегуарнинг бобокалони пикардиялик Оноре Грегуарни бошқарувчи қилиб хизматга олганди. Монсуда шартнома имзоланиши биланоқ қисиб-қимтиб, эллик минг франк пул тўплаган, уddaбуроликни хўжайинидан ўрганган Оноре ундан қолишмасликка аҳд қилди. У пулларини жарангли тангага айлантириб, бир «денъе»ни қўлга киритар экан, болаларимнинг ҳақиға зомин бўлиб қолмасмиканман, дея капалаги учиб кетганди. Унинг ўғли Эжен ҳақиқатан ҳам жуда оз дивиденд* оларди; бу-

* Фойда ҳиссаси.

нинг устига ғарра-шарра яшашни ният қилгани учун бир қалтис ишдан панд еб, отасининг қолган қирқ минг гини бой бериб қўйиб, фақирона ҳаёт кечиришга мажбур бўлиб қолганди. Лекин унинг «денъе»сига келади-ган даромад секин-аста кўпая борди ва Фелисьен бобоси, яъни мулкнинг собиқ бошқарувчиси қилиб юрган эзгу орзуни рўёбга чиқариш имконига эга бўлиб қолди: у, нафсиламрини айтганда, кепак баҳосига миллий мулк сифатида қирқиб берилган Пиоленини қўлга киритди. Кейин оғир йиллар бошланди, инқилоб зилзилалари оқибатини кутишга тўғри келди, сўнг Наполеоннинг қонли заволи рўй берди. Фақат бир вақтлар бобокалони қўрқа-писа акционерлар жамиятига қўшган маблағнинг ниҳоятда тез суръатлар билан ўсиб бораётган фойдасини Леон Грегуаргина ола бошлади. Ана шу арзимас ўн минг франкнинг даромади Ширкат фаолияти кенгайган сари ўсиб, кўпайиб бераверди. 1820 йилдан бошлаб бу пул юзга юз, яъни ўн минг франкдан фойда бераверди. 1844 йилдан эса йигирма минг франкдан даромад келтирди; 1850 йилда — қирқ минг. Ниҳоят, икки марта бу маблағдан келади-ган дивиденд жуда катта суммани, — йилига эллик минг франкни ташкил этди! Лиллдаги биржа муомаласида ҳар бир «денъе»нинг қиймати бир миллион франкка чиқди: юз йил мобайнида юз баробар ошди!

«Денъе»нинг қиймати миллионга чиққанида Грегуарга, улушингни сот, деб маслаҳат беришди; лекин у мулойимлик билан жилмайиб, қатъиян рад этди. Ярим йил ўтгач, саноат кризиси бошланди-ю, «денъе»нинг қиймати олти юз минг франкка тушди. Грегуар аввалгидек жилмайиб юраверди, ҳеч нимага афсусланмади ҳам: эндиликда бари Грегуарларнинг эътиқоди конга баланд эди. Оллонинг ҳақлиги қанчалик бешак бўлса, баҳонинг кўтарилиши ҳам шунчалик шубҳасиз! Бу эътиқодга бутун бир аср мобайнида ҳеч қандай меҳнатсиз катта хонадонни боқиб келаётган хазинадан чуқур миннатдорлик ҳисси ҳам қўшилган эди. Бу уларнинг худбинлиги чинакам саждани эслатувчи қандайдир бир илоҳий нарса — ялқовлик учун кенг шароит яратган, лаззатли неъматлардан баҳраманд қилиб турувчи хонадоннинг маишат париси эди. Бу удум отадан болага ўтиб келди; тақдирни синаб кўриш, ундан шубҳаланишнинг нима кераги бор? Оилавий

анъаналарга бўлган бу садоқатда озгина хурофий қўрқув ҳам бор: улар акцияларни сотиб, «дене»га олинган миллионларни сандиққа солишимиз билан бу пуллар йўқ бўлиб кетади, деб қўрқардилар. Уларнинг назарида, бу пуллар ерда — кўмир қазувчилар — қолдан тойган кишиларнинг бутун бир авлоди ҳар куни уларнинг эҳтиёжларига қараб баҳоли қудрат оз-оздан чиқараётган ерда узоқроқ сақланиб қоларди.

Бахт бу хонадонни ўз эҳсонларига кўмиб ташлаганди. Жаноб Грегуар йигитчалик пайтидаёқ Маршьенн аптекачисининг уч пуллик сепи йўқ, хунуқкина қизига уйланганди; йигит хотинини иззат-ҳурмат қиларди, хотин ҳам эрининг ўтидан кириб кулидан чиқарди. Грегуар хоним бутунлай хўжалик ишларига берилиб кетганди, эридан мамнун эди; унинг гапи хотин учун қонун эди. Эр-хотиннинг дид-таъблари ҳам бир хил эди; эзгу ниятлари — осуда турмуш; улар шу кўйи бир-бирига меҳрибонлик билан, арзимаган нарсада ҳам бир-бирига ғамхўрлик қилиб, қирқ йил умр кечиришди. Бу бир меъёрда ҳаёт кечириш эди; қирқ минг франк қати бузилмай жойида тураверди, бошқа жамғармалар кейинроқ туғилиб, уларнинг ҳисоб-китобларини ағдар-тўнтар қилиб юборган Сесилга сарфланди. Лекин энди улар эрка қизнинг барча истагини бажо келтирардилар: иккинчи от, иккита экипаж сотиб олдилар. Париждан кийим-кечаклар, пардоз-андоз буюмлари олдириб келишди — буларнинг ҳаммаси уларга олам-олам қувонч бағишларди; улар яна қизларининг кўнглини қандай олишни билмасдилар. Бироқ ўзлари ёшлиқларида расм бўлган либосларда юришарди — ясан-тусанни, олифталикни ёқтиришмасди. Ўзини оқламаган сарфу харажат уларнинг наздида камоли нодонлик ҳисобланарди.

Бирдан эшик очилиб, қаттиқ қичқириқ эшитилди:

— Вой, бу қанақаси? Менсиз нонушта қилдингларми?

Бу Сесиль эди; у ҳозиргина ўрнидан турган, уйқудан кўзлари шишган эди. У сочларини наридан-бери тўғрилади-да, оқ жун халатини кийиб олди.

— Йўқ, йўқ, — жавоб берди она. — Қўриб турибсанку, биз сени кутиб ўтирибмиз. Қўриб кетгур шамол сенга уйқу бермадимми, тилла қизим?

Қиз ажабсиниб онасига тикилди.

— Шамол бўлдимми?.. Ҳеч нимани билмабман, кечаси сираям уйғонмабман.

Ҳамма хахолаб юборди; нонушта олиб келишаётган пазанда хотин билан оқсоч ҳам кулиб қўйишди: бекачанинг ўн икки соат миқ этмай ухлагани ҳақидаги фикр ҳамманинг кулгисини қистатганди. Ёғли булкани кўриб, ҳамманинг чехраси гул-гул очилиб кетди.

— Буни қачон ёпа қолдинглар?— сўради Сесиль.— Зўр совға тайёрлабсизлар!.. Қойил! Иссиққина булочка шоколад билан жуда маза бўлади-да!

Ҳамма стол теграсига ўтирди; чинни идишлардаги шоколаднинг ҳовури кўтарилиб турибди; анчагача гап фақат тотли булочка устида борди. Мелани билан Онорина емакхонада қолишиб, пишириқ тайёрлашнинг ҳар хил икир-чикирлари ҳақида сўзлашар, ота-она билан қизнинг лабларини мойга булаб, оғзиларини тўлдириб, нонни туширишаётганларини кузатишар эди. Оқсоч ёғли булка ёниб бериб, хўжайинларнинг иштаҳа билан ейишини кўрсанг, жуда ҳузур қиласан, дерди.

Ҳовлидаги итлар қаттиқ вовиллашди; ҳамма душанба ва жума кунлари Маршъендан келиб, дарс бериб кетадиган музика муаллимаси бўлса керак, деб ўйлади. Ундан бўлак яна тил муаллими ҳам келиб турарди. Пиоленада тўкин-сочин ҳаёт кечираётган эрка қиз китоб жонига тегиши биланоқ уни ойнадан улоқтириб юборадиган бола сингари маълумот оларди.

— Денелен жаноблари,— маълум қилди Онорина хонага қайтиб кираркан.

Унинг кетидан жаноб Грегуарнинг амакиваччаси жаноб Денелен ҳам кирди. У эски суворилар офицерига хос қадам ташлаб, лапанглаб, қаттиқ гапириб, имо-ишоралар қилиб кириб келди. Гарчи ёши элликлардан ошган бўлса ҳам, калта қилиб олинган сочи билан шоп мўйлови қоп-қора эди.

— Ҳа, бу мен, салом... Баҳузур, безовта бўлманглар!

У шундай деб стол ёнига ўтирди. Уни хитоблар билан кутиб олган оила яна шоколад ейишга тушди.

— Бирон маслаҳатли гапинг борми менда?— сўради Грегуар.

— Йўқ, ҳеч гап йўқ,— шошиб жавоб берди Дене-

лен.— Отда бир оз шамоллаб келай деб чиқувдим, ўтиб кетаётиб сизларни бир кўрай дедим.

Сесиль унинг қизлари Жанна билан Люсини сўради. Денеленнинг гапига қараганда, иккови ҳам соғсаломат, ўйнаб-кулиб юришибди: биттаси расм солиш билан машғул, опаси эса эрталабдан кечгача фортепяно чалиб, қўшиқ айтишни машқ қиларкан. У гўё ясама қувноқлик билан ташвишини яширмоқчи бўлгандек овози сал титраб гапирарди.

— Конларингдаги ишлар қалай?— сўради жаноб Грегуар.

— Эҳ, бу лаънати кризис мени ҳам, бошқаларни ҳам қийнапти... Ҳа, яхши кунларнинг қадрига етмаган эканмиз, энди адабимизни еяпмиз! Беҳисоб пул топамиз, деб заводларни қураверибмиз, темир йўлларни чўзаверибмиз, сармойани тўкаверибмиз. Мана оқиба ти, пуллар кулогини ушлаб кетди, қолгани бу корхоналарни ишга солишга ҳам етмайди... Ҳайрият, аҳволимиз унчалик ночор эмас; ҳар қалай, мен-ку бир амаллаб ўнгланиб оларман-а.

Денелен ҳам амакиваччасига ўхшаб Монсудаги тошкўмир кони «денье»сидан бир акция мерос олганди. Ишбилармон инженер бўлгани учун катта бойлик орттириш иштиёқида куйиб-ёнган Денелен «денье»нинг курси миллионга чиққанда улушини шартта сотиб юборганди. У анчадан бери бир режани пишитиб юрарди. Унинг хотини тоғасидан Вандам яқинида очилган бор-йўғи иккита шахта — Жан-Барт билан Гастон-Марини ишлатиш ҳуқуқини олганди. Бу шахталар шу қадар хароб ва ёмон жиҳозланган эдики, уларни эксплуатация қилиш харажатларни аранг қопларди. Шу боисдан Денелен Жан-Барт шахтасини тиклаш иштиёқида ёнади, кўпроқ одам ишласин учун янги машина ўрнатади, штольняларни кенгайтиради. Гастон-Мари шахтасини эса резервда ушлаб туради. Ўшанда, дерди у, олтинни белкурак билан олса бўлади. Бу фикр тўғри эди. Лекин миллион сарфланиб кетган, лаънати саноат кризиси ҳам келиб-келиб катта харажатни мўмайгина даромадлар ҳисобига қоплаш керак бўлган бир пайтда юз бериб турибди. Бунинг устига Денелен ноқобил маъмур бўлиб, ишчиларни бир хилда кўрмасди, айниқса хотини вафотидан кейин дуч келганга

бойлигини талатаверди; бунинг устига қизларини ҳам ҳаддан ташқари талтайтириб юборди; катта қизи фақат саҳнани ўйласа, кичиги ҳатто учта расмини Салонга ўтказа олмаса ҳам, ўзини рассом деб билади... Оталари синиб, хонавайрон бўлишига қарамай, иккови ҳам ҳаралла-ю тараллани тарк этмасди, аммо муҳтожлик хавфи икковини ҳам ҳар бир тийинни тежаб-тергаб сарфлашга мажбур этган эди.

— Мана, кўрдингми, Леон,— давом этди Денелен дудмол қилиб,— сен мен билан бирга ўз улушингни сотмасдан чув тушдинг. Энди ҳаммаси борбод бўлади, ҳалиям чакки қилиясан... Агар пулингни менга бериб турганингда борми, Вандамдаги конларимиздан нима-лар қилиш мумкинлигини сенга кўрсатардим!

Грегуар қолган шоколадни хўпларкан, вазминлик билан жавоб берди:

— Мутлақо!.. Савдогарчилик қилишни хоҳламаслигимни ўзинг ҳам яхши биласан-ку. Тинч-осойишта яшаяпман; бошимга бўлмағур ташвишу ғалваларни сотиб олиш камоли нодонлик бўлур эди. Монсу масаласига келганда шуни айтишим керакки, сармойнинг курси қанча тушса, тушаверсин,— тирикчилигимизга етади. Лекин жудаям зиқна бўлиш керак эмас. Кези келганда шуни айтиб қўяйки, бир кун эмас, бир кун мен эмас, сен бармоғингни тишлаб қоласан — Монсу тез орада яна қаддини ростлайди, ҳатто Сесилнинг набиралари ҳам ундан тушадиган пулга оқ нон еб ётишади, мен бунга аминман.

Денелен бу гапларни зўраки табассум билан эшитиб ўтирди.

— Бундан чиқдики,— деди у,— мен сенга бошлаган ишимга юз минг франк қўшгин, деб таклиф қилсам, рози бўлмас экансан-да?

У Грегуарларнинг ташвишли юзларини кўриб, шош-машошарлик қилганига афсусланди; у аҳвол жуда танг бўлиб қолган тақдирдагина қарз олиш хусусида гап очишга жазм этди.

— О! Мен ҳали у даражага бориб етганим йўқ! Ҳазиллашувдим... Лекин балки сен ҳақдирсан: одам кўпроқ бировлар топиб берадиган пулни еб ётаверса семиради.

Гап бошқа мавзуга кўчди. Сесиль яна тоғаваччалари ҳақида гап очди, тоғаваччаларининг дид-таъблари

уни қизиқтирарди ва айни чоқда хижолат ҳам қиларди. Грегуар хоним офтоб чарақлаган куниеқ қизини дўндиқчаларнинг олдига олиб боришга ваъда берди. Фақат хаёли қочиб ўтирган жаноб Грегуаргина суҳбатга қўшилмасди. Ниҳоят у баланд овоз билан деди:

— Мен сенинг ўрнингда бўлганимда, оёғимни тираб ўтирмай, Монсу Ширкати билан музокара олиб борган бўлардим... Улар шуни жуда хоҳлашади, сен эса пулингни қайтариб олган бўлардинг.

У Монсу Ширкати билан Вандам шахталари эгалари ўртасидаги эски адоватга шама қилди. Вандам шахталари Монсу олдида аҳамиятсиз бўлишига қарамасдан, унинг олтимиш етти коммуна ерларини эксплуатация қилиб ётган қудратли қўшнисини Монсу Ширкати ўз ерларига суқулиб кириб қолган бу бегона бир парча участкадан ғазабланарди. Вандам шахтасини йўқотиш учун ҳамма чораларни қўллаб, бирор натижа чиқаролмаган Ширкат Денелен корхонасини биланоқ арзимаган пулга сотиб олишни орзу қиларди. Икки орада тўхтовсиз жанг борарди; ҳар қанча фойдаланилганда ҳам муҳолифларнинг ер ости йўлақлари бир-биридан икки юз метр масофада тўхташлари керак эди. Гарчи директорлар ва инженерлар орасида назокатли хушмуомала сақланса-да, бу кураш сўнгги томчи қон қолгунча олиб бориладиган кураш эди.

Денеленнинг кўзлари ёниб кетди.

— Асло! — хитоб қилди у ўз навбатида. — Мен тирик эканман, Монсу Вандамни олиб бўпти... Пайшанба куни Энбоникада тушлик қилдим. Энбонинг пинжимга кириб, парвона бўлганини сездим. Утган йил кузида бу корчалонлар Бошқармага йиғилишганда мени ҳар кўйга солиб, роса замах қилишди-да... Ҳа, ҳа, биламан мен уларнинг ҳаммасини, бу маркизу герцогларни, генералу министрларни! Қароқчининг ўзи булар, худо кўрсатмасин, ўрмонда бунақаларнинг қўлига тушиб қолсанг борми, шўрим қуриди деявер, кўйлак-иштонинггача шилиб олади!

Энди уни юпатишнинг иложи йўқ эди. Жаноб Грегуар, сирасини айтганда, Монсу конлари бошқармасини ёқламасди; 1760 йилдан бошлаб унинг олти директордан иборат правлениеси бутун Ширкатга шафқатсизлик билан ҳукмронлик қиларди; ҳар сафар улар-

дан бири ўлганда қолган бештаси энг бой ва нуфузли акционерлардан янги аъзо сайларди. Пиоленанинг хўжайини ўз хоҳишларини тизгинлай оладиган одам бўлганлигидан бу корчалонлар бойлик кетидан қувиб, кўпинча ҳаддан ошиб кетишади, деб ҳисобларди.

Мелани дастурхонни йиғиштиргани келди. Ҳовлида яна итлар вовиллади. Онорина эшик томон юрган эди, димиқиб, қорни тўйиб кетганидан ҳарсиллаётган Сесиль ўрнидан турди.

— Керак эмас, бормай қўя қол, — деди у Оноринага қараб. — Балки, муаллима келгандир.

Жаноб Денелен ҳам ўрнидан турди. У кетаётган қизнинг орқасидан қараб туриб, илжайиб сўради:

— Хўш, Негрелнинг ўғли уйланмоқчийди, нима бўлди?

— Ҳали ҳеч нима маълум эмас, — жавоб берди Грегуар хоним, — ҳамон осмонда юрипти... Ўйлаб кўриш керак.

— Э, бўлмасам-чи, — давом этди у айёрона илжайиб. — Менимча, бу жиян билан холаси тушмагур... Айниқса Энбо хонимнинг Сесилга осилиб олгани мени ҳайрон қолдиради.

Лекин жаноб Грегуар тутақиб кетди. Шундай мўътабар хоним-а, яна ўзидан ўн тўрт ёш кичик йигит билан донлашиб юрса-я! Даҳшат-ку бу! Грегуар бунақа гапларни ҳазил қилиб ҳам гапиришларини ёқтирмас эди. Денелен тиржайганча, унинг қўлини қисиб, узоқлашди.

— Буям муаллима эмаскан, — деди Сесиль қайтиб келиб. — Анави икки болали хотин-чи, ойи, эсингдами, биз учратган шахтёрнинг хотини, ўша келибди... Бу ёққа чақириб келайми?

Грегуарлар иккиланиб қолишди. Ҳамма ёқни из қилиб ташлашмасмикин? Йўқ, унчалик кир эмас кийимлари, ёғоч бошмоқларини зинапояга ечиб келишар. Ота билан она нонушта яхши ҳазм бўлсин учун катта креслоларга ясланиб олишганди; уларнинг ўринларидан қимирлагилари келмасди.

— Бу ёққа олиб киринг уларни, Онорина.

Емакхонага Маэ хоним болалари билан кириб келди; совуқ ўтиб, очликдан силласи қуриган бу бечоралар иссиққина, ёғли нон ҳиди гупиллаб турган хонада чўчинқираб турардилар.

II

Ҳаммаёғи ёпиқ хонанинг панжарасимон дераза қоққоқлари тирқишларидан тушган кундузги кулранг нур йўл-йўл бўлиб, елпигичдек шифтга таралган эди. Хонанинг дим, бузуқ ҳавосида нафас олиш қийин бўлишига қарамасдан, ҳамма миқ этмай ухларди. Ленора билан Анри қучоқлашиб ётишар, Альзира бошини елкасидаги букрисига ташлаб олган, Улмас бобо бўлса, Захария билан Жанлендан бўшаган ўринда бир ўзи ётиб, оғзини очганча хуррак отарди. Йўлакдаги майдончага қўйилган эр-хотин каравотидан ҳеч қандай сас эшитилмасди. Маэ Эстеллани эмизиб бўлгач, ёнбошига ағдарилиб, болани қорнига кўндаланг қилиб ётқизганди-ю, шу кўйи пинакка кетганди, қизалоқ қорни тўйгач, онасининг юмшоқ сийнасига юзини қўйганича ухлаб қолганди.

Пастдаги ку-кулайдиган соат олтига занг урди. Посёлкада кўча эшикларнинг тақ-туқ очилиб ёпилиши, ёгоч бошмоқларнинг тротуар плиталарида тўқиллаши эшитила бошлади: булар сараловчилар бўлиб, ишга кетишаётганди. Кейин соат еттигача яна сукунат чўкди. Еттида дераза қоққалари очилди, юпқа деворлардан қаттиқ ҳомуза тортишлар, йўталишлар эшитила бошлади. Яқин орадаги қаҳвахона тегирмони аллақачондан бери ғижирларди, бироқ Маэ уйдагиларининг биттаси ҳам ҳали уйғонмаганди.

Бирдан қаттиқ қичқириқлар, шапалоқ товушлари эшитилди. Шовқин Альзирани уйғотиб юборди; у ухлаб қолишганини фаҳмлаб, ўрnidан дик этиб турди-ю, оёқ яланг югуриб бориб, онасини уйғота бошлади:

— Ойи, ойи, тез тур! Сен у ёққа боришинг керак... Эҳтиёт бўл. Эстеллани босиб олма тагин.

У шундай деди-ю, онанинг улкан кўкраклари оғирлигидан бўғилаётган қизалоқни кўтариб олди.

— Вой худо-ей! — деди Маэ аранг кўзларини ишқаларкан. — Шундай чарчабманки, қўйиб берса, кечгача қимирламай ухлардим. Ленора билан Анрини кийинтир, бирга олиб кетаман; сен Эстеллага қараб турасан, бунақа расво ҳавода уни обормай қўя қолай, касалпасал бўлиб қолмасин тагин.

Маэ апил-тапил ювинди, эски кўк юбкасини, яқин-

да иккита ямоқ солган, ювиб озода қилиб қўйган кулранг жун кофтасини кийди.

— Тушликни ҳам жаббор чалибди-ку! — яна ғўлдиреди Маэ. У зинадан тушаркан, ҳадеб у-бу нарсаларга қоқилар эди.

Бу орада Альзира қайтиб, яна чинқириб йиғлаётган Эстеллани хонага олиб келди. Ушоқ, букри Альзира қизалоқнинг йиғисига ўрганиб қолган, саккиз ёшда бўлишига қарамасдан катта хотинлардек болани овутишга уста эди, — у қизалоқни ҳали совимаган ўрнига оҳиста ётқизди-да, оғзига бармоғини тиқиб сўрдириб, аллалай бошлади. Яхшиям чақалоқни ухлатиб олипти: ниҳоят уйғонишган Ленора билан Анрининг жанжалини босиб, ажратиб қўйишга тўғри келди. Болалар асло тотув юришмасди, фақат уйқуга кетганларидагина бир-бирларини қаттиқ қучоқлаб олишарди. Олти яшар қиз уйғониши биланоқ ўзидан икки яшар кичик укасига ташланар, бола эса муштларга жавоб қайтармай чидар эди. Икковининг ҳам бешини худди пуфлаб шиширилгандек катта-катта бўлиб, малларанг сочлари тўзиб кетганди. Альзира синглисини оёғидан судраб ажратди-да, ўлгудек савалайман, деб пўписа қилди. Кейин болаларни ювинтириш, кийинтириш бошланди; улар сўз бермай, оёқларини типиллатиб, қийнашарди. Бобони уйғотиб юбормаслик учун дарчаларни очишмади. Чол болалар кўтарган шовқинсуронга парво қилмай хуррак отиб ётарди.

— Мен тайёрман! Ҳой, тепадагилар, бўлдиларингми? — чақирди она.

Маэ пастдаги хонанинг дарчасини очди, оловини титди-да, кўмир ташлади. У зора-мора чол суюқ ошдан қолдирган бўлса, деб умид қилганди. Лекин котелокни ялаб, чиннидек қилиб қўйипти; уч кундан бери асраб келаётган бир сиқим вермишелни қайнатишга тўғри келди. Болалар ёғсиз ҳам ейишаверади, — бари бир кечагидан ҳеч вақо қолмаганди; лекин у Катринанинг бутербродлардан ёнғоқдек ёғни қолдирганини кўриб, ниҳоятда ажабланди. Бу сафар буфет ҳам шипшийдим: на бир тишлам нон, на бирон овқат қолдиғи бор, мужишга ярайдиган суяк ҳам йўқ. Агар Мегра озиқ-овқатни қарзга бермаса, Пиолонодаги жаноблар юз су бермаса, уларнинг ҳоли нима кечади? Эркаклар билан қизи шахтадан қайтишса, албатта овқат егилари ке-

лади; афсуски, одамлар ҳали овқат емасдан кун кўриш йўлини топишмаган.

— Кела қолсаларинг-чи! — қичқирди Маэ жаҳли чиқиб. — Кечга қоляпман.

Альзира билан болалар пастга тушишганда она учта кичкина ликопчага вермишель қуйиб берди. Узи эса ичким келмаяпти, деб ишонтирмоқчи бўларди. Гарчи Катрина кеча кофе қуйқасига сув қўшган бўлса ҳам, Маэ яна сув солиб, икки марта катта кружкада ичди: унинг туси кофедан кўра кўпроқ занглаган сувга ўхшарди. Ҳар қалай мадор бўлади-ку.

— Менга қара, — деди Маэ Альзирага қараб, — бувангни уйғотма, Эстеллага қараб тур, йиқилиб, майиб бўлиб ўтирмасин, мабодо уйғониб, жуда йиғлайдиган бўлса, манави бир бўлак қандни сувда эритгин-да, қошиқча билан ичиргин. Биламан, сен ақлли қизсан, буни ўзинг еб қўймайсан.

— Мактабим нима бўлади, ойи?

— Мактаб! Мактабга янаги сафар борасан... Сен менга уйда кераксан.

— Тушлик нима бўлади? Хўп десанг, овқатни мен қила қолай, балки кеч келарсан?

— Тушлик... Тушки овқат... Йўқ, кутиб тур, ўзим келиб қиламан.

Альзира кўпчилик дардчил болалар каби муштдек бошидан бало эди. Овқат пиширишга ҳам уста эди, лекин у гапнинг тагини тушунди-ю, индамай қўя қолди. Бутун посёлка уйғонди, болалар тўда-тўда бўлишиб, пойабзаллари билан тротуарни дўқиллатишиб, мактабга кетардилар. Соат саккизга занг урди; чап томондан, Леваклар уйдан гўнғир-гўнғир гаплар тобора қаттикроқ эшитила бошлади. Хотинлар куни бошланди, — аёллар кофедан хўплаб, чакакларига зўр беришар — гўё тилларини тегирмон тошидек тинмай галдиратар эдилар. Дераза ойнасига лаби гўштдор, бурни пучук, сўлгин юз ёпишди-да, шундай деди:

— Зўр янгилик бор, эшиттингларми?

— Йўқ, йўқ, кейин! — жавоб берди Маэ. — Мен кетишим керак.

Маэ, кириб қайноқ кофе ич, деган таклифга хўп деб ўтириб қолишдан қўрқди-да, наридан-бери Ленора билан Анрини овқатлантириб, уларни етаклаб хонадан

чиқди. Тепада бутун уйни бир маромдаги хурраги билан аллалаб Улмас бобо ҳамон ухлаб ётарди.

Маэ шамол тинганини пайқаб ҳайрон қолди. Қўқ-қисдан ҳаво исиб кетди; осмон ер рангида эди, намиқиб кетган деворлари яшил тус олганди, йўллар лой. Бу тошкўмир чиқадиган жойларга хос алоҳида лой бўлиб, худди суюлтирилган қурумдек қоп-қора, шунчалик қуюқ, ёпишқоқки, пойабзалингни олиб қоламан дейди. Шу заҳоти Ленорани бир тарсаки уришга тўғри келди: у худди белкурак билан олгандек бошмоғига қалин лойни илаштириб олиб ўйнаётганди. Маэ посёлкадан чиқиб чиқитлар уюми ёнидан ўтгач, каналга олиб борадиган йўл билан юрди; йўлни қисқартириш учун мох босган тўсиқ билан ўралган майдонни чўрт кесиб ўтди. Саройлар узун завод корпуслари билан алмашинар, узун-узун трубалар қоп-қора дуд пуркаб, фабрика посёлкасига айланиб қолган бу қишлоқни булғар эди. Бир тўп тераклар орқасида минораси бузилиб, фақат бақувват пойдевори қолган эски Рекийяр шахтаси кўринди. Унга бурилган Маэ ниҳоят катта йўлга чиқиб олди.

— Тўхта-тўхта, итвачча! Ҳозир адабингни бераман сени!

Бу сафар Анри қўлга тушган эди: у бир қисм лойни олиб мижиғлаётганди. Маэ суриштириб ўтирмай болаларнинг икковига ҳам шапалоқ тортиб юборди; улар жим бўлишиб, ўзларининг йўлдаги кичкина-кичкина изларига кўз қирларини ташлашди. Улар ҳориб-чарчаб, лой кечиб, аранг боришарди, чунки ҳар қадам босгандан кейин оёқни зўр-базўр суғуриб олишга тўғри келарди.

Маршённдан кейин икки милча йўлга тош ётқизилганди; бу йўл қизғиш далалар ўртасидан гўё қорамойга беланган тўғри лентадек ўтарди. Ундан у ёғига ингичка шнурдек қия бўлиб тушиб кетган текисликдаги Монсуни кесиб ўтарди. Шимолдаги йўллар худди тизимчадек саноат шаҳарчалари аро сўзилиб кетарди; баъзан сал буриларди-да, сезилар-сезилмас баланд-пастликлардан ўтарди, улар атрофида секин-аста бинолар қурилиб, бутун округни ишчилар посёлкасига айлантириб юборганди. Қиялик этагигача ўнги ва чап томонда ғиштин уйлар тизилиб кетганди. Атроф-теваракдаги бефайз жойни бирон нима билан бўл-

са ҳам жонлантириш учун уйларнинг баъзиларини сарик, айримларини зангори рангга, кўпларини эса қорага бўягандилар; бари бир охири ҳаммаси қорайиб кетади-ку, деган мулоҳаза билан қорага бўяган бўлсалар керак. Завод бошлиқлари учун қурилган бир неча катта икки қаватли уйлар кўримсиз уйчалар сифини бузиб турарди. Черков ҳам ғиштин бўлиб, кўмир чангидан қорайиб кетган қўнғироқхонаси билан домна печининг янги моделини эслатарди. Бу ерлардаги қанд заводлари, арқон фабрикалари, тегирмонлар билан бирга танца қиладиган заллар, қаҳвахоналар, пивохоналар ҳам асосий ўринни эгалларди; мингта иморатдан беш юзтаси ана шунақа эди.

Мана Ширкатга қарашли завод корпуслари,— омбор ва устахоналарнинг узун қатори бошланди. Маэ Анри билан Леноранинг кўлларидан ушлаб олди. Директор Энбонинг швейцарияликларнинг тоғ чайласига ўхшатиб солинган ва йўлдан панжара билан ажратилган уйи иморатларнинг орқасида эди. Панжаранинг нарёғида дарахтлари нимжон боғ кўриниб турарди. Дарвоза олдига экипаж келиб тўхтади; ундан орден таққан жаноб билан мўйнали манто кийган хоним тушди — афтидан булар паришлик меҳмонлар бўлиб, Маршённ вокзалидан келишганга ўхшайди. Нимёруғ вестибюлда Энбо хоним кўринди; у ҳайрат ва қувонч билан меҳмонларни қутлаб, уларга пешвоз чиқди.

— Нимага анграясанлар, юринглар, ишёқмаслар! — вайсади Маэ лойга ботган болаларининг кўлларидан тортиб.

Маэ қаттиқ ҳаяжонланиб, Мегранинг дўконига яқинлашди. Баққол директор билан ёнма-ён турарди: унинг уйи билан ҳашаматли иморатни фақат девор ажратиб турарди. Моллар сақланадиган омбор ҳам шу ерда бўлиб, узун бинога жойлашганди; кўчага қараган баққоллик дўкони ҳам шу ерда эди. Бу ерда ҳамма нарса: баққолчилик буюмлари, колбаса, тар мевалар, нон, пиво, кастрюлкагача сотиларди. Мегра илгари Ворёда назоратчи бўлиб ишларди, сўнг фаолиятини кичкина қовоқхона очишдан бошлади, кейин бошлиқларнинг ҳомийлигида савдо-сотиқни кенгайтириб юборди; секин аста у Монсудаги майда-чуйда дўкондорларни хонавайрон қилди. У ҳамма нарса билан савдо қиларди,

завод посёлкаларидаги харидорларнинг кўплиги эса нарсаларни бошқаларга қараганда арзонроқ сотишга, кўпроқ қарз-насыга нарса тарқатишга имкон берар эди. Мегра кейинчалик ҳам Ширкат ёрдамидан баҳраманд бўлиб турди, Ширкат унга уйча билан омбор қуриб берди.

— Мен яна келдим, Мегра жаноблари,— деди Маэ эшик олдида турган дўкондорни кўриб.

Мегра унга индамай қараб қўйди. Бу семиз одам ҳаммага сиполик билан хушмуомалада бўларди; у қарорини ҳеч қачон ўзгартирмаслиги билан фахрлар эди.

— Арзимни тингланг, барака топкур, кечагидек мени ҳайдаб юбормассиз, а? Бир амаллаб шанбагача етиб олсак бас. Тўғри, икки йилдан бери сиздан олтиш франк қарздормиз...

У арз-додини не машаққатлар билан қисқа ибораларда изҳор қиларди. Ҳалиги олтиш франк эски қарз бўлиб, охирги иш ташлаш давридан қолганди. Маэлар неча марта шу қарздан қутулайлик, деб жазм қилишарди-ю, аммо уддасидан чиқиша олмасди, чунки маошларидан жилла қурса қирқ су ҳам орттиришолмасди. Бунинг устига ўтган куни бошларига яна бир фалокат тушди — қарзни тўламасаларинг судга бераман, деб қўрқитган этикдўзга йигирма франкни беришга мажбур бўлишди... Мана энди бир тийинга зор бўлиб ўтиришибди. Бўлмаса бошқа ўртоқларга ўхшаб шанбагача чўзиб туришарди-я.

Мегра қорнини дўппайтириб, қўлларини кўкрагига чалиштирганча Маэнинг ҳар бир илтижосига бошини сарак-сарак қилиб, рад жавоб берарди.

— Иккита нон беринг, кўп эмас, Мегра жаноблари. Андишали хотинман, мен сизга кофе беринг, деяётганим йўқ... Фақат уч қадоқли нондан кунига иккита бериб турсангиз бўлгани!

— Йўқ! — ўшқирди ниҳоят Мегра жон-жаҳди билан.

Бир минут ҳам ҳисоб-китоб дафтарларидан бош кўтармайдиган касалманд аёл — Мегранинг хотини кўринди. У бечора хотиннинг илтижо билан боқшини пайқаган заҳоти қўрқиб, кўздан ғойиб бўлди. Одамларнинг айтишларича, юккаш аёллар харид қилгани келишганда, бу аёл ўз ётоғини бўшатиб берар экан.

Бу нарса ҳаммага маълум: агар кўмир қазувчи қарз тўлаш муддатини чўзмоқчи бўлса, дўконга қизи ёки хотинини юбориши лозим — чиройликми, хунукми, бари бир, фақат кўнгли бўш бўлса бас.

Маэ илтижо билан Меграга қараб тураркан, бирдан ўзини ноқулай сизди. У Мегранинг хира кўзлари ҳирс билан тикилиб турганини пайқаб қолди. Бу ҳол унинг жонини чиқариб юборди: етти боласи бўлмаса, ўзи ёш бўлганда ҳам майли эди! Маэ ариқдан оқиб келаятган ёнғоқ пўчоқларини тутиб, қарашаятган Ленора билан Анрининг қўлларидан силтаб, жўнаб қолди.

— Бу ишингиз сизга бахт келтирмайди, жаноб Мегра, мени айтди дерсиз бир кун.

Энди унинг умиди фақат пиоленалик жаноблардан эди. Агар улар ҳам юз су қарз беришмаса — унда очдан ўлишдан ўзга чора қолмайди. У йўл юриб, чапга, Жуазель томонга бурилди. Йўллар туташиб, бурчак ҳосил қилган жойда Правленининг гиштин биноси қад кўтариб турарди. Бу ҳашаматли саройда ҳар кузда парижлик донгдор жаноблар, князлар, генераллар, амалдорлар асъаса-дабдаба билан зиёфат беришарди. Маэ бораркан, оладиган юз суни хаёлан сарфлаб ҳам бўлди: даставвал нон, кейин кофе, сўнг чоракталикда ёг олади, эрталабки суюқ ошга ва кечки овқатга бир челак картошка ва ниҳоят озгина студень* ҳам ётиб олади, чунки эри гўштлик таом емаса бўлмайди.

Монсулик руҳоний, аббат Жуар ридосининг этагини кўтариб, худди терисини булгашдан қўрққан семиз мушукка ўхшаб оҳиста қадам босиб ўтиб кетди. Бу беозор қобил киши ишчиларни ҳам, хўжайинларни ҳам ўзига қарши қилиб қўймаслик учун ҳеч кимнинг ишига аралашмасликка ҳаракат қиларди.

— Салом, кюри жаноблари.

Маэ умуман тақводор бўлмаса ҳам, бирдан назарида руҳоний бир илож қилиб ёрдам берадигандек туюлди. Жуар тўхтамасдан болаларга илжайиб қўйди-да, йўл ўртасида қоққан қозикдек туриб қолган хотин ёнидан ўтиб кетди.

Шундан кейин хотин яна ёпишқоқ қоп-қора лойдан юриб кетди. Яна икки километр йўл бор; энди болаларни ҳам судраб бориши керак; болалар ўлгудек

* Гўшт ёки балиқни қайнатиб тайёрланган яхна овқат.

чарчашганди, улар энди ҳеч нимага қизиқмай ҳам қўйишганди. Унг ва сўл томонда ҳамон ўша мох босган панжара билан ихота қилинган майдонлар кўринарди, ис босган баланд-баланд трубали фабрика корпуслари тизилиб кетганди. У ёғида далалар — бепоён, кўз илғамас қўнғир тупроқли ерлар ёстаниб ётарди; атрофда уфққа қадар, Вандам ўрмонлари бинафшаранг товланиб турган жойгача бирон туп дарахт кўринмасди.

— Мани кўтариб ол, ойи.

Маэ навбатма-навбат болаларни кўтариб оларди. Тош йўлда одим жойда қўлмак бўлгани учун Маэ хўжайинлар олдига лой бўлиб бормаи, деб юбкасини липпасига қистириб олганди. Уч марта йиқилиб тушишига оз қолди, — лаънати йўл шу қадар сирғанчиқ эди. Улар ниҳоят уйга яқинлашганларида иккита ит шу қадар вовиллаб уларга ташландики, болалар қўрқиб, қичқириб юборишди. Кучер қамчинни ишга солишга мажбур бўлди.

— Бошмоқларингни ечиб кираверинглар, — деди Онорина.

Она-болалар емакхонага киришди-ю, қаққайиб туриб қолишди; уйнинг иссиғи дарҳол уларни гангитиб, креслога ясланиб, диққат билан разм солиб ўтирган кекса жаноб билан анча ёшга бориб қолган хонимнинг савлати қаттиқ хижолат қилиб қўйган эди.

— Қани, қизалогим, — деди хоним, — арзимас бурчингни адо эт.

Грегуарлар қизлари зиммасига камбағалларга ёрдам бериш вазифасини юклагандилар. Уларнинг назарида бу иш яхши тарбия ҳисобланарди. Раҳму шафқатли бўлиш керак, чунки бизнинг уй худонинг уйи, дейишарди улар. Шуниси ҳам борки, улар яқин кишиларга оқилона ёрдам бераётганларига ишонишар, доимо алданишдан қўрқишар, ножоиз хайр қилиб, гуноҳга ботишдан ҳайқишарди. Шу сабабли улар ҳеч қачон, асло пул беришмасди! Ун су у ёқда турсин, икки суни айтинг, — ахир гадойга икки су тегдими, бас, дарров бориб ичиши аниқ. Шунинг учун ҳам улар ҳамма вақт хайру садақага пул эмас, кўпинча қишда йўқларнинг болаларига иссиқ кийим-кечак беришарди.

— Вой бечора болалар-ей! — хитоб қилди Сесиль. — Совуқ еб кўкариб кетишибди-ю! Онорина, шкафдаги тугунни олиб чиқ.

Оқсоч ҳам бечораларнинг ҳолига юраги ачиб, анграйиб қолган эди: бироқ бу ачиниш — ўз қорни ғамини емайдиган аёлнинг изтироби эди. Оқсоч нарсаларни олиб келгани тепага чиқиб кетгач, ошпаз хотин қолган бурда-сурда нонларни йиғиштирмоқчи бўлди-ю, лекин уларни яна стол устига қўйди-да, қўлларини қовуштириб, емакхонада ўтираверди.

— Менда худди мўлжалдагидек иккита жун кўйлак билан иссиқ рўмол бор эди, — Сесиль давом этди гапида. — Мана кўрасиз, иссиққина, болаларингизнинг жони киради!

Бу орада бир оз ўзига келган Маэ қўрқа-писа деди:

— Сизга катта раҳмат, бекача... Қўлингиз очиқ экан...

Маэнинг кўзларига ёш келди. Унга юз су нақддек туюлди ва у жанобларнинг ўзлари таклиф этишмаса, нима деб айтишни, қандай ундиришни ўйлади. Оқсоч ҳадеганда келавермади; орага ноҳуш сукунат чўкди. Болалар онанинг юбкасига ёпишиб, булгага суқлик билан қарашарди.

— Болаларингизнинг бори шу иккитами? — сўради Грегуар хоним сукунатни бузиб.

— Йўқ, хоним, етти болам бор.

Яна газета ўқишга тутинган жаноб Грегуар жаҳли чиққанидан ҳатто ўрнидан сал туриб ўтириб, деди:

— Етти бола, вой худойим-ей! Нега мунча кўп?

— Бу ақлдан эмас, — гўлдиради кекса хоним.

Маэ гўё кечирим сўргандек мужмал имо-ишора қилди. Нима ҳам қилардинг? Бу ҳақда ўйламайсан ҳам, ўз-ўзидан бўлиб қолаверади-да. Аммо кейин болалар ўсиб катта бўлишгач, ишлаб, оилага ёрдам беришади. Сирасини айтганда, улар ҳозир ҳам, агар жуда қариб қолган бобо бўлмаганида, болалар ҳам сал каттароқ бўлишганда-ку, зориқш нималигини билишмасди-я; икки ўғли билан бир қизи конда ишлаганга рухсат этиладиган ёшга энди етишди. Ҳар қалай кичкиналарни ҳам боқиш керак, — ахир улар ҳемири ҳам ишламайди-ку.

— Демак, сиз бу конларда анчадан бери ишлар экансиз-да?— сўради Грегуар хоним.

Маэнинг қонсиз чехраси унсиз табассум билан ёришди.

— Э, нимасини айтасиз! Ҳа... йигирмага киргунимча ишладим. Лекин иккинчи марта туққанимда, доктор агар ишни давом эттираверсанг, ўша ерда ўласан, деди; суякларимга бир бало бўлибди шекилли. Бунинг устига ўша пайтларда эрга теккандим, уйда ҳам ишларим кўпайиб қолувди... Лекин эримнинг авлод-аждоди узоқ замонлардан бери шахталарда ишлаб келишади. Эримнинг бувакалони бошлаб берганми-ей,— хуллас, ҳеч ким билмайди қачон бошлашганини,— Рекийярдан кон топишган вақтларда бўлиши керак.

Жаноб Грегуар хаёл суриб, хотинга, унинг нимжон болаларига, уларнинг заъфарондек юзларига, оқимтир сочларига разм солди. У уларнинг бўйлари пастлиги, юзларининг қонсизлиги, фақирона яшашларини кўриб, бу туғма нуқсонлар аломати эканини пайқади! Яна сукунат чўкди, фақат каминдаги кўмирнинг чирсиллаши эшитиларди. Иссиқ емакхонанинг дим, оғир ҳавосидан тўқ, фаровон ҳаёт ҳиди келарди; маъмурчилик ҳавоси бу бадавлат, хирсдай тўқ хонадоннинг ҳар бир бурчагини тўлдирган эди.

— Мунча имилламаса-я?— қичқирди Сесиль тоқати тоқ бўлиб.— Мелани, чиқиб айт, тугун шкафнинг пастиди, чап томонида турибди.

Шу пайт бу бечораларнинг афт-башарасини кўриб хаёлга чўмган жаноб Грегуар мушоҳадаларини овоз чиқариб яқунлади:

— Дунёда қайғу-ғам кўп, бу ҳақ гап; лекин ази-зам, ўзингиз ҳам тан беринг, ишчиларнинг ўзлари ҳамини ҳам оқилона иш тутмайдилар. Деҳқонларга ўхшаб бир кунимга яраб қолар, деб оз-оздан пул йиғиб юриш ўрнига, кўмир қазувчиларимиз ичкиликка зўр берадилар, қарзга ботадилар, пировардида оилани тебратишга қурбилари етмай қолади.

— Гапингиз тўғри,— деди Маэ вазминлик билан.— Ишчиларимиз кўрпаларига қараб оёқ узатмайдилар. Улар шикоят қилишганда минг марта айтаман бу ишқемасларга... Тағинам омадим бор экан: эрим ичмайди. Ҳа энди, якшанба кунлари сайил қилиб бир оз ичади, лекин анавиларга ўхшаб кўп эмас. Унинг

шуниси яхшики, турмуш қургуниimizча роса ичган, молдек ичарди ўзиям. Аммо ўзини тийгани билан ишимиз юришмаяпти-да. Мисол учун мана шу бугунги кунни олайлик, уйни ағдар-тўнтар қилиб юборсангиз ҳам, бир тийин тополмайсиз.

Маэ, менга юз су керак бўлиб қолди, деб шама қилиб ўтмоқчи бўлиб чайналар, маъшум қарз домига қандай илнини қолишганини тушутирмоқчи бўларди; дастлаб арзимаган пул экан, лекин вақт ўтиши билан кўпайиб, жами жамгармаларни хўлаб кетибди. Улар қарзни ҳар моянадан канда қилмай тўлаб боришаркан. Лекин бир сафар тўлашнинг илсжи бўлмаган экан — тамом — ўшандан бери пул тўплашолмасмиш. Рўзгор эмас — гор деганлари тўғри экан, отинг ўчкур бу тешикни ҳеч тўлдириб бўлмайди-я; шундан кейин: бу нима, итдек ишлайсан, ишлайсану ҳатто қарзингдан ҳам қутулолмайсан, деб ўқинасан. Ҳе, қуриб кетсин ҳаммаси! Улиб қутулмасанг, тиригингда қутулиш йўқ бу ташвишлардан. Бунинг устига кўмир қазувчи учун бир-икки кружка пиво ичиб туриш фойдали эканлигини ҳам айтиш керак, кўмир чангларини ютавергандан кейин оғизни чайқаш ҳам керак-да. Ичкилик ана шундай бошланади, кейин, бирон кўнгилсизлик юз бериб қолса, қсвоқхонадан чиқмайди қўяди. Маэ ҳеч кимни айбламайди, бу фалокатларнинг боиси унинг фикрича, ишчиларнинг кам ҳақ олишида бўлса керак.

— Ширкат сизларга тураржой, ёқилги беради, шекилли, — гап қистирди Грегуар хоним.

Маэ каминда ловиллаб ёнаётган кўмирга кўз қирини ташлаб деди:

— Ҳа, ҳа, бизга кўмир беришади: унча яхши бўлмаса ҳам, ростини айтганда, ҳар қалай ёнади... Жой масаласига келсак: уй учун сўйига бор-йўғи олти франк — арзимаган пул тўлаш керак, лекин кўпинча шуниям орттиролмай қоламиз... Мана бугун мени сўйиб, минг бўлакка бўлишгки, икки су ҳам топа олмайсиз. Тагида бўлмагандан кейин, минг қидир, тополмайсан-да!

Хўжайин билан хоним креслоларда таманно билан жим ўтиришарди, улар бундай муҳтожликни кўриш ва эшитишдан алланечук бўлиб, зерикишди. Маэ уларнинг иззат-нафсига тегиб қўймадиммикин, деб қўрқиб

кетди; тадбирли аёл бўлгани учун вазминлик билан қатъий оҳангда деди:

— Э, мен бу гапларни арз-дод маъносида айтаётганим йўқ. Пешонамизда бори шу бўлгандан кейин, на чора, кўнамиз-да; ўзингни минг у ёқдан бу ёққа урганинг билан бари бир ҳеч нима ўзгармайди. Менимча, энг муҳими, тақсир, худонинг берганига қаноат қилиб яшашу ўз ишингни виждонан бажарганинг яхши.

Жаноб Грегуар Маэнинг гапларини жудаям маъқуллади.

— Бундай эътиқодли киши, азизам, ҳеч қачон хор бўлмайди.

Онорина билан Мелани ниҳоят тугунни олиб келишди. Уни Сесилнинг ўзи ечди-да, иккита кўйлақчани олди. Кейин уларга биттадан рўмол, ҳатто пайпоқ билан қўлқоп ҳам қўшди; у болажонлар жони кириб кийишади, деб ишонтирди, чўри хотинга эса ажратилган нарсаларни ўраб беришни буюрди. Сесиль шошиб қолди: ниҳоят музика ўқитувчиси келиб қолганди, шунинг учун ҳам она-болаларни тезроқ уйдан жўнатишга ошиқди.

— Пулимиз қолмади ҳечам, — қўрқа-писа деди Маэ, — агар бизда лоақал юз су пулимиз бўлгандаям...

Унинг сўзлари бўғзида қолди, чунки Маэлар ориятли бўлишиб, ҳалигача бировдан хайру садақа сўрашамаганди. Сесиль нима қиламиз дегандек отасига қаради, лекин у гўё эзгу бурчни адо этаётгандек ўшшайиб қатъиян рад этди.

— Йўқ, пул бериш бизнинг удумда йўқ. Биз беролмаймиз.

Шунда она чеҳрасида зоҳир бўлган ғам-андухдан таъсирланган Сесиль болаларга бирор нарса беришга қарор қилди; улар келганларидан бери булкадан кўзларини олишмас эди; Сесиль икки бўлак нон кесиб, уларга узатди.

— Мана! Бу сизларга.

Лекин кейин Сесиль уларни қайтариб олди-да, эски газета беришларини буюрди.

— Шошмай турунглар, ҳали опа-сингилларинг билан бўлиб ейсизлар.

Сесиль меҳмонларни эшикка чиқариб қўйди, ота-она эса қизларининг бу ишларига завқ билан қараб

туришарди. Анчадан бери нон тишламаган бечора болалар совуқ қотган мурғак қўлларида икки бўлак ёгли булкани ардоқлаб тутиб борардилар.

Маэ катта тош йўлдан болаларнинг қўллари тугиб судраб борарди: у бийдай далаларни ҳам, қора лойни ҳам, қовоғи солиқ осмонни ҳам кўрмасди: кўз олдида олам чир-чир айланарди. Яна Монсу орқали ўта туриб, Маэ дадил қадам билан Мегранинг олдиға кирди-да, ялиниб-ёлвориб, ниҳоят, икки буханка нон, кофе ва ёгдан ташқари ҳатто муддаоси юз сулик тангани ҳам олди: айтганча Мегра судхўрлик билан ҳам шуғулланарди. Унга Маэ эмас, Катрина керак эди. Маэ хоним бу нарсани Мегра, озиқ-овқатни олиб кетгани қизингни юбор, деганида фахмлади. Майли, кўрармиз. Агар у қўлига эрк берса, Катрина унинг юзига тарсаки тортиб юбориши турган гап.

III

Аббат Жуар якшанба кунлари имомлик қиладиган Икки юз зағизгон посёлкасидаги гиштин черковнинг қўнғироқлари ўн бир марта занг урди. Черков ёнида мактаб бўлиб, унинг биноси ҳам гиштин эди. Совуқ бўлгани учун деразалар зич ёпилганига қарамасдан болаларнинг чўзиқ товушлари эшитилиб турарди. Тўртта катта маҳалла уйларига тутшиб кетадиган хиёбонга ёнма-ён тушган кенг кўчада жон зоти кўринмайди. Дарахтлар ҳали қишдагидек яп-яланғоч; тошлоқ ерлар чопилиб, ариқчалар олинган, кечки сабзавотлар тўда-тўда бўлиб ивирсиб ётибди. Ошхоналарда овқат қилинарди. Мўрконлардан дуд чиқиб турипти. Аҳён-аҳёнда уйлардан хотин киши чиқиб, эшик очилар, яна ғойиб бўларди. Ёмғир тинган бўлса ҳам, аммо осмон кулранг эди, шунчалик ҳаво нам эдики, тош ётқизилган тротуарга қўйилган бочкаларга тарновлардан ҳамон сув чакиллаб томарди. Кенг, ясси тепаликка қурилган қора йўллар гўё мотам ҳошиясидек ўраб олган бу бефайз посёлкага ёмғир тинмай юваётган қизил черепицали томларнинг тўғри қаторларигина жон киритиб турарди.

Маэ қайтишида бир кўчага бурилди-да, назоратчининг хотинидан картошка сотиб олмоқчи бўлди. Бу хотинда ўтган йилги картошкадан қолган эди. Бу ёқ-

ларнинг ягона дарахти — нимжон тераклар оркасидан бир хил иморатлар тўдаси кўринади: уйлар тўртта-тўртта қилиб бирлаштирилган, атрофлари боғ эди. Ширкат бу участкани штейгер ва назоратчилар учун сақларди. Кўмир қазувчилар уни «Ипак пайпоқ» посёлкаси дейишар, ўз районларига эса, ўта муҳтожликка заҳарханда қилиб, «Қарзни тўла» деб от қўйгандилар.

— Уф! Етиб келдиг-ей, ўлсин,— деди пакетларни кўтариб олган Маэ хоним оёқлари лойга ботган, совуқ қотган Ленора билан Анрини ичкарига киргизаркан.

Ўт ёнида Альзира қўлида бигиллаётган Эстелла билан ўтирар, қизалоқни овутишга уринади. Қанд қолмаганди; чақалоқни қандай қилиб тинчитишини билмаган Альзира ўз кўкрагини тутиб Эстеллани алдамоқчи бўлди. У кўпинча шундай қилиб оутарди. Лекин ҳозир бундан ҳам иш чиқмади: қиз кўйлагининг тугмасини ечиб, ўзининг ориқ, ҳали бўртмаган сийнасини чақалоқ оғзига ҳар қанча тутмасин, бари бир чақалоқ тинчимас, ҳеч нима эмолмай унинг кўкрагини тишлаб олар эди.

— Болани менга бер! — Қичқирди она пакетларни қўйгач.— Гапни гапга қовуштирмайди у!

Маэ корсажидан тирсиллаб турган саночдек оғир сийнасини бўшатди. Сийнага оғзи теккан йиглоқи шу заҳоти овунди қолди. Энди гаплашса бўлади. Уй саранжом-саришта; кичкина бека олов ёққан, супуриб-сидирган, емакхонагача, ҳаммаёқни ораста қилиб қўйган эди. Сукунат чўкди; тепада бобо ҳамон аввалгидек бир маромда ҳуррагини отиб ётарди.

— Мунча кўп яхши нарсалар олиб келибсан! — деди Альзира жилмайиб, емишларни кўздан кечираркан.— Агар хўп десанг, ойи, овқат қиламан.

Стол усти тўлиб кетган бўлиб, унда кийим-кечак ўралган тугун, иккита булка нон, картошка, ёғ, кофе, сачратқи талхаси, ярим қадоқ студень ётарди.

— Ҳа, суюқ ош қил! — хаста товуш билан деди Маэ.— Бориб шовул билан кўк пиёз териб келиш керак... Йўқ, эркакларга кейин ўзим қиламан овқатни... Картошқадан қайнат, сарёғ билан еймиз... Ҳа, яна кофе бор, кофе қайнатиш эсингдан чиқмасин.

Маэнинг эсига бирдан ёғли булка тушиб қолди-да,

дам олиб, ерда ўйнашиб ўтирган Ленора билан Анрига қаради. Наҳотки бу очопатлар икки бўлак булкани йўлда билдирмай еб қўйишган бўлса? Маэ уларнинг гарданига муштлади. Котелокни ўтга қўйиб келган Альзира онани юпатди:

— Қўй уларни, ойи, урма. Агар бу нон менга бўлса, ўзинг биласан-ку, менга бари бир, улар жуда узоқ йўл юриб, роса очиқишган.

Пешин бўлди. Кўчада мактабдан қайтаётган болаларнинг оёқ товуши эшитилди. Картошка қайнаб пишди, ярмига талхак солиб қайнатилган кофе ҳам биқирлаб, тайёр бўлди, унинг йирик томчилари плита устига сачраб жизиллай бошлади. Столнинг бир четини тозалашди; лекин стулда фақат онанинг ўзи ўтирарди, болалар бўлса тиз чўкиб олишганди. Мечкайлиги билан ажралиб турадиган Анри ғоят ҳаяжонлантираётган ёғли қозоғга ўралган студенга индамай қараб-қараб қўярди.

Маэ исиниш учун стаканни икки қўллаб ушлаб, кофедан майдалаб хўплаб ўтираркан, тепадан Ўлмас бобо тушиб келди. Одатда у кечроқ уйғонар, понушта-си эса плита устида турар эди. Лекин бу сафар у суюқ ош йўқлигидан нолиб вайсади. Келини, ҳампшаям хоҳлаган нарсангиз бўлавермайди-да, дегандан кейин чол жим бўлиб, картошка ейишга тушди. У вақт-вақти билан ўрнидан туриб, полни ифлос қилмаслик учун кул уюмига туфларди-да, яна курсисига ўтирар, бошини қуйи солар, шуурсиз боқиб, овқатини чайнар эди.

— Вой, ойи, эсимдан чиқипти!— хитоб қилди Альзира.— Қўшни хотин чиқувди...

Она унинг гапини бўлди:

— Жудаям жонимга тегди-да, ўша хотин!

У қўшниси Левакнинг хотини кеча қарз сўраб қолмасин, деб ўзининг қашшоқлигидан нолиганини эслаб, ичида хафа бўлди. Чунки Маэ шу кунларда униг ҳеч нимага зориқмаслигини, уларникида ижарага турадиган Бутлунинг пулни икки ҳафта олдин бериб қўйганини жуда яхши биларди. Сирасини айтганда, посёлкадаги одамларнинг биттаси ҳам бир-бирига қарз бермасди.

— Тўхта! Яхши эсимга солдинг,— деди Маэ.— Қо-

ғозга кофедан бир сиқим ўра... Пьерроннинг хотинига олиб бориб бераман, қарз олганимга уч кун бўлди.

Қизи пакетчани тайёрлаб бўлгач, онаси, ҳозир қайтиб келаману эркакларга овқат қиламан, деди. Кейин у Эстеллани кўтариб чиқиб кетди. Ўлмас бобо ҳамон картошкани чайнар, Ленора билан Анри бўлса топиб олиб ейишаётган пўстлоқни таллашиб уришишарди.

Маэ айланиб келиш ўрнига Левакнинг хотини чақриб қолишидан қўрқиб, боғ оралаб тўппа-тўғри юрди. Маэлар участкаси Пьерронларнинг боғига туташган бўлиб, панжарасимон тўсиқда бир одам бемалол сигадиған дарча қолдирилганидан қўшнилар бир-бирлариникига бемалол кириб-чиқишарди.

Шу ернинг ўзида қудуқ бўлиб, ундан тўрт хонадон фойдаланарди. Ен томонда, сўлиган сирень буталари орқасида қақир-қуқурлар билан тўла пастаккина кичик сарой бор; шу ерда қуён боқишади; қуёнларни семиртириб, байрамларда сўйиб ейишарди. Соат бирга занг урди. Бу вақтда ҳамма кофе ичиш билан машғул бўлганидан эшиклар олдида ҳам, деразалар олдида ҳам ҳеч ким кўринмасди. Фақат битта ремонтчи ишчи шахтага кетишидан олдин бошини кўтармай участкасида сабзавот эккани ариқ оларди. Рўбарўдаги уй олдида келган Маэ черков олдида бир жаноб билан икки хонимни кўриб ҳайрон қолди. У тўхтаб, уларни дарров таниди: бу Энбо хоним бўлиб, меҳмонларига — орденли жаноб билан мўйнали манто кийган аёлга посёлкани кўрсатаётган эди.

— Э, нега овора бўлиб юрибсан?! — хитоб қилди Пьерроннинг хотини Маэ унга кофени бергач. — Шошилмасанг ҳам бўларди.

Иигирма саккиз ёшдаги бу жувон посёлкада хуш рўйлиги билан шуҳрат қозонганди. Қорамағиздан келган, пешонаси паст, кўзлари шахло, оғзи ўймоқчадай бу жувон жуда танноз, озода эди. Бола кўрмагани учун кўкраклари диркиллаб турарди. Унинг Ашаддий лақабини олган онаси шахтада ҳалок бўлган бир кўмир қазувчининг беваси бўлиб, қизини фабрикага ишга юборган ва ҳеч қачон қизимни кончига бермайман, деб қасам ичган эди. У ўтириб қолган қизи хотини ўлиб, саккиз яшар қизчаси билан қолган тул Пьеронга текканини кўриб, бениҳоя ғазабланди. Гарчи эри-

нинг серандишалиги ва рафиқасининг ўйнашлари борлиги ҳақида бўлмағур латифалар, фиқсу фасодлар кўп бўлса ҳам, эр-хотин жуда бахтиёр ҳаёт кечирди-шарди. Пьерронлар ҳеч кимдан қарз олишмасди, ҳафтада икки марта гўштли овқат ейишарди; уй шу даражада озода тутилардики, қайси кастрюлкага қарасанг, аксинг кўринади. Бу оилавий масрурлик устига хўжайинларнинг лутфу карами билан Пьерроннинг хотинига ўзи тайёрлаган конфет ва печеньеларини сотиш ружсат этилганди, аёл бу нарсаларни шиша вазаларга солиб, деразага ўрнатилган иккита токчага қўярди. Бу иш кунига олти-етти су, баъзан якшанба кунлари ўн икки су даромад берарди. Уларнинг осуда ҳаётларида фақат қари исёнчидек ғазабланиб, эрининг ўлими учун хўжайинлардан ўч оламан, деб доимо қарғаб-қақшаб юрувчи Ашаддий билан оиланинг ҳамма аъзолари кучларини аямай савалайдиган кичкина Лидия кўзга тушган хаста ўхшаб турарди.

— Кап-катта бўлиб қолибди-ю, қизинг,— деди Пьерроннинг хотини Эстеллани эркалатаркан.

— Э, шўримни қуритяпти бу, қўй, гапирма!—этироз билдириб деди Мао.— Қандай бахтлисан, чурвақаларинг йўқ. Ҳеч бўлмаса уйинг озода туради-ку.

Маэнинг уйи ҳам озода, режали, ҳар ҳафта поли ювилиб турса ҳам, у ёп-ёруғ, кўзни қамаштирадиган даражада тоза ва ҳатто буфетдаги зарқалли вазалар, тошойна, рамкага солинган учта гравюра билан зийнатланган хонага бекаларга хос суқланиб қаради.

Еш жувон энди кофе ичаман, деб турувди; оила аъзоларининг ҳаммаси шахтада бўлгани учун кофени ёлғиз ўзи ичишга мажбур бўларди.

— Мен билан бирга бир стакан ичгин,— таклиф дилди жувон.

— Йўқ, раҳмат, ҳозиргина уйда ичиб келдим.

— Хўш, ичсанг, нима бўпти?

Аслини олганда бунинг сира аҳамияти йўқ эди. Иккала хотин бамайлихотир кофе ича бошладилар. Деразадан, печенье ва конфетлар солинган шиша вазалар орасидан рўбарўдаги қатор уйларнинг дарпардалари кўзга ташланади. Бу дарпардаларнинг ранги уй бекаларининг қай даража озодалигидан далолат берарди. Левакларнинг дарпардалари ниҳоятда кир

бўлиб, гўё улар ҳозиргина кастрюльканинг туби артилган латтага ўхшарди.

— Одамларга ҳайронман, шунчалик кирга ботиб, ёшлари келмагани!— гўлдиради Пьерроннинг хотини.

Маэ худди шуни кутиб турган экан шекилли, гапга тушиб кетди. Агар унинг уйида Бутлуга ўхшаган ижарачи бўлгандами, уй тутиш қандай бўлишини кўрсатиб қўярди-я! Агар билиб иш тутса, ижарачи сақлаш фойдали жуда. Лекин у билан дон олишиб юришнинг ҳожати йўқ. Шунинг учун ҳам эри ўлгудек ичади, хотинини дўшпослайди, Мөнсудаги яллачиларнинг олдига югуради.

Пьерроннинг хотини жирканиб, афтини буриштирди. Ҳе, ўша яллачиларни худо олсин! Ҳамма касаллик ўшалардан тарқайди. Жуазелда битта хотин бутун шахтадагиларга касал юқтирди.

— Углинг Левакнинг қизи билан юрганига сенинг лом-мим демаслигинг мени ҳайрон қолдирыпти!

— Узинг нима қилардинг менинг ўрнимда бўлганигда, қани айт, эшитай-чи?.. Уларнинг боғи билан бизники ёнма-ён. Езда Захария қачон қарасанг, Филомена билан сирень тагида тургани турган. Бундоқ одамлардан андиша ҳам қилишмайди, жилла қурса саройнинг ичига ҳам ўтишмайди, қачон қудуққа сув олгани борсанг, икковининг гаплашиб тургани устидан чиқасан.

Посёлкадаги барча ошиқ-маъшуқларнинг оддий тарихи мана шундай эди. Йигит ва қизлар бир-бирларини бузишади; оқшомлари улар ўз таъбирлари билан айтганда, саройнинг пастак, нишоб томида ўйнашганлари ўйнашган. Юккаш қизлар бўлса, баъзилари биринчи боласини сарой ичида туғиб қўярди; баъзилари эса туғиш учун Рекийярга ёки жавдар орасига жўнаб қолардилар. Одатда бу ишларнинг оқибати енгил кўчарди; йигит-қизлар уйланишиб олишарди, фақат барвақт уйланган йигитларнинг оналари, ўғлим уйга ҳеч нима олиб келмайди, деб жаҳли чиқарди.

— Сенинг ўрнингда бўлсам, мен ортиқча қаршилик кўрсатиб ўтирмасдим,— деб давом этди мулоҳаза билан жувон.— Қиз Захарияндан иккита болали бўлди, энди улар сира ҳам бир-биридан ажрамайди... Энди ишлайдиган пулидан умид қилмасаларинг ҳам бўлади.

Маэ ғазабланиб, қўлларини ишқалади:

— Ҳа, агар улар тониб кетадиган бўлишса, қарғишимга қолишади. Нима Захария бизни ҳурмат қилмаслиги керакми? Уни суягини қотиргунча озмунча заҳмат чекдикми? Тўғрими? Шунинг учун аввало ота-онасидан қарзини увсин, кейин хотин олсин... Муштдек бошидан болаларамиз бировлар учун ишлай бошласа, бу ёғи нима бўлади? Унда очимиздан ўлишдан бошқа иложимиз қолмайди!

Ҳар қалай кўп ўтмай Маэ ҳовуридан тушди.

— Мен бу гапларни шунчаки айтяпман-да, у ёғини кейин кўрамиз. Кофени аччиқ дамлабсан, керагича солгансан-да.

Яна чорак соатча гап сотиб ўтирган Маэ, эркакларга овқат қилиши кераклиги эсига тушиб, ўрнидан турди. Болалар мактабларидан қайтиб келишарди. Баъзи эшикларда хотинлар кўриниб, меҳмонларига посёлканинг жойлашишини тушунтириб ўтиб келаётган Энбо хонимга қизиқиб қараб туришарди. Бу ташриф посёлка аҳлини қизиқтира бошлади. Ишчи ҳатто жўяк олишни ҳам тўхтатди, қаердадир боғда иккита товуқ қўрқиб қақиллади.

Маэ уйига қайтар экан, конда ишлайдиган доктор Вандерхаген ўтиб кетмасин, деб пойлаб туриш учун кўчага чиққан Левакнинг хотинига дуч келиб қолди. Бу паст бўйли киши иши кўп бўлиб, доимо шошиб юрарди: юрган йўлида ишчиларга маслаҳат берарди.

— Доктор жаноблари,— мурожаат этди унга Левакнинг хотини,— ҳечам ухлай олмаяпман, ҳаммаёғим оғрийди... Сиз билан маслаҳатлашиб олсам девдим.

Ҳаммани сенсирайдиган доктор тўхтамасдан жавоб берди:

— Мени тинч қўй! Кофени жуда кўп ичасан.

— Ҳа, менинг эримни ҳам,— деди ўз навбатида Маэ,— уйга кириб, уни бир кўриб қўярмидингиз... Доим оёқлари оғригани оғриган.

— Уни тентиратиб қўйган ўзинг-ку. Қоч, йўқол!

Иккала хотин қочиб кетаётган докторнинг орқасидан қараб қолишди, бир минутча туришгандан кейин:

— Уйга кир!— деди Левак умидсизлик билан елкасини қисиб.— Биласанми, янгилик бор... Ҳа, айтганча, кофе ичасан. Ҳозир қайнатдим.

Маэ йўқ демоқчи эди-ю, лекин азмойиш олиш иштиёқи голиб келди. Мезбонни ранжитмаслик учун бир қултум ичсам, ичиб кета қолай, деган қарорга келди.

Уй шунақанги ифлоски, бош суқиб бўлмайди: ердаям, девордаям ёғ доғлари, буфет билан столни мой босиб кетган; ҳамма ифлос уйларда бўладиган қўланса ҳид димоқни ёради. Печка олдидаги столга тирсакларини қўйганча тарелкага тумшуғи теккудек бўлиб Бутлу ўтирибди. Бу дуркун, яғриндор, кўринишидан жуда ёввош йигит ўттиз бешларда бўлиб, анча ёшга ўхшарди. У бир бўлак қайнатилган гўштини бамайлихотир еб бўлай деганди. Рўпарасида Филоменанинг тўнғичи, икки ёшдан ошиб қолган кичкинагина Ахилл ўтирибди; у худди очопат бўри боласидек Бутлуга илтижо билан индамай қараб ўтирарди. Тўқсарик қалин соқоли ўсиб кетган сахий кўноқ вақт-вақти билан бола-нинг оғзига мол гўштидан солиб қўярди.

— Тўхтаб тур, шакар солай,— деди Левак кофейникка шакар солар экан.

Кўкраклари каби қорни ҳам шалвираб осилиб тушган, юзи япасқи, оқ оралаган сочлари доим тўзиб юрадиган, дабдаласи чиққан бу бадбашара хотин Бутлудан олти ёш катта эди. Афтидан, Бутлу бу хотиннинг бўлган-тургани шу, деб ҳисоблар, ошига тушган сочларга ёки уч ойлаб алмаштирилмайдиган тўшак, чойшабларга эътибор бермагандек, унинг камчиликларига ҳам парво қилмасди. Хотин Бутлуга насиб этган қулайликлар сирасига кирарди, унинг эри бўлса, ҳисобли дўст айрилмас, дейишни яхши кўрарди.

— Мен сенга бир нарсани айтмоқчиман,— давом этди Левак.— Кеча кечқурун Пьерроннинг хотинини «Ипак пайпоқ» атрофида санқиб юрганини кўришганмиш. Сенга маълум ўша жаноб уни Раснёр яқинида кутиб турган экан, кейин улар биргалашиб канал ёқалаб сайр қилишибди... Қалай? Бошида эри туриб қилаётган ишини қара-я!

— Нима қипти,— деди Маэ,— Пьеррон уйлангунча штейгерни қуёнчалар билан меҳмон қилиб турарди, энди бўлса ўзининг хотини билан сийлайди, арзонга тушади-да.

Бутлу хахолаб кулди-да, бир бўлак нонни шўрвага ботириб, Ахиллнинг оғзига тикди. Иккала хотин

бир-бирига гал бермай, Пьерроннинг хотинини чалпиб кетишди: умуман унинг бировлардан ортиқ жойи йўқ, шунчаки уччига чиққан таниз, эрталабдан-кечгача қиладиган иши — ўзини ойнага солади, ювиниб-тараниб, ўзига оро беради. Э, бизга нима, бу эрининг иши, шунақа юриши унга ёқса, билганини қилмайдими. Ахир бошқаларнинг товонини ялайдиган шунақа шуҳратпараст одамлар бўлади-ку, фақат бунинг учун раҳмат дейишса бўлгани уларга. Қўшни хотин кириши билан ғийбат тўхтади. Хотиннинг қўлида Филоменанинг иккинчи боласи — тўққиз ойлик қизалоқ Дезира бор эди. Филоменанинг ўзи саралаш жойида овқатлангани учун болани эмиздиргани ўша ёққа олиб бориб туришини келишиб олганди; у ўша ерда кўмир уюми устига чўнқайиб эмизиб берарди.

— Мен бўлсам, боламдан бир лаҳза ҳам нари кетолмайман, ойи, деб ариллагани ариллаган, — деди Маэ қўлида ухлаб қолган Эстеллага қараб.

Лекин у Левакнинг кўзларидан билиниб турган саволга чап беришнинг иложини қила олмади.

— Менга қара, шуни бир амаллаб бир ёқлик қилиш керак-ку ахир.

Олдинлари иккала она никоҳ қилишнинг ҳожати йўқ деган фикрда эдилар. Маэ ўғлининг маошидан кўпроқ фойдаланишни хоҳларди, Филоменанинг онаси ҳам, қизининг моюнасидан айилиб қолишни ўйлаши биланоқ жони ҳиқилдогига келарди. Шошишнинг нима кераги бор, шу боисдан Левак ҳозирча қизининг боласи битта бўлгани, ҳатто чақалоқни ўзи боқа туришни афзал кўрарди; лекин бола улғайиб, битта нонхўр кўпайди, бу орада иккинчиси ҳам туғилди. Бу нарсани ортиқча чиқим деб билган она ўз зиёнига юришни истамай, зўр бериб тўйни тезлатиш пайига тушди.

— Захария толеини синаб кўрди, чекига тушгани шу, — давом этди у, — энди ҳеч қанақа тўсиқ йўқ... Тўйни қачон қиламиз-а?

Бир оз сабр қилайлик-чи, сал орқа-ўнгимизни йиғиштириб олайлик, — хижолат тортиб жавоб берди Маэ. — Жудаям уят ишлар-да!.. Худди то никоҳ қилгунча чидаб туриша олмагандай!.. Ўлай агар, менинг

Катринам ҳам шунақа аҳмоқлик қилганини билсам,
бўғиб ўлдириб қўйсам керак!

Левак елкасини қисиб қўйди.

— Қўй-э, вақти келса, у ҳам бошқалар қилган
ишни қилади-да!

Бутлу худди ўз уйидагидек вазминлик билан бу-
фет ёнига келди-да, нон излай бошлади. Суюқ ош учун
сабзавотлар, ярми арчилган картошка, пиёз столнинг
бир четида турарди; бека ўн мартача уларни артишга
тутинди-ю, лекин ҳар сафар гапга қизиқиб, қўйиб
қўярди. Ниҳоят у астойдил картошка арчишга кириш-
ди-ю, лекин шу заҳоти яна ишни ташлаб, дераза ёни-
га келди.

— Бу қанақаси бўлди? Буни қара-я! Энбо хоним
аллақандай жаноблар билан юрипти. Ҳув ана улар,
Пьерронларникига қараб кетишди.

Шундан кейин икковлари яна Пьерронларнинг гў-
рига гишт қалай кетишди. Посёлкани у ёқ бу ёқдан
келганларга кўрсатишганда Пьеррон хонимни сира
унутишмайди, тўппа-тўғри ўшаникига бошлашади,
чунки унинг уйи озода-да. Албатта, меҳмонларга хо-
нимнинг штейгер билан дон олишиб юргани ҳақида
чурқ этишмайди. Ойига уч минг франк топадиган,
бунинг устига совга-саломларини ҳисобламаганда
ҳам тураржой, ёқилғи оладиган ўйнашинг бўлса, уйни
озода тутиш қийин бўптими? Сирти тоза бўлгани би-
лан ичи ифлос. Рўбарўдаги уйга кирган меҳмонлар
то чиққунча иккала хотин тозаям Пьеррон хонимнинг
ғийбатини қилишди.

— Чиқишяпти,— деди ниҳоят Левак.— Бурилиш-
ди... Қара-чи, жоним, сеникига келишмаётганмикин-
лар?

Маэ ташвишга тушди. Альзира стол устини йиғиш-
тириб бўлганмикин? Овқат ҳам тайёр эмас! У «хайр»
деб мингирлади-да, шошиб, ҳеч ёққа қарамай уйига
чопди.

Лекин уйи озода, ёғ тушса ялагудай эди. Онаси
ҳадеганда келавермагач, Альзира пешбанд тутиб, жид-
дий қиёфада овқат қилишга киришди. У жўяклардан
қолган-қутган пиёзни суғуриб келди-да, шовул териб,
сабзавот арта бошлади. Бу орада оловга қўйилган кат-
та қозонда сув психётганди: эркаклар шахтадан келиб

ювинишади. Анри билан Ленора одатдаги жанжалларини қўйиб, жимгина эски календарни ўйнашар, унинг варақларини йиртиб ўтиришарди. Улмас бобо бўлса индамай тамакисини чекарди.

Ҳаллослаб югуриб келган Маэ уйига кирар-кирмас Энбо хоним эшикни тақиллатди.

— Уйингизга кирсак майлими, жоним?

Баланд бўйли, оқ пўст, сал семира бошлаган қирқ ёшлардаги хотин тавозе билан илжайди, унинг бу табассумидан қора духоба манто ичидан кийган бугдойранг шоҳи кўйлагини кир қилиб қўйишдан қўрқаётгани сезилаб турарди.

— Киришлар, кираверинглар, — таклиф этди у меҳмонларини. — Бемалол ўз уйимиздек... Қаранглар, озода, саранжом-саришта, тўғрими? Бу аёлнинг еттига боласи бор! Ҳамма уйларимиз ҳам шунақа... Мен сизларга айтдим-ку, Ширкат шу уйлар учун ойига атиги олти франк ижара ҳақи олади. Пастда катта хона, юқорида яна икки хона, ертўла, боғ.

Эрталабки поезд билан Париждан келган, орденлар таққан жаноб билан мўйнали манто кийган хоним уларга кўрсатилаётган бу жойлардан ҳайратланиб кўзларини бақрайтириб боқардилар.

— Боғ ҳам борми? — такрорлади хоним. — Худди жаннатда яшагандек туришаркан-да. Жуда зўр-ку!

— Уларга етиб-ортадиган даражада кўмир берамиз, — давом этди Энбо хоним. — Доктор ҳафтада икки марта келиб, кўриб кетади, кексайишганда, гарчи ойликларидан нафақа кассасига ҳеч нима ушлаб қолинмаса ҳам, пенсия олишади.

— Оромбахш диёр экан-да! Чинакам жаннат-ку бу! — завқланиб деди жаноб.

Маэ илтифот билан стулларга ўтиришни таклиф этди. Хонимлар ўтиришмади. Елғизликдан зерикиб юрган Энбо хоним аввалига қизиқиб ажойиб хоналарни томаша қилдирди-ю, кейин ҳамроҳларни бошлаб юриш жонига тега бошлади; гарчи у энг озода уйларга кирган бўлса ҳам, қашшоқликнинг қўланса ҳидига тоқат қилолмай қолди. Бунинг устига у қулоғига чалинган узук-юлуқ жумлаларни такрорлар ва шундоқ ёнгинасида не азоб-уқубатларда меҳнат қилаётганлар ҳаёти билан яхшироқ танишишга ҳафсала ҳам қилмас эди.

— Мунчаям яхши болалар экан булар,— деди хоним ич-ичидан улардан жирканиб: уларнинг бошлари ҳаддан ташқари катта бўлиб, тутам-тутам сочлари сомонранг эди. Уларнинг ёшлари нечадалигини Маэ айтишга мажбур бўлди. Кўнгил учун Эстелла тўғри-сида ҳам сўрашди. Улмас бобо меҳмонларга ҳурмат юзасидан оғзидан трубкасини олди. Ер остида қирқ йил меҳнат қилиб эзилган, оёқлари шишган, аъзолари емирилаётган, заҳил юзли бу одамга ҳамманинг раҳми келарди. Йўтал бўғиб келганда қора тупугим меҳмонларга нохуш туюлмасин, деб у хонадан ташқарига чиқди.

Альзира ҳамманинг таҳсинига сазовор бўлди. Пешбанд тутган бу беканинг кўҳликлигини қаранг! Меҳмонлар онани бунчалик фаросатли қизча билан табриклашди. Унинг букриси ҳақида ҳеч ким чурқ этмади. Аллақандай ноқулайлик акс этган изтиробли кўзлар дам-бадам ғариб ва мажруҳ вужудга тикиларди.

— Энди,— деди пировардида Энбо хоним,— Парижда биров сизлардан посёлкамиз ҳақида сўрашса, кўп нарсаларни гапириб беришларингиз мумкин. Бу ер ҳамиша бугунгидек сокин, урф-одатлари ҳам эскича; мана кўрдингиз, ҳаммалари бахтиёр, соғ-саломат. Умуман бу ер асли сизлар келиб, ажойиб ҳавосидан нафас олиб, оромбахш жимжитлик қўйнида роҳат қилиб кетадиган сўлим жой-да!

— Жуда ажойиб! Ажойиб!— шавқ-завққа тўлиб такрорлади жаноб.

Улар гўё ажойибхонани томоша қилган кишилардек ҳайратланиб чиқишди. Уларни кузатиб чиққан Маэ остонада тўхтаб, баланд овоз билан гаплашиб кетаётган меҳмонларга тикилиб қолди. Кўчалар жонланди, меҳмонлар учратган тўп-тўп хотин-халажлар парижликлар келганини билиб, бу хабарни уйдан-уйга етказишганди.

Левакнинг хотини томоша қилиш учун кўчага югуриб чиққан Пьеррон хонимни эшиги олдида тўхтатди. Иккови ҳам алланечук бўлиб қолганди. Нима гап ўзи? Нима, бу меҳмонлар Маэникида тунаб қолишмоқчими? Бу улар учун асло кулгили эмасди.

— Қанчалик ишлашмасин, доим бир пулга зор бўлиб юришади! Маълум, бунақа одамлар ўзи шунақа бўлиши ҳам керак-да!

— Мен бугун эрталаб Маэнинг Пиоленадаги хўжайинларниқига тиланиб борганини биллиб қолдим. Мегра аввалига нон бермаган экан, кейин унга унчамунча озик-овқат берибди қарзга... Бу ёғи — Меградан қарзларини қандай узишлари маълум нарса.

— Уни нима ҳам қиларди... Йўқ! Унга ҳафсаласи ҳам келмаса керак... Унинг қарзини Катрина узиб юборади.

— Ҳа-я! Беҳаёни қара, агар Катрина шу ишни қилгудек бўлса, бўғиб ўлдираман, дейди-я! Апов найнов Шаваль қачонлардан бери қизга ўралишиб юрганини гўё биз билмаймиз!

— Жим!.. Келишяпти.

Иккала хотин — Левак билан Пьеррон ҳаёсизлик билан қизикаётганларини сездирмай, уйдан чиқаётган меҳмонларга хотиржамлик билан зимдан қараб-қараб қўярдилар. Кейин улар қўлида Эстеллани кўтариб эшикка чиққан Маэни имлаб чақирришди. Учала хотин турган жойларида қимир этмай, башанг Энбо хоним билан унинг меҳмонлари кетидан узоқ қараб қолишди. Улар ўттиз қадамча нари кетишгач, хотинлар аввалигидан ҳам жўшиб, яна иғвони бошлашди.

— Эгниларидаги либослари озмунча турмаса керак; ҳар қалай ўзларидан ҳам қиммат турар-ов!

— Ундан ҳам ортиқ бўлса керак!!! Анависини билмадиму манави ўзимизникини бундан семиз бўлганда ҳам бир суга олмасдим. У ҳақида кўп яхши гаплар айтишади...

— Ростданми? Нима дейишади?

— Ҳа, шунчаки нечта эркак билан борди-келдисини айтишади-да... Биринчидан, инженер...

— Анави қилтириқми?.. Жуда зигирттак-ку у, кўрпанинг ичида йўқ бўлиб кетади-ку.

— Аҳамияти йўқ, ўзига ёққандан кейин бўлди-да... Шу десанг, менга ҳеч ким ёқмайди дегандек афтини буриштирган сатанларни кўрсам, қилиқлари менга доимо шубҳали туюлади. Орқасини лорсиллатиб кетишини қара, худди бизлардан жирканаётгандек. Сенга маъқулми шу иши?

Меҳмонлар гаплашиб, шошилмай қадам ташлаб олислаб боришарди; мана, йўлда, черков рўбарўсида бир коляска тўхтади; ундан қирқ саккиз ёшлардаги,

қора сюртук кийган, қорачадан келган, баджаҳл чеҳраси хушбичимгина жаноб тушди.

— Эри!— деди Левак пичирлаб, гўё унинг товушини ҳалиги жаноб эшитиб қоладигандек; директорнинг турқ-тароватидан ҳамма ишчиларга зуғумини ўтказиши билиниб турарди.— Ҳар қалай унга ҳам хиёнат қилишди!

Энди бутун посёлка кўчага чиққанди. Хотин-халажларнинг қизиқиши тобора ортди, тўдалар бирлашиб, оломонга айланарди, кир-чир болалар анграйишиб, тротуарларда бир-бирини итариб-туртишарди. Мактаб ҳовлисини ўраган тўсиқ ортидан ўқитувчининг қонсиз юзи бирров кўринди. Боғда ишлаётган ишчи жўяк олишдан тўхтаб, бир оёғини белкуракка қўйганча бақрайиб қолди. Эшитилар-эшитилмас пичир-пичирлар секин-аста қуруқ баргларнинг шамолда шалдирашига ўхшаган қаттиқ вағир-вуғурга айланди.

Ҳаммадан ҳам Леваклар уйи олдида одам кўп тўнланди. Аввалига иккита хотин келувди, ундан кейин ўнта бўлишди, сўнг йигирмата. Пьеррон хоним сқилаллик қилиб чурқ этмади,— қулогини динг қилиб юрувчилар жуда кўп эди. Доимо мулоҳаза билан иш тутадиган Маэ ҳам кузатиш билан кифояланди. Эстелла уйғониб, чинқира бошлади, Маэ чақалоқни овунтириш учун осилиб тушган сийнасини — бақувват эмизикли хотинга хос тўлиб, гўё тўхтовсиз сут келишидан чўзилиб кетган сийнасини ҳамманинг кўзи олдида хотиржамлик билан чиқарди. Жаноб Энбо хонимларни экипажга ўтқазиб, уларни Маршьени томон жўнатгач, вайсақиларнинг шанғиллаган товушлари эшитилди; аёллар худди инига чўп тиқилган чумолилардек ҳаммаси бирдан ҳовлиқиб, қўлларини силтаб гапиришарди.

Соат учга занг урди. Бутлу билан бошқа ремонтчи ишчилар ишга кетишди. Қўққисдан черковнинг муюлишида шахтадан қайтаётган кўмир қазувчилар кўринди. Юзлари қоп-қора, уст-бошлари шалаббо; улар букилишиб, қўлларини кўкракларидан чалиштириб келишарди. Хотинлар орасида қий-чув кўтарилди. Ҳамма жонҳолатда уй-уйига чопарди: ҳадеб кофе ичавериб, гапни гапга улайвериб, уй ишларини унутиб қўйишганди. Ҳаммаёқдан жанжалдан дарак берувчи ташвишли қичқириқлар эшитиларди:

— Вой худойим, тушлик нима бўлади? Тушлик тайёр эмасди-ку!

IV

Маэ Этьенни Раснёрникида қолдириб, уйга келганида, Захария билан Жанлен стол атрофида ўтириб, овқатларини ичиб бўлай дейишганди. Кўмир қазувчилар шахтадан қайтишганда шундай очиққандиларки, ҳўл кийимларини ечмай, юзларини ҳам ювмай дастурхон атрофига ўтирдилар. Ҳеч ким қолганларни кутмасди,— шунинг учун дастурхон эртадан-кечгача тузоқлиқ турарди,— доим атрофида кимдир ўтириб, иш вақтига қараб, ўз улушини ерди.

Маэ уйга кирар-кирмас озиқ-овқатларга кўзи тушди. У миқ этмади, лекин қайгули чехраси ёришди. Эрталабдан бери штольняда бўғилиб ишларкан, буфет бўм-бўш, уйда на кофе, на ёғ бор, деган фикрдан эзиларди. Хотини нима қиларкин? Ҳеч нима тополмай, қуруқ қайтиб келса нима бўлади? Шукр, ҳамма нарсалари бор экан. Кейин хотини қандай иложини топганини сўзлаб берди. У қувониб жилмайди.

Катрина билан Жанлен дастурхондан туришиб, тик турганларича, кофе ичишарди. Суюқ ошга тўймаган Захария каттароқ бурда нон кесиб олиб, сарёғ сурди. У ликопчадаги студенни кўрди-ю, унга тегмади: гўштлиқ овқатни, агар бир кишилик бўлса, ҳамиша дадасига олиб қўйишарди. Суюқ ошдан кейин ҳамма бир стакандан совуқ сув ичарди; бу ажойиб ичимлик ҳамиша маош олинини яқинлашган кунлари ичиларди.

— Пивом йўқ,— деди Маэ эри дастурхон ёнига келиб ўтиргач...— Пулнинг ҳаммасини сарфлаб ўтирмадим... Агар хоҳласанг, Альзира югуриб чиқиб пинту опкела қолсин.

Эр хотинига тикилди-да, чехраси яшнаб кетди. Йе! Пули ҳам борми ҳали унинг?

— Йўқ, йўқ,— жавоб берди у.— Бир кружка ичудим боя, менга бўлади.

Маэ нон, картошка, пиёз ва шовулдан қилинган, ликопча ўрнида ишлатиладиган товоққа тўлдириб сузилган ёвғонни қошиқ билан шошмай тушира бошлади. Хотини Эстеллани қўлидан қўймай, дастурхон ту-

заётган Альзирага кўмаклаша бошлади: эрига ёғ билан студенни узатди, иссиқроқ бўлсин деб кофени плитага қўйди.

Шу чоғ печка ёнида бочкани ўртасидан арралаб қилинган қўлбола тосда ювиниш бошланганди. Катрина биринчи бўлиб чўмилди; у тосга илиқ сув солди, шошилмай ечинди, чепчигини, блузкасини, иштонини — ич кўйлагидан бошқа ҳамма нарсасини ечди. Қиз бунга саккиз яшарлигидан ўрганган бўлиб, бунинг ҳеч бир айби йўқ, деган тушунчада ўсган эди; у қорнини оловга қаратди-да, зўр бериб қора совунни сураверди. Ҳеч ким унга қарамади, ҳатто Ленора билан Анри ҳам унинг бадани қанақалигига қизиқишмади. Катрина ювиниб бўлгач, ҳўл кўйлаги билан бошқа кийимларини ерда қолдириб, қип-яланғочлигича нарвондан юқорига кўтарилди. Шу чоғ ака-ука жанжали бошланди. Жанлен, ҳали Захария овқатланиб бўлгани йўқ, деган баҳона билан олдин чўмилмоқчи бўлди; Захария эса, уни итариб ташлаб, навбат меники, дея исбот қила бошлади. Катринага биринчи бўлиб ювинишга рухсат этган бўлса, бундан ўғил бола чўмилган сувда ювинаман, деб кўзи учиб тургани йўқ, албатта, бунинг устига Жанлен чўмилган сувни мактабдаги сиёҳдонларга қуйиб қўйишга ярайди холос. Ниҳоят улар бирга чўмила бошлашди, ўтга ўгирилиб, бир-бирларини ишқалашди. Кейин улар ҳам Катринадек, қип-яланғоч ҳолда тепага чиқиб кетишди.

— Ҳаммаёқни ифлос қилишганини-я! — вайсади Маэ ердаги кўйлакни қуритиш учун оларкан, — Альзира, артиб қўй.

Девор ортидаги қўшнисиникидан чиққан жанжал уни жим бўлишга мажбур этди. Сўкиш, хотин кишининг йиғиси эшитилди — бу чинакам уриш эди, гўё ичи бўш қовоқни муштлаётгандек бўғиқ гурсиллаган овоз эшитиларди.

— Левақнинг хотини насибасини еяпти, — вазминлик билан деди Маэ қошиғи билан товоғининг тагини қиртиллатиб. — Ажаб, Бутлу, овқат тайёр, девди-ку ахир.

— Қаёқда тайёр бўлади! — деди Маэнинг хотини. — Картошка, пиёзлари стол устида турганини ўзим кўрдиму, артилмагандиям.

Қий-чув авжга чиқди; бировнинг зўр куч билан итариб юборгани эшитилди, девор зириллаб кетди, кейин жимжит бўлиб қолди. Шундан кейин шахтёр овқатининг сўнгги қошиғини ютиб, босиқ, насиҳатомуз гапириб, жанжалга яқун ясагандек бўлди:

— Овқати тайёр бўлмаган бўлса, тушунарли, — у шундай деди-ю, бир стакан сувни симириб, студенни ейишга тутинди: кичкина-кичкина тўртбурчак қилиб кесиб чиқди-да, пичоқ учи билан нон устига олиб қўйиб вилкасиз тушираверди.

Ота овқатланаётганда ҳеч ким чурқ этмасди. Маэ очиққанидан индамай овқатланарди; чўчқа гўшти одатдаги Меграникидан бўлакчароқ эди, — афтидан бу таом бошқа жойдан олинган бўлса керак. Лекин у хотинидан суриштириб ўтирмади, фақат чолнинг уйда-уйдамаслигини, ухлаётган-ухламаётганлигини сўраб билди. Йўқ, чол одатича сайр қилгани чиқиб кетган экан. Яна сукунат чўкди.

Ерга тўкилган сув жилғаларини ўйнашаётган Ленора билан Анрининг димогига гўшт ҳиди кирди. Улар оталари олдига келишди-да, кичиги олдинроққа ўтиб турди. Улар ҳар бир бўлак гўштни кузатишар, ота ликопчадан олганида умидвор бўлишар, бўлак оғизда ғойиб бўлганини кўриб, маъюсланишарди. Ота ниҳоят болаларининг унга қанчалик суқланиб тикилиб турганликларини пайқади, — ҳатто ранглари қум ўчиб, оғизларидан сўлаклари оқмоқда эди.

— Болаларга берувдинларми? — сўради у.

Хотини жавоб беролмаганидан кейин қўшиб қўйди:

— Узинг биласан-ку, мен адолатсизликни ёқтирмайман. Улар қаршимга келиб, бир бўлак беринг, дегандек кўзларини лўқ қилиб турганларини кўрсам, иштаҳам гип бўғилади қўяди.

— Уларга берганман! — жаҳл билан қичқирди Маэ. — Уларнинг гапига кирадиган бўлсанг, сенинг улушингни ҳам, бошқаларнинг улушини ҳам бериш керак, улар бўлса, қоринлари ёрилгунча еяверишади... Тўғрими, Альзира, ахир ҳаммамиз студень едик-а?

— Ҳа, албатта, ойи, — дея жавоб берди митти букри. Бунақа пайтларда у худди катталардек ёлғонни дўндириб қўярди, Ленора билан Анри бунақа ёлғондан ғазабланиб, гангиб қолди, — ахир улар ёлғон га-

пиришса, доимо уларни калтаклашарди-ку. Уларнинг мургак қалбларида ғазаб жўш урди; бошқалар студень ейишайтганда биз уйда эмасдик, деб эътироз билдиргилари келди.

— Йўқолларинг-е! — қичқирди она болаларини уйнинг нариги бурчагига ҳайдаркан. — Отанг овқат еяётганда тепасида қаққайиб неча бўлак еяр экан, деб санаб тургани уялмайсанларми? Студенни битта отангга берсам нима бўпти? Ишлайдиган ким? Ишлайдиган отанг, сен дангасалар эса ейишдан бошқани билмайсанлар, керагиданам ортиқ ейсанлар!

Ота болаларини ёнига чақирди, Ленорани чап тиззасига, Анрини ўнг тиззасига ўтқизди-да, қолган студенни бирга ея бошлади. Студенни майда-майда бўлакларга кесиб, икковига бера бошлади. Болалар хурсанд бўлишиб, овқатни апир-шапир ютишарди.

Маэ овқатланиб бўлиб, хотинига деди:

— Йўқ, менга кофе қуйма. Аввал ювиниб олмоқчиман... Манави ифлос сувни тўкишга қарашворсанг бўлгани.

Эр-хотин тосни кулоқларидан кўтаришиб, ташқарига олиб чиқишди-да, ариқчага тўкишди. Шу чоқ қуруқ кийим — жун шим билан блузка кийган Жанлен тепадан тушиб келди; кўйлак-шими ҳалпираб турарди, чунки улар акасига тор келиб, энди бунга ўтганди. Жанленнинг очиқ эшикдан лип этиб чиқиб кетмоқчилигини билиб онаси чақириб қолди:

— Сан қаёққа?

— Анов ёққа.

— Анов ёгинг қаёқ?.. Бор, кечқурунга шакаробга қоқи ўтдан териб кел. Эшитдингми? Агар олиб келмасанг, мендан кўрасан кўрадиганингни!

— Хўп, хўп!

Жанлен қўлларини чўнтагига тикиб, ёгоч бошмоғини судраб чиқиб кетди; ўн ёшли бола мажруҳ қоматини кекса шахтёрларга тақлидан ўйнатиб борарди. Унинг кетидан Захария ҳам тушиб келди. У анча башанг кийинган — зэнгори йўл йўл фуфайка танасига ёпишиб турарди. Отаси, жуда кечга қолма, дея бақириб қолди; у оғзига трубкасини қистириб олганча бошини қимирлатиб қўйди-да, индамай чиқиб кетди. Тосни яна илиқ сувга тўлатишди. Маэ шошилмай блу-

засини ечди. Альзира шартта Ленора билан Анрини кўчага олиб чиқиб кетди. Ота посёлкадаги кўп хонадонларда қилишганидек одамлар олдида ювинишни ёмон кўрарди. Сирасини айтганда бировга дашном бермасди, фақат болаларгина бирга чўмилиши мумкин, дерди.

— Нима қиялсан тепада? — қичқирди Маэ нарвоннинг ёнига келиб.

— Кўйлагимни тикапман, кеча йирттеворувдим, — жавоб берди Катрина.

— Бу ёққа тушма, отанг ювиняпти.

Эр-хотин ёлғиз қолишди. Хотин ниҳоят Эстеллани стул устига қўйди. Чақалоқ печка ёнида иссиқда ётаркан, аллақандай бир мўъжиза билан қичқирмас, ушоқ, онгсиз бир вужуднинг кўзлари билан уларга боқарди. Эр тос олдига чўнқайди-да, қора совуни суриб, бошини сувга тикди; қора совун сурилаверганидан ишчиларнинг сочлари рангсизланиб, саргайиб кетарди. Кейин у сув ичига тушди-да, кўкраги, қорни, қўллари, сонига совун суриб, иккала қўлини чалиштириб, кучиборица ишқалана бошлади. Хотини ёнида унга қараб турарди.

— Биласанми, — дея гап бошлади у, — келганинда сенга разм солдим... Жудаям эзилиб кетганинг-а, тўғрими? Озиқ-овқатни кўриб, чиройинг бир оз ёришди, а... Биласанми, пиоленалик жаноблар бир су ҳам беришмади менга. Улар яхшигина илтифот кўрсатишди, болаларга биттадан кўйлак совға қилишди, кейин улардан пул тилагани юзим чидамади; одамлардан бирор нарса сўрасам, алланечук бўлиб кетаман.

У бир минут жим бўлиб қолди-да, Эстелла йиқилиб кетмасин деб тагига бир нарса қўйиш учун стул олдига келди. Маэ хотинига савол бермасдан ювинишда давом этарди; озиқ-овқатларнинг қаердан пайдо бўлганини жуда ҳам билгиси келарди-ю, лекин хотинининг ўзи гапириб беришини сабр билан кутарди.

— Мегра қарз беришдан қатъий бош тортиб, мени итдек ҳайдаб юборишига оз қолди, шуни билиб қўй... Менинг қай аҳволга тушганимни тасаввур қилсанг эди! Манави жун кийимлар иситади-ю... лекин қорин ўлгур бўшлигича қолаверади-да, тўғрими?

У бир оғиз ҳам гапирмай бошини кўтарди. Пиоле-

надан ҳеч нима, Меградан ҳеч нима олмаган бўлса, бу овқатлар қаёқдан келиб қолипти? Хотини унинг орқасини ишқалаб қўйиш учун одатича енгини шимарди. Хотинининг ишқалаб, эринмай ювинтириб қўйишини Маэ яхши кўрарди. Хотини совунни олиб, унинг елкаларига сура бошлади, эри бўлса, маҳкам туриш учун оёқларини кериб олди.

— Кейин яна Мегранинг олдига бордим, унга айтдимки... Ишқилиб айтмаган гапим қолмади: зиғирча ҳам раҳм-шафқатинг йўқ экан ҳам дедим, дунёда адолат деган нарса бор бўлса, бирор балога йўлиқиши муқаррарлигини ҳам айтдим. Роса жонига тегдим ўзиниям, тескари қараб олди, қарасам, жўнаб қолмоқчи...

Маэ эрининг куракларини юиб, унинг баданини бирон буришини ҳам қолдирмай шундай ҳафсала билан артишга тушдики, бадани худди шанба куни юиб-артилган кастрюлкадек йилтиллаб кетди. Ўзиям қора терга тушиб, ишнинг зўридан пишиллаб, зўрга га пирарди.

— У пировардида мени қари сурбет деб ҳақорат ҳам қилди... Нонимиз шанбагача етади, лекин ҳаммасидан ҳам яхшиси шуки, у менга яна юз су қарз ҳам берди... Мен ёғ, кофе, қанд олдим, ҳатто чўчқа гўшти билан картошка ҳам оламан, деб турувдим, у жавраб берди... Студенга етти су, картошкага ўн саккиз су тўладим, қўлимда яна уч франку қирқ беш сантимет қолди, суяк-саёқ билан суюқ ошлик учун... Хўш, қалай, менимча эрталаб овора бўлиб борганим беҳуда кетмади.

Маэ эрининг бадани қуригунча латта билан арта бошлади. Маэ янги қарз ҳақида ўйламай, кайфи чоғ бўлиб, кулди-да, иккала қўли билан хотинини маҳкам кучоқлаб олди.

— Қўйвор, тентак! Хўлсан, мени шалаббо қилиб юборасан... Мен фақат шунисидан қўрқаманки, Мегра тағин...

У Катрина ҳақидаги ташвишларини гапирмоқчийди, лекин индамай қўя қолди. Эрини элдан бурун ташвишлантириб нима қилади? Кейин гап-сўздан қутулолмайсан.

— Нега тағин деяпсан?— сўради у.

— Биздан роса фойда кўрмасин, деяпман-да. Кат-

ринага айтиш керак, ёзув-чизувларни яхшилаб бир текшириб чиқсин.

У хотинини яна кучоқлади-ю, қайтиб қўйиб юбормади. Одатда чўмилиш шу билан тугарди. Хотини баданини қаттиқ ишқалаганида Маэ доим жонланиб кетарди, кейин тоза ич кийим кийгизганда қўл, кўкракларигаги жунлари китигини келтирар эди. Дарвоқе, посёлкадаги ҳамма хонадонда ҳам шунақа бўларди: бу чоғ ҳузур-ҳаловат дамлари бўлиб, бундан сўнг хотинлар истаklarидан эртароқ ҳомиладор бўлиб қолардилар. Кечаси оиланинг ҳамма аъзолари уйда бўлиб, бир иш қилиб бўлмасди. Маэ шўхлиги қўзиб, бир кечакундузда насиб этадиган ягона хайрли соатда ҳузур қилиб қолмоқчи бўлган чапани эркакдек хотинини стол томон итарди; у бу ишни лаззатли дақиқаларим, бунинг устига текин деб биларди. Хотини тўла қомадини сал букиб, тирсиллаб турган кўкрагини олдинга чиқариб, ҳазил учун қаршилик кўрсатган бўлди.

— Жуда ҳам эсинг йўқ-да!.. Бунинг устига Эстелла кўзини бақрайтириб бизга қараб ётипти-я! Тўхта, жила курса нарёққа ўгириб қўяй.

— Бу гапинг нимаси энди! Уч ойлик бола нима ни биларди?

Ниҳоят Маэ қуруқ шимини кийди. У чўмилиб, хотини билан ўйнашиб, кўйлакчан ўтиришни ёқтирар, ҳузур қиларди. Унинг қони кам қизларники каби оппоқ баданида шахтада тушиб кетган кўмирлар тилиб, кесиб кетган жароҳатларнинг изи кўриниб турарди, — шахтёрлар буларни «эсдаликлар» дейишарди, — у катта мускулдор қўлларини чўзиб, кўк йўл-йўл мрамардек оппоқ, кенг тўшини кериб, ана шу «эсдаликлари» билан фархланарди. Езда ҳамма шахтёрлар шу ҳолатда кўчага чиқиб, эшиклари олдида туришарди. Маэ ҳам ҳаво намлигига қарамай ташқарига чиқди ва боғнинг нариги томонида ярим яланғоч турган ўртоқларидан бирига нордонгина бир сўзни айтиб қичқирди. Уйлари олдида бошқа кўмир қазувчилар ҳам кўринди. Йўлкада санқиб юрган болакайлар ишда ўлгудек чарчаган бу кишиларнинг қувноқлигидан ҳайратланиб, бошларини кўтариб кулишарди; энди уларнинг баданлари очиқ ҳавода дам оларди.

Маэ ҳамон кўйлагини киймай, кофе ича бошлади.

У инженернинг йўлаклар яхши маҳкамланмаганлигидан газебланганини хотинига гапириб берди. У ҳовуридан тушиб, бунақа ишларда балога ақли етадиган хотинининг доно маслаҳатларига қулоқ соларкан, маъқуллаб бошини силкитарди. У ҳамиша бошлиқларга қарши иш тутиб, ҳеч нима ютмайсиэлар, деган фикр-ни эрининг қулогига қуярди. Кейин у Маэга Энбо хонимнинг келганини айтди. Улар бу ҳақда ҳеч нима дейишмади, лекин иккаласи ҳам фахрланарди.

— Энди тушсам майлими? — сўради Катрина нарвоннинг юқори босқичида туриб.

— Ҳа, ҳа, отанг баданини қуритяпти.

Қиз ўзининг кишилик кийимини — тўқ-зангори поплиндан тикилган эски кўйлагини кийди; унинг ранглари кетиб, чоклари сўкила бошлаганди. Бошида қора тўрдан одми чепчик..

— Мунча ясаниб олмасанг, ҳа, қаёққа?

— Монсуга, чепчигимга лента сотиб олиб келаман... Эскисини олиб ташладим: жудаям кир бўлиб кетипти.

— Пулинг борми ўзи?

— Йўқ. Мукетта менга ўн су бериб тураман, деб ваъда қилувди.

Онаси бориб келишга рухсат берди. Лекин Катрина эшикни очган ҳам эдики, қизини чақирди:

— Менга қара, лента оламан деб Мегранинг олди-га борма... Бирни учга сотади у ноинсоф, ҳам буларнинг пули росаям кўп экан, деб ўйлайди.

Ўт қаршисида чўнқайиб, гардани билан қўлтиқларини қуритаётган отаси қўшиб қўйди:

— Яна кечаси кўчаларда дайдиб юрмагин.

Маэ тушдан кейин одатда боғида ишларди. У картошка, лўя, нўхат экканди. Кеча карам билан салат ўтказишни мўлжаллаганидан ҳозир ишга киришди. Богнинг бу бурчаги картошкадан бошқа ҳамма нарса билан оилани таъминларди: уйда доим картошка етишмасди. Маэ богдорчиликни яхши билганидан ҳатто артишок резаворидан ҳам етиштирарди. Қўшнилари бунини мақтанчоқликка йўйишганди. У жўяк олаётган пайтда Левак ҳам трубкасини чеккани ва эрталаб Бутлу эккан ромен салатидан хабар олгани боғига чиқди: агар жўякларни ҳафсала билан олган мана шу ижарачи Бутлу бўлмаганда уларнинг ерида қичитқондан

бошқа нарса ўсмасди. Қўшнилар девор оша гаплаша бошлашди. Яқиндагики хотини билан бўлиб ўтган жанжалдан сўнг ҳали ўзига келмаган Левак Маэни мен билан Раснёрникига юр, деб уни кўндиришга уринди. Бир кружка пиво ортиқ ичса нима қипти? Наҳотки у шундан кўркса? Ўртоқлар билан бир кўл кегли ўйнашади, дилкашлик қилиб, кечки овқатга қайтиб келишади. Шахтадаги ишдан кейинги умр шу тахлит ўтиб борарди. Албатта, бунинг ҳеч ёмон жойи йўқ-а. Лекин Маэ қайсарлик қилиб, асло кўнмасди: агар салатни бугун экиб қўймаса, эртагача сўлиб қолади. Аслини олганда бир андишани қилиб, боришга кўнмасди: у хотинида қолган пулдан олишга кўзи қиймасди.

Соат бешга занг урди. Уларнинг олдига Пьеррон хоним келиб, менинг Лидиям қаёққа кетдийкин — Жанлен билан кетмадимикин? — деб сўради. Левак шунақа бўлса керак, деб жавоб берди; Бебер ҳам қаёққадири ғойиб бўлди, бу болалар ҳаммаси бирга санқиб юришади. Маэ уни юпатиб, Жанленга шакароб учун қоқи ўт териб келиш буюрилган, шунинг учун улар узоққа кетмаган бўлишлари керак, деди. Кейин Левак билан Маэ андишасизларча ёш жувоннинг жиғига тега бошладилар. У жаҳли чиқса ҳам кетмади, чунки бу қўпол ҳазиллардан ич-ичидан хурсанд бўлиб, қотиб-қотиб кулар эди. Бу гаплар устига келиб қолган озгингина хотин унинг жонига ора кирди; унинг жоҳиллик билан вайсаши товуқнинг қақоғлашини эслатарди. Бошқа хотинлар ўз эшиклари олдида туриб, Пьеррон хонимнинг ўзига бунчалик бино қўйганлигидан газабга келгандилар.

Мактабда дарслар тамом бўлиб, болалар уй-уйларига тарқалишди-да, болакайларнинг чуғур-чуғури, қичқириги, олишуви ва уриш-жанжали эшитила бошлади. Пивохонага бормаган шахтёрлар уч-тўрттадан бўлиб олишиб, у ер-бу ерда ихоталар тагида худди шахтадагидек чўнқайишиб, трубка тутатишар, аҳён-аҳёнда гап отиб қўйишарди. Левак сонини чимчиламоқчи бўлгани учун Пьеррон хоним жон-пони чиқди-ю, жўнаб қолди. Левак Раснёр дўконига бир ўзи жўнади, Маэ бўлса, боғида қолиб, ишини давом эттирди.

Тез орада қош қорайиб қолди. Маэнинг хотини қи-

зи билан ўгиллари келишавермаганидан жигибийрон бўлиб, чироқни ёқди. Унинг кўнглига келган нарса бўлмайд қолмайди: суткада бир мартагина ҳамма дастурхон атрофига тўпланиши мумкин бўлса-ю,— бунга ҳечам муяссар бўлиш олишмаса! Бунинг устига шакаробга солиш учун Жанлен олиб келиши лозим бўлган қоқи ўтти ҳам кутарди. Шу қоронгида қоқини қаёқдан тераркан, ярамас бола! У ҳозиргина ўтга қўйган картошка, барги сербар пиёз, шовул ва пиёздоғлик қовурдоққа шакароб жуда кетади-да! Бутун уйни пиёздоғ ҳиди тутиб кетди; унинг иси тез тарқалди,— бутун посёлкадан пиёздоғ ҳиди анқийди, далаларда ҳам олисдан туриб, ғариб ошхонадан таралаётган бу ҳидни сезиб, хонадон яқинлигини билиш мумкин эди.

Қоронғи тушгач, Маэ богдан қайтди-да, стулга ўтириб, бошини деворга суяди-ю, шу заҳоти пинакка кетди. Оқшом тушди дегунча у стулга ўтириши билан ухлаб қоларди. Каккули соат еттига занг урди. Дастурхон тузатаётган Альзирага ёрдам бермоқчи бўлган Анри билан Ленора битта ликопчани синдиришди. Бобо биринчи бўлиб қайтди — у яна ишга борадиган бўлгани учун овқатланишга шошилиб турарди. Маэ эрини уйғотди.

— Ўзимиз овқатланаверамиз, келмаганлар ўзларидан кўришсин... Ахир кичкина эмас-ку, уйга қачон келишини билишлари керак-да. Фақат алам қиладиган жойи — овқатни шакаробсиз ейдиган бўлдик-да!

V

Этьен Раснёрникида тамадди қилиб олгач, ўзига ажратилган, деразаси Ворё томонга қараган, нақ томинг таккинасидаги ҳужрага кўтарилди-да, чарчаб, шалақ-шалақ бўлиб кетаётгани учун ечинмай ҳам ўзини каравотга ташлади. У икки кун бадалида тўрт соатдан ортиқ ухламаганди. У тонг қоронғисидида уйғониб, тезда ўзига кела қолмади, қаерда ётганини ҳам билолмади; кайфияти ёмон эди, боши шу қадар оғирлашиб кетгандики, ўрнидан зўр-базўр турди; у овқатдан олдин бир оз тоза ҳаво олиб келиб, кейин ётиб ухлайман, деган қарорга келди.

Кун илиди, қоп-қора осмон мис тусига кирди; бетиним ёмғир бошланди; шимолда ҳамиша ёмғирдан ол-

дин юмшоқ нам ҳаво бўлади. Қалин туман паға-паға бўлиб, ҳаммаёқни буркаб кела бошлади. Осмон паст тушиб, гўё сарғимтил пасттекислик денгизига қоп-қора чанг сепарди; нохуш қоронғилик кафандек ер юзини ўраб олган, ғир этган шабада ҳам йўқ.

Этъен баданини ёзиб келиш учун таваккал қилиб кетаверди. Йигит пастқамликка жойлашган, бирорта ҳам фонари ёнмаётган Борё шахтаси олдидан ўтаркан, кундузги сменадагиларнинг чиқишини кўриш учун бир лаҳза тўхтади.

Афтидан соат олтига занг урган бўлса керак, чунки қабул қилувчилар, юкчилар, отбоқарлар, гира-ширада, кулгили башараларини зўр-базўр ажратиш мумкин бўлган кўмир сараловчи қизлар билан гуруҳ-гуруҳ бўлиб чиқиб келишарди.

Ҳаммадан олдинда Ашаддий кампир билан унинг куёви Пьеррон борарди. Кампир сортга ажратилган кўмир миқдори хусусида назоратчи билан бўлган можарода мени ёқламадинг, деб куёвини яниб келарди.

— Бизни зулукдек сўриб ётган газандаларга икки букилиб, латтадек бўшашиб юриш мумкинми, ахир!

Пьеррон унинг орқасидан чурқ этмай бамайлихотир борарди. Ниҳоят у деди:

— Балки бошлиқни дўшпослаб кетсам бўлармиди-а? Раҳмат-э, кейин бир умр ташвишдан қутулмасдим-да!

— Бўлмаса, думингни қисиб, тиз чўкиб тур унинг олдида!— Қичқирди кампир.— Мени худо ургани шуда! Қизим ҳам гапимга кира қолмади! Эримни жувонмарг қилганлари етмаганидек, яна уларга қуллуқ қилишим қолувди энди! Йўқ, билиб қўй, мен ҳали уларга кўрсатиб қўяман!

Овозлар узоқлашиб сўнди. Этъен қирғийбурун, оппоқ сочлари тўзиган, ориқ, узун қўлларини газаб билан ўйнатиб бораётган кампирнинг орқасидан қараб қолди. Лекин шу чоқ унинг эътиборини икки ёшнинг гап-сўзи жалб этди-ю, у қулоқ сола бошлади. У Захарияннинг овозини таниди; кончи олдига келаётган Муқени кутиб турарди.

— Борасанми?— сўради униси.— Ул-бул еб оламиз-да, «Вулқон»га борамиз.

— Тўхта ҳали, менинг ишим бор.

— Қанақа иш?

Қабул қилувчи қайрилиб қараб, саралаш хонасидан чиқиб келаётган Филоменани кўриб қолди.

— Э, ҳа, майли... бўлмаса, мен кетавераман.

— Боравер, мен етиб оламан.

Муке йўлда қари отаси Мукни учратди; у ҳам Ворёдан ишдан қайтаётганди; улар оддийгина хайр-хўшлашиб, бир-бирларига хайрли тун тилашди, ўгил катта йўлдан жўнади, ота эса қанал бўйлаб бедана юриш қилиб кетди.

Захария қизнинг қаршилигига қарамай, Филоменани ўша ёлғиз йўлакка судради. Қиз шошилиб турганидан бошқа сафар бўлар, деди; шундан кейин улар кўндан бери бирга турадиган эр-хотиндек гижиллашиб қолишди. Кўчаларда бунақа учрашувдан фойда йўқ, айниқса қиш, нам, бунинг устига пана қиладиган жавдарзор ҳам йўқ.

— Йўқ, гап ундамас,— сабрсизлик билан деди Захария,— сенга баъзи гапларни айтмоқчиман.

У қизнинг белидан қучоқлаб, уни оҳиста олиб кетди. Улар кўмир уюмидан ўтишгач, Захария ундан пулинг борми, деб сўради.

— Пулни нима қиласан?— қизиқиб сўради Филомена.

У икки фунт қарз бўлиб қолганини, бунинг учун уйдагиларнинг жаҳли чиқишини пойинтар-сойинтар қилиб гапирди.

— Қўй-е!.. Мукени ўзим кўрдим, сен яна ўша «Вулқон»га борасан, ўша манжалақи яллачилар билан кайфу сафо қиласан.

У йўқ деб, кўкракларига муштлади, худони ўртага солиб, қасам ичди. Қиз унга жавобан елкасини қисиб қўйгач, у қўққисдан таклиф этди:

— Хоҳласанг, биз билан бирга юрақол... Бизга асло халақит бермайсан. Яллачиларни бошимга ураманми!.. Қани, кетдикми?

— Чақалоқни нима қиламиз?— жавоб берди у.— Шу бақироқ билан бориб бўлармиди у ерга?.. Қўйвор, яхшиси уйга борай, роса жанжаллашиб ўтиришгандир ҳали, бунга ишончим комил.

Лекин Захария уни қўйиб юбормай, ялиниб пул сўрайверди. Мукега ваъда бергандан кейин унинг олдига қуруқ борадимми? Нима, эркак киши уйда товуқ-

қа, ұжшаб тухум босиб ётаверадими? Ниҳоят у Филоменани кўйдирди, шундан сўнг жувон кофтасининг этагини қайириб, бармоғи билан астарини сўкди-да, ўн су чиқариб берди. У шахтада ишдан ташқари пайтларда ишлаб топган пулини онасидан бекитиб, шу ерда сақларди.

— Мана кўрдингми, ўзи бор-йўғи бешта, учтасини сенга бераман... Лекин бизни никоқлаб қўйишга онамни кўндираман, деб қасам ич. Кўча-кўйдаги бу турмуш жонга тегди-ку! Ойим ҳам ҳар куни менга таъна қилгани қилган... Қасам ич, сўз бер аввал.

Филомена ҳорғин, эҳтироссиз, кўраётган кунидан адою тамом бўлган киши сингари хаста товуш билан гапирарди. Йигит қасам ичди, энди ҳаммаси узил-кесил ҳал бўлди, деб бақирди; уч тапгани олгач эса, у билан ўйнашди, кулдирди, қишда ётди-турди вақтида ётоқ вазифасини бажарувчи ағдарманинг ўзида муродини ҳосил қилмоқчи эдиям-ку, лекин Филомена асло кўнмади,— бундан у ҳеч қанақа баҳра олмасди. Филомена посёлкага битта ўзи қайтди, йигит эса ўртоғига етиб олиш учун даладан югуриб кетди.

Эъён узокдан беихтиёр кузатиб тураркан, нималар бўлаётганига тушунмай, буни оддий бир учрашув бўлса керак, деб ўйларди.

Шахтадаги қизлар тез етилади; у Лиллдаги фабрика қизларини эслади, уларни фабрика орқасида кутиб турарди; бу қизлар қашшоқлик ва қаровсизлик натижасида ўн тўрт ёшданоқ бузилиб кетишарди. Иккинчи бир учрашув Эъённи яна ҳам кўпроқ ҳайратда қолдирди. У тўхтади.

Ағдарма пастада, чуқурликдаги тошлар орасида ёш Жанлен бири ўнг қўлида, бири чап томонида ўтирган Лидия билан Беберни қаттиқ койир эди.

— Хўш, қани? Яна гапириб кўринглар-чи! Яна гинг дейдиган бўлсаларинг, қулоқларинг тагида шавла қайнатаман... Буларни ким ўйлаб топдийкин, а?

Ҳақиқатан ҳам учовлари канал бўйидаги ўтлоқдан қоқи теришаркан, Жанлен йиғилган ўтга қараб, барибир уйда шунчани ейишмайди, посёлкага элтишдан кўра, Монсуда пуллаш яхшироқ бўлса керак, деган фикрга келди; Беберни қоровул бўлиб туришга мажбур этди, Лидияни бўлса, хонадонларга кўнғироқ қилиб,

қоқиларни сотиб келишга буюрди, чунки у ўз тажрибасидан одамлар қизалоқ қўлидан қоқини жон деб сотиб олишларини биларди. Болалар савдога берилиб кетишиб, ҳамма қоқини сотиб қўйишди. Қиз ўн бир су ишлади. Энди учаласи ўлжани бўлишарди.

— Бу инсофдан эмас, баравар бўлиш керак! — деди Бебер. — Борди-ю, сен етти суни олиб қўйсанг, бизга фақат икки судан тегади.

— Нимаси инсофдан бўлмайди? — деди жигибийрони чиқиб Жанлен. — Авваламбор, ўтнинг кўпини мен тердим!

Одатда ўртоғи индамай кўниб, ҳамиша Жанленга қойил қолганидан панд ерди. Гарчи у Жанлендан катта ва кучли бўлса-да, дўстининг шапалоғини ҳам еб кетаверади. Лекин бу сафар шунча пул унинг норозилигини қўзгади.

— Тўғрими, Лидия? Бизни чўмичда қоқмоқчи... Агар пулни баравар бўлиб бермаса, ойисига айт-тамыз, а...

Жанлен унинг тумшуғига муштини олиб келди.

— Қани, яна битта айт-чи! Мана мен ўзим бориб, сенлар ойингларнинг ўтини сотганларингни айтиб бераман... Кейин, ўзинг қанақа аҳмоқсан, ўн бирни учга қанақа бўламан? Уста бўлсанг, ўзинг бўлиб кўр-чи... Мана икки судан олинглар-да, тезроқ уйлариңга жўнаб қолинглар, бўлмаса, униям чўнтагимга ураман.

Бебер кўниб, икки суни олди. Титраб-қақшаётган Лидия ҳеч нима демади, чунки Жанлендан қўрқар, калтак еган кичик хотиндек унга меҳр билан мўлтирар эди. Жанлен унга икки су берганда у итоат-корона табассум билан қўлини чўзди. Лекин у бирдан фикридан қайтди:

— Пулни нима қиласан ўзи?.. Агар яхшилаб беки-тиб қўймасанг, ойинг албатта топиб олиб қўяди... Яхшиси ўзим сен учун бекитиб қўяман. Қачон пул керак бўлса мендан сўраб оларсан.

Шундай қилиб, тўққиз су ғойиб бўлди. Унинг оғзини маҳкамлаш учун кулиб, қучоқлаб олди-да, ағдармада сирпана бошлади. Лидия унинг кичкинагина хотини бўлиб, улар хилват жойларда гўё ошиқ-маъшук бўлиб, уйларида тўсиқ оша ёки эшик тирқишидан кўрганларини эрмак қилишарди. Уларга ҳамма нарса

маълум бўлиб, худди кучук болаларидек соатлаб ярамас ўйин билан машғул бўлардилар. Бола бу ўйинни «Ота-она ўйини» деб атарди; Жанлен етаклаганда Лидия инстинктив равишда ёқимли ҳаяжонланарди-ю, унинг кетидан югуриб кетарди, кўпинча араз қилар, лекин сира рўёбга чиқмайдиган бир нарсанинг илинжида индамай қўяқоларди.

Бунақа эрмакларда Бебер қатнашмасди, Лидияга қўл теккизиши биланоқ мушт ерди; икковлари бу борида ҳам уялмай ўз ўйинларини давом эттираверишганда бола алланечук бўлиб, ўзини ноқулай сезар ва хуноби ошарди. Шунинг учун ҳам у:

— А-ҳа, қўлга тушдиларинг-ку, битта одам қараб турипти!— дея қичқириб, ўйинларига халақит бериб, қўрқитишдан мириқиб роҳатланарди.

Бу сафар у алдамади, Этьен ниҳоят йўлида давом этишга қарор қилди. Болалар сапчиб туриб, ура қочиши, Этьен бўлса, бу жулдурвоқиларнинг кўрқиб кетганидан кула-кула, ағдармани айланиб ўтди-да, канал бўйлаб кета бошлади. Албатта бунақа ишлар учун ҳали ёш эдилар; лекин улар шунчалик кўп нарсани эшитиб, шунча кўп нарса кўришганки, бундай гуноҳдан тийиш учун уларни бойлаб қўйиш керак. Аслида эса Этьеннинг таъби жуда хира эди.

У юз қадамча юриб, яна вақтини чоғ қилиб юрган бир жуфтга дуч келди. У ерда, Рекийярдаги хароба шахта атрофида Монсунинг ҳамма қизлари яхши кўрганлари билан санқиб юришарди. Бу ер севишганлар дийдор кўришадиган жой эди; юккашлар тўнғичларини уйларидаги саройда туғишга журъат этолмасалар, шу ерда, шу хилват гўшада кўз ёрардилар. Сикик тўсиқ орқасидаги плита қолдиқлари, бузилган икки сарой харобалари, туби билан қўпорилган устунлар, ивирсиб ётган майдон олисларга чўзилиб кетганди. Фойдаланишга ярамайдиган вагонеткалар, қариб-чуриган дарахтлар ҳам шу ерда уюм-уюм бўлиб ётарди: бу ерларни қалин, бўлиқ ўт-ўланлар, ҳатто бақувват ниҳоллар босиб кетганди. Шунинг учун ҳам ҳар қандай қиз бу ердан хилват жой топиб, севиклиси билан хоҳлаган устун тагида, йиқилган дарахт орқасида, вагонеткаларда учрашарди. Уларнинг ҳаммаси ёнма-ён жойлашиб олишарди-ю, лекин қўшниси билан сира

иши бўлмасди. Гўё кўмир беравериб чарчаган, ташландиқ шахта атрофида худди ўчакишгандай янги авлод дунёга келиб, эркин севги барқ ураётган эди; барвақт ҳомиладор бўлиб қолган қизлар она бўлар-бўлмас беихтиёр шу ёққа интилардилар.

Шу ерларнинг қоровули кекса Мук сал нарида яшарди: Ширкат унга минора тагидаги ярим хароба, йиқилиб кетай деб турган уйлардан иккита хона ажратиб берганди,—ҳатто бир уйнинг шипи ўпирилиб тушмаслиги учун тиргак қўйишга тўғри келганди. Чол унда оиласи билан яшарди; у ўғли билан—битта хона, Мукетта бошқа хонада турарди. Барма деразаларнинг ойналари синганидан, чол уларнинг кўзига тахта қоқиб қўйган эди. Хоналар қоронғи бўлса ҳам, аммо иссиқ эди. Сирасини айтганда, бу ерда қоровул қўриқлайдиган ҳеч вақо йўқ эди; фақат отларга қарагани Ворёга бориб-келарди, фақат қўшни шахта учун вентиляция вазифасини бажараётган стволигина сақланиб қолган кўҳна Рекийяр шахтасига бутунлай қарамасди.

Шундай қилиб, Мук бобо ёш шахтёрларнинг ишқий саргусаштларини кўра-кўра қариди. Мукетта ўн яшарлигидаёқ йўлдан озганди; лекин у нимжон, қўрқоқ Лидияга ўхшамасди, балки тўладан келган, дуркунгина қиз бўлиб, соқолли йигитлар билан доп олишиб юрарди. Отаси унга ҳеч нима демасди, чунки унинг ҳурматини жойига қўяр ва ҳеч қачон уйга жазманларини олиб келмасди. Бунинг устига чол бунақа воқеаларга кўникиб қолган эди. У қачон Ворёга бормасин ёки у ёқдан қайтиб келмасин, ишқилиб, қачон инидан чиқмасин, ҳамиша бирор жуфтга дуч келарди: лекин энг хунуги ошхонага ўтин ёки қуёнга ўт олиб келиш учун тўсиқнинг нариги четига бориш эди: бундай пайтларда монсулик ҳамма шўх қизлар бирин-бирин бошларини чиқариб мўралашаётганларини кўрар ва сўқмоқларга чиқиб турган оёқларни айланиб ўтишга ҳаракат қилар эди. Аслини олганда, бу учрашувлар ҳеч кимга — қоқилиб кетмаслик ташвишида келаётган чолга ҳам, ўз ишлари билан шуғулланишларига йўл қўйиб қўйган қизларга ҳам халақит бермасди; у табиат қонунига заррача эътироз қилмай майда қадам ташлаб, кўрмагандай ўтиб кетарди. Лекин қизлар келган кимса Муклигини билганларидек,

чол ҳам бора-бора уларни ҳам таниб оларди: боққа ёпирилган ва нок дарахтларига қўнган зағизгонларни ҳам шу хилда билиб олишади. Эҳ, ёшлик, ҳарис ёшлик! Чол баъзи вақтларда қоронғиликда қаттиқ хўрсинаётган қақилдоқ қизлардан юз ўгириб, афсусланганича индамай бошини сарак-сарак қилиб қўярди. Лекин бир нарса унинг хунобини ошириб юборарди: қандайдир йигит билан қиз ёмон одат чиқарди, нақ деразаси тагига келиб ўпишишарди. Тўғри, чолнинг уйкусига халал беришмасди, бироқ уй орқасида гимиллаб юришганидан деворлар йиқилиб кетай-йиқилиб кетай дерди.

Ҳар оқшом Мук бобо олдига кечки овқатдан олдин одатда сайр қиладиган дўсти Ўлмас бобо келарди. Чоллар ярим соат бирга бўлишарди-ю, суҳбатлашиб ўтирмай, уч-тўрт оғиз гаплашишарди холос. Лекин икковлари бирга бўлишганда қувонишиб, эски воқеаларни эслашарди, бунинг учун гап-сўзга ҳам ҳожат йўқ эди. Улар битта-яримта тўсин бўлагига ёнма-ён ўтириб олиб, аҳён-аҳёнда битта-яримта гап ташлаб, ерга тикилганларича орзу-хаёлларга чўмардилар. Эҳтимол, ёшликларини эслашар. Атрофларида шивир-шивирлар, аҳён-аҳёнда ўпишлар эшитилиб турарди, босилган ўтлардан қизларнинг тафти келарди. Қирқ уч йил бурун Ўлмас бобо ўзининг хотини, нимжон юккаш билан учрашганди, ўшанда қонгунча бўсалар олиш учун уни вагонеткага ўтқазиб оларди. Э, у кунларнинг садағаси кетсанг арзийди! Шуларни эслаб чоллар бошларини сарак-сарак қилганча тарқалишар, кўпинча ҳатто хайр-маъзурни ҳам нася қилишарди.

Лекин бу оқшом улар ёнидан Этьен ўтганда, Ўлмас бобо посёлкага қайтиш учун ўрнидан тураркан, Мукка деди:

— Тунинг хайрли бўлсин, қария!.. Айт-чи, сен сариқ хотинни билармидинг?

Мук чурқ этмади, елкасини қисиб қўйди-да, кейин уйга кираётиб деди:

— Хайр, тунинг хайрли бўлсин, қария!

Этьен ҳам гўлага ўтирди. Нима учундир унинг ғусаси ортаверди. Узоқлашиб бораётган чолнинг орқасидан қараркан, эрталаб Ворёга борганида бу камсухан чол оғзидан қутурган шамол туфайли отилиб чиққан

гапларни эслади. Қашшоқлик ҳам шунчалик бўлади-ми! Бунинг устига ишда силласи қуриган қизларнинг яна кечқурунлари учрашувга шошилиб, янги вужудларга, азоб-уқубатлардан эзилиб кетадиган бўлажак бахтсиз заҳматкашларга жон бағишлашга ошиқишларини айтмайсанми! Агар улар бадбахтларни туғиб ташлайверсалар, бу ишга барҳам берилиши амри маҳол. Улар ўзларини тийсалар, муқаррар ҳалокатнинг олдини олиш учун ҳадеб қоринларини қаппайтиравермасалар бўларди. Балки ёлғиз бўлгани ва атрофида эса бошқаларнинг жуфт бўлиб, ўпишиб юрганлари учун миясига шундай даҳшатли фикрлар келиб, ич-этини кемираётгандир. У юмшоқ нам ҳаводан сал нафаси қайтди, сийрак ёмғир томчилари жонсараклик билан сиқилган қўлларига тушди. Ҳа, қизларнинг ҳаммаси шу синоатни бошидан кечириши керак, бу — ақлу заковатдан кучли.

Худди Этьен қоронғуликда қимир этмай ўтирган пайтда унинг ёнидан сал бўлмаса тегиб кетай деб бир жуфт ўтиб кетди, улар Монсудан Рекийяр майдонига тушиб келишаётганди. Шубҳасизки, қиз ҳали иффати кетмаганидан кўнмас, қаршилик кўрсатар, паст товуш билан ўз ҳолимга қўй деб ёлборар эди; йигит эса, индамай саройнинг могор босиб кетган арқонлар уюлиб ётган қоронғи бурчагига қизни итариб-сурарди. Булар Катрина билан Шаваль эди. Лекин Этьен уларни танимади, нима бўларкин, дея қараб турди; бу учрашув унинг ҳиссиётини туғенга келтирди ва фикрларини ағдар-тўнтар қилиб юборди. Ҳалақит беришнинг нима кераги бор? Қиз бола «йўқ» дедими, бас, зўрлик билан билганингни қил, дегани бўлади.

Катрина Икки юз зағизгон посёлкасидан чиқиб, кўча ўртасидан Монсу тарафга йўл олди. Қиз ўн ёшидан, яъни ўзи шахтада ишлаб тирикчилик учун пул топа бошлаганидан бери шахтёрлар удумига кўра, қаерда бўлса ҳам бир ўзи юрар эди; шу пайтгача бирор эркак унга теголмаганига сабаб унинг жисмонан кеч етилгани, ҳамон камолга етмагани эди холос. Катрина Ширкат участкасига етганда, кўчани кесиб ўтди-да, доим шу ердаги хотинлар билан кечалари-ю, кундузлари кўфехўрлик қилиб қолиб кетадиган Мукеттани албатта учратаман, деган умидда кирчи аёлникига

кирди. Лекин аксига олиб шу куни Мукетта дугоналарини меҳмон қилаётгани учун ваъда этган ўн су пули қолмаган экан. Ҳаммалари жилла қурса, бир стакан кофе ичиб кет, деб зўрлашса ҳам қиз унамади, ҳатто дугонаси бошқа хотинлардан пул қарз олиб бераман, деса ҳам, олишни хоҳламади. Бирдан миёсига тежамлироқ бўлиш керак, деган фикр келди, бунинг устига энди лента сотиб олсам, бирор бахтсизлик рўй беради, деган хурофий бир андиша, ишонч ҳам уни тўхтатди.

У посёлкага қайтишга шопилди, Монсудаги охириги уйга етган ҳам эдики, «Майхона» эшигида турган бир киши уни чақирди.

— Эй, Катрина, қаёққа шошяпсан?

Бу найнов Шаваль экан. Бу учрашувдан у хурсанд бўлмади, бунинг боиси Шавални ёқтирмагани эмас, балки таъби хира бўлгани ва кулишга иштиёқи асло йўқлиги эди.

— Бу ёққа кир, бир нима ич... Бир рюмка ширинидан ичасанми?

Катрина ёқимли табассум билан, йўқ, қоронғи тушиб қолди, уйдагилар кутишяпти, деди. Йигит унинг ёмига келди-да, кўча ўртасида туриб олиб қистайверди. Шаваль анчадан бери уни «Майхона» тепасидаги хонасига олиб кирмоқчи бўлиб юрарди. Иккинчи қаватдаги бу яхшигина хонада икки кишилик катта каравот бор эди. Қиз ҳамиша рад қиляптими, демак, ундан қўрқади. Қиз мулойимлик билан кулиб, унга пайшанба куни ёмғир тингандан кейин келаман, дея жавоб берди. Кейин гапдан гап чиқиб, зангори лента сотиб ололмаганини айтиб қўйганини ўзи ҳам сезмай қолди.

— Э, ўзим олиб бераман!— хитоб қилди у.

Қиз ундан воз кечиши лозимлигини жуда яхши сезиб турса ҳам айтиб чоқда ленталик бўлиб қолишга ичида жон-жон деб турарди. У яна ахир Шавалдан озгина пул қарз сўраш мумкину, деб ўйлади-да, қилган харажатларнинг ҳаммасини кейин қайтариш шарти билан рози бўлди. Улар яна ҳазил-мутойиба қилишиб, охири агар қиз унинг маҳбубаси бўлиб қолмаса, пулни қайтарадиган бўлди. Лекин йигит Мегранинг олдига боришни таклиф этганда, яна бир тўсиқ пайдо бўлди.

— Йўқ, фақат Мегранинг олдига бормаймиз, ойм борма, деб тақиқлаган.

— Э, қўйсанг-чи, қаерга борганингни айтишинг шартми... Монсудаги энг яхши ленталар ўшанда-да.

Мегра дўконга кириб келаётган Шаваль билан Катринани кўрганида, назарида булар тўй сарполари харид қилгани келган ошиқ-маъшуқларга ўхшади; қисқичбақадек қизариб кетган Мегра мазах қилинган одамдек қаҳр-ғазаб билан зангори ленталарни кўрсата бошлади. Ёшлар лента сотиб олиб кетишди, Мегра эса дўкон остонасида туриб, уларнинг ғира-ширада узоқлашиб кетаётганликларини кузатди. Хотини кўрқаласа бир нима сўровди, жеркиб, сўкинди-да, бир кун келиб, бу ярамас нобакорлар пушаймон бўлишади, менинг оёғимни ўпса ҳам бўларди, деб бақира бошлади.

Найнов Шаваль Катринани кузатгани бирга кетди. У қиз ёнида қўлларини ўйнатиб, сездирмасдан уни ўзи хоҳлаган томонга бошлар эди. Бирдан қиз йўлдан бурилиб, тор сўқмоқдан Рекийярга кетишаётганини билиб қолди. Катрина ҳатто ғазабланишга ҳам улгуролмай қолди; у қизнинг белидан қучиб, ширин сўзлар билан унинг бошини айлантириб юборди. Вой, аҳмоқ экан-ку, нимасидан кўрқади? Наҳотки у еб қўяй деб тургани шундоқ маъсума, ипақдек майин, нозик қизга ёмонлик қилса-я. Иигит бу сўзларнинг ҳаммасини қизнинг қулоғига шивирларкан, лабларини бўйнига теккизганда қизнинг аъзойи бадани жимирлашиб кетарди. Қиз энтикиб, бирор жавоб айтолмасди. Ҳақиқатан ҳам йигит уни яхши кўради шекилли. Ўтган шанба куни қиз шамни ўчириб, ўрнига кирди-да, ишимни тўғрилаб қўйса, нима қиламан-а, деб ўйлаб ётиб, ухлаб қолди-ю туш кўрди, тушида унга розилик берганмишу қимир этмай роҳатланиб ётганмиш. Нега энди у ҳозир ундан ҳазар қилади, нимагадир юраги ачишади? Унинг мўйлаби бўйнини ёқимли қитиқларкан, ҳатто кўзларини юмиб олди, кўз олдидан бошқа бировнинг, эрталаб бирга бўлган йигитнинг сурати ўтгандек бўлди.

Қўққисдан Катрина ён-верига қаради, Шаваль уни Рекийяргади шахта харобасига олиб келиб қўйипти,

қиз қоронғи, вайрона саройни кўриб, ўзини орқага ташлади.

— Йўқ, йўқ, керак эмас, қўйвор мени! — пичирлади қиз.

Қизни қўрқув босди, лекин бу қизнинг ўзи шу ишни хоҳлаб, голиб йигитнинг яқинлашувини сезаётганда қаршилиқ кўрсатиш учун барча мускулларни беихтиёр таранглаштириб юборадиган қўрқув эди. Кўпни кўрган, лекин ҳали бокира қиз — Катрина қўрқиб кетди: гўё унга даҳшатли бир нарса хавф солаётгандек, худди унга жароҳат етказаётгандек эди, шу боисдан у номаълум бир оғриқ азобидан қўрқиб кетди.

— Керак эмас, керак эмас, хоҳламайман! Мен ҳали жуда ёшман, деяпман сенга... Ҳа, лоақал сал катта-роқ бўлгунимча кут...

— Вой, жинни-ей, унда қўрқишнинг ҳам ҳожати йўқ... — пичирлади Шаваль бўғиқ товуш билан. — Нима керак ўзи сенга яна?

У ортиқ бир сўз айтмади. У қизни маҳкам қучоқлаб олди-да, бостирма тағига улоқтирди. Қиз эски арқонлар устига бориб тушди-да, қаршилиқ қилишни тўхтатди ва замондош қизларни сал бўлмаса болаликданок эркаклар қучоғига отадиган удум — катта биби-ларидан мерос бўлиб қолган итоаткорлик билан эркак иродасига бўйсунди. Қўрқув билан айтилган гаплар тинди, фақат эркакнинг қизишиб қансираши эшитиларди.

Этъен жойидан қимир этмай, ҳаммасини эшитиб ўтирарди. Мана, яна биттасининг шўри қуриди! Энди, бу қангомани охиригача томоша қилгач, ҳасад ва ғазабга тўла ноҳуш ҳис билан ўрнидан турди. У андишани йиғиштириб қўйди-да, ходадан-ходага сакраб, узоқлаша бошлади, ахир бу иккови ўзи билан овора, бу билан нима ишлари бор. Лекин у юз қадамча юриб, қайрилиб қараган эди, иккови ҳам ўрнидан туриб, унга ўхшаб посёлка томон келаётганини кўриб ҳайрон бўлди. Эркак яна қизнинг белидан қучиб олган, миннатдорлик билан бағрига тортиб, бир нималар деб шивирларди; қиз бўлса, шунчаки кеч қолганидан хафа бўлиб, уйига ошиқаётгандек кўринарди.

Бирдан Этъен уларнинг юзини жудаям кўргиси келиб кетди. Бу бемаънилик эди, у васвасага берилмас-

лик учун қадамини тезлатди. Лекин оёқлари ўз-ўзидан секинлашиб, Этьен ўзини биринчи дуч келган фонарнинг соясига олди. У Катрина билан Шавални таниган заҳотиёқ ҳайратдан тахта бўлиб қолди. Аввалига Этьен иккиланди — наҳотки тўқ зангори кўйлакли, чепчикли бу қиз ҳақиқатан ҳам Катрина бўлса? Наҳотки бу ўша иштон кийган ва каноп чепчикли ўша бола бўлса? Шу иштони туфайли ҳатто унга тегиб кетган бўлса-да, унинг қиз бола эканини ажрата олмаган эди. Бироқ энди у ортиқ шубҳаланмади, унинг кўкимтир, қаърига тортган, шаффоф, булоқ сувидек тиниқ кўзларини яхшилаб кўриб олди. Қойил-е, фоҳиша! У ўзидан-ўзи ғазабланиб, қиздан ўч олиш пайига тушди: у қиздан жирканди. Бунинг устига эғнидаги хотинлар кўйлаги бир ярашмаган, рўдапога ўхшайди.

Катрина билан Шаваль аста-секин ўтиб кетишди. Улар биров кузатаётганини хаёлларига ҳам келтиришмасди. Шаваль Катринанинг қулоғи тагидан ўпиш учун тўхтатди, қиз ҳам кулиб, унинг эркалашидан ийиб тўхтади. Орқада қолган Этьен, ҳар қалай, уларнинг кетидан юришга мажбур бўлди, улар йўлини тўсаётганлари учун жаҳли чиқарди; у чор-ночор ҳаммасини кўриб борар, бундан баттар қутурар эди. Демак, эрталаб ҳали менга ҳеч ким текканмас, дея қасам ичгани рост экан-да, хуштори йўқлиги ҳам тўғри: Этьен бўлса қизнинг гапига ишонмай, биров қилган ишни ўзи қилмай, ундан айрилиб ўтирибди-я! Мана энди оғзидаги ошини олдириб ўтирибди, яна аҳмоқ бўлиб кетларида қараб келяпти! Этьен ақлдан озай деди, у муштларини тугиб, манави кишига ташланишга ҳам тайёр: у қаҳру ғазабдан ҳеч нимага ақли етмай, одам ўлдиришни кўмсаб, жазавага тушди.

Сайрга чиққанига ярим соат бўлганди. Катрина билан Шаваль қишлоққа етишганда қадамини секинлатишди, канал бўйида — икки марта, уюм ёнидан ўтганда — уч марта тўхташди, энди улар шоду хандон, йўл-йўлакай бир-бирларига эркаланишарди. Билиб қолишмасин дея қўрққан Этьен ҳам тўхтаб-тўхтаб юрди. У шунчаки таъбим хира-да, деб ўзини ўзи ишонтиришга ҳаракат қиларди: аммо бундай лалайиш, қизларга раҳм қилиш ярамас экан, бу бир сабоқ бўлсин. Этьен Ворёдан ўтгач, овқатланиш учун бемалол Рас-

нёрникига жўнаши ҳам мумкин эди, лекин у севишганларни посёлкагача кузатиб қўйди-да, бир чеккада биқиниб, Шавалнинг Катринани ниҳоят уйига қўйворишини ярим соатча кутди. Этьен уларнинг тамомила айрилишганига қаноат ҳосил қилгач, яна санқиб, Маршьенн йўлида анча олислаб кетди: у ҳеч нимани ўйламай қадам ташлаб бораркан, юраги гаш бўлиб, нимадир бўғар, хонасига қайтишни хоҳламас эди.

Этьен бир соатдан кейин, тўққизларга яқин, эрталаб соат тўртда туришни хоҳласанг, у-бу еб олиб, ухлашинг керак-ку, деган қарорга келди-да, посёлкани кесиб ўтди. Қоронгиликка чўмган посёлка уйқуда эди. Уйларнинг ёпиқ дераза қопқоқларидан заррача ҳам зиё тушмас, уларнинг олд томонлари тўғрига чўзилиб кетган, ҳамма қаттиқ уйқуда бўлганидан казармага қамалиб олган кишиларнинг хурраklarигина эшитиларди. Бўм-бўш боғдан битта мушук ўтди холос. Кун тугади, эзилган, чарчоқдан сулайган ишчилар қоринларини бир амаллаб тўйдиришди-да, дастурхон устидан туриб, ўзларини ўринларига ташлашди.

Раснёрникидаги каттакон ёруғ залда аллақандай механик билан икки ишчи пивохўрлик қилиб ўтиришарди. Этьен залга киришдан олдин тўхтади-да, қоронгиликка сўнгги бор нигоҳ ташлади. Эрталаб шу ерга келганидагидек, далада шамол ўйнаб, кўзи ўнгида кенг зим-зиё ялаглик ёстаниб ётарди. Олдинда, бир неча фонарнинг хира ёғдусида аранг кўринадиган Ворё қутурган ҳайвон каби биқиниб турарди. Ағдарма тепа олдидаги учта гулхан гўё осмонда осилиб турган қирмизи ойдек лангиллаб ёнарди; ахён-ахёнда гулханлар шуъласида Ўлмас бобо билан оқ отнинг баҳайбат гавдаси кўриниб қоларди. Нарироқда эса ҳамма нарса — Монсу, Маршьенн, Вандам ўрмони, кўз илгамас лавлаги экилган далалар билан буғдойзорлар зим-зиё тун қўйнида ётарди; фабриканинг баланд трубалари кўк чироққа, кокс печлари эса қизил чироққа ўхшаб милтиллаб кўринарди. Секин-аста қоронгиликда ҳамма нарса қўшилиб кетди, тўхтовсиз севалаб ёғайтган ёмғир чор атрофни қамраб олди, тун сукуна-тида биттагина товуш — кечаю кундуз қанда қилмай сув чиқариб ташловчи насоснинг кучли, чўзиқ нафас олишигина эшитиларди.

УЧИНЧИ ҚИСМ

1

Этъен эртасига ҳам, кейинги кунлари ҳам шахтадаги ишга бораёвди. У шу ҳаётга ўргана бошлади, аввалига юрагини сиқадиган янги шароитларга кўникиб қолди. Кейинги икки ҳафта бир хилда ўтаётган тирикчилигини битта воқеа — қаттиқ безгак тутиб қолишигина бузди; безгак уни икки кунгача ўринга ётқизиб қўйди. Оёқ-қўллари зирқираб оғрир, боши ловиллаб ёнар, алаҳсирар эди; алаҳсираганда вагонеткани ўзи ҳам сиғмайдиган тор штольняга итариб кирғизмоққа уринаётгандек бўларди. Бу шунчаки ниҳоятда чарчаганлик натижаси бўлиб, иш ўрганиш жараёни билан боғлиқ эди, шу боисдан Этъен тезда тузалиб кетди.

Кунлар кетидан кунлар, ҳафталар кетидан ҳафталар, ойлар ўтди. Этъен ўртоқлари каби эрталаб соат учда турар, кофе ичар, нонуштага кечқурун Раснёр хоним тайёрлаб қўйган бутербродни олиб кетарди. У эрталаблари шахтага йўл оларкан, ҳар куни уйига ухлаш учун қайтаётган Ўлмас бобони учратарди; кечқурунлари эса ишдан қайтаётганида кечки сменага кетаётган Бутлуга дуч келарди. Бутлу ҳамманикига ўхшаш шапкача, чолвор билан бўз кўйлак кийган эди: у ҳам бошқаларга ўхшаб совуқ қотиб қалтирар, баракдаги ўтга орқасини тутиб исинарди. Кейин шамол қаттиқ ғўриллаётган қабулхонада яланг оёқ кутиб туришга тўғри келарди. Энди Этъенни мис қисмлари ялтираб турган, силлиқ қилиб жило берилган машина ҳам, тунги қушларнинг қора, унсиз қанотларига ўх-

шаб сирпаниб бориб-келаётган арқонлар ҳам, сигнал қўнғироқлари овозига қараб ҳар минутда пайдо бўлиб, яна ғойиб бўлиб кетаётган кўтарма машина кажавалари ҳам, бақриб берилган командалар, рельслар устида тарақ-туруқ қилиб юрадиган вагонеткалар ҳам қизиқтирмасди. Унинг лампаси жуда хира ёнарди: лантани лампачи уни яхши тозаламагани аниқ. Лекин Этьен Муке бобо ҳаммани зўрлаб чиқараётганда, ҳазиллашиб, қизларни шапиллатиб уриб ҳайдаганида кўнгли бир оз ёзиларди. Кажава қўзғалиб, тубсиз чоҳ тагига тошдек тушиб кетаётганда Этьен кундузги нурнинг ғойиб бўлишини кўриш учун ўгирилиб қарашга ҳам улгурмасди. У ҳатто кажава узилиб кетиши мумкин, деб ўйламаган одатдаги муҳит қўйнига, жала қуйиб турган зулмат қаърига тушиб борарди. Пастда, қабулхонада Пьеррон энсани қотирадиган мунофиқона қиёфада уларни тушираркан, шахтёрлар тўда бўлиб, шалвираб штольняларга бўлиниб кетишарди. Этьен энди шахтанинг ҳамма йўлакларини Монсу кўчаларидан ҳам яхши билар, қаерда бурилишни, қаерда пастроқ энгашиб юришни, кўлмаклардан қандай айланиб ўтишни яхши билиб олганди. Йигит ер остидаги шу икки километрлик йўлни шунчалик яхши билардики, ҳатто лампасиз ҳам икки қўлини чўнтагига тикиб юра оларди. Унга бирдек ўша кишилар дуч келишади: мана, ишчиларнинг юзини ёритиб штейгер ўтиб кетяпти, мана Мук бобо отни етаклаб боряпти, мана, Бебер пишираётган от — Уктам билан ўтяпти. Жанлен бўлса вентиляция эшикларини ёпиб, поезд кетидан чопяпти, семиз Мукетта билан ориқ Лидия эса вагонеткаларни филдиратиб келишарди.

Этьен ўнгирлардаги намлик билан димликдан энди камроқ озор чекадиган бўлиб қолди. Тор штольнялар ўтишга осон бўлиб қолгандек эди. У шунчалар ориқлаб кетгандики, илгарилари қўлини суқишга ҳам журъат эта олмайдиган тирқишларгаям сигиб кетарди. У кўмир чангига ўрганиб қолди, қоронғиликда ҳам бемалол кўрадиган бўлди, қора терга ботса ҳам парво қилмас, эрталабдан кечгача шалаббо кийимда юришга одатланди. Бунинг устига Этьен кучини ҳуда-беҳудага сарф қилавермас, эпчиллиги ва ишга чечанлиги билан ўнгирдаги ўртоқларини ҳайратда қолдирар эди. Уч

ҳафтадан кейин шахтанинг энг яхши юккаши деб ном чиқарди: ҳеч ким вагонеткани битта итарганда тепаликка Этьендек олиб чиқа олмас, ҳеч ким вагонеткани арқонга унчалик эпчиллик билан илолмасди. Бўйи паст бўлгани учун у ҳамма жойдан ўта олар, қўллари хотинларникидек нозик ва оппоқ териси юмшоқ бўлишига қарамасдан, чайир, жуда ҳам бақувват эди. У ғуруридан бўлса керак, чарчаб силласи қуриса ҳам ҳеч қачон шикоят қилмасди. Фақат ҳазилни билмайди, биров гап отиб кўйса, жаҳли чиқади, деб ундан гина қилишарди холос. Шахтёрлар уни ўз сафларига кўшиб олиб, чинакам кўмир қазувчи дейишарди; у кун сайин ишнинг ҳадисини олиб, машинага айланиб борарди.

Этьенга айниқса Маэ дўстона муносабатда бўларди, чунки у ҳамиша астойдил қилинган ишни ёқтирарди. Бундан ташқари у ҳам бошқалар қатори юккашни ақлу заковатда ўзидан юқори кўярди. У Этьеннинг ўқиб-ёзаётганини, планлар чизаётганини кўрган эди. Шунингдек, у Этьеннинг маъжуд нарсалар ҳақидаги суҳбатларини эшитганди, бу нарсалар Маэга янгилик эди. Бу ҳол Маэни асло ажаблантирмасди: шахтёрлар содда бўлишади, уларнинг бошлари ҳам механикларникидек зўр бўлади, лекин у очликдан ўлмаслик учун кўмир қазувчилик касбини астойдил эгаллашга тиришган бу йигитнинг матонатига қойил қоларди. У шахтани бунчалик тез ўзлаштириб олган бошқа ишчини эслай олмайди. Шунинг учун ҳам штольняни тезлик билан мустаҳкамлаш керак бўлиб қолса, Маэ кончиларни ишдан қолдиришни хоҳламай, тиргаклар қўйишни йигитга буюрарди, унинг ишни пухта ва маҳкам қилишига ишонарди. Бошлиқлар бу лаънати тиргакларни деб унга тинчлик беришмас, у минут сайин инженер Негрелнинг Дансарт билан яна бошлашиб келиб қолишидан кўрқарди; яна бақириб-чақиришига, ўзиникини маъқуллаб, ҳамма тиргакларни бошқатдан ўрнатишга мажбур этишига тоби йўқ эди. Маэ бу корчалонлар гарчи ҳамиша ҳеч нарсадан кўнгиллари тўлмагандек бўлиб кўринишга уриниб, бир кун эмас, бир кун Ширкат жиддий чора кўради, деб дўқ уришни қўймасалар ҳам, юккашнинг ишидан қониққанларини сезиб юрарди. Вақт ўтган сари шахтада зимдан

норозилик кучайиб борарди, ҳатто Маэнинг ўзи ҳам, шунчалик вазмин бўлишига қарамай, баъзан газабланиб, муштини тугарди.

Биринчи кунларданоқ Захария билан Этьен орасида адоват пайдо бўлди. Бир оқшом ёқалашиб кетишларига оз қолди. Лекин ўз маишатида бошқа нарсани билмайдиган кўнгилчан Захария Этьен унга бир кружка пиво ичишни дўстона таклиф этиши билан жим бўлди қолди. Кўп ўтмай у ҳам янги ишчининг устунлигини тан олди. Левак ҳам у билан дўстона муносабатда бўла бошлади, у билан сиёсат ҳақида тез-тез суҳбатлашар, бу масалаларда Этьеннинг ўз фикри бор, дерди. Артелдагилардан фақат битта найнов Шавалгина юккашга қандайдир адоват билан қарар — бунинг сабаби бир-бирларига хўмрайиб юришларидагина эмасди, аксинча, улар ҳатто иноқлашиб ҳам кетишди. Бироқ ўзаро ҳазил-мутойибада худди бир-бирини еб қўймоқчидек ўқрайиб қарашарди. Катрина ишда аввалгидек ҳорғин, итоаткор қиздек кўринар, аввалгидек, қаддини букиб, вагонеткани итарар, Этьенга ҳам меҳрибонлик билан муносабатда бўларди, йигит ҳам ўз навбатида унга ёрдам берар эди. Иккинчи томондан, Катрина маъшуқининг ҳамма инжиқликларига кўниб, эркалаган пайтларида жон-жон дер эди. Уларнинг алоқасини посёлкадагиларнинг ҳаммаси биларди, ҳатто Катриналарнинг оиласи ҳам уларнинг муносабатига панжа орасидан қарашарди. Шу боисдан Шаваль ҳар оқшом юккаш қиз билан уюм орқасига ўтиб кетар, кейин уни ота-онаси эшигигача кузатиб келиб, шу ернинг ўзида бутун посёлкадагиларнинг кўзи олдида қизни сўнгги бор ўпарди. Этьен ўзини бу ишларга ҳеч алоқаси йўқдек қилиб кўрсатарди, кўпинча уларнинг бирга юришларини масхаралаб, шундай қаттиқ гаплар айтардики, бундай гапларни қиз-йигитлар фақат шахтанинг ичидагина айтишлари мумкин эди. Катрина ҳам бўш келмас, йнгити унинг учун нималар қилганини мақтаниб гапирар, лекин кўзлари Этьеннинг кўзларига тушганида, ҳар сафар хиёлат бўлиб, ранги оқариб кетарди. Икковлари ҳам тескари қараб олиб, баъзан соатлаб гаплашишмасди. Гўё икковлари ҳам қалбларида жувонмарг бўлган ўша туйғу учун

бир-бирини ёмон кўрарди, бу ҳақда ҳеч қачон сўз очишмас эди.

Баҳор келди. Бир куни Эъён шахтадан чиқар экан, апрелнинг илиқ нафаси юзларига урилганини, пўрсиллаб турган ер, мурғак кўкатлар, мусаффо ҳаво ҳидини сазди. Мана энди у ҳар сафар уйига қайтар экан, назарида ҳаво тобора хушбўй бўлиб, ёз нафаси сира уфурмайдиган зимистон ва зах зиндонда ўн соат ишлаб келаётган кишига қуёшнинг ҳарорати ошиб бораётгандек туюларди. Кунлар узайиб боргани учун май ойида Эъён шахтага қуёш чиқар пайтда, қирмизи осмон Ворёни шафақ билан нурафшон этиб, эрталабки енгил туман эса пушти рангга кирганда тушадиган бўлиб қолди. Энди ҳеч ким совуқдан дилдирамасди, узоқ далалардан илиқ шамол эсарди, осмонда эса тўрғайлар овозларини янградиб сайрардилар. Соат учда эса у кўзни қамаштириб ёнаётган қуёшни кўрди,— қуёш уфқни ловиллатиб, кўмирдан ифлосланган гиштин биноларга қизғиш шуъла сочарди. Июнда жавдар баланд ўсган бўлиб, унинг кўкимтир пояси лавлагининг қорамтир баргларига қуюқ соя ташлаб турарди. Бу — салгина шамолга ҳам мавжланадиган бепоён денгиз бўлиб, кун сайин кенгайиб борарди. Эъён кўпинча уларнинг кечқурун эрталабкидан ҳам кўкроқ эканлигини кўриб, ҳайрати ортарди. Зовур бўйидаги тераклар барглар билан безанди. Кўмир уюмини ўт-ўлан босиб, ўтлоқлар гулга бурканди, ҳаммаёқдан янги ҳаёт чечак отар, бу ҳаёт Эъёнга азоб ва ҳорғинлик келтирадиган ер остидан булоқдек қайнаб чиқар эди, Эъён эса ана шу ер остида азоб-уқубат чекиб, силласи қуррди.

Энди Эъён кечқурунлари сайрга чиқаркан, укм орқасида ошиқ-маъшуқларни учратмасди. Иигит уларнинг изидан жавдарзор оралаб бораверарди. Саргая бошлаган бошоқлар билан катта-катта қизил лолаларнинг силкинишини кўриб, уларнинг ўз эҳтиросларини қондириш учун топган хилват жойларини билиб оларди. Захария билан Филомена эски одатларига кўра, шу ёққа кетишарди. Доимо Лидияни излаб юрадиган Ашаддий кампир Жанлен билан қизини қарғгани қарғаган эди: болалар жавдари ичига кириб кетишганидан, уларни қўрқитиш учун оёқларига тегиш ке-

рак эди. Мукетта эса, бошқа гап: унинг бормаган ери йўқ эди, даладан ўтаётганда албатта унинг боши билан жойдан кўриниб қоларди; у бегонани кўриши билан дарров яшириниб, ётиб олганидан оёқларигина чиқиб турарди. Ахир ёшлар эркин-ку, шу боисдан Этьен уларнинг бу ишларини айбга буюрмасди. У фақат Катрина билан Шавални учратган оқшомларигина хуноб бўларди. Этьен яқинлашиб келиши билан уларнинг бекинишганини, тепаларидаги кўк пояларнинг бирлашиб, қимир этмаётганини икки марта сезиб қолди. Бошқа бир сафар Этьен торгина сўқмоқдан бораркан, Катринанинг парпираган кўзлари бирров кўриниб, шу ондаёқ жавдарлар ичида ғойиб бўлди. Ушанда кўз илгамас текислик назарида жудаям торайиб кетгандек бўлди-ю, Этьен шу оқшомни Раснёрниқида, унинг «Авантаж» майхонасида ўтказишни афзал кўрди.

— Раснёр хоним, менга бир кружка беринг... Йўқ, мен бу оқшом сайр қилгани бормайман, жуда чарчадим, оёқларимда оёқ қолмади.

Сўнг у хонанинг нариги томонида, девор олдидаги стол ёнида ўтирган ўртоғига мурожаат қилиб сўради:

— Суварин, сен ҳам ичасанми?

— Йўқ, раҳмат, ҳеч нима истамайман.

Этьен шундоққина қўшни бўлиб турганида Суварин билан танишганди. Суварин Ворёда машинист бўлиб ишларди, тенёдаги хонада Этьен билан ёнма-ён турарди. Кўринишдан ўттиз ёшлар чамасидаги озгин, оқиш, нозик юзиши узун-узун туклар билан сийрак соқол қоплаганди; ўткир, оппоқ тишлари, ўймоқдай оғзи билан бурни, ёноқларининг қизғишлиги уни қизларга ўхшатарди; у ювош кўринса ҳам, айни чоқда юз ифодалари қайсарлигидан далолат берарди, кўкимтир-кулранг кўзларида баъзан ғазаб учқунланарди. Бу қашшоқ ишчининг кулбасида китоблар билан қоғозлар солиб қўйилган катта яшикдан бўлак ҳеч нима йўқ эди. Суварин миллати рус бўлиб, ўзи ҳақида ҳеч нима демас, одамлар бўлса, у ҳақда бўлмағур гапларни бичиб-тўқишарди. Ажнабийларга ишончсизлик билан муносабатда бўлувчи кўмир қазувчилар Сувариннинг қўллари кичкиналигидан унинг бошқа табақага мансублигини пайқашиб, аввалига бу бир иш қилиб,

балки одам ўлдириб, жазодан қочиб юрибди, деб ўйладилар. Лекин Суварин ўзига заррача ҳам бино қўймай, уларга биродарона муносабатда бўлар, ёнидаги чақаларини ишчиларнинг болаларига улашиб юрарди, шу боисдан кўмир қазувчилар охири уни тан олишди. Улар бу — сиёсий муҳожир, деган фикрга келиб, хотиржам бўлишди. Бундай таъбир қанчалик ноаниқ бўлса ҳам бу, Суварин гарчи жиноят қилган бўлганда ҳам кўмирчилар наздида уни оқлар эди. Кўмир қазувчилар бу ҳам ўзимизга ўхшаган бир бадбахт ўртоқ-да, деб қарардилар.

Дастлабки ҳафталарда у Этъенга хафақон ва одамови бўлиб кўринди. Этъен унинг саргузаштини кейинроқ билиб олди. Суварин Тула губернасидаги бир дворяннинг кенжа ўғли эди. У Петербургда медицинадан таҳсил олди. Шу ерда у ўша замондаги Россиянинг ҳамма ёшлари фикру зикрини чулғаб олган социализм ғоялари билан шуғулланди. У халқ орасига кириш, уни яқиндан ўрганиш ва унга биродарона ёрдам бериш ниятида бирор ҳунар ўрганишга қарор қилиб, механик касбини танлади. Мана энди императорга суиқасд муваффақиятсиз чиққач, у Россиядан қочиб келиб, шу касби билан тирикчилик қилиб юрибди: аввалига роса бир ойгача сабзавот дўконининг ертўласида биқиниб, кўчанинг тагидан тешиб чиқадиган лаҳм қавлади, ҳар лаҳза уй-пуй билан бирга портлаб кетиш хавфидан қўрқмай бомба ясади. Оиласи ундан юз ўгирди. Бу жосус бўлса керак, дея гумон қилиниб, француз устахоналарининг қора тахтасига ёзиб қўйилган Суварин то Монсудаги Ширкат ишчи кучи етишмагани учун уни ёллагунча бир чақага зор бўлиб, очдан ўлаёзди. Бу ерда у бир йилдан бери ишляпти — бир ҳафта кундузи, бир ҳафта кечаси ишлайди, доимо тиришиб, ичмасдан, юмушларни пухта, жо-бажо қилиб, камсуқум бўлиб юрганидан бошлиқлар уни бошқаларга иборат қилиб кўрсатишарди.

— Наҳотки сираям ичгинг келмаса? — кулиб сўради ундан Этъен.

У бўлса оҳиста, деярли акцентсиз жавоб берди:

— Фақат овқат маҳали ичгим келади.

Этъен Сувариннинг ишқий саргузаштларини айтиб ҳазиллашди, сени «Ипак пайпоқ» посёлкаси яқинида-

ги жавдарзорда юккаш қиз билан кўрдим, деб қасам ичди. Суварин ўта хотиржамлик, лоқайдлик билан елкасини қисиб қўя қолди. Юккаш нима қилади? Агар хотин киши эркаклардек мард бўлиб, ўртоқларча муносабатда бўлса, у ҳам ўртоқларча муносабатда бўларди. Йўқса бунақа разиллик қилишнинг нима кераги бор? Унга ҳеч ким — на хотин, на дўст керак эди, бирор киши билан муносабатда бўлишни ҳам истамасди. У эркин қуш бўлиб, бирон яқин кишиси йўқ эди.

Ҳар оқшом соат тўққизларга яқин қовоқхонадан одамларнинг оёғи узилгач, Этьен қолиб, Суварин билан суҳбатлашарди. У пивони майдалаб ҳўплар, машинист эса папирос кетидан папирос чекарди; тамаки тутунидан унинг ингичка бармоқлари саргайиб кетганди. У худди туш кўраётгандек, бесаранжомлик билан ҳалқа-ҳалқа бўлиб чиқаётган тутунни кузатарди. У талвасага тушиб, чап қўли билан бўшлиқда алланимани изларди: кейин уйда эркин юрадиган оғиргина, қўлга ўрганган, семиз, урғочи қуённи тиззасига оларди. Ўзи «Польша» деб от қўйган бу мода қуён уни жуда яхши кўрар, шимларини искаб чиқар, рўпарасида чўнқайиб, худди ёш боладек тиззага олмагунча тимдалайверарди. Шундагина унга суйканиб, қулоқларини туширарди-да, кўзларини юмарди; Суварин бўлса, шуурсиз бир меҳр билан унинг ипакдек кулранг юнгини силайверарди. Бу иссиқ жонивор унга таскин берарди.

— Виласизми,— деди бир кун кечқурун Этьен,— мен Плюшардан хат олдим.

Хонада Раснёрдан бошқа ҳеч ким йўқ эди. Сўнгги майхўр ҳам ҳамма бир уйқуни олган посёлкага жўнаганди.

— А!— хитоб қилди майхоначи мижозларига яқин келиб.— Ишлари қанақа экан?

Ўзининг Монсуда ишга кирганини ҳабар қилган Этьен икки ойдан бери Плюшар билан хат олиб, хат бериб турарди. Кўмир қазувчилар орасида тарғибот ишлари олиб бориш имконияти туғилгани ҳақидаги фикрга ёпишиб олган Плюшар Этьенга шу хусусда турли топшириқлар бериб турарди.

— Сиз билган Ўртоқликнинг ишлари яхши кетяп-

ти; афтидан унга ҳамма тарафдан одамлар қўшилаётганга ўхшайди.

— Уларнинг жамияти ҳақида сен қандай фикрдасан? — сўради Раснёр Суваринга мурожаат қилиб.

Суварин «Польша»нинг бошини оҳиста силаркан оғзидан пага-пага тутун чиқариб, жавоб берди:

— Бўлмаган савдо!

Лекин Этьен руҳланиб кетганди. Ундаги норозилик кучайиб меҳнатнинг капитал билан курашини орзу қиларди. У тажрибасиз бўлганидан ҳар нарсага жуда қизиқарди. Гап халқаро ишчилар ўртоқлиги, яқиндагина Лондонда тузилган машҳур Интернационал ҳақида борарди. Пировардида адолатнинг тантана қилишига олиб келадиган ўша шонли курашнинг дебочаси шу эмасми? Барча тўсиқлар бузиб ташланади. Ишчи ўз меҳнати билан топадиган бир бурда нонига ўзи эга бўлиши учун бутун дунё меҳнаткашлари қўзғолиб, бирлашадилар. Шундай содда, шундай буюк ташкилот бу: аввалига мазкур жамоани ифодаловчи секция тузилади; сўнгра ўша вилоятдаги секцияларни бирлаштирувчи федерация вужудга келади, кейин миллат туғилади ва ниҳоят, буларнинг ҳаммаси тепасида турадиган бош кенгашда ўз аксини топган инсоният барпо этилади, бу кенгашда ҳар бир миллатнинг мухбир секретари бўлади. Ярим йилга қолмай жаҳонни забт этиш ва агар корхона эгалари қайсарлик қилавермаса, уларни қонунларни бажаришга мажбур этиш мумкин бўлади.

— Сафсата! — деди такроран Суварин. — Сизларнинг Карл Марксларингиз табиий кучларни ишга солишни истайди. Сиёсат — фитна-да, суиқасд ҳам йўқ, шундайми? Ҳамма нарса рўйрост, ягона бир иш учун — иш ҳақини ошириш учун олиб борилиши керак... Ҳе, ўша эволюцияларингдан ўргилдим-е! Шаҳарларни ёндириш, бутун-бутун халқларни қиринг, йўлингиздаги ҳамма нарсани супуриб ташланг, бу чириган дунёдан ҳеч нима қолмаган тақдирдагина яхшироқ дунёни қуриш мумкин бўлар.

Этьен кулиб юборди. У ўртоғининг фикрига ҳаммаша қўшилавермасди: умумий емирилиш назарияси унга оддий бир олифтагарчиликдек туюларди. Раснёр анча тажрибали, тўғри фикр юритувчи, нуфузли киши

бўлганидан бу гапларга хафа бўлмади. У фақат масалани ойдинлаштириб олмоқчи бўлди.

— Хўш, нима қилмоқчисан? Монсуда секция ташкил этмоқчимисан?

Шимолий федерациянинг секретари Плюшар худди шундай қилмоқчийди. У айниқса, кўмир қазувчилар забастовка қилгундай бўлсалар, Уртоқлик жамиятининг ёрдам беришига ишора қиларди. Эъён стачка бўлиши муқаррарлигини олдиндан биларди: тирговичлар масаласи ёмон оқибатга олиб келиши турган гап; Ширкат яна битта талаб қўйса бас, ҳамма конларда дув қўзғолон кўтарилди.

— Лекин энг ишкали — бадал пули тўлаш, — комил ишонч билан деди Раснёр. — Умумий фондга эллик сантим, яна секцияга икки франк — арзимаган пул бўлса ҳам, гаров бойлашаман, кўплари тўлашдан қолади.

— Шундай бўлгач, — илова қилди Эъён, — даставвал бу ерда ўзаро ёрдам кассаси ташкил этиш керак; агар лозим бўлиб қолса, уни стачка фондига айлантириб юборардик... Ҳар қалай, бу ҳақда ўйлаш вақти етди. Агар бошқалар хўш дейишса, мен бунга тайёрман.

Сукунат чўкди. Пештахтадаги керосин лампа тутаб ёнарди. Ланг очиқ эшикдан белкуракнинг тарақ-туруғи эшитилиб турарди: Ворёдаги гўлаҳ машина печкаларидан бирига кўмир ташлаяпти.

— Ҳамма нарса қимматлашиб кетди-я! — деб қўйди хонага кириб, боядан бери гапларини маънос эшитиб турган Раснёр хоним; у эғнидаги доимий қора қўйлагида жуда новча кўринарди. — Бунга қаранг-а, тухумга йигирма икки су тўлабман-а... Бир кун эмас, бир кун ҳаммаёқ остин-устун бўлиб кетади.

Эркаклар ҳам шу фикрда эдилар. Шикоятлар ёғилиб кетди, улар бирин-кетин оғир-оғир хўрсиниб гапирарди. Ишчиларнинг бундай ҳаётга чидашни қийин. Революция ишчини баттар қашшоқ қилиб қўйди. 89-йил революциясидан сўнг буржуйларгина бойиб, семириб кетди, меҳнаткаш инсонга сарқитларини ҳам раво кўришмайди. Қани, инсоф билан айтишсин-чи, шу юз йил ичида йиғилган нозу неъмат, молу дунёдан ишчилар жила қурмаса озгина баҳраманд бўлдимми? Уларни озод дея эълон қилишиб, устига чиқиб тепиш-

япти холос; ҳа, улар очликдан ўлсин, деб эркинлик беришди, лекин улар илгари ҳам бундай ҳуқуқдан маҳрум эмасдилар. Ўзларини ўтган йили ёққан қорчалик эсга олмайдиган аллақандай очопат муттаҳамларга овоз берганлари билан битта ноилари иккита бўлиб қолмайди. Йўқ, қандай қилиб бўлса ҳам бу аҳволни тугатиш керак — буни хоҳ қонуний йўл билан, хоҳ тартиб доирасида ўзаро келишиб, амалга ошириш, ё бўлмаса зўравонлик йўли билан, ҳаммаёқни ёндириб, бир-бирини сўйиб, амалга ошириш керак. Биз кўрмасак ҳам, балки болаларимиз кўришар буларни, чунки бу аср бошқа революция билан, бу гал ишчилар революцияси билан якунланиши керак. Ана шу жамият ўрнида адолат ва ҳалолликка асосланган янги жамият барпо этиш учун эски жамиятни ҳамма табақалари билан бирга кунпаякун қиладиган талатўп бўлади.

— Бир кун эмас, бир кун буларнинг ҳаммаси остинустун бўлиши турган гап,— қатъий такрорлади Раснёр хоним.

— Ҳа, ҳа, ҳаммаси кунпаякун бўлади! — тасдиқлашди эркаклар.

Суварин «Польша»нинг қулоқларини силаркан, қуён хуш ёққанидан бурунларини буриштирарди. У шуурсизлик билан бўшлиққа боқаркан, ўзи билан ўзи гаплашгандек минғирлади:

— Иш ҳақини ошириш мумкинми? Темир қонунга кўра, маош ишчи қоқ мон ейиши-ю, болаларни кўпайтиришга етадиган даражада жуда оз ошади... Агар у ҳаддан ташқари камайиб кетса, ишчилар очдан ўла бошлайди; янги ишчи кучига эҳтиёж туғилади, кейин яна маош ошади. Борди-ю, у ҳаддан ташқари ошиб кетса, ишчиларнинг келиши кўпаяди, маош яна камаяди. Бу ишчини доимий очликка маҳкум этувчи бўш жигилдон мувозанатидир.

Суварин жазавага тушиб, билимдон социалистлардек фикрларини ривожлантириб баён қилганида, Этьен билан Раснёр эшитиб ташвишга тушарди: унинг ваҳимали хулосаларидан довдираб, эътироз билдиришга сўз тополмасдилар.

— Эшитяпсизларми,— давом этди у, одатдаги хотиржам товуш билан уларнинг юзларига боқаркан,— ҳаммасини йўқотишимиз керак, бўлмаса яна оч қола-

миз. Ҳа, ҳа! Анархия — бошқа нарса керакмас! Ер қон билан ювилиб, олов билан покланиши керак!.. У ёғи кейин маълум бўлади.

— Суварин жаноблари мутлақо ҳақлар, — деди Раснёр хоним.

Бу аёл исёнкорлардек шарттаки бўлса-да, ғоят назокатлилиги билан ажралиб турарди. Ҳеч нарсадан хабарсизлиги учун ўкинган Этьен ортиқ мунозарада қатнашишни истамади. У ўрнидан турди-да, деди:

— Бориб ухлаймиз. Нима бўлсаям эрталаб соат учда туриш керак.

Суварин қўлидан тушмайдиган папирোসини ўчириб, семиз қуённи оҳиста қорнидан кўтариб, ерга қўйди. Раснёр кўча эшикни ёпди. Ҳамма чурқ этмай тарқалди. Ҳаммасининг қулоғи шангилларди, бошлари эса муҳим, ҳаяжонли муаммолардан шишиб кетгандай эди.

Улар ҳар куни бўш залда Этьен бир соатча чўзиб ичадиган бир кружка пивони олдиларига қўйволиб, нуқул шу гапларни гапиришарди. Шу чоққача Этьеннинг миясида мудраб ётган мубҳам фикрлар уйғониб, ҳаётнинг паст-баландини кўпроқ тушуна бошлади. Этьен билимга ғоят ташналигини ҳис қилиб, анча вақтгача қўшниспдан китоб сўрашга ботина олмади; аксига олиб, унда фақат немис ва рус тилларидаги китоблар бор эди. Ниҳоят у қаердандир Уртоқлик кооперативлари ҳақидаги французча китобни топиб олди. Сувариннинг гапига қараганда, бу китоб ҳам бир пулга қиммат эди. Бундан ташқари Этьен анархистларнинг Женевада нашр этилаётган «Кураш» деган варақасини мунтазам ўқиб борарди; Суварин уни олиб турарди. Ҳар қалай, улар ҳар куни суҳбатлашиб туришларига қарамай, машинист ўша-ўша одамовилигича қолаверди: афтидан, у ўз ҳаёт йўлини орзу-ҳавассиз, ишқ-муҳаббатсиз, роҳат-фароғатсиз босиб ўтаётгандек эди.

Июлнинг бошида Этьеннинг аҳволи яхшиланди. Қўқисдан юз берган воқеа шахтада муттасил бир хилда кечадиган ҳаёт маромини бузиб юборди: ишчилар бирдан Гийом қатламларида жинсларнинг аралашиб кетганини, кўмир қатламлари алмашаётганини пайқаб қолишди. Бу—шубҳасиз дарз кетиш белгиси эди. Ҳа-

қиқатан ҳам тезда ёриқни топишди, ёриқ борлиги ҳатто ер қатламларини жуда яхши билган инженерларнинг ҳам хаёлларига келмаганди. Бу воқеа бутун шахтани ташвишга солиб қўйди: ҳамма, афтидан, аралаш қатлам ёриқнинг нариги томонига ҳам ўтиб, анча пастга тушиб кетгани ҳақида гапирарди. Кекса кўмир қазувчилар худди кўмир излаб топиш учун юборилган итлардек ҳаммаёқни қидириб кетдилар. Лекин ҳозирча ишчилар қўл қовуштириб ўтиролмасдилар, шунинг учун ҳам Ширкат янги жойларда кўмир қазиб олишни кўзлаб, ким ошди савдосини белгилади.

Бир кун Маэ Этьен билан шахтадан қайтар экан, унга бошқа артелга ўтиб кетган Левакнинг ўрнига бизга ишга ўт, дея таклиф қилиб қолди. Маэ бош штейгер ва инженер билан келишиб қўйганди; улар йигитдан гоят мамнун эдилар. Этьен бундай кўтарилиш ҳақидаги таклифни қабул қилишга рози бўлди, — у Маэнинг бу ишончидан бахтиёр эди.

Кечқурун улар эълонлар билан танишгани шахтага равона бўлишди. Ким ошди савдосидан кейин ижарага олиниб, ишга туширилган янги участкалар Ворёнинг шимолий йўлагидagi Филоньер қатламида эди. Бунда ишланишнинг унчалик фойдаси йўқ эди. Этьен шарт-шароитларни ўқиб бераркан, шахтёр бошини сарак-сарак қиларди. Ҳақиқатан ҳам эртасига улар кўмир қазиладиган жойга боришганда, Маэ Этьеннинг эътиборини участканинг қия штрекдан узоқлигига, тупроқнинг бўшлигига, кўмир қатламининг юпқалиги ва унинг қаттиқлигига жалб этди. Лекин ишламасанг тишламайсан. Шунинг учун ҳам келаётган якшанбадaёқ ким ошди савдоси бўлаётган баракка боришди: шахта инженери билан бош штейгер раислигида савдо авжида эди: аммо округ инспектори эса йўқ эди.

Бурчакдаги кичкинагина очиқ саҳнада беш-олти юз кўмир қазувчи уймалашарди. Савдо шу қадар авжида эдики, фақат бўғиқ товуш эшитилиб қоларди: қичқириб рақамларни бирин-кетин маълум қилишар, шу ондаёқ яна янги рақамларни айтишарди. Бир лаҳза Маэ Ширкат таклиф этган участкадан биттасига ҳам илина олмаймизмикин, дея қўрқиб турди. Рақиблар кризис ва иш тўхташи ҳақидаги шов-шувлардан вавсасага тушиб, баҳони камайтиришарди. Инженер

Негрель бозори чаққон бўлишига қарамасдан шошилмас, баҳони жудаям паст нуқтасига тушириб юборишга ҳаракат қилар, хушомадгўй Дансарт эса, ижарага берилаётган участкаларни мақтаб, сурбетларча ёлғон гапирарди. Маэ эллик метрлик участкани олмоқчи бўлди, лекин уни қўлдап чиқаргиси келмаган ўртоғи билан рақобат қилишга мажбур бўлди. Улар навбатма-навбат ҳар вагонеткасига бир сантиметрдан тушиб беришди. Маэ голиб чиқди-ю, лекин тўловни шу қадар камайтириб юбордики, ҳатто орқасида турган штейгер Ришомм уни туртиб қўйди, у тишларини ғижирлатиб, Маэ бунақа нарҳда бари бир ҳеч вақо ишлай олмайди, деб қўйди ичида.

Улар тўпдан чиқишаркан, Катрина билан далаларни сайр қилиб қайтаётган Шавални кўриб, Этьен аламига чидолмай, сўкинди: чол шундай жиддий иш билан юрса-ю, булар тентирашини қўймаса!

— Жин урсин! — хитоб қилди Этьен. — Одамларнинг нах ғирибонидан олишади-я!.. Энди улар ишчилар бир-бирларини ғажиб, йўқ қилиб ташлашини хоҳлайдилар шекилли!

Шаваль ғазабланиб, мен бўлсам нарҳни асло камайтирмасдим, деди. Томоша қилиш учун келган Захария бўлса, бу ҳолни бориб турган бемаънилик, деди. Лекин Этьен жаҳл билан бақириб, уларни жим бўлишга мажбур этди:

— Бу расвогарчиликларга барҳам берилади! Биз ҳам хўжайин бўладиган кун келади!

Савдо тугагандан бери чурқ этмай келаётган Маэ худди уйқудан уйғонгандек ғўлдираб қўйди:

— Хўжайин бўлармиш-а! Эҳ, пешонамиз қурсин! Қани энди тесроқ келақолса!

II

Июль ойининг охириги якшанба куни Монсуда маҳаллий байрам ҳисобланарди. Шанба куни кечқурун бутун посёлкадаги бекалар челақ-челақ сув сепиб, полу деворларни ювишди, оқ қум сепилган бўлса-да, пол эрталабгача ҳам қуримади, — бунақа ҳашам камбағалларга ҳамиша ҳам насиб бўлавермайди. Кун жуда иссиқ бўладиганга ўхшайди, — бу шимол осмонида мо-

мақалди роқлар авжга чиқадиган, бепоён тақир текисликлар жазирама иссиқдан хансирайдиган ёз кунларининг бири эди.

Шанба куни Маэ оиласидагиларнинг ҳаммаси ҳар хил вақтда уйғонишарди. Ота соат бешдан буён ўрнида у ёқдан-бу ёққа ағдарила-ағдарила охири ўрнидан туриб кийинди, болалар бўлса, тўққизгача мириқиб ётишди. Бу сафар Маэ чекиш учун боққа чиқди, қайтиб уйга кирди, бошқаларнинг туришини кутаркан, ёлғиз ўзи ёғ билан бир бурда нон еди. У нима қилишни билмай шу алпозда тонгни оттирди; оқадиган бўлиб қолган тоғоранинг тешигини ямади, болаларга армуғон қилинган валиаҳд шаҳзоданинг суратини соат тагига ёпиштириб қўйди. Ниҳоят тепадан бирин-кетин хонадоннинг бошқа аъзолари ҳам тушиб келишди: Улмас бобо офтобда ўтириш учун стулини олиб тушди; она билан Альзира дарҳол нонушта тайёрлашга киришиб кетишди; Катрина бўлса Ленора билан Анрини кийинтириб, олиб тушди. Соат ўн бирга занг урди. Қайнатилаётган қуён гўшти билан картошканинг ҳиди уйни тутиб кетди. Ниҳоят уйқудан қовоқлари шишиб кетган Захария билан Жанлен эснай-эснай кириб келди.

Байрам муносабати билан бутун қишлоқ кўчага кўчиб чиққанди, ҳамма бугун барвақтроқ пишадиган тушки овқатни кутарди: овқатланиб, тезроқ Монсуга жўнашлари керак. Болалар ғужгон ўйнашарди, блузасиз, қўйлакчан, шиппак кийган одамлар дам олиш куни сайр қилаётган кишилардек эринчоқлик билан саланглаб юришарди. Ҳаво яхши бўлганидан ҳамма деразалар билан эшиклар ланг очик эди. Хоналардан говур-гувур гаплар, қичқирриқлар билан қадам товушлари эшитиларди. Ҳамма уйдан қайнатилган қуён гўштининг хушбўй ҳиди келар ва бу ёқимли ис ўрнашиб қолган пиёз доғининг нохуш исини бир кунга бўлса ҳам босиб кетарди.

Маэ хонадони қоқ пешинда овқатланишди. Уйлари анча осуда эди; аммо атрофлардаги говур-гувурдан қулоқ қоматга келарди. Қўшнилари тинмай эшикдан-эшикка ўтиб гаплашишар, хотин-халажлар тўп-тўп бўлишиб, гап сотишар, бир-бирларидан ҳар хил рўз-

гор буюмлари сўрашар, болаларни хонадан қувиб чиқаришар, ё бўлмаса аксинча, тарс-турс уриб, уйга судраб киришарди. Маэ хонадони Захария билан Филомена туфайли уч ҳафтадан бери қўшнилари Леваклар билан муросалари келишмай қолган эди. Эркаклар бир-бирлари билан гаплашсалар-да, хотинлар худди етти ёт бегонадек эдилар. Бу можаро Маэларнинг Пьеррон хоним билан муносабатини яхшилаб қўйди. Бироқ шу кун Пьеррон хоним эри билан Лидияни онасига ташлаб, азонда Маршённдаги опасиникига жўнаб қолганди; шу боисдан энди уни ғийбат қилишга тушишганди: опаси қанақалиги ҳаммага аён! Опасининг мўйлови бор, Ворёда бош штейгер вазифасида ишлайди. Маэнинг хотини, байрам куниям оиласини ташлаб кетадими, яхшимас, деди.

Маэлар хонадониди тушлик қилиш учун саройда бир ойдан бери боқиб семиртирилган қуён гўшти билан картошқадан ташқари гўштлик суюқош билан пишган мол гўшти ҳам бор эди. Икки ҳафталик маошни нақ кеча, шанба кун олишганди. Улар бунақа зиёфатни узоқ вақтлардан бери кўришмаганди. Ҳатто улар шахтёрлар уч кун ишламайдиган байрам — авлиё Варвара ҳайитида ҳам бунчалик маза қилишмаганди, — қуён гўшти бугунгичалик семиз ва юмшоқ эмасди. Энди тишлари чиқаётган жажжигина Эстелладан тортиб то сўнгги тишларидан ҳам айилай деб турган Ўлмас бобогача ўн жуфт жаг шундай зўр бериб ишлардики, ҳатто суякларгача ҳам қолмасди. Гўшт яхши бўлишига қарамасдан кўмир қазувчиларнинг ошқозони уни яхши ҳазм қилолмасди, чунки гўштлик таомни кам кўрардилар. Ҳаммасини пок-покиза туширишди; фақат кечки овқатга бир бўлак қайнатилган мол гўшти қолди холос. Бирортаси очиқиб келса нон билан ер.

Биринчи бўлиб Жанлен ғойиб бўлди. Бебер уни мактаб олдида кутиб турганди. Улар то Лидияни тузоққа илинтиргунларича узоқ саланглаб юришди; Ашаддий кампир ўзи ҳам эшикка чиқмай, қизни ҳам бир қадам ёнидан жилдирмай ўтирганди. Қизи қочиб кетганини билиб қолган кампир қоқсуяк қўлларини силкитиб, қарғай бошлади. Бу ишлар жонига теккан Пьеррон айланиб келиш учун чиқиб кетди. Унинг кўриниши-

дан хотиним ҳам вақтини ўзича чоғ қилиб юрипти-ку, дея хотиржамлик билан айшини сураётган эр эканлиги билиниб турарди.

Кейин Ўлмас бобо кетди. Маэ ҳам аввал хотинидан мен билан айланиб келмайсанми, деб сўради-да, тоза ҳаво олиб келгани отланди; лекин хотини: жоннинг эгови бу болалардан ортиб, қаёққа ҳам борардим; балки кейинроқ, қўлим бўшаса, сени ўзим топиб оларман, деди. Маэ уйдан чиқиб, эшик олдида хаёл суриб турди-да, кейин Левак тайёр бўлдимикан-йўқмикан, дея қўшнисиникига йўл олди. Маэ у ерда Филоменани кутиб турган Захарияга дуч келди. Левакнинг хотини шу заҳоти одатдагидек тўй ҳақида гапга тушиб кетди, ахир бу қанақа хўрлик, мен ўзим хотинингиз билан очикчасига гаплашиб қўяман, деб айюҳаннос солди. Қандоқ кунларга қолдим — қизимнинг отасиз болаларини боқсам, қизим бўлса топишгани билан ўйнашиб юраверса? Филомена парво ҳам қилмай чепчигини кийди, Захария бўлса, ойим рози бўлса, ҳозироқ уйланаман, деб қизни олиб чиқиб кетди. Левакнинг ўзи уйда бўлмагани учун Маэ кампирга хотиним билан гаплашиб кўринг, дея маслаҳат берди-ю, шошиб чиқиб кетди. Бутлу тирсақларини столга қўйганча пишлоқни еб бўлаёзганди. У худди намунали эрлардек Маэнинг мен билан юр, бир кружкадан пиво ичиб келамиз, деган таклифини рад этди.

Секин-аста посёлка бўшаб қолди; эрақлар бирин-бирин кетишди, остоналарида йигитларини кутаётган қизлар эса улар келиши билан қўлтиқлашиб, қарама-қарши томонга жўнашди. Маэ черков муҳолишига бурилганида Шавални узоқдан кўриб турган Катрина бирга Монсуга бориш учун у томон ошиқди. Она қий-чув кўтарган болалари билан ёлғиз қолди; жойидан туришга ҳафсаласи келмай, яна бир стакан кофе қуйди-да, оз-оздан ҳўплаб ича бошлади. Посёлкада хотинхалажларгина қолишди; улар бир-бирларини меҳмонга чақиришиб, тушликдан сўнг ҳали йиғиштириб олинмаган, доғ-дуғ дастурхон устида кофехўрликни давом эттиришарди.

Левакнинг «Авантаж»га кетганига ишонган Маэ шошилмай Раснёрникига йўл олди. Ҳақиқатан ҳам Левак майхона ёнидаги атрофи иҳоталанган богчада

ўртоқлари билан кегли ўйнаётган экан. Ҳлмас бобо билан Мук бобо ҳам шу ерда туришарди; улар шарларни шу қадар диққат билан кузатишардики, ҳатто бир-бирларини туртиб қўйишни ҳам унуттишганди. Офтоб куйдирарди, уй ёнидагина ингичка соя қолганди. Этьен столча олдида ўтириб, пиво смирарди, ҳозиргина ўз хонасига кўтарилган Сувариннинг ташлаб кетганидан хафа эди. Машинист қарийб ҳар якшанба кунини уйини бекитиб олиб ёзар ёхуд ўқир эди.

— Уйнайсанми? — сўради Левак Маэдан.

Аммо Маэ йўқ, деди. У иссиқлаб кетган, ўлгудек ташна эди.

— Раснёр! — чақирди Этьен. — Яна бир кружка олиб кел.

Кейин Этьен Маэга мурожаат қилиб, қўшиб қўйди: — Мен меҳмон қиламан.

Энди уларнинг ҳаммаси «сенга» ўтганди. Раснёр шошмасди, уч марта чақиритишга тўғри келди. Ниҳоят, Раснёр хоним илиб қолган пиво олиб келди. Йигит овозини пасайтириб майхона эгаларидан шикоят қила бошлади: шубҳасиз, ўзлари яхши одамлар, эътиқодлари ҳам чакки эмас, аммо пиволари бир чақага ҳам арзиймайди, овқатлариям маза-матрасиз! Агар Монсугача йўли узоклик қилмаганда аллақачон уйни ҳам ўзгартирган бўларди. Лекин бари бир, эртами-кечми посёлкадан бир хонасини бериб, ўзига нонхўр қилиб оладиган бирон хонадон топиш керак.

— Унақаси албатта дуруст, — ҳар қачонгидек шошилмасдан деди Маэ, — хонадонда турсанг, ўзингга яхши бўлади.

Бирдан қийқириқ кўтарилди: Левак бир зарб билан ҳамма кеглиларни йиқитган эди. Қийқириқ кўтараётганлар орасида Мук бобо билан Ҳлмас бобогина бошларини қуйи солганича индамай маъқуллаб туришарди. Моҳирона зарб ҳазил-мутойибаларга сабаб бўлди, айниқса ихота орқасида Мукеттанинг қувноқ юзи кўриниши билан кулги-қийқириқлар авжга чиқди. Мукетта шу атрофда бир соатдан бери изғиб юрган эди, ниҳоят у кулги ва қийқириқларни эшитгич, журъат қилиб, жуда яқин келди.

— Бу қанақаси! Бир ўзингмисан?! — хитоб қилди Левак, — Жазманларинг қани?

— Жазманларимни ҳайдаб юбордим, — Мукетта қувноқлик билан жавоб берди. — Янгисини қидириб юрибман.

Ҳамма бири олиб, бири қўйиб, хизматга тайёрлигини айтар, қочириқ қилар эди. У бўлса гўё одобли қиздек уялинқираб, бошини сарак-сарак қиларди. Бу гапларни уриб йиқитилаётган кеглилардан кўзини узмаётган отаси ҳам эшитиб турарди.

— Э-ҳа!— деди Левак Этьен томонга нигоҳ ташлаб.— Кимни нишонга олаётганингни биламиз, қизалоғим!.. Лекин уни осонликча қўлга ололмайсан.

Этьеннинг кайфи чоғ бўлиб кетди. Ҳақиқатан ҳам Мукетта Этьенга разм солиб юрар, бу нарса Этьенга хуш ёқса ҳам, йигит унга илашишни асло хоҳламасди. Мукетта йирик кўзларини диққат билан унга тикиб, яна бир неча минут ихота олдида турди-да, кейин секин нари кетди, бирдан худди жазирамада қолдан тойгандек қовоғи солинди.

Этьен яна пичирлаб Маэни гапга тутди; у Монсу кўмир қазувчилари ўзаро ёрдам кассаси таъсис қилишлари лозимлигини муфассал тушунтира бошлади.

— Ширкат бизга тўла эркинлик ваъда қилгандан кейин нимадан қўрқамиз?— деди у.— Ширкат бизга ўзи хоҳлаганча нафақа беради, чунки маошимиздан ҳечам чегириб қолмаяпти. Шу боисдан ҳам Ширкатнинг мурувватига муъте бўлиб қолмаслик учун зориқиб қолганимизда ҳожатимизни чиқарадиган ўзаро ёрдам ўртоқлик кассаси ташкил этишимиз керак.

Кейин Этьен касса ташкил қилишнинг ипидан-иг-насиғача тушунтириб, бутун ишни ўз гарданига олишга ваъда берди.

— Мен-ку, қарши эмасман-а,— деди ниҳоят Маэ унинг далилларига ишонч ҳосил қилиб...— Лекин бошқалар нима деркин... Бошқаларни ишонтиришга уриниб кўр.

Левак ўйинни ютди; ўйинчилар пиво ичиш учун кеглини қўйишди. Маэ иккинчи кружкани ичмади: кейинроқ бир гап бўлар, ҳали кун узун-ку. Унинг ёдига Пьеррон тушди: у қаердайкин ҳозир? Ланфаннинг олдида, қаҳвахонада ўтирган бўлса керак. Маэ Этьен билан Левакни бирга Монсуга боришга кўн-

дирди; шу заҳотиёқ «Авантаж» кегельбаними янги ўйинчилар эгаллади.

Улар йўл-йўлакай аввал тошкўча бўйидаги Кази-мир қовоқхонасига, кейин «Тараққиёт» қаҳвахонасига киришди. Ланг очиқ эшиклар олдида турган кўмир қазувчилар уларни ўз ёнларига таклиф қилишарди, рад этишнинг иложи йўқ эди, албатта. Ҳар сафар бир кружкадан, баъзан эса икки кружкадан пиво ичишга тўғри келарди, чунки ўз навбатингда ўртоғингни ҳам меҳмон қилишинг керак эди. Улар бир-икки ҳазил-мутойиба қилишиб, ўн минутча туришарди-да, чиқиб кетишарди, чунки улар булоқ сувидек тиниқ бу пиво-ни ичиб тўймасликларини, оқибатда бари бир югуртириб оёқдан қолдиришини ўз тажрибаларидан билишарди. Дарҳақиқат улар Ланфан қаҳвахонасида энди иккинчи кружкани ичиб тугатган Пьерронни учратиш-да. Пьеррон улар билан учинчи кружкани ҳам ичди. Улар ҳам, турган гап, бир кружкадан ичишди. Энди улар улфати чор бўлишиб, Захария бормикин, дея «Ўчоқ» қаҳвахонасига йўл олишди. Залда ҳеч ким йўқ эди, улар бир кружкадан пиво буюриб, кутишга қарор қилдилар. Кейин яна «Авлиё Элоа» қаҳвахона-си борлиги эсларига тушиб қолди. У ерда штейгер Ришомм уларни меҳмон қилди, у ердан чиқишгач, ҳеч қандай баҳона қидирмай ягона мақсад — сайр қилиш ниятида майхонадан майхонага ўтиб юришди.

— «Вулқон»га бориш керак! — таклиф қилди қўқ-қисдан кайфи ошиб қолган Левак.

Бошқалар қаҳқаҳ уриб юборишди, аммо кейин, бир пас хаёл суриб туришгач, ўртоқларига ҳамроҳ бўлиш-га қарор қилиб, сершовқин, шодон халойиқ орасидан ўта бошладилар. «Вулқон»нинг тор ва узун зали тўрида тахтадан қилинган эстрада бўлиб, унда Лиллда-ги шилта фоҳишалар орасидан олиб келинган, кўйлак-лари ёқаси чуқур ўйилган бешта сатанг ашулачи жон-жаҳдлари билан қўлларини ўйнатиб қўшиқ айтарди. Агар мижоз улардан бири билан тахта девор орқаси-га ўтишни хоҳласа, ўн су тўлар эди. Бу ерда асосан юккашлар, қабул қилувчилар, ўн тўрт ёшгача бўлган болалар, — хуллас, шахтанинг ҳамма ёшлари бўларди; пиводан кўра кўпроқ қораарча ароғини ичишарди. Аҳён-аҳёнда бу ерга айрим кекса шахтёрлар — оила-

вий ҳаёт жонига теккан, зиногар эркаклар ҳам келиб қоларди.

Янги улфатлар стол атрофига ўтириб олишгандан кейин Этьен Левакнинг бошини қотириб, унга ўзаро ёрдам кассасининг тузилиши ҳақидаги фикрини тунтири бошлади. У гўё ўзининг эзгу вазифасидек ана шу янги нарсани зўр бериб тарғиб қиларди.

— Кассанинг ҳар бир аъзоси ойига йигирма судан тўлаб туради. Тўрт-беш йилдан кейин қарабсанки, мўмайгина пул йиғилиб қолади. Пул эса ҳар қандай шароитда ҳам қувват бўлади... Хўш, қалай? Сен нима дейсан?

— Мен қарши эмасман, — паришонхотир жавоб берди Левак. — Маслаҳатлашиб кўриш керак.

Узун бўйли малласоч хотин унинг эътиборини жалб этган эди, Маэ билан Пьеррон бир кружкадан пиво ичишиб, кейинги номерни ҳам кутмасдан кетмоқчи бўлишди, лекин Левак нима бўлса ҳам қолишга қарор қилди.

Ўртоқлари билан бирга чиққан Этьен худди уни кузатиб юргандек эргашиб келган Мукеттага рўбарў бўлди. У қаерга бормасин, Мукетта рўбарўсидан чиқар, йирик кўзларини тикиб жилмаярди-да, «Хоҳлайсанми?» деяётгандек бўларди. Йигит бўлса ҳазиллашиб, елкасини қисиб қўярди. Шунда Мукетта жаҳли чиқиб, қўл силтарди-да, оломон ичига кириб кетарди.

— Шаваль қани? — сўради Пьеррон.

— Ҳа-я, — деди Маэ, — «Пикетт» қаҳвахонасида бўлса керак. Қани кетдик «Пикетт»га.

Учови қаҳвахонага яқин келишаркан, шовқин-суронни эшитишди. Захария эшик олдида туриб олиб, валлонлик михчи, чорпаҳил, тепса тебранмас йигитга муштини ўқталарди. Шаваль бўлса, қўлларини чўнтагига тикиб, уларга қараб турарди.

— Мана Шаваль ҳам шу ерда экан! — хотиржамлик билан деди Маэ. — Катрина билан бирга келган.

Юккаш қиз билан унинг жазмани беш соатдан бери Монсу йўли бўйида чўзилиб кетган ярмаркада роса ўйнаб юришди. Кўча кенг бўлиб, икки қатор пастак, олақуроқ бўялган уйлар тизилиб кетганди; қуёш нурлари ёндираётган кўчада оломон худди тақир текисликда ўрмалаб юрганлар тўпидек у ёқдан-бу ёққа бо-

риб-келарди. Доимо қорайиб ётган лой қора чангга айланиб, даҳшатли булутдек кўтариларди. Кўчанинг иккала томонидаги қовоқхоналар одамлар билан гавжум, улар йўлгача қўйилган ҳамма стулларни банд қилиб ўтиришарди. Тротуардаги эшикларда ўтирган баққоллар қизларга — пешонабоғ билан ойна, эркакларга — пичоқ билан фуражка, шунингдек, қанд-қурс, конфет ва печенье олинглар, деб таклиф этишарди. Черков ёнига камондан ўқ отадиган тир қурилганди. Омборларнинг шундоққина рўпарасида шар ўйнашарди. Кўчанинг Жуазелга буриладиган жойида, Правление жойлашган уй ёнида, тахта девор орқасида хўроз уриштириларди. Иккита катта қизил хўроз жанг қиларди; уларнинг пихлари темирдек қаттиқ эди; дабдаласи чиққан томоқларидан қон оқарди. Нарироқда, Мегранинг дўкони ёнида бильярд ўйнашарди; голиблар соврин сифатида иштон олишарди. Вақт-вақти билан ҳаммаёқ сув қуйгандек жимжит бўлиб қоларди; ҳамма чурқ этмай еб ичиш билан овора бўларди. Дим ҳаводан пиво билан қовурилган картошка ҳиди келарди; шундоққина очиқ ерга қўйилган ўчоқларда овқат пиширилаётганидан иссиққа чидаб бўлмасди.

Шаваль Катринага ўн тўққиз суга ойна билан уч франкка косинка олиб берди. Улар дам-бадам Мук билан Ўлмас бобога дуч келиб қолишарди; чоллар ҳам ҳайитга келишган бўлиб, оғир оёқларини судраб, хаёл сурганларича у ёқдан-бу ёққа секин бориб-келишарди. Лекин бошқа бир учрашув уларнинг ғазабини қўзғатиб юборди: улар Бебер билан Лидияни майдон четидagi ичимлик сотиладиган дўкончадан бир шиша қорарча ароғини ўғирлашга кўндирган Жанленга дуч келиб қолдилар. Катрина укасининг гарданига бир мушт туширишгагина улгурди; қизча эса қўлидаги шиша билан қочиб кетди. Бу зумрашалар бир кун эмас, бир кун турмага тушади-да!

Улар «Довюррак» майхонаси ёнидан ўтишаётганда Шаваль маъшуқаси билан сайроқи қизилтўшларнинг мусобақасини кўриш учун қовоқхонага киришга қарор қилди; эшикларга ёпиштириб ташланган афишалар бир ҳафтадан бери одамларни бу мусобақаларга чорлар эди. Маршьяенилик ўн беш миҳчининг ҳар бири бир дўждан қафас олиб келганди: парда ўралган кич-

кинагина қафасларнинг ҳар бирида биттадан қизилтўш бўлиб, қафаслар майхона ҳовлисида деворга осиб қўйилганди. Бир соат давомида ўз навосини энг кўп марта такрорлаган қушча голиб ҳисобланарди. Ҳар бир қушчи ўзининг қафаси ёнида туриб, қуши неча марта сайраганини кўлидаги тоштахтага чизар, айна чоқда қўшнисиникини ҳам кузатарди, улар ҳам буникини текшириб борарди. Қизилтўшлар сайраша бошлади. Баъзилари паст товуш билан сайрашар, бунақаларини «қулоғи оғир» дейишади, «чинқироқ» лақабли бошқалари эса чирқираб сайрарди; аввалига ҳамма қуш аста, қўрқа-писа, тўхтаб-тўхтаб сайрай бошлади, кейин бир-бирига қизиқиб, тез-тез сайрашди, ниҳоят шу даражага етишдики, айримлари ўзини таппа ташлаб ўлиб қолаверди. Михчилар бўлса, ўзларининг валлонча лаҳжаларида уларни тезлатиб, алланималар дейишар, яна, яна, яна бир озгина сайрашни буюрарди. Қарийб юзга яқин томошабин чурқ этмай завқ билан бу қиёмат навони, бир юз саксонга қизилтўшнинг бири олиб, бири қўйиб сайрашини тингларди. Биринчи соврин — тунука чойнакни «чинқироқ»лардан бири олди.

Захария билан Филомена киришганда, Катрина билан Шаваль ўша ерда эдилар. Икки жуфт ошиқ-маъшуклар бир-бирларининг кўлларини сиқишиб, ёнмаён туришди. Ўртоқлари билан қушлар мусобақасини кўриш учун келган михчилардан бири Катринанинг сонини чимчилай бошлаганини кўриб, Захариянинг жони чиқиб кетди. Қип-қизариб кетган Катрина жанжал чиқиб, Шаваль унга ён босгудек бўлса, ҳамма михчилар унга ташланади, деб қўрқиб, акасидан индамасликни илтимос қилди. Бир эркакнинг хиралик қилаётганини сезса ҳам андиша қилиб чурқ этмай турарди. Унинг бахтига жазмани кулиб қўя қолди, шундан кейин тўртоғ кўчага чиқди, — шу билан жанжал тугайдигандек эди. Бироқ улар пиво ичиш учун «Пикетт» қаҳвахонасига киришганда, изма-из ўша хира михчи ҳам кириб, беҳаёларча ҳуштак чалиб, уларни мазах қила бошлади. Синглиси учун орияти келган Захария сурбетга ташланди. — Бу менинг синглим бўлади, ярамас тўнғиз!.. Шошмай тур ҳали! Шундай адабингни берайки, қадамингни ўйлаб босасан!

Ҳамма уларни ажратиб қўйишга тушди. Битта Шавалгина хотиржамлик билан дерди:

— Қўйсанг-чи, сени ишинг бўлмасин... Айтипман-ку сенга, тупурдим унга деб!

Шу пайт ҳамроҳлари билан чиқиб қолган Маэ йиглай деб турган Катрина билан Филоменани овутди. Ҳамма қаҳ-қаҳ уриб юборди, михчи бўлса жуфтагини ростлаб қолди. «Пикетт» қаҳвахонасини ўз уйи деб биладиган Шаваль бу можарони эсдан чиқариш учун бир кружкадан пиво ичишни таклиф қилди. Эъснга Катрина билан қадаҳ уриштиришга тўғри келди; ҳамма — ота, қиз билан жазмани, ўғли билан севгилиси биргаликда «Садоқатли улфатлар сорлиғи учун!» деб ичди. Кейин Пьеррон ҳам ҳаммани меҳмон қиламан, деб қолди. Захария ўртоғи Мукени кўриб қолиб, яна газаби тошгунига қадар ҳамма ўзини жуда яхши ҳис этаётган эди. У Мукени гўё михчидан ўч олиш учун чақирган эди.

— Бориб уни бир савалайман!.. Менга қара, Шаваль, Филомена билан Катринани сенга топшираман. Мен тез қайтаман.

Маэ ҳам ўз навбатида бир кружкадан ичишни таклиф этди. Модомики йигит синглизининг ёнини олмоқчи бўлибдими, бунинг ёмон томони йўқ. Лекин Филомена Мукени кўриб, кўнгли жойига тушди-ю, фақат бошини чайқаб қўйди. Йигитлар шунчаки «Вулқон»га кетишган бўлса керак-да.

Байрам кунлари одатда «Қувноқ» томошахонасидаги танца оқшоми билан якунланарди. Танцаларни эллик ёшли Дезир деган бева хотин уюштирарди. Бочкадек дум-думалоқ бу хотин ҳали шунчалик шўх, сатанг эдики, ҳафтанинг ҳар бир кунига биттадан ўйнаши бўлиб, ўзининг айтишича, якшанбада олтови ҳам ёнида бўларди. У ўттиз йилдан бери ичган пиволари учун миннатдорчилик юзасидан кўмирчиларни болаларим, деб атарди; у биронта ҳам юккаш менинг майхонамда танца тушмасдан туриб қорнини қаппайтирмаган, дея мақтанарди. «Қувноқ» майхонаси икки хонадан иборат бўлиб, стол билан пештахталар турган биринчиси — ичкиликхона, унга туташган, ёлғиз кенг пешток билан ажратилгани эса — базмхона вазифасини ўтар эди. Бу катта хонанинг ўртасигина тахта пол

қилинган бўлиб, атрофига эса плита ётқизилган эди. Шифтдаги бир-бирига кўндаланг қўйилган, ўртаси худди шунақа ясама гулдаста билан маҳкамланган икки даста қоғоз гул хонани безаб турарди: деворларга авлиёларнинг номлари ёзилган зарҳал тахталар қоқилган: темирчилар пири — авлиё Элоа, этикдўзлар пири — авлиё Криспина, кўмирчилар пири — авлиё Варвара — ҳаммаси майда авлиёлар. Шифт ниҳоятда паст бўлганидан шакли ва катталиги черковдаги минбарга ўхшаган супадаги уч чолғучининг боши унга тегиб турарди. Кечалари танца вақтида зални бурчакларга осиб қўйилган тўрт керосин лампа ёритарди.

Уша якшанба куни танцалар соат бешдан, кун ботмасдан анча илгари бошланганди. Соат еттига бориб, иккала хона ҳам одамга лиқ тўлди. Ташқарида кучли шамол кўтарган қора чанг тўзони кўз очиргани қўймас, ошпазларнинг товасига ёпирилар эди. Маэ, Этьен ва Пьеррон залга киришгач, Катрина билан танца қилаётган Шавални кўришди. Филомена бир ўзи уларга қараб турарди. Левак ҳам, Захария ҳам қайтиб келмади. Залда скамейка бўлмаганидан Катрина ҳар бир танцадан кейин дам олгани отаси ўтирган стол ёнига келарди. Улар Филоменани ёнларига чақиринди, лекин қиз тик туришни афзал кўрди. Қоронғи тушиб қолди. Уч чолғучи жазавага тушиб чаларди: залда умумий тўс-тўполон авжга чиққан — сонлар, кўкраклар, чирмашиб кетган қўллар қимирларди. Мана, ҳамманинг кучли қийқириғи жўрлигида тўрттала лампа ёқилди: ҳаммаёқ ёришиб, қип-қизил чехралар, тўзгиб кетган, баданга ёпишган сочлар, залга қўланса тер ҳидини таратиб учаётган юбкалар яққол кўринди. Маэ Этьенга Мукеттани кўрсатди: худди бир парча ёгдек дум-думалоқ ва семиз қиз баланд бўйли, ориққина ишчи билан зўр бериб рақс тушарди; ўз жуфтини топиб, кўнгли тинчигандек эди. Ниҳоят соат саккизларда Эстеллани кўтариб олган Маэнинг хотини пайдо бўлди: унинг орқасидан болаларининг ҳаммаси — Альзира, Анри ва Ленора ҳам келишганди. Маэ хоним эрини шу ердан топишига ишониб тўғри бу ёққа келганди. Кейинроқ овқатланишса ҳам бўлади, ҳозир ҳаммаси пиво билан кофе ичган, тўқ. Бошқа кўмир қазувчиларнинг хотинлари ҳам келишди. Маэнинг хоти-

ни кетидан Филоменанинг болалари Ахилл билан Де-зиранни етаклаб олган Бутлу ҳамроҳлигида Левакнинг хотини кириб келиши билан ҳамма шивир-шивирга тушди. Иккала қўшни хотин бир-бири билан яхши муносабатда бўлишса керак: ҳадеб бир-бирларига му-рожаат қилиб, гап қотишарди. Йўлда улар яхшилаб гаплашиб олишганди: Маэнинг хотини Захариянинг маошидан айрилиш қанчалик оғир бўлса ҳам унинг Фи-ломенага уйланишига розилик берди, бари бир энди мен бу ойликка эгалик қилиш ҳуқуқига эга эмасман, деди. Энди Маэ хоним кувноқ кўринишга уринса ҳам ичини ит тирнарди, ҳамённинг мазаси кетгач, рўзго-римга пулни қандай етказаман, деб ўз-ўзидан сўрарди.

— Қўшни, бу ёққа ўтир,— деди Маэ хоним эри Этьен ва Пьеррон билан пиво ичиб ўтирган столга ишора қилиб.

— Меники бу ерда кўринмайдими-а? — сўради Ле-вакнинг хотини.

Ўртоқлари Левак ҳозир келиб қолади, дейишди. Бутлу, болалар, ҳамма эркаклар икки столни бир қи-либ сиқилишиб ўтиришди. Пиво сўрашди. Онасини, икки боласини кўрган Филомена ҳам келиб ўтиришга қарор қилди. Филомена ўзига таклиф этилган стулга ўтирди, афтидан тўйи ҳақидаги масала ниҳоят ҳал қилинганини билиб, жуда хурсанд эди. Кейин Заха-рияни излаб қолишганда Филомена майин товуш би-лан деди:

— Мен уни кутяпман, у анави ёқда.

Маэ билан хотини рози бўлибди-да? У қовоғини уйиб, чурқ этмай чекишга тутинди. У ҳам эртанги кунни, болалари ота-оналарини муҳтож қилиб қўйиб, бирин-кетин уйланиб, эрга тегиб кетишларини ўйлаб, уларнинг бео-қибатликларидан ранжиди.

Танца давом этаётганди. Кадриль рақси оёқлаб қол-ган, бутун зални саргиш чанг тутиб кетган эди; де-ворлар зириллар, корнет-а-пистондан худди ташвишли паровоз ҳуштагига ўхшаш шиддатли, чинқирган товуш чиқарди. Рақс тушувчилар тўхташганда, улардан югу-риб келган отники сингари буғ кўтариларди.

— Эсингдами,— деди Левакнинг хотини қўшниси-

нинг қулогига, — агар Катрина бемаъ依лик қиладиган бўлса, бўғиб ўлдираман, дегандинг-а?

Шаваль Катринани уларнинг оиласи ўтирган стол ёнига олиб келди-да, икковлари ота ўтирган стул орқасида тик туриб, кружкаларидаги пиволарини ичиб тугатишга киришдилар.

— Э, шунчаки айтдим қўйдим-да!.. — жавоб берди Маэ хоним бўшашибгина. — Лекин кўнглим унинг туғишига сира ишонмайди. Мен бунга аминман!.. Худо кўрсатмасин, туғиб қўйса-ю, кейин эрга берсам-а! Унда нима қилардик?

Корнет-а-пистон «Полька»ни чалди. Яна аввалгидек шовқин-сурон бошлангач, Маэ дилидаги биттаю битта гапини хотинига айтди: бир ижарахўр олсак нима бўларкин-а? Лоақал Этьенни олсак? У ҳозир қараб турадиган одами бор уй қидириб юрипти. Жўй топилади, — ахир тез орада Захария биздан кетади; биз маҳрум бўладиган пулнинг ўрни қисман бошқа йўл билан тўларди. Маэ хонимнинг чехраси ёришиб кетди: ҳа-я, яхши фикр, шунақа қилиш керак.

Маэ хонимнинг назарида улар очлик ўлимидан яна кутулиб қолишгандек эди; яна унинг кайфи чоғ бўлиб кетди, у ҳамма учун тагин пиво буюрди.

Бу орада Этьен Пьерронга ўзаро ёрдам кассаси тузилиши ҳақидаги ўз лойиҳасини батафсил тушунтиратган эди. У Пьерронни қўшилишга тамомила ишнатириб қўйган ҳам эди-ку, бироқ эҳтиётсизлик қилиб, кассанинг чинакам вазифасини айтиб қўйди.

— Биласанми, забастовка қилгудек бўлса, касса қандай ёрдам беради? Ушанда Ширкат-пиркатинг керак бўлмайди. Курашда қоқилмаслик учун касса дастлаб пул бериб туради... Хўш, розимисан?

Пьеррон оқариб кетди, кўзларини ерга тикди.

— Ўйлаб кўраман, — гўлдиради у. — Яхши хулқ — энг яхши касса.

Бу пайт Маэ гапни айлантирмай, Этьенни уйига ижарага қўймоқчи эканлигини шартта айтди. Иигит шу ондаёқ рози бўлди: у посёлкада яшашни ва ўртоқлари билан яқиндан алоқада бўлишни жуда-жуда истар эди. Икки огиз сўз билан иш пишди қўйди. Маэнинг хотини то Захариянинг тўйи ўтгунча Этьеннинг кўчмай туришини айтди.

Шу чоқ ниҳоят Захария ҳам Мук ва Левак билан қайтиб келиб қолди. Улар ўзлари билан бирга «Вулқон»нинг ҳидини — қораарча ароғи, фоҳиша хотинлар нопок баданларига сурган ўткир атир исини ҳам олиб келишганди. Эркаклар бутунлай маст бўлиб, қилмишларидан оғизлари қулоқларига етиб, бир-бирларини тирсақлари билан туртишар, ҳиринг-ҳириң кулишар эди. Захария ниҳоят уйлантиришмоқчи бўлишганларини эшитиб, шунчалик хурсанд бўлиб кетдики, ҳатто кулгидан нафаси тиқилиб қолди. Филомена босиқ товуш билан ўзим йиғлаб юрганимдан кўра, унинг кулганини кўриш менга ёқимлироқ, деди. Бўш стул бўлмагани учун Бутлу сиқилиб, жойининг ярмини Левакка берди. Левак оила аъзоларининг барчаси жам бўлганидан қувониб кетиб, ҳаммага яна бир кружкадан пиво буюрди.

— Бунақа шодиёна жуда кам бўлади, жин урсин! — деди у бақириб.

Ҳамма соат ўнгача қовоқхонадан чиқмади. Дамбадам эрларини уйга олиб кетиш учун қидириб келган хотинлар кўриниб қоларди, оналари кетидан болалари ҳам эргашиб келарди. Оналар уялмай сули солинган қопга ўхшаб шалвираб қолган оппоқ сийналарини чиқаришарди: чақалоқларнинг лўппи юзларига сут суйкаларди; йўлга кирган, пиво ичирилган болалар эса стол тагида эмаклаб, уялмай-нетмай, бемаза ишларини қилишарди. Бсва Дезирнинг бочкасидан қуйилаётган пиво денгизи қоринларни шишириб, бурундан, кўзлардан, ҳаммаёқдан оқар эди. Тиқилинч бўлганидан ҳамма бир-бирининг елкасига, тиззасига суянганди, ана шу тирбандликнинг ўзи уларга завқ бағишларди. Тўхтовсиз кулги эшитилар, оғизлар қулоқларга етган эди. Хона хумдондек қизиб, тер қуйилаётганидан одамлар тугмаларини ечиб ташлашганди, яланғоч бадан қуюқ тамаки тутунида гўё зарҳал сурилгандек кўринарди, лекин ўриндан туриш одобсиалик саналарди. Вақт-вақти билан қизлардан биттаси ташқарига чиқар, қудуқ олдига бориб, юбкасини кўтарарди-да, яна қайтиб залга кирарди. Ёшлар азбаройи терлаб кетганларидан деярли бир-бирларини кўрмай, ранго-ранг қоғоз гул дасталари остида рақс тушишарди. Шўх болалар фурсатдан фойдаланиб, юккаш қизларни чалиб йиқити-

шарди. Борди-ю, бирон қиз йигитини ҳам судраб йиқилса, корнет-а-пистон бу йиқилишни чинқириб табрикларди, раққослар уларни босиб ўтишарди; гўё уларнинг устига бутун зал босиб тушаётгандек бўларди.

Аллаким Пьерронга, қизинг Лидия эшик тагида тротуарда ухлаб ётибди, деб қолди. Қиз ўғирлаган шишадаги қораарча ароғидан улушига текканини ичиб, шу қадар маст бўлибдики, отаси кўтариб олиб кетишга мажбур бўлди. Жанлен билан Бебер анча тетик эди, улар ўз саргузаштларидан завқланиб, ундан бир неча одим орқада боришарди. Уларнинг кетиши уйга жўнаш учун сигнал бўлди: одамлар «Қувноқ»ни тарк эта бошлашди. Маэ билан Левак посёлкага қайтиш вақти етди, деб ўринларидан туришди. Шу пайт Улмас бобо билан Мук чол ҳам Монсудан чиқиб кетишаётганди: улар жимгина хотиротларга берилиб, худди тушдагидек каловланиб боришарди. Ҳамма бирга қайтар экан, сўнгги марта ярмаркадан ўтишди. Таом пишириладиган товалар совиган, қолган пиво қовоқхоналардан йўлга жилга бўлиб оқар эди. Осмондан боягидек момақалди роқ иси келади, чироқли уйлар ортада қолди, зим-зиё далада қаҳқаҳалар янграрди. Ҳосили пишиб қолган ғаллазордан иссиқ ҳаво уфуради: бошланган кўпгина ишлар бундай кечада ниҳоясига етиши керак. Посёлкага ҳамма айрим-айрим, тўптўп бўлиб етиб келди. Леваклар ҳам, Маэллар ҳам овқат қилиб ўтиришмади; мудраб-мудраб тушликдан қолган гўштни ейишди.

Этьен яна пиво ичиш учун Шавални Раснёрникига судраб кирди.

— Ҳа, майли!— деди Шаваль ўртоғи ўзаро ёрдам кассасининг тузилиши ва вазифасини тушунтириб бергач.— Бўпти, қандингни ур, яхши йигит экансан!

Этьеннинг кайфи оша бошлади, у кўзлари чақнаб, хитоб қилди:

— Ҳа, биргалашиб ҳаракат қиламиз... Кўрдингми, ҳақ иш учун ҳеч нарса аямайман — ичкилик ҳам олиб бераман, қизларниям. Буржуаларни ёр юзидан сурпуриб ташлаймиз, деган фикрнинг ўзидан енгил тортаман.

III

Этъен августнинг ўрталарида Маэларникига кўчиб ўтди. Захария уйланиб, посёлкадаги бўш уйлardan бирига Филомена ва икки боласи билан кўчиб борди. Аввалига Этъен Катринани кўрганда, ноқулай аҳволга тушиб юрди.

Йигит доимо қизнинг яқингинасида истиқомат қилар, унинг акаси ўрнида Жанлен билан бир каравотда ётар эди. Унинг каравоти Катринанинг каравотига рўбарў эди. Этъен ётаётганида ва ўрнидан тураётганида Катринанинг олдида ечиниб, кийинарди, ўз навбатида қизнинг ҳам ечиниб, кийинганини кўрарди. Қизнинг ички юбкаси тушганида, Катринанинг ҳамма камқон малла аёлларникидек тиниқ ва қордек оппоқ баданига кўзи тушарди: юзининг ранги аввалгидек тиниқ эмасди, қўллари ҳам дағаллашганди, аммо бутун танаси товонидан бўйнигача сутдек оппоқ бўлиб, офтобда қорайган жойлари худди маржондек яққол ажралиб турарди. Этъен ҳар сафар унга қараганда ҳаяжонланарди. У ҳар гал тескари қараб олгандек кўринишга уринса-да, ҳар қалай унинг баданидан кўрмаган жойи қолмади: Этъен ерга қараганида аввал, унинг оёқларига кўзи тушарди, кейин қиз адёлга ўралиб олаётганда тиззаларини, сўнг, эрталаблари тоғорага энгашиб ювинаётганида кичик диркиллама кўкракларини кўриб оларди. Қиз унга қарамасди: у жуда шошарди, бир неча секунд ичида ечиниб, худди илондек шип этиб, кўрпа ичига кириб кетарди-да, Альзиранинг ёнига ётиб оларди; орқасини ўгириб ётгани учун Этъен ўрилган қуюқ сочларининг тугунинигина кўрарди. Бу вақт ичида Этъен ечинишга зўр-базўр улгурарди.

Аслини олганда, Катринанинг ундан нолийдиган жойи йўқ эди. Этъен баъзан тийиқсиз ҳирс васвасасига берилиб, беихтиёр қизнинг ётиш онини кутарди. Лекин у бирор ҳазил-мутойиба ё бўлмаса бирон ножоиз ҳаракат қилишдан ўзини тиярди. Ота-онаси шундоқ ёнларида; бундан ташқари Этъеннинг қизга нисбатан муносабатларида дўстлик ва пинхона алам туйғулари омихта бўлиб кетганди: улар шу қадар тиқилинчда истиқомат қилишларига, бир дастурхондан овқатланиб, шахтада бирга ишлаганлари учун энг нозик сиру

асрорларидан воқиф бўлишларига қарамай, йигит ҳирсини қондириш ҳақида ўйламасди. Оилада пайдо бўлган ягона истиҳола шу эдики, энди ҳар куни эркаклар пастда, қиз тепадаги хонада ювинадиган бўлди.

Биринчи ойнинг охирига бориб, Этьен билан Катрина гўё бир-бирларидан зиғирча ҳам уялмайдиган бўлишди. Кечқурунлари иккаласи ҳам шамларни ўчирмай ечиниб, хонада у ёқдан-бу ёққа юраверишарди. Энди Катрина шошилиб ўринга кириб кетмас, эски одатига кўра қўлларини кўтариб, ётиш олдидан соч ўримларини тузатиб ўтирарди: бундай пайтларда унинг кўйлаги кўтарилиб, сонлари очилиб кетарди. Шимини ечган Этьен эса кўпинча ерга тушиб кетган қадагичларни қидириб, унга ёрдамлашарди. Одат шарму ҳаёни йўққа чиқарганди: улар уятли бирор иш қилмаганларидан бу ҳолни мутлақо табиий деб билишарди, ахир шунча одамнинг битта хонада ётиб-туришга мажбур бўлганликларига улар айбдор эмас-ку. Шундай бўлса-да, баъзан, — уят ишни ҳаёлларига келтирмаган лаҳзаларда, — иккови ҳам негадир хижолат бўларди. Этьен бир неча кечагача қизнинг вужудини илғамай юрди, кейин бирдан Катринанинг қип-яланғоч, оппоқ баданига кўзи тушди-ю, титраб кетди ва чидолмасдан унга ёпишиб қолишдан қўрқиб, ўгирилиб олди. Баъзи оқшомлари қиз ҳеч қандай сабабсиз уялиб кетиб, худди йигитнинг қўллари уни ушлаб олаётгандек шоша-пиша кўрпа ичига кириб кетарди. Шам ўчирилганда эса чарчаган бўлишларига қарамай ухлолмасдан беихтиёр бир-бирларини ўйлаб ётганларини сезишарди. Эртасига Этьен билан Катрина худди бир-бирлари билан уришгандек, бесаранжом юришарди. Улар ҳеч ким безовта қилмайдиган шундай оқшомларда шунчаки бир-бирига ўртоқ бўлиб қолишни афзал кўришарди.

Этьен жуда бесаранжом ётадиган Жанлендангина хафа бўлиши мумкин эди. Альзира зўр-базўр нафас олар, Ленора билан Анри бўлса, кечқурун қандай ётишган бўлишса, эрталаб ҳам шундай ачомлашиб ухлашарди. Зим-зиё уйда эр-хотин Мазларнинг темирчилар босқонининг пишиллашига ўхшаш бир маромдаги хураги эшитилиб турарди. Умуман олганда, Этьен бу ерда Раснёрларникидагига нисбатан анча яхши турар-

ди: кўрпа-тўшаги ёмон эмас, чойшаб ойда бир марта алмаштириларди, овқатлари ҳам жойида, фақат гўшт-ли овқат аҳён-аҳёнда бўлади. Бироқ ҳамманинг ҳам емиши шу, ойида тўлайдиган қирқ беш франки учун ҳар куни гўшт қовурма қилиб берасан, деб талаб қилиши ҳам инсофдан эмас-да, ахир. Қирқ беш франк хонадонга анча дармон бўлди. Ниҳоят, учини учига етказиб, рўзгорни тебрата бошладилар, арзимаган қарзларгина қолди. Маэ хонадондагилар ижарачидан мамнун эдилар: кийимлари ҳамиша ювилган-таралган, ямалган-ясқалган, тугмалари тақилган, буюмлари саранжом-сариишта эди; ниҳоят Этьен аёл меҳрибонлиги туфайли озода яшайдиган бўлди.

Уша пайтларда Этьен миясида гужгон ўйнаётган фикрларнинг мағзини энди чақа бошлаганди. Шу чоқ-қача унда ўртоқларида бўғиқ жўш ураётган исёнкорлик кайфиятлари туфайли пайдо бўлган табиий ғазабгина бор эди. Олдида талайгина мавҳум муаммолар кўндаланг бўла бошлади. Нега бировлар қашшоқликда, бошқалар эса фаровонликда яшайди? Нима учун бировлар бошқаларнинг оёқлари остида азоб чекади, бу боёнларнинг ўрнини эгаллашга кўзи етмайди? Этьен дастлабки қадамлариданоқ ўзининг нодонлигини тушунди. Шу пайтдан бошлаб бир андиша, бир дарднинг ичини тирнай бошлади; у ўзини шунчалик тўлқинлантираётган нарсалар ернинг нозу неъматларини баравар тақсимлашни талаб этаётган кишиларнинг тенглиги, адолат ҳақида ҳеч нима билмас, гапиришга ҳам журъат қилолмас эди. Шунинг учун ҳам Этьен билимга ташна соддадил кишилардек зўр иштиёқ билан, гарчи системасиз бўлса ҳам, ўқиш-ўрганишга киришди. У энди социалистик ҳаракат масалаларида ўзидан анчагина саводли ва тажрибали бўлган Плюшар билан мунтазам равишда ёзишиб турди. Йигит китоблар ёздириб олиб ўқий бошлади, лекин яхши ўзлаштира олмасди; аммо жудаям берилиб ўқирди. Этьенни айниқса «Кўмир қазувчилар гигиенаси» деган тиббий китоб ҳайратга солганди; муаллиф, бельгиялик врач унда тошкўмир конларидаги халқни қираётган ҳамма касалликларни келтирганди. Кейин Этьен қуруқ, техника тилида ёзилгани учун тушунилиши қийин бўлган жуда кўп сиёсий иқтисод китобларини, ўзини йўл-

дан урган анархистларнинг рисолаларини, битта-яримта билан тортишиб қолса, рад қилиб бўлмайдиган далилларга эга бўлиш учун сақлаб юрган эски газеталарни ўқир эди. Суварин ҳам уни китоблар билан таъминларди. Эъён кооператив жамиятлар ҳақидаги китобларни ўқиб, пуллар бекор қилиниб, бутун ижтимоий тузум меҳнатга асосланган жаҳон айрибошлаш уюшмаси тўғрисида бир ойгача хаёл суриб юрди. Эъён ўзининг нодонлигидан уялмай қўйди; энди, у фикрлашга ўргангач, унда ифтихор ҳисси пайдо бўлди.

Дастлабки ойларда Эъён янги мазҳабни қабул қилган йигитдек керилиб юрди. Унинг қалби золимларга қарши олижаноб нафрат билан лиммо-лим эди, у келгусида эзилганлар тўла галаба қилади, деган умид билан яшарди. Ўқишида бирор тартиб бўлмагандан кейин, албатта, унда аниқ дунёқарашнинг шаклланиши ҳақида гап бўлиши мумкин эмасди. Унинг миясида Раснёрнинг амалий талаблари билан Суварин тартиб қилаётган зўравонлик ва йўқотиш ғоялари аралашиб кетганди. Улар ҳар куни йиғилишиб олиб Ширкатни сўкадиган «Авантаж» майхонасидан чиқаркан, Эъён худди туш кўраётгандек келарди: назарида халқлар кўз олдида емирилишларсиз, қон тўкишларсиз тубдан қайта туғилаётгандек бўларди. Лекин бу нарса қандай воситалар орқали амалга ошишини тушуна олмасди. Ҳамма иш сип-силлик, яхши боришига ишонгиси келар, аммо жамиятни қайта қуриш режасини тузишни ўйлай бошлаши биланоқ ҳар сафар довдираб қоларди. У ҳатто мўътадил ва ноизчил фикрларни айтар, баъзан ижтимоий масалаларни ҳал қилишда сиёсатни мутлақо аралаштирмаслик керак, дер эди. Бу жумлани у қаердадир ўқиган ва доимо лоқайд кўмир қазувчилар билан суҳбатда уни такрорлашни яхши кўрарди.

Энди Маэлар ҳар оқшом одатдагидан ярим соат кеч ётадиган бўлишди. Эъён яна ўша гапни бошлаган эди. Эъён ўсган сари посёлкада ҳукм суриб келаётган ёши ва жинсидан қатъий назар тартибсиз яқинлик ҳақорат бўлиб туюла бошлади. Нима, улар молмидиларки, даланинг ўртасидаги қўшоққа қўшиб қўйишипти, қўшнингга орқангни кўрсатмай қўйлагингни ҳам кия олмайсан! Тиқилинча қизлар билан йигитларнинг тез бузилиб кетишлари, ахир бу — соғлиққа зиён-ку!

— Ҳа, ҳақ гап! — жавоб берди Маэ. — Пул кўп бўлганда-ку яхши яшардик-а... Ҳа энди, албатта, одамларнинг тиқилиб яшашлари кимга ҳам хуш келарди, бу гапинг рост. Эркакларнинг ичкиликбозлик қилишлари, қизларнинг эса ҳомиладор бўлиб қолишлари шундан.

Суҳбатда хонадоннинг ҳамма аъзоси қатнашар, ҳар ким ўз гапини қистириб қоларди. Керосин чироқ пиёздоғ ҳиди тутиб кетган уй ҳавосини заҳарлар эди. Йўқ, нимасини ҳам айтасиз, кун кўриш қийин бўлиб қолди. Эшакдек ишлайсан, ҳам илгарилари оғир жазо олган каторгачилар бажарадиган ишни қиласан; тириклайин терингни шилиб олишади-ю, яна қозонинг гўшт кўрмайди. Тўғри, очдан ўлмайсан, лекин шунчаки очдан ўлмайдиган даражада ейсан — кўп ҳам эмас, оз ҳам эмас; қарзга ботиб кетасан, гўё ўз нонингни ўзинг ўғирлагандек, сени таъқиб қилиб юришади. Яқшанба бўлса, азбаройи чарчаганингдан ўриндан туролмайсан. Бирдан-бир дилхушлигинг — ё ўлгудек ичиб маст бўлиш, ё бўлмаса, хотининг билан ётиб, яна битта бола орттириш. Иннанкейин пиво ҳам қорнингни шишириб юборади, болалар катта бўлса, башарангга тупуради. Йўқ, йўқ, кўрган кунинг ғам-ғурбат!

Шунда Маэнинг хотини гапга аралашди:

— Ҳаммадан ёмони шуки, юз ўйлаганинг билан ҳеч нимани ўзгартиролмайсан. Ешлигингда ахир бир кун бахт кулиб боқар, деб хаёл қиласан, нимагадир умид боғлайсан; кейин кўрасанки, муҳтожликдан бошинг чиқмайди, ундан қутулишнинг иложи йўқ... Мен бировга ёмонликни раво кўрмайман-у, лекин бу адолатсизликлар мени ҳам тўйдириб юборади.

Орага сукунат чўкди. Ҳамма бу қашшоқликдан қутулиш йўли йўқлигини ҳис қилиб, аламдан зардоб ютарди. Елғиз Улмас бобогина уйда бўлса, ҳаммага ҳайрон бўлиб қарарди, чунки унинг замонида бунақа тортишувлар бўлмасди. Одамлар кўмир ичида туғилиб, кўмир қатламларини кўпориб, ҳеч нарса талаб қилмай ўтиб кетаверишарди; энди бўлса кўмир қазувчиларга жасорат бахш этувчи шамоллар эсиб қолибди.

— Э, ҳаммасига тупурдим,— мингиллаб қўярди у,— бир кружка яхши пиво яхшилигича қолаверади... Бошлиқларнинг бари ҳам аблаҳ албатта, аммо бошлиқ

ҳамиша бўлади-ку, шундай эмасми? Бошларингни қотириб ўтирманглар.

Этён шу заҳоти қизишиб кетди. Бу қанақаси! Ишчи мулоҳаза юритмасинми? Йўқ, буларнинг ҳаммаси ҳадемай ўзгаради, — ишчи энди баъзи нарсаларни тушуна бошлади. Эски замонларда шахтёр умр бўйи ер остида, қонда молдек яшаб, кўмир қазийдиган машинадек ишлаган, атрофда нималар бўлаётганини кўрмаган, эшитмаган. Шунинг учун ҳам корчалони бойлар кўнгилларига келганини қилишган, ишчини сотишган ҳам, сотиб олишган ҳам, кейин унинг терисини шилишган, — ишчининг ўзи эса нима қилишаётганини билмаган ҳам. Энди эса ўша кўмир қазувчи ер остида уйғоняпти, уруғдек туп қўйиб, ниш уряпти; бир куни келиб у ер юзига ёриб чиқади! Ҳа, адолат ўрнатадиган одамлар, талай лашкарлар етилиб келяпти. Ахир революциядан кейин одамларнинг ҳаммаси баробар бўлиб қолишмадимми? Ҳамма сайловда тенг ҳуқуқли бўлганидан кейин нега энди ишчи пул тўлайдиган хўжайинига қул бўлиб қолиши керак? Йирик жамиятлар ўз машиналари билан ҳаммани эзиб ётибти, илгарилари бир касбдаги кишилар цех бўлиб бирлашиб ўзларини қандай ҳимоя қилишни биларди, ҳозир эса бундай қилишлар ҳам йўқ. Мана шу туфайли ҳам, эҳ, жин урсин, яна бошқа важлар туфайли ҳам, ҳаммаси қулаб тушади, бу эса ишчилар саводли бўлгандан кейин рўй беради. Масалан, шу посёлкани олайлик: боболаримиз отларини ёзишни ҳам билишмасди, оталаримиз бўлса имзо чекадиган бўлишди, уларнинг фарзандлари ўқиш-ёзишда олимлардан қолишмайди. Ҳа, ҳаммаси ўсяпти, секин-аста камол топиб боряпти; одамлар қуёшда бўлиқ экиндек етиляпти! Умрбод боғланиб қолган жойларидан озод бўлганлари ҳамон агар истасалар, қўшнилариинг ўрнини эгаллашга кўзлари етса, уларда кучли бўлиш учун нега муштумларини ишга солиш истаги туғилмасин?

Бунақа гаплардан таъсирланган Маэ ҳар қалай иккиланарди.

— Сал қимирладингми, бўлди, паттангни қўлингга тутқазишади, — деди у. — Чол ҳақ: кўмир қазувчилар умрбод қийналиб ўтадилар, бунинг эвазига ҳатто тўйиб овқат ея олмайдилар.

Унинг хотини чурқ этмасди. Энди у гўё уйқудан тургандек эди.

— Агар попларнинг гапи рост бўлса, қашшоқлар нариги дунёда бой бўлишармиш!

Қаттиқ қаҳқаҳа унинг гапини бўлиб юборди; болалар ҳам слкаларини қисиб қўйишди. Ишончсизлик кайфияти ҳаммага таъсир қилганди; тўғри, ичларида улар шахтадаги арвоқлардан қўрқишса ҳам ҳеч нарса си бўлмаган осмонни эрмак қилишарди.

— Эҳ, поплари тушмагур-ей! — хитоб қилди Маэ. — Агар шу гапларига ўзлари ҳам ишонишганда эди, осмондан яхшироқ жой олиш учун оз еб, кўпроқ ишлар эдилар... Йўқ, пешонанга нима ёзилган бўлса, шу бўлади.

Хотини оғир хўрсиниб қўйди.

— Э, худойим-эй, худойим-эй!

У қўлларини тиззасига ташлади-да, жуда маъюсла-ниб, қўшиб қўйди:

— Демак, ҳаммамизнинг ҳолимизга войлиги рост экан-да.

Ҳамма бир-бирига қараб қўйди. Ўлмас бобо даст-рўмолига туфлади. Маэнинг ўчиб қолган трубкаси оғзида эди. Альзира столга суяниб ухлаб қолган Ленора билан Анри орасида ўтириб, бу гапларга қулоқ соларди. Катрина бўлса, иягини қўлига қўйганча бўлажак ижтимоий жаннатнинг ғаройиб оламини завқланиб, комил ишонч билан унга очиб бераётган Этьендан йирик кўкиш кўзларини узмас эди. Посёлкада ҳамма уйқуга кетган. Фақат баъзи жойлардан боланинг йиғиси ёки кечикиб қолган мастнинг сўкиши эшитиларди. Ҳоҳада-ги соат шошилмай вақт ўтаётганини билдириб турарди. Уй дим бўлишига қарамасдан қум сепилган ердан ёқими нам ҳовур кўтариларди.

— Утакетган бемаънилик бу! — давом этди йигит. — Бахтли бўлишларинг учун шу жаннат билан худо албатта кераки? Нима, бу дунёдаги бахтларингни ўзларинг ярата олмайсизларми?

У жўшқин, узоқ гапирди. Унинг гаплари нажот-сизлик доирасини ёриб, бу камбағалларнинг зим-зиё ҳаётига нур сочгандек бўлди. Аввал терисини шилиб, кейин ўлдириладиган мол қисматидадан баттар мангу

қашшоқлик, қулларникидек оғир меҳнат — ҳамма фалокат гўё қуёшнинг ёндирувчи нурларида куйиб, қаёққади қойиб бўлганди; адолат сеҳрли ёғду бўлиб кўкдан тушгандек эди. Худо йўқ бўлгандан кейин, одамларга бахт-саодатни адолат беради, ер юзида тенглик ва биродарлик барқарор бўлади. Кўз юмиб очгунча янги жамият бунёд этилди, худди тушдагидек ҳар бир одам ўз меҳнати билан яшайдиган, умумий шодликда ўз ҳиссаси бор, таърифга сизмайдиган, ажойиб бир гўзал шаҳар қад кўтаргандек бўлди. Эски, чиркин дунё кунпаякун бўлиб, унинг ўрнига жиноятлардан холи бўлган ягона ишчи халқидан ташкил топган ҳар кимнинг хизматига яраша, хизмати эса меҳнати билан белгиланади, деган шиор билан чиққан ёш инсоният пайдо бўлди. Бу орзу кун сайин кучайиб, имконият доирасидан чиққан сари гўзаллашиб, қизиқарли бўлиб борарди.

Маэнинг хотини аввалига бу гаплардан капалаги учиб, эшитишни ҳам хоҳламади. Йўқ, йўқ, бу орзулар жудаям яхши, лекин бунақа фикрларга берилиш керак эмас: кейин шу кунинг ҳам шундай ёмон кўриниб қоладики, бахтли бўлишинг учун ҳамма нарсадан воз кечасан. Эрининг кўзлари чақнаб, бу гапларга ишониб, ҳаяжонланаётганини кўрган Маэ жоним ташвишга тушиб, шанғиллаб, Этьеннинг гапини бўла бошлади:

— Унинг гапига кирма, чол! Буларнинг ҳаммаси чўпчаклигини билмаяпсанми?.. Наҳотки буржуалар ҳам бир кун эмас, бир кун бизга ўхшаб ишлашга кўнса?

Лекин секин-аста у ҳам Этьен гапларининг сеҳрига берилди. Ниҳоят у жилмайиб, ширин хаёлларга чўмди-да, ўзини ажиб орзу-умидлар оламида кўрди. Бу қайғули ҳаётни бир соат бўлса ҳам унутиш қанчалик нашъали! Шуларга ўхшаб чўчқадек тумшуғинг билан ер ковлаб ҳаёт кечириб юрганингда ўзинг умрбод эриша олмайдиган нарсаларни орзу қилиб, бир лаҳза бўлса ҳам ором олиш керак-да. Ҳаммасидан кўпроқ уни адолат ҳақидаги фикр қизиқтириб қолганди, бу масалада у йигитнинг гапларига тамомила қўшилди.

— Ҳа, рост-да! — хитоб қилди у. — Адолат учун мен ҳеч нарсадан қайтмайман... Тўғриси айтганда,

бизлар ҳам бундоқ бошқаларга ўхшаб яшасак бўларди энди.

Бу гаплардан кейин Маэ жўшиб кетди.

— Жин урсин! Бой бўлмасам ҳам шундай кунга етиш учун жон-жон деб юз су берардим!.. Роса ағдар-тўнтар бўлади-да, а! Тезроқ бўлармикин, қандай бўларкин?

Этъен яна гапга тушиб кетди. Эски жамиятнинг путури кетди: нарисни билан икки-уч ойга боради, ортиқ эмас, деб ишонтирарди Этъен. Лекин буни амалга ошириш йўллари ҳақида дудмал қилиб гапирарди. Уқиганлари бошини говлатиб юборган, гарчи ўзи яхши англаб олмаган бўлса ҳам бу гумроҳларга ақл ўргатишдан қўрқмас эди. У, агар баъзи каллаварам хўжайинлар билан буржуаларни ҳисобга олмаса, синфий зиддиятларга барҳам берадиган оламшумул тўфоннинг тезда ғалаба қозонишига хизмат қиладиган ҳамма системаларни маъқуллаб, бирма-бир баён қилиб берди. Эҳтимол, куч билан бу хўжайин ва буржуаларнинг эсини киритишга тўғри келар. Маэ назарида булар шундай ажиб бир тарзда ҳал бўлишини ҳамма тушунаётгандай, маъқуллаётгандек бўлар, ҳамма шундай деб ўйлаётгандек туюларди. Одамлар христианликнинг биринчи асрида қадимги дунё харобалари ўрнида дарҳол янги ва мукамал тузум пайдо бўлиб қолишини қандай кутишган бўлса, булар ҳам шу гапларга худди янги мазҳабни қабул қилган кишилар каби кўр-кўрона ихлос билан ишонардилар. Кичкинагина Альзира ҳам луқма ташлаб, умумий суҳбатга аралашарди; унинг тасавурида бахт деган нарса болалар хоҳлаганча еб-ичиб, ўйнаб-куладиган иссиққина уй шаклида намойи бўларди. Катрина ҳамон қўлини иягига тираб, Этъендан кўзини узмасдан қимир этмай ўтирарди. Йигит гапдан тўхташи билан қизнинг ранги ўчиб, худди совуқ егандек сал титради.

Шу чоғ Маэнинг хотини соатга қараб деди:

— Росаям ўтирибмиз-ку, соат ўн бўляпти! Бундай ўтираверсак, эрталаб сираям тура олмай қоламиз.

Ҳаммалари диллари гаш бўлиб, умидсизликка тушиб, ўрнларидан туришди. Назарларида улар ҳозиргина бой-бадавлат бўлиб, бирданига яна қашшоқлашиб қолгандек эдилар. Ўлмас бобо шахтага йўл оларкан,

бу сафсаталар ошингга маза киритармиди, дея вайсар эди, бошқалар эса зах деворларга қараб, қўланса, нохуш ҳавони ичларига ютиб, гоз юриш билан юқорига чиқиб кетишди. Юқори хонадагилар қаттиқ уйқуга кетганида, Этьен қулоқ солди: Катрина энг кейин ётди; қиз шамни ўчиргач, у ёқдан-бу ёққа ағдарилиб аллавақтгача ухлолмади.

Бунақа суҳбатларга баъзан қўшнилар ҳам чиқишарди. Мол-мулк бўлганини эшитган Левак жонланиб кетар, Пьеррон бўлса, Ширкатга ҳужум бошланиши билан, андиша қилиб ухлагани кетарди. Баъзан Захария ҳам кириб, бир-икки минут ўтирарди; лекин сиёсат жонига тегиб, «Авантаж»га бориб бир кружка пиво ичганим яхши, дея жўнаб қоларди. Шавалга келганда эса, у қуруқланиб, ҳаммадан ошиб тушар, барчасини қириб ташлашни талаб этар эди. У қарийб ҳар оқшом бир соатча вақтини Маэларникида ўтказарди: унинг қадам канда қилмаслигидан ичида қизганаётгани, Катринани битта-яримтаси илиб кетмасин, деб қўрқаётгани сезилиб турарди. Шавалнинг кўнглига сал-пал урган қиз энди, хоҳлаган пайтида бир нарсани қилиши мумкин бўлган эркак билан бир хонада ёта бошлагандан бери унга азиз бўлиб қолганди.

Этьеннинг таъсири кучайиб бораверди. У секин-аста бутун посёлкада кураш руҳини уйготди. Этьеннинг ҳурмат-эътибори одамлар ичида кун сайин ортаётганлиги бу пинҳона тарғиботнинг муваффақиятли олиб борилишига сабаб бўлаётган эди. Умуман одамларга ишонмайдиган Маэ хоним, эҳтиёткор бека, ижара ҳақини ўз вақтида тўлаб келаётган бу йигитни ҳурмат қиларди. У ичкилик ичмасди, карта ўйнамасди, ҳамиша китоб ўқиб ўтиради. Маэ хоним саводли йигит, дея бутун округга унинг донғини чиқарганди. Қўшни хотинлар бундан фойдаланиб, тез-тез ундан мактуб ёзиб беришни илтимос қилишарди. Этьен уларнинг ишончли кишиси бўлиб қолди; турли хатлар ёзиб бериш унинг бўйнида эди, нозик оилавий масалаларда ҳам у билан маслаҳатлашишарди. Ниҳоят, сентябрь ойига келиб у талай гапга сабаб бўлган ўзаро ёрдам кассасини таъсис қилишга муваффақ бўлди. Ҳозирча касса унча бақувват эмасди — унга фақат посёлка аҳолисигина

аъзо эди; лекин Этьен ҳозирча ўзини четга тортиб турган Ширкат агар кейинчалик халақит бермайдиган бўлса, ҳамма конларнинг кўмир қазувчиларини ҳам жалб қилмоқчи эди. Уни союзнинг секретари қилиб сайлашди ва ҳатто ёзув-чизув ишларини бажаргани учун бир оз маош ҳам тайинлашди. Этьен ўзини бой бўлиб қолгандек ҳис қиларди. Бола-чақали кўмир қазувчи учини-учига етказиши қийин, лекин бўйдоқ, камтар, ҳеч қандай ташвиши бўлмаган йнгит бир оз маблағ жамғариши ҳам мумкин эди.

Шу орада Этьен анча ўзгарди. Энди қашшоқлик йилларида бўғилиб ётган олифтагарчилик, бойликка ҳирс майллари уйғонди. У мовут костюм сотиб олди, юпқа чармдан ботинка буюрди ва шу тариқа бутун посёлка атрофига тўпланадиган бошлиққа айланди. Унинг иззат-нафси қониққанди. У машҳурликнинг дастлабки қувончларидан маст эди: кечагина юккаш бўлган ёшгина йнгит бугун шахтёрлар бошлиғи бўлса, уларга амр-фармон қилиб турса! Бу нарса унинг ғурурига ғурур қўшар, ўзи муҳим роль ўйнайдиган бўлажак инқилоб ҳақида янада жўшқинроқ хаёл суришга ундар эди. Ҳатто унинг чеҳраси ҳам ўзгарди; у анча виқорли, ўз нутқидан ўзи маст бўладиган бўлиб қолди; унда пайдо бўлган шухратпарастлик ёндириб, уни курашиш фикрига солиб қўйди.

Бу орада куз яқинлашди: октябрь совуқлари посёлкадаги боғчаларга сарғайган барглар тўшади. Энди ўспиринлар юккаш аёллар билан яккам-дуккам сирень буталари орқасига уриб кетишмасди; жўякларда кечки экинлар — қиров босган карам, порей* ва салат** ларгина қолганди: яна жала ёғиб, қизил черепицали томларни тақирлатарди, тарновлардан шариллаб оқиб, ёғоч бочкаларга тушарди. Уйлардаги тўлатилган кўмир печкалар бурқсиб ёниб, ҳаммаёғи ёпиқ хоналарнинг ҳавосини заҳарларди. Қаттиқ муҳтожлик кунлари етиб келди.

Октябрнинг дастлабки аёзли кечаларидан бирида суҳбатдан қизишиб кетган Этьен аллавақтгача ухлай олмай ётди. У Катринанинг кўрпа орасига сирганиб

* сербар баргли бир хил пиез.

** овқат юзига солинадиган кўкат.

кириб, шамни пуфлаб ўчирганини кўрди. Афтидан қиз ҳам ҳаяжонланган эди: баъзан у ҳам шарм-ҳаё босганидан апил-тапил счинарди-ю, билмай қолиб ҳаммаёғи бадтар очилиб кетарди. Қоронғиликда қиз мурдадек ётарди, лекин Этьен унинг ухламаётганини сезарди, ўзи қизни ўйлаганидек у ҳам буни ўйлаётганига ишонарди: дилдаги бу яқинлик уларни шу чоқ-қача бунчалик ҳаяжонлантирмаганди. Минутлар кетидан минутлар ўтиб борар — аммо на у, на бу қимир этарди; ўзларини ҳар қанча босишга қарамай бир-бирларидан қисиниб нафас олаётганликлари эшитилиб турарди. Этьен икки марта ўрнидан туриб, қизни қучоқлаб олишига сал қолди. Иккови бир-бирига шунчалик талпиниб турса-ю, эҳтиросларини қондира олмаса, бундан ортиқ бемаънилик ҳам борми?! Истак билан курашишнинг нима кераги бор? Болалар ухлашяпти, қиз ҳам, албатта, уни орзиқиб, нафасини ичига ютиб кутяпти, мана у ҳозир тишларини қисиб, индамай қучоқлаб олади. Орадан бир соатча вақт ўтди. Этьен унинг олдига бормади. Катрина уни чақиришдан қўриқиб, ўгирилмади ҳам. Улар қанчалик кўп ёнма-ён яшасалар, орадаги шарм-ҳаё, адоват, дўстона тортишчоқлик тўсиғи тобора баланд кўтариларди, — буни уларнинг ўзлари ҳам тушунтириб беролмасдилар.

IV

— Менга қара, — мурожаат қилди хотини Маэга, — ойлик олгани Монсуга борадиган бўлсанг, ўшогдан бир қадоқ кофе билан бир кило қанд олакел.

Маэ бошмоғини ямоқчига бермаслик учун ўзи тикаётган эди.

— Яхши! — деди у ишдан бошини кўтармай.

— Яна қассобга ҳам учрашгин... Бир парча бузоқ гўштидан оласанми, а? Анчадан бери гўшт кўрганимиз йўқ.

Маэ бошни кўтарди.

— Сен бу юзлаб, минглаб олади, деб ўйлайсан, шекилли... Кейинги икки ҳафта ичи ишнинг мазаси бўлмади, — лаънати бекор туриб қолишлар ишнинг белига тепди.

Икковлари жим бўлиб қолишди. Бу гап октябрнинг

охирги шанба кунларидан бирида нонуштадан сўнг бўлиб ўтган эди. Ширкат ишчилардан ўч олиш учун пул қийинчиликларини баҳона қилиб, ўша кун ҳамма шахталарда кўмир қазини яна тўхтатганди. Яқинлашиб келаётган саноат кризиси ваҳимасидан талвасага тушган, шундоқ ҳам тўпланиб қолган кўмир запасларини кўпайтиришни хоҳламаган Ширкат ҳар бир имкониятдан фойдаланиб, ўн минг кишилик кўмир қазувчилар армиясини яна бир кун бекор юришга мажбур қилар эди.

— Биласанми, Эъён сени Распёрникида кутиб турипти,— давом этди Маэ хоним.— Уни бирга олиб кетақол. Ишлаган вақтларимизга ҳақ ёзмаган бўлишса, у бир пложини қилади.

Маэ маъқуллаб бошини қимирлатиб қўйди.

— Айтгандай, ўша хўжайинлар билан чол масаласини гаплаш. Врачнинг ҳам маъмурият билан тили бир... Тўғрими, отажон, доктор янглишиши мумкин, сиз ҳали ишлай оласиз, а?

Ўлмас бобо ўн кундан бери стулга михлаб қўйилгандек, ўз ибораси билан айтганда, «панжалари увишиб» қолган эди. Маэ хоним саволини қайтарди, шундагина чол тўнғиллаб қўйди:

— Ўз-ўзидан маълум, ишлайман, албатта. Одамнинг оёғи оғриса, ҳаммаси тамом бўлди дегани эмаску, ахир. Менга бир юз саксон франк пенсия тайин қилишдан қочиб, ҳар қандай бўлмагур гапларни бичиб-тўқишади-да.

Маэ хоним, эҳтимол, чол олиб келиб берадиган қирқ судан энди бутунлай маҳрум бўлишини ўйлаб, зорланиб деди:

— Вой худойим-ей! Иш шу алпозда кетадиган бўлса, ҳадемай ҳаммамиз ўламмиз-ку.

— Ўлганинда овқат ҳам егинг келмайди,— деди Маэ.

У бошмоғига яна бир неча мих қоқди-да, кетди. Икки юз зағизгон посёлкаси ойликни соат тўртларда олиши керак эди. Шунинг учун ишчилар шошмай, ҳар ерда тўхтаб-тўхтаб бирин-кетин боришарди. Хотинлари улар кетидан, тезда уйга қайт, дея ёлвориб боришарди. Кўплари эрим қовоқхонада ўтириб қолмасин, дея ҳар нарсани тайинлаб юборишди.

Эъен Раснёрникада талайгина янгилик эшитди. Ваҳимали мишмишлар юрипти: айтишларича, Ширкат борган сари тирговичлар қўйилишидан норози бўлаётган эмиш. Ишчиларга жарима солишди, тўқнашув муқаррар бўлиб қолди. Аслини олганда, бу бир баҳона эди, бунинг замирида талай сирли ва муҳим сабаблар яшириниб ётарди.

Эъен қовоқхонага кирганида, пиво ичиб ўтирган ўртоқларидан бири, ҳозиргина Монсуда бўлганини, кассирнинг тепасига бир эълон осиб қўйилганини, аммо унда нима ёзилганини яхши англаб етолмаганини айтди. Кейин иккинчи, учинчи ўртоқ кирди: ҳар ким бирор янгилик айтарди. Аммо бир нарса равшан эди: афтидан, Ширкат қандайдир қарорга келганга ўхшарди.

— Хўш, сен нима дейсан? — сўради Эъен, олдида бир қути тамакидан бошқа ҳеч нимаси йўқ Суварин столига ўтиб ўтираркан.

Машинист шошмай тамаки ўрарди.

— Ростини айтсам, шундай бўлишини олдиндан билиш мумкин эди. Улар сизларни ҳақларингга таянтиради.

Булар ичида фақат Сувариннинггина юз берган вазиятга ақли етарди. У одатдагидек хотиржамлик билан аҳволни тушуңтира бошлади. Кризисга учраган Ширкат беихтиёр чиқимларни қисқартириши керак, бўлмаса хопавайрон бўлади. Бунинг жабрини ишчилар тартади, албатта. Ширкат маошни камайтириш учун турли-туман найранглар ўйлаб чиқаради. Мана икки ойдан бери кўмир шахта омборларида қимирламай турибди, қарийб ҳамма заводлар ишни тўхтатган. Лекин Ширкат конлар ишдан чиқиши мумкинлигидан ҳадиксираб, кўмир қазини тўхтатишга журъат қилолмайди; у бошқа воситаларни ўйлаяпти,— эҳтимол, ҳатто забастовкалардан ҳам фойдаланса ажаб эмас: бу ҳол кўмир қазувчиларнинг попугини пасайтириб, уларни оз ҳақ олиб ишлашга мажбур қилади. Ниҳоят, Ширкат янги ўзаро ёрдам кассасидан ташвишга тушиб қолди; касса келажакда Ширкатни таҳликага солади,— забастовка эса кассани қуритиб, унинг тагига сув қуяди, чунки ҳали кассанинг пули кам.

Раснёр Эъеннинг ёнига ўтирди. Иккови ташвишла-

ниб, Сувариннинг гапларини эшитарди. Қовоқхонада пештахтанинг у томонида гимираб юрган Раснёр хонимдан бошқа ҳеч ким бўлмагани учун баралла гапириш мумкин эди.

— Бу қанақа гап бўлди! — деди қовоқхоначи, — Нима кераги бор бунинг? Ширкат забастовкадан умуман манфаатдор эмас, ишчиларга ҳам керак эмас. Келишилгани яхши.

Мана бу оқилона фикр эди. Раснёр ҳамisha оқилона талаблар тарафдори эди. Собиқ ижарачиси тез орада машҳур бўлиб кетганини кўрган Раснёр секин-аста тараққий этиш ғоясини тарғиб қилишга зўр берди: ҳаммасини бирданига олишмоқчи бўлганлар одатда ҳеч нимага эга бўла олмайдилар, дерди у. Ичи пивога тўлган бу семиз, хушмуомала бўлишига қарамай, дўкони кўпинча ҳувиллаб туришидан, Ворё ишчиларининг пиво ичиш ва унинг гапларини эшитиш учун кам келишаётганидан ичида зил кетар эди; шу боисдан баъзан ишдан ҳайдалган шахтёр сифатида Ширкатга нисбатан қалбида яширини ётган эски адоватини унутиб, уни ёқлаб ҳам қўярди.

— Бундан чиқдики, сен забастовкага қарши экансан-да? — қичқирди Раснёр хоним пештахтанинг нарғидан.

Раснёр қатъий қилиб «ҳа», деди. Шунда хотини эрига ёпишиб кетди:

— Эҳ! Сенда юрак деган нарса йўқ ўзи. Манави жанобларнинг гапларига қулоқ сол.

Олдига қўйилган кружкадаги пивога тикилганича хаёл суриб ўтирган Этъен ниҳоят бошини кўтарди.

— Ўртоғимиз айтган гапларининг ҳаммаси бўлиши эҳтимолдан холи эмас. Бизни мажбур қилгудек бўлсалар, забастовкадан бошқа иложимиз йўқ... Плюшар ҳам менга худди шу ҳақда ёзади, жуда тўғри айтади. У ҳам забастовкага қарши: ундан хўжайинлар билан бирга ишчиларнинг ўзлари ҳам азият чекишади-ю, аммо ҳеч вақога эга бўлишмайди. Лекин Плюшарнинг фикрича, забастовка одамларимизни катта ташкилотга киришга ишонтирувчи энг яхши воситадир... Ҳа, мана унинг хати.

Ҳақиқатан ҳам Монсу шахтёрларининг Интернационалга ишонмаганликларидан ранжиган Плюшар

улар бирор можаро бўлиб, Ширкатга қарши кураш бошласалар, ҳаммалари Интернационалга дарҳол аъзо бўлиб кирадилар, деган умидда эди. Этьен ҳарчанд уринса ҳам Интернационалга ҳеч кимни торта олмади; дарвоқе, бунинг сабаби ишчилар жон деб кира бошлаган ўзаро ёрдам кассасини яхши йўлга қўйиш учун бутун таъсирини ўтказишга ҳаракат қилганида бўлса керак. Лекин касса шу қадар қашшоқ эдики, Сувариннинг фикрича, унинг маблағи тезда тамом бўлиши керак; ана ундан кейин ишчилар ўз биродарлари — бутун дунё ишчиларидан ёрдам олиш учун ишчилар Уртоқлиги ташкилотига ёпишишлари муқаррар.

— Кассаларингда қанча пул бор? — сўради Раснёр.

— Уч минг франкка яқин, — жавоб берди Этьен. — Биласизларми, учинчи куни маъмурият мени чақирди. Улар ниҳоятда тавозе билан кутиб олишиб, менга, ишчиларнинг омонат фонди тузишларига қаршилиқ қилмаймиз, дейишди. Лекин улар бу фондни назорат қилиб туриш ниятида эканликларини билиб турибман... Нима бўлганда ҳам биз ҳужумга бардош беришимиз керак.

Қовоқхоначи жирканчли хуштак чалиб, у бурчакдан-бу бурчакка юра бошлади. Уч минг франк! Шу пул билан узоққа бориб бўларканми? Ноннинг ўзига бир ҳафтагаям етмайди-ку! Хорижийларга — Англияда яшовчиларга ишонилса, ҳозирдан ўлдим деявер. Йўқ, энди забастовка қилиш ғирт аҳмоқлик бўлади!

Шундан кейин бу икки одам биринчи марта аччиқлашиб қолишди. Илгари улар баҳслардан кейин ҳаммаша мурасага келишарди, чунки икковлари ҳам капитални ёмон кўришарди.

— Хўш, сен нима дейсан бунга? — деди Этьен Суваринга мурожаат қилиб.

У бўлса одатдагидек бурнини жийириб жавоб берди:

— Забастовками? Бемаънилик!

Орага ноқулай жимлик чўкди. Суварин юмшоқлик билан илова қилди:

— Лекин сизлар шуни хоҳласаларинг, мен зинҳор қарши эмасман: бировлар хонавайрон бўлади, баъзиларнинг шўри қурийдими, аммо умуман олганда, жилла бўлса ҳам ишни силжитади... Фақат кейинчалик ҳам

ишлар шундай кетадиган бўлса, дунёни янгилаш учун камида минг йил керак бўлади. Аввалига ўзларингиз ҳалок бўладиган турмани портлатиб кўринглар-чи!

У пингичка қўли билан ланг очик эшикдан иморатлари кўриниб турган Борё томонни кўрсатди. Лекин шу пайт кутилмаган бир ҳодиса унинг гапини бўлди: семиз, ўргатилган қуён — «Польша» кўчага чиқмоқчи эди, лекин шумтака болалар отган тошдан қўрқиб, сакраб орқасига қайтди; қўрқиб кетган қуён қулоқларини қисиб, думини кўтариб, ўзини Суварин оёқлари остига отди-да, уни таталаб, мени қўлингга ол, дегандек ёлворди. Қуён унинг тиззасига ўтириши билан у икки қўллаб уни ушлади-да, юмшоқ ва илиқ жунни хуш ёқиб, мудрай бoshлади.

Шу он Маэ кириб келди. Раснёр хоним гўё меҳмон қилаётгандек лутфан пиво ичинг, дея қистаганига қарамай, у ҳеч нима ичмоқчи эмасди. Этьен шу заҳоти ўрнидан турди, кейин иккови бирга Монсу томон кетди.

Кўмир қазувчилар маош олишганда Монсу худди якшанбадаги ярмаркадек яшнаб кетарди. Ҳамма посёлкалардан шахтёрлар тўда-тўда бўлиб келишарди. Касса жойлашган бино тор бўлгани учун ишчилар эшикда кутишни афзал кўришарди. Улар йўл устида тўда-тўда бўлишиб, кўчани тўсиб олишар, бу жонли девор тобора узайиб борар эди. Сотувчилар фурсатдан фойдаланиб, аравачаларини шу ерга келтириб, жойлашиб олишарди; улар ҳар хил нарса, идиш-товоқдан тортиб қолбасагача сотишарди. Лекин бунақа кунларда қаҳвахона билан қовоқхона эгалари роса ишлаб олишарди: шахтёрлар маош олишдан олдин пештахта олдида тоқат қилиб туриш учун, кейин эса чўнтагида пул билан яна моюнани ювгани киришарди. Улар кунни «Вулқон»да ўтказиб юбормаганларига ҳам шукр қиларди.

Маэ билан Этьен бу тиқилинчдан олдинга сурилганлари сари ишчиларнинг ғазаби қайнаётганини тобора аниқ сезиб борардилар. Шу кунни кўмир қазувчилар пулни қовоқхоналарда созуриб юрадиган одатдаги беғамлик йўқ эди. Муштлар тугилган, қаҳр-ғазабли сўзлар оғиздан-оғизга кўчиб юрарди.

— Наҳотки шу рост бўлса?— сўради Маэ «Пикетт» қаҳвахонаси остонасида Шавални кўриб қолиб.—Бари бир шу қабиҳликни қилишибди-да, а?

Шаваль жавобан Этьенга кўз қирини ташлаб, жаҳл билан бир нима деб тўнғиллади. Артель янги участкани қазишга олгандан бери Шаваль бошқа тўпда ишларди. У янги келган, ўзини бошлиқлардек тутадиган ўртоққа ҳасад қилиб, ич-этини ерди: Шаваль бутун посёлкадагилар унинг товонини ялаяпти, дерди. Бу муносабатларнинг ҳаммаси севги можаролари билан янаям мураккаблашиб кетганди. Ҳар сафар Шаваль Катрина билан Рекийярга борганида ёки уюм орқасига ўтганида у қизни, ижарачиларнинг билан ётасан, дея сира куракда турмайдиган сўзлар билан таҳқирларди: кейин эса эҳтироси жўшиб, қизни ардоқлаб қийнарди.

Маэ Шавалга бошқа савол билан мурожаат қилди:
— Ворёга ҳам навбат келдими?

Шаваль бу саволга ҳа, дегандай бош ирғади-да, орқасини ўгириб олди. Этьен билан Маэ бино ичига кирмоқчи бўлишди. Касса ўртасидан панжара билан ажратилган чоғроқ тўртбурчакли хонага жойлашган эди. Девор тагига қўйилган скамейкада беш-олти шахтёр навбатини кутиб ўтирарди. Идора хизматчиси ёрдам бераётган кассир дарча олдида фуражкасини ушлаб турган шахтёрга мойна берарди. Чапдаги скамейка тепасига кулранг дуд босган шувокда кўзга яққол ташланаётган сариқ қоғозга ёзилган эълон осиб қўйилганди. Эрталабдан бери шу эълон олдидан одамларнинг оёғи узилмасди. Улар иккитадан, учтадан бўлиб киришарди-да, эълон олдида қоққан қозикдек тўхтаб қолишар, кейин бутунлай гангиб, чурқ этмай, фақат елкаларини қисиб, чиқиб кетишар эди.

Этьен билан Маэ киришганда эълон олдида икки кўмир қазувчи турарди: биттаси ёш, япалоқ юзи баджаҳл, иккинчиси — афтидан, кексайиб, меровсираб қолган ориққина чол эди. На униси, на буниси ўқишни биларди: ёши лабларини қимирлатиб, ёзувни ҳижжалаб ўқишга ҳаракат қилди, чол бўлса, эълонга беҳуда тикилиб турарди. Кўпчилик гарчи ҳеч нима тушунмаса ҳам бир қараб кетиш учун кирарди.

— Қани, бизга ўқиб бер-чи,— деди Маэ саводи унча яхши бўлмаган ҳамроҳига.

Этьен эълонни ўқий бошлади. Бу Ширкатнинг барча конлардаги шахтёрларга мурожаати эди. Ширкат улар-

га шахталарни яхши мустаҳкамламаганликлари учун бефойда жарималар солиш ўрнига қазиб чиқариладиган кўмирга янгича ҳақ тўлаш жорий этилишини маълум қилган эди. Бундан буён Ширкат шахтани мустаҳкамлаш учун алоҳида ҳақ тўлайди, шахтага туширилган ва яхши иш учун фойдаланилган ҳар бир куб метр ёғочни ҳисоблаб пул тўланади. Табиийки, чиқарилган ҳар бир вагонетка кўмир учун тўланадиган ҳақ, албатта, кўмирнинг сифати, қазилган жойнинг узоқ-яқинлиги ҳисобга олинган ҳолда, мутаносиб равишда эллик сантиметрдан қирқ сантиметга пасайтирилади. Кейин жуда чигал ҳисоб-китоб ҳақида гап бориб, гўё ҳар вагонетка кўмирга тўланадиган ҳақнинг ўн сантиметр камайиши шахтани мустаҳкамлашга кетадиган пул билан қопланишини исботлашга зўр берилган эди. Пировардида Ширкат янги усулнинг афзалликларига ҳар бир ишчининг ишонишига имкон бериш истагида уни биринчи декабрь, душанба кунидан жорий қилишга қарор берганлиги айтилган эди.

— Ҳей, секинроқ ўқисаларинг бўлмайдими! — қичқирди кассир. — Ҳеч нима эшитилмаяпти.

Этъен кассирнинг танбеҳига парво қилмай, охиригача ўқиб чиқди. Унинг овози титрарди, у ўқиб бўлганидан кейин ҳам ҳамма эълонга диққат билан тикилиб тураверди. Кўмир қазувчиларнинг иккови: кексаси ҳам, ёши ҳам яна ниманидир кутиб туришди-туришди-да, кейин бошларини қуйи солиб чиқиб кетишди.

— Хўп қизиқ бўлди-ку! — гўлдираб қўйди Маэ.

У ўтирди, ҳамроҳи ҳам. Улар хаёлларини бир ерга тўплаб, бошларини қуйи солганича нималарнидир ҳисоблашишарди, сариқ эълон олдига келувчиларнинг эса кети узилмасди. Нима, уларни калака қилишяптими? Улар ҳар бир вагонеткадан уриб қоладиган ўша ўн сантиметрни шахтани мустаҳкамлашга ишлатиб бўпти. Бу иш учун энг кўп деганда саккиз сантиметр олиш мумкин, ширкат бу оғир ишга кетадиган вақтни ҳисобга олмай, улардан икки сантиметрни уриб қолади. Уларнинг найрангларини қаранг-а, сездирмасдан иш ҳақини камайтириш экан-да ниятлари! Ширкат кўмир қазувчилар ҳисобига иқтисод қилишга ўтипти-да.

— Жин урсин! Вой, худо ургур-ей! — такрорлади

Маэ бошини кўтариб... — Агар биз шунга кўнсақ, қипқизил аҳмоқ бўлиб қолаверамиз!

Лекин бу чоқ касса дарчаси олдида ҳеч ким қолмагани учун у ойлигини олгани борди. Вақтни ўтказмаслик учун пулни артелнинг каттасига беришарди, бошлиқ эса ўзи бўлиб берарди.

— Маэ билан ўртоқлари,— деди идора хизматчиси,— Филоньер қатлами, еттинчи ўнгир.

У ведомостдан Маэнинг фамилиясини излади. Бу ведомость назоратчилар ҳисоб дафтарларидан йиртиб олиб, ҳар бир артелнинг ҳар куни қазиб чиқарган вагонеткаси қайд этилган варақлар асосида тузиларди. Кейин такорлади:

— Маэ билан ўртоқлари, Филоньер қатлами, еттинчи ўнгир. ... Бир юз ўттиз беш франк.

Кассир пулни санаб узатди.

— Кечирасиз, тақсир!— деб гўлдиради ҳаяжонланган қончи.— Шу тўғрими? Янглишмадингизмикин?

Маэ аъзойи бадани билинар-билимас титраб, чўғи кам пулга қараганича уни олишга журъат этолмай турарди. Сирасини айтганда, у катта маош олишни кутмаган эди, лекин анави ҳисобда янглишмаган бўлса, бунчалик кам бўлишини тасаввур ҳам қилмаганди. У шу пулдан Захарияга, Этьенга ва Шаваль ўрнига ишлаган ўртоққа тегишларини берса, ўзига, отасига, Катринага ва Жанленга жуда кўп деганда эллик франк қолади.

— Йўқ, йўқ, мен янглишмадим,— деди идора ходими.— Икки якшанба билан бекор туриб қолинган тўрт кунни чегириб ташланса, ҳаммаси бўлиб тўққиз иш куни қолади.

Маэ пичирлаб қўшиб, олиб, ҳисоблаб чиқди; тўққиз иш куни учун ўзи ўттиз франкка яқин, Катрина ўн саккиз, Жанлен тўққиз франк олиши керак эди. Улмас бобо эса уч кунга ҳақ олиши керак. Бари бир ана шуларга Захария билан қолган икки ишчи оладиган тўқсон франкни қўшганда, умумий сумма кўп бўлиши керак эди.

— Жаримани ҳам унутманглар,— қўшиб қўйди идора хизматчиси.— Шахтани яхши мустақкамламаганларинг учун йигирма франк.

Қончи ғазаб билан чапак чалиб юборди. Йигирма

франк жарима, тўрт кун бекор қолиш! Ундоқ бўлса, ҳисоб тўғри, албатта! Буни қара-я, Улмас бобо ишлаб юрганида ва Захария уйланмасдан олдин ҳар икки ҳафтада уйига юз эллик франкдан олиб келарди-ку!

— Хўш, пулларингизни оласизми-йўқми? — қичқирди тоқати тоқ бўлган кассир. — Кўрмаяпсизми, орқангизда одамлар туришибди, кутишяпти... Олишни истамасангиз, ариза беринг.

Аммо шу пайт, Маэ пулни олиш учун титраётган катта қўлини узатган ҳам эди, идора хизматчиси деди:

— Тўхтанг-чи, мен сизнинг отингизни ёзиб қўювдим. Туссен Маэ, шундайми?.. Катта котиб сиз билан гаплашмоқчи эди. Кабинетига киринг, олдида ҳозир ҳеч ким йўқ.

Ҳангу манг бўлиб қолган ишчи қизил ёғочдан ишланиб, ранги ўчган яшил мато сирилган мебель билан жиҳозланган кабинетга кирди. У беш минутча қоғозлар қалашиб ётган стол ёнида ўтирган баланд бўйли, ранги мурданикига ўхшаган киши — секретарнинг гапларини эшитди. Лекин Маэнинг қулоқлари гувиллаётганидан яхши эшитмасди. У гап отаси ҳақида кетаётганлигини зўр-базўр тушунди; унинг ёши ва қирқ йиллик хизмати ҳисобга олиниб, бир юз эллик франк пенсия билан истеъфога чиқаришга қарор қилинибди. Кейин Маэга котиб кўрсроқ гапиргандек бўлди. Бу энди ҳайфсан эди, унинг сиёсат билан шуғулланиши қораланиб, ижарачиси билан ўзаро ёрдам кассасига ишора қилиб ўтилди. Пировардида бундай бемаъниликлар билан шуғулланиб, ўзингни бадном қилиб қўйма, чунки сен шахтадаги энг яхши ишчилардан саналасан, дея маслаҳат берилди. Маэ эътироз билдирмоқчи бўлди, лекин гаплари пойинтар-сойинтар чиқди, у титроқ бармоқлари билан фуражқасини асабий ғижимлаб чиқиб кетаркан, гўлдиради:

— Албатта, котиб жаноблари... Сизни ишонтириб айтаманки, тақсир...

Эъён уни кўчада кутарди. Уни кўргач, Маэ қайнаб кетди:

— Ғирт аҳмоқ эканман, ахир унга жавоб беришим керак эди-ку!.. Ейишга ҳеч вақомиз йўқ-ку, улар бўлса қаёқдаги бемаъни гаплар билан мияни ачитишади. У тишини сенга қайраб юрибди; у менга бутун посёл-

каларинг исёнкорлик ғоялари билан заҳарланган, деб айтди... Жин урсин, энди нима қилдик, а? Икки букилиб, раҳмат айтсакмикин, а? У ҳақ, энг оқилона иш ана шу.

Ғазабланган, айна пайтда қўрқиб кетган Маэ жим бўлиб қолди.

Этъен қайгули ўйларга ботди. Улар яна бутун кўчани тўсиб қўйган ишчилар ёнидан ўтишди. Қаҳр-ғазаб кучайиб бораётганлиги сезилиб турарди,— бу одатда хотиржам ва вазмин кишиларнинг қаҳру ғазоби эди; шовқин-сурон эшитиларди, бу — қимир этмай турган оломон тепасидаги момақалдиروқнинг гумбурлашига ўхшарди. Шу ондаёқ ҳар бир тирговичдан икки су уриб қолган Ширкатнинг қанча фойда кўришини ҳисоблаб чиқувчилар ҳам топилиб қолди. Бу рақамлар оғиздан оғизга ўтиб, унча-мунчани писанд қилмайдиганларнинг ҳам ғазабини қайнатди, ҳамманинг ғазабини кўпроқ келтирган нарса маошнинг камлиги эди. Бу — ишда бекор туриб қолиш ва жарималарга қарши очлар исёни эди. Ҳозирнинг ўзида ейишга ҳеч вақолари йўқ-ку, маошни яна камайтирсалар, ҳоллари нима кечади? Қовоқхонадагилар бўлса, бундан ҳам баттар бақиритиб, томоқлари шунчалик қақраб кетдики, олган ўша озгина маошларини ҳам пештахта устида қолдиришди.

Монсудан посёлкага боргунларича йўлда Этъен билан Маэ бир-бирига оғиз очмади. Маэ уйга кириши биланоқ болалари билан қолган хотини унинг қулуқу қайтганини пайқади.

— Ана холос!— деди хотини.— Кофе, қанд, гўшт қани? Бир бўлак бузоқ гўшти сотиб олсанг, бир нима бўлармидинг.

Маэ жавоб бермади: у ҳаяжондан бўғилиб кетаётганди, шу боисдан у ўзини босишга ҳаракат қилди. Кўмир қазувчининг ер ости ишларида тобланган ғамгин юзида ғам-алам акс этарди, кўзларида пайдо бўлган йирик-йирик ёш томчилари қиздириб оқиб тушарди. У стулга ўзини ташлади-да, эллик франкни столга улоқтириб, ёш боладек ҳўнг-ҳўнг йиғлай бошлади.

— Мана!— деди у зўрға.— Сенга олиб келган пулнинг ҳаммаси шу... Ҳаммамизнинг ишлаб топганимиз мана шу!

Маэ хоним Этьенга қаради. Этьен гангиб қолганидан ҳеч нима демади. Шундан кейин Маэ хоним ҳам йиглаб юборди. Эллик франк билан тўққиз киши икки ҳафта қандай кун кўради? Катта ўғиллари бўлак бўлиб чиқиб кетди, чолнинг бўлса оёқлари ишламай қолди, ётиб бандаликни бажо келтирса ҳам бўлади. Онасининг йиглаётганини кўрган Альзира ваҳимага тушиб, унинг бўйнига осилиб олди, Эстелла чирилларди, Ленора билан Анри эса пиқ-пиқ йиглашарди. Кўп ўтмай қашшоқлик фарёди бутун посёлкани тутиб кетди. Эркаклар қайтиб келишгач, ҳар бир хонадонда жуда оз пул олиб келишгани учун аламли оҳ-воҳлар эшитиларди. Эшиклар қарсиллаб очилиб, хотин-халажлар гўё уйларнинг шифтлари уларнинг фарёдига дош беролмайдигандек кўчага отилиб чиқишди. Емғир шивалаб ёғаётганини улар сезишмас ҳам эди. Улар тротуарда туриб бир-бирини чақирешар ва кафтларидаги озгина пулни кўрсатишар эди.

— Эримга беришган пулни кўринг-а! Ахир бу одамни хўрлаш эмасми?

— Меники-чи? Нонга икки ҳафтага зўрға етади!

— Меники-чи? Санаб кўринг бир! Яна кўйлагимни сотишга мажбурман.

Маэ хоним бошқалар каби кўчага чиқди. Ҳаммадан кўпроқ бақираётган Левакнинг хотини атофига бир гуруҳ аёллар тўпланганди; алкаш эрим ҳатто уйга ҳам келмади, энди олган моянаси қанча бўлса ҳам ҳаммасини «Вулқон»да йўқ қилиб келади, дерди. Филомена Захария пулни олиб қўймасин, деб Маэдан бохабар бўлиб турарди. Ёлғиз Пьерроннинг хотинигина жуда хотиржам кўринарди. Бу риёкор Пьеррон доимо бир йўлини қиларди-ю, штейгерлик ҳисоб дафтарчасида ўртоқлариникига нисбатан кўп соат ёзилган бўларди. Лекин Ашаддий кампир куёвим нотўғри иш қиляпти, дея бутунлай газабланганлар томонида эди; унинг тик ва ориқ гавдаси хотинлар орасида ажралиб турарди: у Монсу томонга муштларини ўқталиб ўдағайлар эди.

— Инсофсизларни қаранг-а,— қичқирди у Энбоннинг номини тилга олмасдан,— уларнинг чўриси бугун эрталаб фойтунда сайр қилиб юргангани ўз кўзим билан кўрдим!.. Ҳа, ҳа, ошпаз хотин қўш от қўшилган фойтунда Маршьеннга, балиққа кетди шекилли!

Яна дод-фарёд кўтарилиб, қарғишлар эшитилди. Оқ пешбандли ошпаз хотиннинг хўжайин фойтунида кўнчи бозорга бериб келиши ҳамманинг газабини қўз-гаган эди. Ишчилар очдан ўляпти-ю, булар тирик балиқни тусаб қолишинти-я! Балки уларнинг балиқ ейишлари узоққа бормас: камбағалларнинг ҳам елкасига офтеб тегиб қолар. Эъён ташлаган уруғлар униб чиқди: Эъёнининг бутун фикрлари бу газабли ҳайқириқларда ифода этилмоқда. Бу ваъда қилинган олтин даврни тоқатсизлик билан кутиш нидоси, тезроқ ўз бахтига муяссар бўлиш, қашшоқлик балосидан қутулиш истаги эди. Адолатсизлик ҳаддан ошиб кетди: бунинг оқибагида кўмир қазувчилар оғзиларидаги конни тортиб олаётганларга ўз қуқуқларини кўрсатиб қўядилар. Айниқса хотин-халаж ҳаяжонланган эди, улар бир ҳамла билан бахтсизлар бўлмайдиган ажойиб раванқ салтанатини дарҳол қўлга олишни истардилар. Деярли қоронғилик тушганди, ёмғир борган сари кучаярди, хотинлар бўлса бутун посёлкани бошларига кўтариб фарёд қилардилар. Улар атрофида эса болалар қий-чув қилишарди.

Кечқурун «Авантаж» қаҳвахонасида забастовка бошлашга қарор қилинди. Энди Раснёр эътироз билдирмади, Суварин эса, биринчи қадам бўлади бу, деган ниятда рози бўлди. Эъён аҳволни икки оғиз сўз билан таърифлаб берди: агар Ширкат қандай қилиб бўлса ҳам забастовка чиқармоқчи экан, демак, забастовка бўлади!

Ҳ

Бир ҳафта ўтди. Иш ўз йўлида бораверди, лекин шахтёрларнинг қовоғидан қор ёғарди, гумонлари ошиб, минут сайин тўқнашув бўлишини кутишарди.

Маэнинг маоши ўтган галгисидан ҳам кам бўлиши керак эди. Унинг хотини оғир-вазмин, андишали бўлса ҳам сержаҳл бўлиб қолди. Ахир илгарилари Катрина бирор жойда ётиб қолармиди? Эртасига азонда қиз ҳолдан тойиб, тунги сайрлардан чарчаб, ҳатто шахтага ҳам боролмайдиган бўлиб қайтди. У кўзига ёш олиб, айбсизлигини исботлашга уринар: Шаваль қўйиб юбормаганини, ташлаб кетсанг, уриб ўлдираман, дея дўқ қилганини айтар эди. У рашкдан қутуриб

уйга, Этьен ётган хонага боришимни тақиклади, унинг гапини қаранг, мен сизларнинг розиликларинг билан кечалари Этьен қўйнида ётармишман. Ғазабланган Маэ хоним қизига шу ҳайвон билан учрашмагин, агар айтганимни қилмасанг, ўзим Монсуга бориб, юзларига тарсаки тортиб юбораман, деб қўрқитди. Бари бир иш куни кетди, қиз эса ўзи илаштириб олган жазманини ташламоқчи эмасди.

Икки кун ўтгач, янги бир воқеа рўй берди. Душанба билан сешанба кунлари Жанлен Ворё шахтасига ишга келиш ўрнига Бебер ва Лидия билан ботқоққа ҳамда Вандам ўрмонига қочиб кетди. Жуда эрта етилган бу шумлар у ерларда нима номаъқулчиликлар қилишганини, учовлари қандай бўлмагур ўйинлар билан машгул бўлишганини ҳеч ким билмасди. Жанленнинг роса адабини беришди: онаси уни посёлканинг капалаги учиб кетган болалари кўзи олдида, кўчада ўлгудек урди. Ҳеч шунақа бўлганми ўзи? Бола-чақам деб жонини жабборга берса-ю, энди ўзимиз пул топадиган бўлдик, деб кўнглига келганини қиладиган бўлиб қолипти, яшамагурлар! Унинг бу фарёди ўзининг оғир ёшлигидан нолишини ҳам ифодаларди, ночор қашшоқлик уни ҳар бир янги фарзандга бўлажак ишчи кучи деб қарашга мажбур этарди.

Эртасига эрталаб эркаклар билан қизи шахтага кетишганда, Маэ хоним ўрнидан туриб, Жанленга деди:

— Сен ярамас яна қочиб кетадиган бўлсанг, терингни шилиб оламан, билиб қўй!

Маэлар ишлайдиган янги участкада иш оғир эди. Шу жойдаги Филонъер қатлами жуда юпқа бўлганидан равоқ билан девор орасида сиқилиб ишлаётган кончилар тирсакларини шилиб олишарди. Бундан ташқари ер тобора захлашиб борар, соат сайин сув ўпириб, даҳшатли оқим жинслар билан одамларни юиб кетаётгандек бўларди. Этьен кеча зўр бериб чўкич ураётганида ерости чашмасининг суви юзига сачраб кетган эди. Лекин бу сафар ташвишлари беҳуда бўлиб чиқди; ўнгир фақат янада захлашиб, чиринди ҳиди тутиб кетди. Дарвоқе, Этьен юз бериши мумкин бўлган тасодифлар ҳақида асло ўйламас, ҳеч нарсадан қўрқмайдиган ўртоқлари билан ишни давом эттираверарди.

Улар руда гази ичида ишлашар, ҳатто қовоқлари оғирлашиб, кўзлари олдини ўргимчак тўри тутиб олаётганини ҳам сезишмасди. Фақат аҳён-аҳёнда, лампанинг алангаси жудаям оқариб ёки зангори тусга кирганидагина газ борлиги эсларига тушиб қоларди. Кўмир қазувчилардан битта-яримтаси қулоғини кўмир қатламига тутиб, ҳар бир ёриқ ичида ҳаво пуфакчаларидек биқирлаётган газнинг заиф шовқинига қулоқ соларди. Бундан ташқари доимо ўпирилиб тушиш хавфи бор эди; ёмон, ҳафсаласизлик билан қўйилган тиргаклар борлигига қарамай, ювилган тупроқ чўка бошлаганди.

Уша куни Маэ тиргакларни уч марта тўғрилаб қўйди. Соат тўртга яқинлашиб, ишчилар кетишга тайёрланишарди. Этьен ёнбошлаганича сўнгги кўмир бўлагини уриб, ағдарган ҳам эдики, узоқдан келган гумбурлаш бутун шахтани ларзага солди.

— Нима бу? — қичқирди у чўкични улоқтириб, қулоқ соларкан.

Унга худди орқасидаги бутун йўлак ўпирилиб тушгандек бўлди.

Лекин Маэ ўнгир нишаблигидан сирғалиб тушаркан:

— Ўпирилди... Тез! Тез қоч! — дея бақирарди.

Ҳамма ўртоқларидан хавотирланиб, жонҳолатда пастга отилди. Ҳаммаёқ жимжит. Уларнинг қўлларидаги лампочкалар ликилларди; худди эмақлағудек бўлиб энгашиб, йўлаклардан олдинма-кетин қочишарди: қочиб боришар экан, қисқа-қисқа: «Қаер ўпирилди? Балки ўнгирлардадир?» — «Йўқ, пастда! Йўлаклардан бирида бўлиши керак!» дейишарди. Кўмир қазувчилар шахта қудуғи олдига келишлари билан майиб бўлишларига ҳам эътибор бермай, бир-бирларининг устларига ўзларини отиб, тушиб кета бошладилар.

Кечаги калтакдан бадани моматалоқ бўлиб кетган Жанлен шу куни шахтадан қочмади. У ялангоёқ бўлиб, вентиляция эшикларини ёпиб, ўз поезде кетидан лўкиллаб борарди. Баъзи вақтларда бола штейгер кўриб қолишидан ҳам қўрқмай сўнгги вагонеткага чиқиб оларди: бундай қилиш қаттиқ тақиқланган эди — вагонеткага чиққан кишининг ухлаб қолишидан қўрқишарди. Қаршидан келаётган вагонеткаларни ўтказвориш учун поезд тўхтаганида, у лип этиб олдинга

Ўтди-да, отни бошқариб бораётган Бебернинг ёнига борди. Бу Жанленнинг энг севимли эрмаги эди. Малласоч, шалпанг қулоқ, маймунникига ўхшаган тумшуги ориққина, кўк кўзлари қоронғида ялтиллаб турган бола лампочкасиз писиб келиб, ўртоғини қаттиқ чимчиб оларди-да, ҳар хил бўлмағур қалтис ҳазиллар қиларди. Кўзи жуда эрта очилган бу шумтака чала болаларга хос аллақандай топқир, тегирмонга тушса бутун чиқадиган ибтидоий бир махлуққа ўхшар эди.

Тушликдан кейин Мук бобо болаларнинг олдига Ўктам лақабли отни етаклаб келди, чунки энди ишлаш бу отнинг гали эди. От эҳтиёт йўлда туриб олиб хириллай бошлади. Жанлен Бебер ёнига югуриб келиб, ундан сўради:

— Бу қари қирчанғига нима бўлди? Нега тўхтаб қолди?.. Бунақада оёғимни синдиради-ку.

Бебер жавоб бера олмади, жиловни қаттиқроқ тортди холос, чунки қарши томондан поезд келаётганини сезган от сергакланиб қолганди. От узоқдан Қувур лақабли дугонаси яқинлашиб келаётганини пайқаганди: Ўктам бу отни шахтага туширишган биринчи кунданоқ ёқтириб, у билан иноқлашиб қолганди. Бу иноқлик ёш дўстига қобиллик ва сабр-қаноатдан сабоқ бериб, уни овутишни истаётган кекса донишманднинг сидқидилдан ачинишини эслатарди. Ҳалигача кўникиб кетмаган, доимо қуёшни кўмсайвериб, шабкўр бўлиб қолган Қувур бошини қуйи солганича вагонеткаларни лоқайдлик билан тэртиб бораверар эди. Шунинг учун ҳам ҳар сафар Ўктам уни кўрганида бошини чўзиб пишқирар, эркалатмоқчи ва далда бермоқчи бўлаётгандек яларди.

— Вой қурғурлар-ей! — сўкиниб деди Бебер. — Буларни қаранглар-а, бир-бирларини ялаб-юлқишяпти-я!

Қувур ўтиб кетгандан кейин Бебер деди:

— Оббо қари қирчанғи-ей, хўб қилиқларинг бор-да!. Бирон нохушликни — тош ёки ўрани сездими доимо тўхтайти: босиб қолмасин, деб эҳтиётини қилади... Бугун эшик орқасида нима бор экан, билмадим. Эшикни оёғи билан итаради-ю, ўзи жойидан жилмайди... Сен бирои парса сезмадингми?

— Йўқ, — жавоб берди Жанлен. — Лекин у ерда сув тиззага чиқади.

Поезд яна қўзгалди. Ўктам сал юриб, боши билан

вентиляция дарчасини очди-да, яна таққа тўхтаб, бутун танасини силкитиб кишнади. Ниҳоят у бор кучи билан елиб кетди.

Эшикни ёпаётган Жанлен орқада қолди. У эгилиб, ўзи тушиб кетган балчиққа қаради, кейин лампочкани кўтариб қараган эди, силкиб чиққан сув таъсирида тиргаклар жуда қийшайиб кетганини кўрди. Шу пайт Берлок деган бир кончи (уни Шико ҳам дейишади) келиб қолди. У хотинининг ой-куни яқинлашиб қолганидан хавотирланиб, шошилиб уйига кетаётган эди. У ҳам тўхтаб, тирговичларни синчиклаб кўздан кечира бошлади. Қўққисдан, бола поезд кетидан энди югураман, деб турган пайтда даҳшатли қасир-қусур овози эшитилди-ю, иккови — ишчи ҳам, бола ҳам кўчки остида қолди.

Оғир жимлик чўқди. Кўчки ҳавони шу қадар ларзага солган эдики, йўлакни оғир чанг босиб кетди. Ҳар томондан, энг олис участкалардан кўзлари ҳеч нимани кўрмаётган кўмир қазувчилар ҳаллослаб чопиб келишарди. Қўлларидаги лампочкалар лип-лип ўйнаб, бу кўрсичқон инининг энг чуқур жойларида югуриб бораётган кишиларни зўрга ёритарди. Упирилган ерга биринчи бўлиб келган ишчилар ўртоқларини ёрдамга чақириб, қичқира бошладилар. Унгирининг нариги, чуқур томонидаги ишчилар ўша ёқда қолиб кетишди, босиб тушган тупроқ у ёққа ўтиш йўлини тўсиб қўйганди. Шу ондаёқ ўн метрча жойнинг шифти ёрилгани аниқланди. Шикаст унча катта эмасди. Бирдан ҳамманинг юраги муз бўлиб кетди: кўчки остидан жон бераётган кишининг хириллаши эшитилди.

Бебер поездини ташлаб югураркан:

— У ерда Жанлен бор! Жанлен бор!— дея бақирарди.

Шу чоқ ён йўлакдан Маэ югуриб чиқди, унинг ёнида Захария билан Этьен ҳам бор эди. Тутақиб кетган Маэ оғзига келганини қайтармай сўкинарди:

— Эҳ, жин ургур! Жин ургур! Жин ургур!

Елиб келишган Катрина, Лидия ва Мукетта умумий саросималик ва қоронгиликда қўрқиб кетиб додлашарди. Уларни юпатмоқчи бўлишарди, лекин улар, бутунлай ақлдан озиб, ҳар инграш овози эшитилганда яна қаттиқроқ йиғлардилар.

Штейгер Ришомм чоғиб келди. У шахтада инженер Негрель ҳам, Дансарт ҳам йўқлигини билиб фиғони ошди. У каттакон тошга қулогини тутиб, эшитди: йўқ, бу инграш боланики эмас, у ерда, шубҳасиз, катта одам бор. Маэ «Жанлен»! деб бақирини қўймасди. Жавобан бирон овоз эшитилмасди. Афтидан, бола кўчки остида қолиб ўлган бўлса керак.

Лекин бир маромдаги инграш тинмасди. Ўлаётган кишини гапга солиб кўрмоқчи бўлишди, отини сўрашди. Хириллашдан бошқа жавоб эшитилмади.

— Тез бўлинглар!— деб кистади кўмилиб қолганларни қазиб чиқаришни буюрган Ришомм.— Кейин гап-лашасизлар.

Кўмирчилар икки қарама-қарши томондан чўкич ва белкураклар билан кавлашиб, кўчкини тозалай бошлашди. Шаваль чурқ этмай Маэ ва Этьен билан бирга ишларди: Захария бўлса тупроқни тортаётганларга уни қил, буни қил, деб турарди. Иш тугайдиган вақт бўлган, ҳеч ким ҳали ҳеч нима емагани: ўртоқлари ўлай деб тургани учун кўмирчилар уйга кетишни ўйлашмасди ҳам. Ҳеч ким ишдан қайтмаётганини кўриб, посёлкадагилар хавотир олишлари мумкин эди. Посёлкага хотинларни юбормоқчи бўлишди. Бироқ Катрина ҳам, Мукетта ҳам, ҳатто Лидия ҳам ҳамма нарсани билиб олмагунча бормаимиз, деб туриб олишди. Бундан ташқари улар тозалаш ишларига ёрдамлашишди. Шунда Левакка юқорига кўтарилиб, ўпирилиш бўлганини, сал-пал шикаст кўрилганини, аммо тузатилаётганини айт, деб топширишди. Соат тўртга яқинлашиб қолди, ишчилар эса салкам бир соат ичида қарийб бир кунлик ишни қилиб қўйишди; ҳисобларга кўра, агар пештоқ яна чўкмаган бўлса, тупроқнинг ярми олинган эди. Маэ жонини жабборга бериб ишлар, жазава си тутиб, тупроқ отар, биров ўрнингга мен ишлай, деса, жаҳл билан қўл силтар эди.

— Эҳтиёт бўлинглар!— деди ниҳоят Ришомм.— Яқинлашяпмиз. Уларга тегиб кетманглар ишқилиб.

Ҳақиқатан ҳам хириллаш тобора аниқ эшитила бошлади: бу ишловчилар анчадан бери эшитаётган ўша узлуксиз хириллаш эди. Энди бу овоз нақ чўкичлар остидан келаётгандек эди. Бирдан овоз жим бўлиб қолди.

Ҳамма титраб-қақшаб, бу зимистон ичида ўлимнинг

совуқ нафасини туюб, чурқ этмай бир-бирига қарашди. Қора терга ботган кўмирчилар сўнгги кучларини тўплаб, қазишда давом этардилар. Ниҳоят оёқ кўринди: шунда улар тупроқни қўллари билан тортиб, кўмилиб қолган кишининг гавдасини секин-аста чиқариб олдилар. Бошига шикаст етмабди. Лампочка унинг юзини ёритганда, ҳамма бирдан: «Шико», деб юборди. У ҳали иссиққина эди. Кўчки умуртқасини синдирибди.

— Ураб-чирмаб, вагонеткага қўйинглар, — буюрди штейгер, — қани энди кичкинтойни қидирамиз. Тезроқ!

Маэ сўнгги бор чўкич уриб, тупроқни нариги томондан қазиб келаётганлар билан алоқа қилса бўладиган тешик очди. Улар: Жанленни беҳуш топдик, оёқлари синган бўлса ҳам, ҳали тирик, деб бақаришди. Отаси болани кўтариб олиб кетди. У тишларини гижирлатиб, лаънатлар ёғдиришда давом этарди. Катрина ва бошқа хотинлар яна дод-фарёдни бошлашди.

Болани тезда жўнатиш тадоригини кўришди. Бебер Ўктамни етаклаб олиб келди, отни иккита вагонеткага қўшишди: биринчисига Шиконинг жасадини қўйишди, уни Этьен ушлаб кетди, иккинчисига Жанленни тиззасига олиб олган Маэ ўтирди. Бола хушига келмади, вентиляция эшигидан юлқиб олинган бир парча жун матони унинг устига ташлаб қўйишди. Йўлга тушишди. Ҳар бир вагонеткадаги лампочка қизил юлдузга ўхшаб ёниб турарди. Вагонеткалар кетидан худди соялар тизмасига ўхшаб эллик чоғли кўмир қазувчи бирин-кетин борарди. Улар ниҳоятда чарчашганини энди сезишди, оёқларини зўрға босишар, худди ўлат теккан подадек ғамгин ва маъюс ҳолда лойда сирганиб, каловланиб боришарди. Қабулхонага етиш учун ярим соатча юришди. Одамлар қоронғиликда секин борардилар, қинғир-қийшиқ йўлаклару ўтиш жойларининг охири йўқдек туюларди.

Биринчи бўлиб қабулхонага келган Ришомм юқорига кўтарадиган битта кажавани бўш қолдиришни буюрди. Пьеррон шу ондаёқ иккала вагонеткани унга ортди. Биттасига дабдала бўлган ўғлини кўтариб олган Маэ ўтирди, иккинчисига эса Шиконинг жасади тушиб кетмасин, деб Этьен жойлашди. Ишчилар кўтарма машинанинг бошқа қаватларига чиқиб олишлари билан

кажава кўтарила бошлади. Кўтарилиш икки минут давом этди. Трубалардан совуқ ёмғир қуярди: ишчилар яна ёруғ оламини кўриш мақсадида ҳадеб юқорига қарардилар.

Хайриятки, доктор Вандерхагенга юборилган шогирд бола уни уйдан тошиб, бошлаб келди. Жанлен билан ўликни қишин-ёзин каминдан ўт аримайдиган назоратчилар хонасига олиб киришди. Бу ерда оёқларни ювиш учун иссиқ сувли челақлар тайёр турарди. Уйнинг тош полига иккита матрац тўшалган бўлиб, унга ишчи билан болани ётқизишди. Хонага фақат Маэ билан Этъен кирди. Қолганлар эса, юккашлар, кўмир қазувчилар, ҳар томондан чопиб келишган шогирдлар эшик олдида уймалашиб, шивир-шивир қилиб туришарди.

Доктор Шикога бир қаради-да, гўлдираб деди:

— Буиси тайёр!.. Уни юваверсаларинг ҳам бўлади.

Икки назоратчи ўликни ечинтириб, кўмирдан қорайиб, тердан кир бўлиб кетган жасадни булут билан юва бошладилар.

— Боши шикастланмапти,— яна гапга тушди Жанлен ётган матрац ёнига чўккалаган доктор.— Кўкраги ҳам... Ҳаммадан кўп оёқлари ёмон бўпти.

Ўзи болани ечинтирди, бошидаги чепчигини олди, энагалардек эпчиллик билан куртқасини, шимини ва кўйлагини ечди. Боланинг ҳашаротга ўхшаш кичик, озгин, яланғоч вужуди қонталаш, чақа бўлиб кетганди. Қоп-қора гард ва лойдан кир бўлиб кетган боланинг танасида ҳеч нимани кўриб бўлмасди, уни ҳам ювинтиришга тўғри келди. Булут теккан сари Жанлен янада ориқлаб кетаётгандек бўларди: қонсиз, оппоқ баданидан суяклари чиқиб кетаётгандек эди. Бахтсиз одамлар авлодининг бу сўнгги фарзандига, бу ночор, ғариб, кўчкида майиб бўлиб, азоб чекаётган мурғак вужудга қараш оғир эди. Болани ювинтиришганда, сонлари лат егани маълум бўлди — қонсиз терисининг икки жойида қизил доғ бор эди. Жанлен ҳушига келиб, ингради. Қўллари осилтириб, ўглининг оёқ томонида турган Маэ унга тикилди; кўзларидан йирик ёш томчилари думалади.

— Сен отаси бўлсанг керак, а?— сўради доктор.— Йиглаб нима қиласан, мана кўриб турипсан-ку, тирик... Ундан кўра менга қарашвор.

Доктор икки жойи синганлигини аниқлади. Лекин ўнг оёғи ташвишлантирарди: балки уни кесиб ташлашга тўғри келармикан.

Шу пайт хонага бу ҳодисадан эндигина хабар топган Негрель ва Дансарт Ришомм билан бирга кириб келишди. Инженер штейгернинг ҳисоботини ғижиниб тинглади. Бирдан у тутакиб: «Доим шу лаънати тирговичлардан панд еймиз!» — деб койиб кетди. Ахир битта-яримтанинг ёстиғи қурийди, деб неча марта айтган эди-ку! Бу ҳайвонлар бўлса, қачон қарама, тирговичларни маҳкамлашга мажбур этсанг, забастовка қиламиз, деб қўрқитишгани қўрқитган! Ҳаммадан ҳам алам қиладиган жойи шуки, бу сарфу харажатларни Ширкат тўлаши керак! Энобо жаноблари тоза хурсанд бўладилар-да!

— Ким бу? — сўради Негрель мурдани чойшабга ўраётганларга қараб турган Дансартдан.

— Шико, энг яхши ишчиларимиздан бири, — жавоб берди бош штейгер... — Учта боласи бор... Бечора!..

Доктор Вандерхаген Жанленни дарҳол ота-онаси олдига жўнатишни талаб қилди. Соат олтига занг урди: қош қорая бошлади. Марҳумни ҳам олиб кетишса дуруст бўларди: инженер соябон аравага от қўшишни ва санитария замбили олиб келишни буюрди. Ярадор болани замбилга солишди, марҳумнинг жасадини эса тўшаги билан аравага олиб чиқишди.

Юккаш хотин-қизлар нима бўлганини билишга келган шахтёрлар билан лақиллашиб ҳамон эшик олдида туришарди. Назоратчилар хонасининг эшиги очилиши билан ҳамма жимиб қолди. Оломон яна йўлга тушди: олдинда соябон арава, ундан кейин замбил кўтарганлар, орқасидан тўда-тўда одамлар боришарди. Оломон шахтадан чиқиб, қияликдан секин-аста посёлка томон кўтарилиб борарди. Ноябрьнинг дастлабки совуқлари бепоён текисликни шипшийдам қилиб кетганди; тун кулранг осмондан тушган кафандек аста-секин ерни чулғаб борарди.

Этьен Маэнинг қулоғига шивирлаб, Катринани олдинроқ юборинг, бориб онасини бу мусибатга кўниктириб турсин, деб маслаҳат берди. Қайғу-ғамга ботиб, замбил кетидан бораётган ота чурқ этмай, боши билан ишора қилган эди, қиз чопқиллаб кетди, чунки улар

уйга яқинлашиб қолишганди. Лекин посёлкадагилар соябон аравани, ҳаммага яхши таниш бу мудҳиш яшикни кўриб қолишганди. Ақлдан озган хотиндар кўчага ёпирилишди; улардан уч-тўрттаси юраклари ёрилиб бош яланг олға ташланди. Кўп ўтмай улар ўттизга, кейин элликта бўлди; ҳамманинг жон-пони чиқиб кетганди. Биров ўлиптими? Ким экан? Левакнинг гапларидан анча тинчигаилар энди алаҳсираётгандек, у ерда битта эмас, ўнтадан ҳам кўп одам ўлган, уларни бирин-кетин аравада олиб келишяпти, дейишарди.

Катрина келганда онаси жуда хавотирланиб ўтирганди; бир фалокат бўлишини билгандек Маэ хонимнинг юраги така-пука бўлиб турувди. Қиз огиз очарочмас:

— Отанг ўлибди-да! — деб қичқирди.

Лекин қизи: отамга ҳеч нарса бўлгани йўқ, деб Жанлен ҳақида қанча гапирмасин, бари бир бўлмади. Маэ хоним унга қулоқ солмай, уйдап отилиб чиқиб кетди. У черков орқасидан кўринган аравага кўзи тушди-ю, ранги оқариб, хушдан кетиб йиқилди.

Уйлари олдида турган хотинлар бўйинларини чўзиб, даҳшатдан қотиб қолишган эди; баъзилари издиҳом қайси уй олдида тўхтаркин, дея хавотирланиб туришарди.

Соябон арава ўтиб кетди. Маэ хоним арава кетидан замбил ёнида бораётган эрини кўриб қолди. Жанлени уйларининг эшиги тагида туширишаётганда она ўғлининг тирик, аммо оёқлари синганини кўргач, бирдан ўзгариб кетди. У кўз ёши тўкмай, ғазабдан бўғилиб, тутила-тутила гапира бошлади:

— Мана энди! Энди улар болаларимизни майиб қила бошлашяпти-да!.. Вой худойим-ей, яна икки оёғия! Энди уни нима қиламан-а?

— Э, овозингни ўчир-е! — деди Жанленнинг шикастланган жойини қайта боғлаш учун келган доктор.— Бола ўша ерда қолиб кетганда сенга осон бўлармиди?

Лекин Маэ хоним Альзира, Ленора ва Анрининг кўз ёшиларини кўриб, фигони бадтар ошарди. Ярадор болани уйга олиб киришда кўмаклашиб, докторга керакли нарсаларни олиб бераркан, у тақдирини лаънатлар, бу майибларни боқиш учун пулни қаёқдан оламан энди, дея зорланарди. Чолнинг оёқдан қолгани

камлик қилиб турувди, энди бола ҳам чўлоқ бўлиб қолди! У тинмай жавварди. Шу орада қўшни уйдан ҳам юракларни тилка-пора қиладиган қичқириқ ва фарёд эшитилди; Шиконинг хотини билан болалари мурда устида йиғлашаётганди. Тун зулмати босди. Эзилиб қолдан тойган кўмир қазувчилар ниҳоят овқатга ўтиришди: посёлка жимжит бўлиб қолди: бу тинчликни қаттиқ дод-фарёдларгина бузиб турарди.

Уч ҳафта ўтди. Боланинг оёғини кесмаслик иложи топилди. Жанленнинг иккала оёғи бутун қолди, бироқ доктор бола оқсоқланиб юради, деди. Ширкат текширишлардан сўнг ниҳоят Маэга эллик франк нафақа беришга қарор қилди. Бундан ташқари болакай тузалиши биланоқ ер устида иш топиб берамиз, деб ваъда қилишди. Лекин бу билан турмушлари яхшиланиб қолмади, чунки бу кўргиликлардан ғам-ғусса чеккан ота қаттиқ иситмалаб қолган эди.

Пайшанбадан Маэ яна ишга бора бошлади, бугун якшанба эди. Кечқурун Этъен яқинлашиб келаётган муддат — 1 декабрь ҳақида сўз очди; У Ширкат дўқпўписасини амалга оширармикин-йўқмикин, деб қизиқсинди. Шу оқшом соат ўнгача ухлагани ётишмади: Шаваль билан санқиб юриб ушланиб қолган Катринани кутишди. Лекин у қайтавермади. Дарғазаб бўлган она чурқ этмай, эшикни қулфлади. Этъен аллавақтгача ухлаёлмади; Альзира озгина жойини олиб ётган катта ўриннинг бўм-бўш туриши унга тинчлик бермасди.

Катрина эртасига эрталаб ҳам қайтмади; кундузи кўмир қазувчилар шахтадан уйларига қайтишгандагина Маэ хонадонидагилар Шаваль Катринани уйда олиб қолганини билишди. Шаваль шунақа бемаза қилиқлар қилдики, Катрина ниҳоят қолиб, у билан яшашдан ўзга чора топмаганди. Шаваль таъна-ташналардан қутулиш учун Ворёдан тезроқ кетишга ошиқиб, жаноби Денеленнинг Жан-Бартдаги шахтасига ёлланди. Катрина ҳам унга эргашиб, ўша ёққа юккаш бўлиб кирди. Лекин келин-куёв аввалгидек Монсуда, Пикеттларникида тураверишди.

Аввалига Маэ Шавални ўлгудек ураман, Катринани бўлса тепиб-тепиб уйга олиб келаман, деб юрди. Кейин тақдирга тан бериб, нима фойдаси бор, дея қўл силтаб қўя қолди. Ҳамиша оқибати шу бўлади, — бир-

бирини хоҳлаб туришгандан кейин қиз болага яхши кўрганинг билан учрашма, деб бўлармиди. Тўй кунини тинчгина кутиб юрган яхши. Лекин хотини бу ишга бунақа енгил қарай олмасди.

— Шу Шавалга илашиб юрганида мен битта чертдимми? — кичқирди у, мурдадек оқариб индамай қулоқ солиб турган Этьенга. — Жавоб берсангиз-чи, менга! Сиз ақлли кишисиз... Ахир биз унга тўла эркинлик бериб қўювдик-ку. Э, худойим-ей! Ҳамманинг бошида шу савдо бор. Мана, мени ўзимни олинг: отаси менга уйланганида, ўзим ҳомиладор эдим. Лекин мен ота-онамдан қочиб кетмадим, бунақа аблаҳликни асло қилмасдим: муҳтож бўлмаган кишига ишлаб топган пулимни элбурундан бериб қўймасдим. Бу — бориб турган бемаънилик-ку, нимасини айтасиз! Бу ишларнинг оқибати ҳаммани болали бўлишдан бездиради.

Этьен фақат бошини сарак-сарак қилар, она эса гапини маъқуллаб жавварди:

— Қиз ўлгур ҳар оқшом хоҳлаган ерига кетиб қолаверди! Унда раҳм-шафқат борми ўзи? То қарз-ҳаволадан қутулиб, ўзим узатгунимча қарашиб турса бўлмасмиди? Қизинг бўлгандан кейин ишлаши керак-да, — ҳамиша шундай бўлиб келган... Лекин биз унга жудаям бўш қарадик-да, эркак билан шўхлик қилиб юришга йўл қўймаслигимиз керак эди. Унга бармогингни тутсанг, бутун қўлингни ютиб юбораман, дейди.

Альзира бу гапларни маъқуллаб, бошини қамирлартарди. Бу жанжалдан қўрқиб кетган Ленора билан Анри дамларини чиқармай йиғлашарди: она бўлса, ҳамма бахтсизликларини санашда давом этарди: аввалига Захария куйдирди — уйлантириб қўйишга тўғри келди; кейин Улмас бобо: мана стулда оёқларини йиғиб ўтирипти; сўнг Жанлен, — суяги жуда секин битяпти, камида ўн кунда юра бошласа керак; ва ниҳоят қиз ўлгур Катрина эркак билан қочиб кетди — бу иши ўлганнинг устига чиқиб тепгандек бўлди! Бутун оила парчаланиб кетяпти. Шахтада энди битта отаси ишлайди-да. Эстеллани ҳисобламаганда, отаси олиб келадиган уч франкка етти жон қандай яшайди? Ҳамма бир варакайга ўзини каналга ташлашидан бошқа илож қолмади энди.

— Минг дод-фарёд қилганинг билан фойдаси йўқ,— деди Маэ бўғиқ товуш билан.— Балки энг ёмон кўргиликлар ҳали олдиндадир.

Этъен ерга тикилганча ўтирарди. Маэнинг охириги сўзларидан кейин у бошини кўтарди: афтидан, у келажак жамолини кўраётгандек эди; у секингина деди:

— Бас, вақт етди!

ТҮРТИНЧИ ҚИСМ

I

Грегуарлар қизлари Сесиль билан душанба куни Энбоникига нонуштага таклиф этилган эдилар. Ҳаммаси олдиндан ҳал қилиб қўйилган: нонуштадан кейин Поль Негрель янгитдан серҳашам қилиб қўйилган шахтани кўргани хонимлар билан жўнайди. Лекин бу яхши бир баҳона эди холос: бу сайрни Сесиль билан Полнинг тўйини тезлаштириш учун Энбо хоним ўйлаб топган.

Қўққисдан, худди ўша душанба куни эрталаб соат тўртда забастовка бошланиб қолди. Ширкат биринчи декабрдан ҳисоб-китобнинг янги системасини жорий қилганида шахтёрлар бунга парво қилишмади: икки ҳафталик маош оладиган куни ҳам ҳеч ким чурқ этиб эътироз билдирмади. Директордан тортиб кичик назоратчиларгача барча маъмурий ходимлар янги тариф қабул қилинди, дея ишонган эди. Эрталаб уруш эълон қилинганини билган маъмурият ҳанг-манг бўлиб қолди. Ҳаракатларнинг режали бориши, ишчиларнинг яқдиллиги улар орасида ғайратли раҳбар борлигидан далолат берарди.

Эрталаб соат бешда Дансарт келиб директор Энбони уйготди-да, Ворёда ҳеч ким ишга чиқмаганини хабар қилди. У айланиб чиққан Икки юз загизгон посёлкаси маст уйқуда бўлиб, ҳамманинг эшигу деразалари ёпиқ эди. Директор уйқудан шишиб кетган кўзларини ишқалаб ўрнидан турмасиданоқ уни ҳар тарафдан ўраб олиша бошлашди: ҳар чорак соатда хат

ташувчилар келиб турарди, телеграммалар ёғилиб, ёзув столи устига уйилиб кетди. Аввалига у забастовка тўлқини Ворёнинг ўзи билан чегараланса керак, деб ўйлаганди; бироқ минут сайин бир-биридан ташвишли хабарлар кела бошлади: Миру, Кручина, Мадленада фақат отбоқарларгина ишга чиқипти; интизоми ҳамма ердагидан маҳкамроқ бўлган Ғалаба ва Фетри-Кантель деган жойларда кўмир қазувчиларнинг учдан бир қисмигина ишга келипти; Сен-Томадаги ишчиларгина тўла ишга чиққан — афтидан бу шахта забастовкада қатнашмаган бўлса керак. Эно соат тўққизгача шошилиш мактублар ёздириб, ҳаммаёққа телеграмма жўнатди: Лилль префектига, Ширкат правлениеси аъзоларига воқеани хабар қилиб, йўл-йўриқ сўради. У Негрелга қўшни шахталарни айланиб чиқиб, у ерлардаги аҳвол ҳақида аниқ маълумот йиғиб келишни буюрди.

Бирдан Энонинг эсига зиёфат тушиб қолди. У энди сайр бошқа вақтга қолдирилади, дея огоҳлантириш учун Грегуарларга извошчисини юбормоқчи бўлиб турган эди, лекин бир минутча иккиланди-ю, ҳозиргина шошиб-пишиб жангга тайёрланиш ҳақида буйруқлар бергани эсига тушиб, аллақандай иродасизлиги уни бу қароридан қайтарди. У хотини олдига кетди. Хотини ўзининг пардозхонасида бўлиб, оқсоч хотин унинг сочларини тараётган эди.

— Аҳ, ҳали улар забастовка қилишдими! — вазминлик билан деди Эно хоним маслаҳат сўраган эрига. — Хўш, нима бўпти? Бизга нима? Шу забастовкани деб, зиёфатни қолдира олмаймиз-ку, шундай эмасми?

Хоним айтганида туриб олди. Эри зиёфат кўнгилдагидек бўлмайди, Сен-Томани айланишга боришолмайди, деб неча бор айтса ҳам, бари бир Эно хоним ҳаммасига жавоб топди. Шунча тайёргарлик кўрилган зиёфат расво бўлсинми? Шахтага боришни эса агар, сайр қилиш ҳақиқатан ҳам номақбул бўлса, уни қолдирса ҳам бўлади.

— Сирасини айтганда, — давом этди у оқсоч хотин чиқиб кетгач, — бугун бу ажойиб кишиларни нима учун уйимда кўришни хоҳлаётганимни ўзингиз биласиз-ку, ахир. Бу никоҳ сизни ишчиларингизнинг қандайдир бемаъни забастовкасидан кўра кўпроқ қизиқ-

тириши керак... Ниҳоят — менинг хоҳишим шу, менга қаршилиқ қилманг!

Энбо хотинига тикиларкан, баданини титроқ босаётганини ҳис қилди. У ўзини тутишга одатланган бўлса ҳам, изтироб чекаётган қалбидаги қайғу-алам тунд, тошқотган юзида акс этиб турарди. Шарти кетиб парти қолган бўлса ҳам ҳали дўмбоққина, мафтункор бу аёл куз қуёшида Церерадек товланиб, серҳашам хонада ялангоч елкаларини кўз-кўз қилиб, нозиктаъб аёллигини сездириб, мушк-анбар таратиб ўтирарди. Эри бир лаҳза уни қучоқлаб олгиси, кўкракларига бошини қўйгиси келиб кетди; лекин у ўзини тийди: ўн йилдан бери бир ёстикда ётишмасди.

— Яхши,— деди у кетаркан.— Зиёфатни қолдирмаймиз.

Энбо Арденнда туғилган. Ёшлигини камбағалларга хос қашшоқликда ўтказди, етимликда Париж кўчаларида санқиб юрди. Энбо кончилиқ институтида курсни қийинчилиқ билан тамомлаб, йигирма тўрт ёшида Гран-Конбга жўнади ва авлиё Варвара шахтасига инженер бўлиб ишга кирди. Уч йилдан кейин эса у Па-де-Каледаги Марль конларининг округ инспектори бўлиб олди ва Аррасдаги йигирув корхонасининг бадавлат эгаси қизига уйланди. Бу омад кон хизматчиларига насиб бўладиган бахтнинг ногаҳоний армуғонларидан бири эди. Эр-хотин ўша вилоят шаҳарчасида ўн беш йил туришди, уларнинг бир маромда кечаётган ҳаётини бирор муҳим воқеа бузолмади; ҳатто уларнинг болалари ҳам йўқ эди. Бундай ҳаёт пулга ўч бўлиб тарбияланган Энбо хонимнинг жинини борган сари кўпроқ кўзгар эди. У қизлигида орзу қилган ҳашам-хушамларни рўёбга чиқаришга имкон бермайдиган даражада оз пулни оғир меҳнат билан топадиган эридан нафратланарди. Ниҳоятда софдил бўлган Энбо пул келадиган бирорта ҳам алдам-қалдам ишда қатнашмас, ўзини худди поstda турган солдатдек тутар эди. Эр-хотин ўртасидаги келишмовчиликлар борган сари кучайди. Бунинг устига хотинидаги ҳар қандай эҳтиросли эркакни ҳам совитиб юборадиган галати бир одат — жисмоний жирканиш ҳам қўшилиб кетганди. Энбо малласоч, нозик табиатли хотинини яхши кўрарди. Лекин икковлари алоҳида-алоҳида хо-

нада ётишар, икковлари ҳам бир-бирларидан қониқмас, муросалари келишмас эди. Хотинининг ўйнаши бўлиб, буни эр билмасди. Ниҳоят Энбо Па-де-Каледан Парижга кўчиб кетиш йўлини қилди, Ширкат правлениссига ишга кириб олди: бу билан у хотинининг миннатдор бўлишидан умид қилганди. Лекин хотини қизлик чоғларида орзу қилиб юрган Париж уларнинг турмушидаги ноиноқликни янада кучайтириб юборди. Бу ерда у бир ҳафта ичидаёқ андиликнинг изини ҳам қолдирмай, дарҳол башанг хонимга айланди-ю, ўзини жон-жаҳди билан улкан шаҳардаги дабдабали ҳаётнинг телба гирдобига урди. У Парижда ўн йил туриб орттирган суюкли кишиси билан очиқ алоқа қилиб юрди: бу одам уни ташлаб кетгач, сал бўлмаса ўлаёзди. Бу сафар унинг алоқаси эрига ошкор бўлиб қолди, лекин эр буларнинг ҳаммасини олдидан олиб ордасига ташлади, хоҳлаган жойда кўнглини хушлайдиган бу хотиннинг хотиржамлик билан беҳаёлик қилаётганини кўрсатувчи қабиҳ ишларидан ҳанг-манг бўлиб қолаверди, Хуштори билан муносабати узилгандан кейин хоним куйиб касал бўлиб қолди. Шунда Энбо Париждан кетишга қарор қилиб, зора хотиним бийдек кўмир ўлкасида тузалса, деган умидда Монсудаги конлар бош бошқармасига катта бўлиб келди.

Энболар Монсуга кўчиб келишганларидан кейин кунлари яна турмуш қурган дастлабки йилдагидек гурбатда ўта бошлади. Аввалига Энбо хоним бу осойишталикка кўнгандек кўринарди. У бепоён текисликнинг бир маромдаги осойишталигидан лаззатланар, бу дунёдан умидини узгани учун ўлишга ҳам тайёр эди; у куйиб кул бўлдим, ёруғ жаҳондан айрилдим, дея ўзини ишонтиришга уринар, ҳатто тўлиша бошлаганидан ҳам ташвишланмас эди. Лекин ана шу лоқайдлик замирида умри ўтган сари саросимага тушиб, яшашга интилиши яшириниб ётарди. Энбо хоним ярим йилгача бу иштиёқни ҳатто ўзидан ҳам яшириб, директорнинг мўъжазгина уйини ўз дидига мослаб жиҳозлаш билан шуғулланди. У кўзига бефайз, хунуқ кўринган бу уйни гиламларга, майда-чуйда безаклару қимматбаҳо зеб-зийнатларга шундай тўлдириб ташладики, бу ҳақдаги гап-сўзлар Лиллгача бориб етди. Бу жойнинг ўзи Энбо хонимнинг жинини

кўзгарди: юракни сиқадиган бийдай далалар, битта ҳам дарахти йўқ, доимо қоп-қора йўл, башарасига қараб бўлмайдиган аҳоли — буларнинг ҳаммаси кўзига ёмон кўринар ва ваҳимага солар эди. У ўз юртимдан қувғун бўлдим, дея тақдиридан нолий бошлади; у рўзғорга зўр-базўр етадиган фақирона маош — қирқ минг франк ойлик учун мени қурбон қилдинг, — дея эрини айблашга тушди. У ҳам бошқаларга ўхшаб иш тутиши керак эди: ўз улушини талаб қилиши, акциялар сотиб олиши, — хуллас, сал кўзга кўринган одам бўлиши керак эди-да; эрига катта бойлик олиб келган бадавлат меросхўр бўлгани учун қаттиқ туриб, шу фикрини эрининг қулоғига қуяверди. Доимо ўзини совуққон тутиб, вазмин бошлиқ ниқобида юрадиган Энбо жаноблари бўлса, қариб бораётган хотиннинг қоникмайдиган истаклари йил сайин катталашиб кетаётганини кўриб, қаттиқ азоб чекарди. У бирон марта ҳам хотинидан ўйнашчалик ҳузур-ҳаловат кўрмаганди, шу боисдан у доимо хотиним бошқа билан дон олишган вақтидагидек менга ҳам бирон марта ўзини бағишлармикин, дея армон қилиб юрди. Энбо ҳар куни эрталаб шу оқшом хотинимнинг қайсарлигини енгаман, дея орзу қиларди; бироқ хотини унга совуқ нигоҳ ташлаганида уни ййдириб бўлмаслигини сезарди-ю, ҳатто қўлига тегиб кетмасликка ҳаракат қиларди. Бу дардга ҳеч қандай даво йўқ эди. Энбо сиртдан сипо кўрингани билан оилавий ҳаётда бахт топмаган нозик табиатли киши сифатида ич-этини еб юрарди. Ярим йилдан кейин уй бутунлай жиҳозлаб бўлинди. Энди Энбо хонимнинг ташвишлари қолмади; энди у юраги сиқилиб, ўзини ўлишига рози бўладиган қувғин қурбони қилиб кўрсатар эди.

Худди шу пайтда Монсуга Поль Негрель келиб қолди. Унинг онаси Авиньонда истиқомат қилган провансальц-капитаннинг беваси бўлиб, озгина рента ҳи собга яшаб, узоқ вақтгача оч-наҳор қолиб бўлса ҳам ўглининг политехникумда ўқиб олишига имконият яратиб берганди. Поль техникумни битиргач, кичикроқ бир вазифага тайинланди; Энбо жаноблари жиянига шу вазифадан воз кечиб, Ворёда инженер бўлиб ишлашни таклиф қилди. Шундан бери Поль Энболарни-кига кўчиб келиб, ўз уйдагидек тураверди, унинг

хонаси бўлиб, дастурхони тайин эди, ҳар ойда оладиган уч минг франк маошининг ярмини онасига юбориб турарди. Жаноб Энбо бу ҳаёру саховатни андавалаш мақсадида шахтадаги инженер, хизматчиларга ажратиб бериладиган уйлардан бирида туриб, ўз рўзгорини ўзи қилиши ҳар қандай йигит учун оғир эканлигига Негрелни ишонтирди. Энбо хоним эса шу заҳоти ўзини меҳрибон хола қилиб кўрсатди-да, Полни сенсираб, унга қулай шароит яратиш ғамини еди.

Энбо хоним дастлабки ойларда айниқса онадек меҳрибонлик қилиб, бўлар-бўлмас нарсаларга ҳам маслаҳат бераверди. Лекин ҳар қалай хотинлигига борди-ю, секин-аста шахсан иқроор бўла бошлади. Еш бўлишига қарамай ўз ишига пишиқ, билағон, ҳар қандай ақидалардан холи, муҳаббатга файласуфона қарайдиган бу йигит киррабурунли, озғин юзини маълум даражада важоҳатли қилиб кўрсатадиган ўта маъюслиги билан хонимнинг кўнглини ром қилганди. Худди кутилгандек бўлди: бир оқшом Негрель ўзини хонимнинг қучоғида кўрди. Энбо хоним ўзини гўё кўнгли юмшоқлигидан раҳми келиб, унинг раъйини қайтаролмагандай қилиб кўрсатди ва ҳамма нарсадан кўнглим совиб кетган, энди мен ҳеч кимни сева олмайман, фақат дўст бўлиб қолишим мумкин, деб ишонтиришга уринди. Аслини олганда, хоним рашкчи эмасди, у ҳадеб Полга юккаш қизлар билан ўйнашиб юрасан, деб тегишарди; лекин йигит уларнинг ҳаммаси расво-ку, дерди, шу боисдан Энбо хоним айтишга арзийдиган бирон қилиқ қилмагани учун Негрелдан жаҳли чиқарди. Кейин бирдан Энбо хоним Негрелни уйлантириб қўйиш фикрига тушиб, ўзини қурбон қилиб бўлса ҳам уни икки қўллаб бирор бадавлат қизга топширишни орзу қила бошлади. Уларнинг алоқаси давом этаверди. Бу бўш вақтда бир эрмак эди, аммо Энбо хоним бундай пайтда бор ҳафсаласи билан нозу карашма қиларди.

Икки йил ўтди. Бир куни кечаси жаноб Энбо шубҳага тушиб қолди: у эшиги орқасидан бировнинг яланг оёқ лип этиб ўтиб кетганини эшитди. Лекин у уйида бунақа гап — жияни билан хотини ўртасида алоқа бўлишини хаёлига ҳам келтира олмасди, ахир онаси тенги-я! Бунинг устига эртасига эрталаб хотини

Полга қайлиқ топиб қўйдим, яна ким — Сесиль Грегуарни, деб қолди. Хотини бу никоҳни бўлдириш учун шунчалик ҳафсала билан киришдики, Энобо миясига шу қадар бемаъни фикр келганини эслаб, қизариб кетди. У ҳатто жияни келганидан бери уйдаги дилсиёҳликлар камайгани учун ундан миннатдор ҳам бўлиб қўйди.

Пардозхонасидан чиқиб, пастга тушган Энобо жаноблари вестибюлда ҳозиргина келган Негрелни учратди. Чамаси, забастовка воқеалари уни ниҳоятда қизиқтириб қўйган эди.

— Хўш, нима гап? — сўради тоғаси.

— Мен ҳамма посёлкаларни айланиб чиқдим. Афтидан, кўмир қазувчилар оқилона иш қилишаётганга ўхшайди. Улар сенга делегация юборишмоқчи шекилли.

Шу пайт тепадан Энобо хонимнинг овози эшитилди:

— Сенмисан, Поль?.. Менинг олдимга кир, янгликларни гапириб бер. Бу одамларнинг забастовка қилгани нимаси, аҳмоқлик-ку, ахир яхши яшашади-ку!

Тафсилотларни билиш директорга насиб бўлмади, чунки у билиб келиш учун юборган одамани хотини олиб кетган эди. У яна ёзув столига ўтирди: янги хабарлар уйилиб кетганди.

Соат ўн бирда Грегуарлар келишди. Бундай кутиб олишдан улар гоят ҳайратда қолишди: эшик ёнида қоровул бўлиб турган малай Ипполит шоша-пиша уларни уйга олиб кирди-да, ташвишланиб, кўчанинг ўнгу сўлига қаради. Меҳмонхонанинг пардалари туширилган, меҳмонларни иш кабинетига олиб киришди: Энобо жаноблари бунақа қабул учун кечирим сўраб, меҳмонхонанинг деразалари кўчага қарагани, одамларнинг гашига тегмаслик лозимлигини айтди.

— Ие! Сизлар ҳали билмайсизларми? — сўради у уларнинг ҳайратга тушганини кўриб.

Забастовка ҳақиқатан ҳам бошланганини билгач, Грегуар ўзига хос мулойимлик билан елкасини қисиб қўйди. Бунинг сира зиёни йўқ, шахтёрлар инсофли одамлар, улардан ёмонлик чиқмайди. Грегуар хоним кўмир қазувчиларнинг азалдан қобиллигига мен ҳам ишонаман, дегандек бошини қимирлатиб қўйди. Соғлом, дуркун, тўқсариқ кўйлак кийган Сесиль эрталабданоқ димоғи чоғ эди: у забастовка бошланганини

эшитиб, жилмайиб кўйди: унинг эсига ишчилар посёлкаларига бориб, хайру эҳсон улашганлари тушиб кетди.

Лекин шу пайт Энбо хоним Негрелни эргаштириб келиб қолди: хонимнинг эғнида қора шойи кўйлак.

— Жуда бемаъни иш бўлди-да, а?!— хитоб қилди у ҳали эшикдан кирмасданоқ.— Бу одамлар гўё кутиб тура олишмагандай-а! Сизларга айтсам, Поль бизларни Сен Томага олиб бормоқчи эмас.

— Биз шу ерда қола қоламиз,— лутфан мулойимлик билан деди Грегуар хоним.— Шу ерда ўтирсак ҳам роҳат қиламиз.

Поль Сесиль ҳамда унинг онасига таъзим қилиш билан кифояланди. Бундай эътиборсизликдан ранжиган холаси кўзлари билан қиз томон ишора қилди, уларнинг чақчақлашиб гаплашаётганини кўриб, икковига оналик меҳри билан қараб кўйди.

Бу вақт жаноб Энбо телеграммаларни ўқиб, жавоблар ёзаётганди. Шундоққина ёнида суҳбат қизиб борарди. Энбо хоним меҳмонларга кабинет жиҳозларига унча эътибор бермаганини сўзларди: ҳақиқатан ҳам кабинетда эски, ранги ўчиб кетган қизил қоғозлар, қизил ёғочдан қилинган кўпол мебеллар қолганди, стол устида эса ҳужжатлар солинган папкалар ётарди. Чоракам бир сват вақт ўтди, меҳмонлар энди дастурхонга ўтиришмоқчи бўлиб туришувди ҳамки, камердинер кириб, Денелен жаноблари келганини хабар қилди. Ниҳоятда ҳаяжонланган Денелен кириб, Энбо хонимга таъзим қилди.

— Э, сиз шу ердамидингиз?— деди у Грегуарларга кўзи тушиб, сўнг дарҳол директорга мурожаат қилди:— Демак, ҳар қалай шу иш бўлибди-да, а? Мен ҳозиргина инженеримдан эшитдим... Сирасини айтганда, барча ишчиларим бугун эрталаб шахтага тушишди, бироқ забастовка бoshқа шахталарга тарқалиши мумкин. Мен жуда хавотирдаман... Хўш, сизларда қандоқ бўляпти?

У от чоптириб келганди. Унинг талвасага тушгани бақириб гапиришидан ва қўлларини бесаранжом ўйнатишидан ҳам сезилиб турарди: бу ҳаракатлари уни истеъфога чиққан кавалерия офицерига ўхшатиб юборарди.

Жаноб Энбо ишнинг боришини батафсил гапириб бераётган эди, лекин шу чоқ Ипполит емакхонанинг эшигини ланг очиб юборди. Шунда Энбо ҳикоясини тўхтатди.

— Биз билан нонушта қилиб кетинг,— деди у меҳмонга мурожаат қилиб.— Нонушта пайтида ҳаммасини айтиб бераман.

— **Майли**, ихтиёрингиз,— жавоб берди Денелен таклиф учун раҳмат ҳам айтмаганига хижолат бўлиб.

Лекин у буни ҳурматсизлик деб ўйлади-да, Энбо хонимга мурожаат қилиб, шу заҳоти кечирим сўради. Хоним жуда ийиб кетди. Хоним еттинчи одамга вилка-қошиқ ва лycopчa қўйишни буюриб, меҳмонларни жой-жойига ўтқизди: Грегуар хоним билан Сесилни эрининг икки ёнига; Грегуар билан Денеленни ўзининг ўнг ва чап томонига; Полни эса қиз билан унинг отаси ўртасига ўтқизди. У тамадди қиларкан, жилмайиб деди:

— Мени кечирасизлар: сизларни устрица билан меҳмон қилмоқчийдим,— ҳар душанба куни Маршьеннга Остендедан тирик устрица олиб келишади,— ошпаз хотинни олиб келиш учун фойтонда юбормоқчи бўлиб турувдим... Лекин у тагин одамлар тош отиб юришмасин, дея қўрқиб бормади...

Ҳамма хахолаб кулиб юборгани учун унинг гапи чала қолди. Бу — ҳаммага жуда қизиқ туюлди.

— Секинрок, жаноблар! — деди жаноб Энбо кўчага қараган деразага ташвишли назар ташлаб.— Бугун бизникида меҳмонлар борлигини улар билмаслиги керак.

— Бари бир бунақа колбасани улар тушларида ҳам кўришмайди,— деди жаноб Грегуар.

Яна ҳамма кулиб юборди, лекин бу сафар сиполик билан кулишди. Меҳмонлар фламанд обойлари ёпиштирилган, эски эман мебедрлар билан жиҳозланган бу хонада яйраб, чақчақлашиб ўтиришарди. Буфетнинг ойнабанд эшигидан кумуш вилка-қошиқлар ярқиллаб кўрниниб турарди; қизил мисдан ишланган катта лампа шифтда осилиб турарди; унинг силлиқ сиртида сирланган сопол туваклардаги хурмо дарахти билан нилуфар гуллари акс этарди. Ташқарида декабрнинг совуқ куни изиллатади, зирқиратувчи шамол изғирини

қутуради. Лекин хонага ғир этган шамол кирмасди; худди оранжереядагидек иссиқ, тилим-тилим қилиб кесиб, биллур идишга қўйилган ананаснинг хушбўй ҳиди димоққа урилади.

— Дарпардаларни тушириб қўйсакмикин, а? — таклиф қилди Негрель, у Грегуарларни қўрқитиб, завқланмоқчи эди.

Хизматкорга ёрдам бераётган оқсоч хотин унинг сўзларини буйруқ деб тушуниб, деразаларнинг биридаги дарпардани тушириб қўйди. Шундан кейин ҳазил-мутойибалар бошланиб кетди: ҳамма ўз вилкақошиқларини ҳар хил мулоҳазаларга бориб, эҳтиёт-корона олар, ҳар бир лаганни босиб олинган шаҳардаги талондан омон қолган ўлжадек муборақбод қилишарди. Лекин уларнинг ясама хушчақчақлиги замирида кўрқув бўлиб, ҳамма беихтиёр деразаларга қараб қўярди: худди уларнинг зиёфат дастурхонини ташқаридан оч оломон ўраб олгандай эди.

Шоколадли тухум қуймоқдан сўнг хонбалиқ келтиришди. Гап мавзуи бир ярим йилдан бери етилиб келаётган sanoat кризисига кўчди.

— Бу кризиснинг олдини олиб бўлмасди,— деди Денелен.— Кейинги йилларда фаровонлик ҳаддан ошиб кетди, бунинг оқибати эса бундан бошқача бўлиши мумкин эмас... Бир ўйлаб кўринг-а, темир йўллар, портлар, каналлар қуриш учун қанчадан-қанча беҳисоб маблағ кетди, энг бемаъни чайқовчиликка қанча пул соврилди. Узимизнинг жойимизни олинг, жилла курса,— озмунча қанд заводи қурилдими бу ерда: уларга қараб, нима, бу округда лавлагидан йилига уч марта ҳосил олинадими, деб ўйлаб қоласан... Албатта, энди ҳеч кимда пул қолмади-да. Сарфланган миллионларнинг фойда келтиришини кутиш керак; ҳамма ўзи билан ўзи овора бўлиб қолди, ишлар юришмади.

Жаноб Энбо бу гапларга қўшилмаса ҳам, лекин фаровонлик йиллари ишчиларни талтайтириб юборганлигини тан олди.

— Инсофсизларни қаранг-а! — хитоб қилди у.— Бу муттаҳамлар шахталаримизда кунига олти франкдан ишлашарди, ҳозир туширишаётганидан икки ҳисса кўп эди-ку! Яхши туришарди ҳам, зеб-зийнатга

ҳам ҳафсала қиладиган бўлишувди... Энди бўлса улар аввалги фақирона ҳаётга қайтгилари келмай қолди.

— Грегуар жаноблари, хонбалиқдан олинг, — деди Энбо хоним эрининг гапини бўлиб. — Яна олинг, еб ўтиринг... Жуда тотли-да, тўғрими? *

— Лекин инсоф билан айтганда, бунда бизнинг нима айбимиз бор? — давом этди директор. — Узимиз ҳам қоврилиб ётибмиз-ку ахир... Заводлар бирин-кетин ёпиляпти, йиғилиб қолган кўмирни сотиш ўлимдан ҳам қийин бўляпти. Буюртмалар тобора камайиб бормоқда, шунинг учун ҳам биз беихтиёр кўмир қазиб чиқаришга бўладиган харажатларни камайтиришга мажбурмиз... Ишчилар бўлса, буни тушунишни ишашмаляпти.

Орага сукунат чўкди. Малай қовурилган қирғовул олиб келди, оқсоч хотин эса меҳмонларга шамбертен виносидан кую бошлади.

— Ҳиндистонда очлик бўлди, — давом этди Денелен овозини пастлатиб, гўё ўзи билан ўзи гаплашгандек. — Америкадан темир билан чўянга буюртма келмаяпти, бу эса чўян ва пўлат қуйиш заводларимизга қақшатқич зарба беради. Ҳамма нарса таққа тўхтайдди: дунё бир ҳимога мақтал бўлиб турипти, бир туртки бўлса бас, ҳаммаси остин-устин бўлиб кетади... Империя эса бу саноат васвасасидан нақадар фахрларнади!

У қирғовул қанотини ейишга тушди.

— Ҳаммадан ёмони шуки, — гапида давом этди Денелен овозини сал баландлатиб, — кўмир қазиб чиқариш харажатларини қисқартирган ҳолда кўмир қазиб чиқаришни кўпайтириш зарур. Бундай бўлиши мантиқан тўғри, акс ҳолда иш ҳақи камайиб кетиб, ишчилар бировларнинг зиёнларини тўлаб юрипмиз, дейишлари турган гап, бундай дейишга ҳақлари бор.

Бунақа очиқ иқроф мунозарага сабаб бўлди. Хонимлар бунақа гапларга мутлақо қизиқмасди. Бунинг устига ҳамма ҳам иштаҳасини қондириш учун овқат ейиш билан овора эди. Малай яна кириб, бир нима айтмоқчи бўлди-ю, аммо журъат қилолмай туриб қолди.

— Нима гап? — сўради Энбо. — Телеграммаларми?.. Менга беринг-чи. Бир неча жойдан жавоб кутиб турибман.

— Йўқ, тақсир, жаноби Дансарт келдилар... Вестибюлда туриптилар... Лекин сизни безовта қилишга кўрқяптилар.

Директор меҳмонлардан кечирим сўраб, катта штейгерни чақириб келишни буюрди. Штейгер кириб, столдан бир неча қадам берида тўхтади; шунда ҳамма ўгирилиб, бу баланд бўйли, ҳансираб турган одамга, қандай янгилик олиб келдйкин, дея қарашди. Посёлка жимжит экан; бироқ директорга делегация юборишга қарор қилишгани аниқ. Делегатлар, эҳтимол, бир неча минутдан кейин келишса ажаб эмас.

— Жуда соз, сизга ташаккур, — деди Энбо. — Менга эрталаб ҳам, кечкурун ҳам хабар қилиб тулинг, туншундингизми?

Дансарт кетгач, яна ҳазил-ҳузул гаплар давом этди. Ҳамма агар ейиш керак бўлса, бир лаҳзани ҳам бой бермай уриб қол, қабилада иш тутиб, русча салатга ёпишди. Негрель оқсоч хотиндан нон сўраган эди, аёл: «Хўп бўлади, тақсир», дея жавоб берди. лекин бу гапни у шунчалик секин, чўчиган товуш билан айтдики, гўё орқасидан зўравон ва қотиллар шайкаси қувиб келаётгандек эди. Ҳамма хандон отиб кулиб юборди.

— Сиз хотиржам гапиравеинг, — деди далда бериб Энбо хоним. — Улар ҳали бу ерга келишганлари йўқ.

Директорга бир даста хат билан телеграмма беришди; хатларнинг бирини эшиттириб ўқиди. Бу хат Пьерондан бўлиб, у таъналарга қолмаслик учун ўртоқлари билан забастовкада қатнашишга мажбур бўлганини эҳтиром билан хабар қилиб, гарчи ўзи бундай жатти-ҳаракатларни қораласа ҳам делегацияда қатнашишдан воз кеча олмаганини кўшиб қўйган эди.

— Мана озод меҳнат дегани, кўриб қўйинглар! — хитоб қилди Энбо.

Гап яна забастовкага кўчди; бу ҳақда директорнинг фикрини сўрашди.

— Э,— жавоб берди у,— биз бундан бадтар забастовкаларни ҳам кўрганмиз!.. Худди охирги забастовка вақтидагидек, бир ҳафта, нари борса икки ҳафтагача улар ялқовлик қилиб юришади. Қовоқхоналарни изғишади; кейин росаям очиқиб, шахтага қайтишади.

Денелен бошини чайқаб деди:

— Менимча, бу гал сиз ўйлагандек жўн эмас... Бу сафар улар, назаримда, анча уюшқоқлик билан ҳаракат қилишяпти. Ҳатто уларнинг ўзаро ёрдам кас-салари ҳам бор.

— Ҳа, лекин унда уч минг франкдан ортиқ пул йўқ; шу пулга қанча яшашлари мумкин? Менинг гу-монимча; уларнинг бошлиғи Этьен Лантье деган бир кимса бўлса керак. У яхши ишчи, шунинг учун ҳам мен Ворёни ўз сафсаталари ва пивоси билан заҳарла-ётган машҳур Расиёрни ҳайдаб юборганимдек, уни ҳам қувиб юборгим йўқ... Бари бир бир ҳафтадан ке-йин ишчилар ишга чиқишади, икки ҳафтадан сўнг эса ўн минг ишчининг ҳаммаси шахтада бўлади.

Энбо бунга амин эди. У фақат Правление забас-товка учун масъулиятни менга ағдаради-ю, кейин ёмон кўриниб қоламанми, деган андишадан ташвиш-ланаётган эди. Кейинги пайтларда унга бўлган муно-сабат ёмонлашиб қолганди. У салатли қошиқни қўй-ди-да, Париждан олинган телеграммаларни қайта-қай-та ўқиб, ҳар бир сўзнинг маъносини қақишга уринди. У кечирим сўради. Энди бу нонушта ҳарбийларнинг урушга киришдан олдин жанг майдонидаги овқатла-нишига ўхшарди.

Хонимлар ҳам суҳбатга аралашинди. Грегуар хо-ним очликка маҳкум этилганларга қайгурди. Сесиль кўз олдига посёлкаларни айланиб, нон билан гўшт учун талон тарқатиб юришини келтирди. Бироқ Мон-судаги кўмир қазувчиларнинг қашшоқлиги ҳақида гап борганида Энбо хоним ниҳоятда ҳайрон бўлиб қолди. Вой, нега унақа дейишади, уларнинг ҳаммаси жудаям бахтли-ку! Ширкат ҳисобига тураржой, ёқил-ғи, медицина ёрдами олишади-ку! Одамлар оммасига тамомила лоқайд қарайдиган, улар ҳақида бошқалар-дан эшитганларини ёдлаб олиб, Париждан келувчи-ларга такрорлайдиган хоним ўзи ҳам бунга ишониб, энди одамларнинг ношукурлигидан ғазабга келган эди.

Негрель эса жаноб Грегуарни кўрқитишини қўй-масди. Сесиль унга ёқиб қолди, холасининг кўнглини олиш учун инженер Сесилга уйланишга тайёр эди: лекин қизга нисбатан юраги сира жиз этмади; Нег-релнинг гапларига кўра, тажрибали одам бўлгани учун у ўйламай-нетмай сева олмасди. Негрель ўзини рес-

публикачи деб ҳисобларди; лекин бу нарса унинг ишчиларга ниҳоятда қаттиққўл ва хонимлар олдида уларни майна қилишига халақит бермас эди.

— Мен тоғамнинг умидбахш гапларига кўшилмайман,— деди у.— Жиддий тартибсизликлар рўй бермаса, деб қўрқаман... Грегуар жаноблари, Пиолени масҳамроқ кулфлаб олишингизни маслаҳат бераман. Талончилар шипшийдам қилиб кетиши мумкин.

Негрель бу гапни Грегуарнинг мулоҳим чехраси одатдагидек табассум билан ёришиб, кўмир қазувчиларга оталарча меҳр-мурувват изҳор қилишда хотинидан ўзиб кетишга интилаётган бир пайтда айтди.

— Талаб кетишади? Мени-я?— ҳайратланиб хитоб қилди Грегуар. — Нега энди улар мени талар экан?

— Ие, ҳали сиз Монсудаги тошкўмир конларининг акционери эмасмисиз? Ўзингиз ҳеч нима билан шуғулланмай, бировнинг меҳнати ҳисобига яшайсиз-ку. Ниҳоят, сиз лаънати капиталнинг намояндасисиз, шунинг ўзи кифоя... Менга ишонаверинг, ҳа, мабодо революция ғалаба қилиб қолгудек бўлса, ҳамма топган-тутган бойлигингизни беришга мажбур қилишади сизни, чунки бу пулларнинг ҳаммасини талончилик йўли билан топгансиз.

Грегуарнинг чехрасидаги хотиржамлик билан одатдаги осойишталик бир зумда сўнди.

— Менинг бойлигим — талончилик билан топилган пуллар эканми?— гўлдираб деди у.— Ота-боболарим шу бойликни оғир меҳнати билан топмаган эканми, машаққат билан топганини шу корхонага сарфламаган эканми ҳали? Бор-будимизни сарфлаганимизда таваккал қилмаган эканмизми? Ҳозир ҳам даромадларимни бирор бемаъни ишга сарфлаётиманми?

Она билан қиз кўрқиб, ранглари оқариб кетганини кўриб, ташвишга тушган Энбо хоним дарҳол гапга аралашди:

— Поль ҳазил қиляпти-да, азизим Грегуар.

Лекин Грегуар жанобларининг жаҳли чиққан эди. Малай эринмай териб чиқилган қисқичбақали лагани меҳмонларга тутаркан, Грегуар шуурсизлик билан учтасини олди-да, қисқичбақа панжасини мужий бошлади.

— Э, баҳслашиб ўтирмайман, акционерлар орасида ўз лавозимини сунистеъмом қилувчилар ҳам бор. Менга, масалан, баъзи министрлар Ширкатга кўрсатган хизматлари учун пора тариқасида акциялар олишганини айтиб беришди. Яна бир шахс бор, номини айтмайман, ўзи герцог, акционерларимизнинг энг бойи! Жуда кўп расвогарчиликлар қилади, хотинбозлик, маишатбозликка, кераксиз зебу зийнатга миллион-миллион франкни совуради... Лекин биз-чи, биз хоксорлик билан ҳалол яшаймиз! Биз чайқовчилик қилмаймиз, бориға шукур қилиб яшаймиз, ортса камбағалларга ҳам берамиз!.. Йўқ, йўқ, мутлақо бўлмаган гап бу! Мабодо сизнинг ишчиларингиз бизнинг игнамизни тортиб олишса, унда ўтакетган қароқчи бўлишлари керак!

Грегуарнинг қаҳру ғазабини тошириб, томоша қилаётган Негрель энди ўзи уни юпата бошлади. Малай қисқичбақа солинган лагани айлантириб тутар эди, қисқичбақа пўстининг кусур-кусури эшитиларди. Гап сиёсат масалаларига кўчди. Ҳамон қўрқувдан титроғи босилмаган Грегуар либерал нуқтаи назарларини баён қила бошлади; у афсус-надомат билан Луи-Филиппни эслади. Қаттиққўллик сиёсати тарафдори бўлган Денелен эса, император хавфли келишувчилик йўлига кирди, деб эълон қилди.

— Саксон тўққизинчи йилни эсланг,— деди у.— Бу революция зодагонларнинг фалсафа соҳасидаги янги фикрларга эътиқод қўйишлари туфайли рўй берди... Хўш, нима бўпти! Энди буржуазия ўша бемаъни ўйинни давом эттирмоқда, либерализмга муккасидан кетиб, вайронгарчиликларни қўмсаепти, халққа тилёғламалик қиляпти... Ҳа, ҳа, бизни ғажиб ташлаши учун ўзларингиз аждаҳонинг тишларини қайраяпсиз, у албатта бизни ғажиб ташлайди, хотирингиз жам бўлсин!

Хонимлар уни жим бўлишга мажбур этишди-да, мавзуни ўзгартириш учун унинг қизларини сўрашди. У Люсининг бир дугонаси билан Маршьенда ашула айтишни ўрганаётганини, Жанна бўлса бир кекса девона бошининг суратини чизиш билан банд эканлигини гапирди. Бироқ Денелен бу гапларни директордан кўзини узмай паришонхотирлик билан айтди; директор бўлса, меҳмонлар борлигини ҳам унутиб, телеграммаларни ўқишга тушганди. У юпқа қоғозларга

қараб, Парижни кўз олдига келтирар, забастовка оқибатини ҳал қилувчи бошлиқларининг фармойишларини илғаб олар эди. Денелен хавотирлигини яшира олмай:

— Хўш, қандай чора кўрмоқчисиз?— деб сўради бирдан.

Энбо чўчиб тушди-да, кейин чалғитиб:

— Кўрамиз,— деб қўйди.

— Албатта, сизнинг мавқенгиз мустаҳкам, сиз кутиб туришингиз мумкин,— деди хаёл суриб Денелен... — Лекин забастовка Вандамга ёйилса борми, мен хонавайрон бўламан. Жан-Барт шахтасини янгитдан ремонт қилиб олган бўлсам ҳам, иш узлуксиз давом этмаса, шу битта шахта билан ҳеч қаёққа боролмай... ҳолимга маймунлар йиглайди, ҳа, менга ишонаверинг!

Денеленнинг беихтиёр иқроп бўлиши Энбо жанобларини ҳайратга солиб қўйди чоғи. У диққат билан тинглай бошлади, миясида бир режа пишиб етила бошлади. Борди-ю, забастовка хунук тус олса, бу забастовкадан фойдаланиб, қўшни шахта хўжайинининг батамом хонавайрон бўлишига эришиши керак, кейин унинг шахтасини арзон-гаров сотиб олиш лозим. Бу эса бир неча йиллардан бери Вандамни қўлга киритиш орзусида юрган бошлиқларни ийдириш учун энг яхши восита бўлур эди.

— Агар Жан-Барт сизларга шунча ташвиш туғдираётган бўлса,— деди кулиб директор,— нега энди шу шахтани бизга ўтказиб қўя қолмайсизлар?

Лекин Денелен шикоят қилганига энди пушаймон эди.

— Ҳеч қачон сиз айтганча бўлмайди!— хитоб қилди у ғазаб билан.

Унинг тутақиб кетганидан ҳамма кулиб юборди. Ширинлик келиши билан забастовка унутилди. Олмали крем ҳамманинг мақтовига сазовор бўлди. Хонимлар буни қандай тайёрлаш йўлини суриштириб кетишди. Ананас ҳам жуда ажойиб экан. Мевалар — узум билан ноқ тўкин дастурхонга файз киритиб, ҳамманинг димоғини чоғ қилди. Ҳаммалари гангир-гунгур гапга тушиб кетишди: малай эса жуда жўн ҳисобланган шампань ўрнига рейнвейн қўйди.

Шубҳасиз, Поль билан Сесилнинг тўйлари ҳақи-

даги масала анча сурилди: ширинлик ҳаммани бир-бирига ийдириб қўйганди. Хола Негрелга шундай маъноли қарадики, у жуда мулойим бўлиб, талончилик ҳақидаги гаплардан ўтакаси ёрилган Грегуарларни шинавандалик билан яна ўзига оғдириб олди. Хотини билан жиянининг тили бирлигини пайқаган Энбо қалбида яна даҳшатли гумон гимиллаб қолганини бир лаҳза ҳис қилди: гўё уларнинг кўз уриштиришида сирли бир боғланиш борлигини пайқагандек бўлди. Лекин тўй ҳақидаги фикр унга яна таскин берди: ахир бу тўй шу ерда, унинг кўзи олдида бўляпти-ку.

Ипполит кофе бераётганда қўрқиб кетган оқсоч хотин емакхонага югуриб кириб деди:

— Бегим, бегим, улар келишди!

Келган кишилар делегатлар эди. Эшиклар қарскурс этиб, гўё қўшни хонадан даҳшат нафаси келаётгандек бўлди.

— Уларни меҳмонхонага бошлаб кириг, — буюрди Энбо жаноблари.

Дастурхон атрофида ўтирган меҳмонлар бир-бирларига ташвишли нигоҳ ташлаб олишди. Сукунат чўкди. Кейин улар бояги ҳазил-мутойибаларини давом эттиришга ҳаракат қилишди: қолган қаёқ-қурсни чўнтақларига солиб, дастурхонни йиғиштириб олиш кераклигини айтишди. Лекин директор ҳўмрайиб ўтирганидан кулгилар секин-аста тўхтади: ҳамма шивирлашга ўтди. Бу орада меҳмонхонадан вазмин қадам товушлари эшитилди — делегатлар гиламни босиб кириб келишаётганди.

Энбо хоним эрига мурожаат қиларкан, товушини пасайтириб деди:

— Кофенгизни ичиб қўярсиз, а?

— Албатта, — жавоб берди эри. — Улар кутиб туришади!

У ҳаяжонга тушиб, ҳар бир товушга қулоқ соларди-ю, лекин ўзини кофе ичаётгандек қилиб кўрсатарди.

Поль билан Сесиль ўринларидан туришди; йигит қизни қулф тирқишидан қарашга кўндирди.

— Кўряпсизми уларни?

— Ҳа... Бир семиз киши, кетида яна бўйи пастроқ икки киши.

— Қалай? Турқилари жудаям совуқми?

— Йўқ, асло, кўринишлари бинойидек.

Жаноб Энбо кофе жудаям иссиқ экан, кейинроқ ичиб кўярман, дея тўсатдан ўрнидан турди. У хонадан чиқаркан, бармоғини лабларига босиб, эҳтиёт бўлинглар, дегандек ишора қилди. Ҳамма яна жойига ўтириб, чурқ этмай, қимирлашга ҳам журъат қилмай, қулоқларини динг қилганларича, эркакларнинг эшик орқасидан келаётган кўпол овозига қулоқ солишди.

II

Кеча Раснёрларникида йиғилиш бўлиб, унда Этьен билан бир неча ўртоқ делегация сайлашди: делегация эртагаёқ директор олдига жўнаши лозим эди. Маэнинг хотини эрининг делегат бўлганини кечқурун эшитиб, жуда хафа бўлди-да, у энди рўзгоримизни бузаркан-да, деди. Маэнинг ўзи ҳам делегация составида қатнашишга истар-истамас рози бўлганди. Икковлари қашшоқлик қисматларининг бутун адолатсизлигини билишса ҳам, ҳаракат қилиш пайти келганида азалий итоаткорликка амал қилишиб, юраклари орқасига тортганича эртанги кунларини ўйлашар ва аввалгидек қаддиларини букиб ишлашни афзал кўришар эди. Маэ турмуш шароитида одатда ҳамиша яхши маслаҳат берадиган хотинининг раъйига қарарди. Бироқ бу сафар у гарчи хотини беҳуда хавотирланмаётганига ичида қўшилса ҳам, жаҳли чиқиб кетди.

— Мени тинч қўй энди, бўлди! — деди у ўринга ётаркан, хотинига орқасини ўгириб. — Ўртоқларингчи қўй эмиш, жуда яхши гап айтдинг-да! Мен бурчимни бажаряпман.

Хотини ҳам ётди. Икковлари чурқ этишмади. Анча вақт ўтди.

— Сен ҳақсан, борақол! — деди ниҳоят хотини. — Лекин бизга жабр бўладиган бўлди, бечора чолгинам, шуни билиб қўй!

Чошгоҳда улар нонушта қилишди, чунки соат бирда «Авантаж»да учрашиб, делегация у ердан дарҳол Энбонинг олдига жўнамоқчи эди. Нонуштага картошка ейишди. Яна бир бўлак ёғ қолди, лекин унга ҳеч ким тегмади: шу ёғ кечқурун нон билан ейишга етиши керак.

— Биласанми, умидимиз сендан, сен гапирасан,— деди Этьен қўққисдан Маэга мурожаат қилиб.

Маэ лол қолиб, ҳаяжонланганидан бир нима деб эътироз билдира олмади.

— Йўқ, бу ҳаддан ташқари энди!— хитоб қилди хотини. — Майли, борса борсин, мен қаршимасман. бироқ сенларга бошлиқ бўлишига йўл қўймайман... Нима учун келиб-келиб, бошқа эмасу бу гапириши керак?

Этьен бутун сўзамоллигини ишга солиб, куйиб-пишиб исботлай кетди. Маэ — шахтадаги энг яхши, энг севикли, энг ҳурматли ишчи; уни ҳамма энг мулоҳазали ишчи деб билади. Шунинг учун ҳам кўмир қазувчиларнинг талаблари унинг оғзидан чиқса, салмоқда бўлади. Аввалига ҳамма сен, Этьен, гапирасан, деган экан. Лекин Этьен ҳали Монсуда жуда кам ишлабди. Шу ерлик кексанинг гапига тезроқ қулоқ солишаркан. Бунинг нимасини тушунтириш керак: ўртоқлар ўз манфаатларини ҳимоя қилишни энг муносиб одамга топширишяпти. Бундан бош тортишга ҳаққи йўқ, уят бўлади.

Хотини умидсизлик билан қўл силтаб қўйди.

— Бор, боравер, эржон, бошқалар учун қурбон бўлавер! Рози бўлмай иложим қанча, бор!

— Бироқ мен гапира олмайман-да,— гўлдиради Маэ.— Бемаъни гапларни айтиб қўяман-да.

Маэни кўндирганидан севиниб кетган Этьен унинг елкасига қоқиб қўйди.

— Дилингдагини айтавер, ҳаммаси жуда зўр бўлади.

Оёғидаги шиши кичрайиб қолган Ўлмас бобо оғзига сўк солиб олгандек, чурқ этмай, бошини сарак-сарак қилиб эшитиб ўтирарди. Сукунат чўкди. Картошка қўйишганда болалар миқ этмай жимгина ўтириб ея бошладилар. Чол оғзидаги овқатини ютиб, шивирлаб гапира бошлади:

— Кўнглиннга келганини айтавер,— бари бир сен ҳеч нима гапирмагандек бўлиб қолаверасан...Эҳ, умрим да бунақа ишларни кўравериб-кўравериб, пишиб кетганман! Қирқ йил бурун дирекция бизни ҳайдаб чиқарган, яна қилич билан ҳайдаб чиқарган! Бу сафар дирекция сизларни қабул қилару, лекин сизларга мана

шу деворчалик жавоб берар-да... Епирай! Уларнинг пули бор, ҳаммангни бир тийинга ҳам олмайди улар!

Яна орага жимлик чўкди. Маэ билан Этьен дастурхондан туришди; оила аъзолари қовоқларини солишиб, бўш ликочаларига қараб ўтиришарди. Маэ билан Этьен уйдан чиқиб, Пьеррон билан Левакларникига киришди-да, уларни ҳам олиб, тўртови Раснёрларникига жўнашди. Бу ерга посёлкаларнинг делегатлари гуруҳ-гуруҳ бўлиб келишаётганди. Ниҳоят делегациянинг ҳамма йигирма аъзоси йигилиб бўлди-да, улар Ширкат олдига қўйиладиган талаб шартларини ишлаб чиқишди. Кейин Монсуга йўл олишди. Тош йўл бўйлаб шимолнинг шиддатли шамоли изғирди. Делегатлар етиб келишганда соат икки бўлиб қолганди.

Аввалига малай, бир оз кутиб туратуриглар, деб улар рўбарўсидаги эшикни таққа ёпиб кириб кетди. Кейин у қайтиб чиқиб ишчиларни меҳмонхонага олиб кириб, дарпардаларни кўтариб қўйди. Хонага тўр пардадан ўтаётган заиф ёруғлик тушиб турарди. Ўзлари қолиб хижолат тортган кўмир қазувчилар ўтиришга журъат этишмади. Улар мовут костюмларини кийиб, соқол-мўйловларини яхшилаб олганлари, малларанг сочларини силлиқ тараганлари, мўйловларини бураб қўйганларидан кўринишлари ниҳоятда озода эди. Улар уй жиҳозларига кўз қирини ташлашиб, қўлларидаги шапкаларини ғижимлардилар. Бу ерда турли-туман услубда ишланган қадимий ноёб буюмлар аралашиб кетганди: Генрих II давридаги креслолар, Людовик XV услубидаги стуллар, XVII асрдаги италянча шкаф, XV асрга оид баланд ёзув столи; каминга эса нақшли парда ўрнига меҳробга тутиладиган ёпиқ ёзилганди, эшикларнинг қалин пардалари хошиясига қадимги черков ёпинчиқларининг попуклари тикилган эди. Кўҳна заррин буюмлар, эски ипакликларнинг нурсиз ранги, — бу зебу зийнатларнинг ҳаммаси худди ибодатхонадагидек ҳурмат-эҳтиром туйғуларини уйғотиб, кишини чўчитар эди. Шарқ гиламларининг ўсиқ жунлари уларнинг юришига монелик қиларди. Айниқса уйнинг хуш ёқадиган бир хилдаги ҳарорати уларни ҳайратга солди: йўлда аччиқ изғиринда уларнинг ёноқлари музлаб қолганди. Беш минутча ўтди. Бу

серҳашам, шинам хона уларни тобора хижолатга соларди.

Ниҳоят, жаноб Энбо кўринди. Унинг сюртугидаги тугмалари ҳарбийчасига қадалган, ёқасида эса ихчамгина орден лентаси савлат тўкиб турарди. У биринчи бўлиб ўзи гапирди.

— Э, ўзларинг келибсизлар-да!.. Исён қияпсизлар шекилли... — Бирдан ўзига келди-да, совуқ, лекин мулойимлик билан илова қилди: — Утиринглар, сизлар билан суҳбатлашишдан хурсандман.

Кўмир қазувчилар, қаерга ўтирсак экан, дея атрофга аланглашди. Баъзилар юрак бетлаб ўтиришса ҳам айримлари шойи ёпиқларга ўтиришдан чўчиб, тик туришни афзал кўришди.

Сукунат чўкди. Жаноб Энбо ўз креслосини камин ёнига суриб, дарров шахтёрларни санаб чиқаркан, уларнинг юзларини эслаб қолишга ҳаракат қилди. У охириги қаторда ўтирган Пьерронни кўрди; кейин рўбарўсида ўтирган Этьенга тикилди.

— Хўш, қани,— деди у,— нима демоқчисизлар?

У, Этьен гапиради, деб ўйлаганди, лекин Маэ гапира бошлагач, шунчалик ҳанг-манг бўлдики, ўзини тийиб туrolмай, қичқириб юборди:

— Ие, бу қандоқ бўлди? Монсунинг энг кекса, энг яхши ишчиси, ҳамиша ақл билан иш тутадиган сиздай одамдан шу гап чикдими? Сизнинг бутун оилангиз шахта очилган кундан бери ишлаб келади-я!.. Эҳ, яхши эмас! Норозиларнинг бошида турганингиз чакки бўлибди, афсус!

Маэ бу гапларни кўзини ерга тикиб туриб эшитди. Кейин у гапира бошлади, овози титраб, аввалига мужмал қилиб гўлдиради:

— Директор жаноблари, мен босиқ бўлганим, бирор ёмон иш қилмаганим учун ҳам ўртоқларим мени танлашди. Бу шу ишни ҳеч нарсадан тап тортмайдиган, тартибсизлик қилишдан бошқани билмайдиган тўполончилар қилмаётганини сизга исботлаб турипти. Биз фақат адолатни истаймиз; биз энди очдан ўлишга тоқат қилолмаймиз, оладиган маошимиз лоақал тирикчилигимизга етадиган бўлишини келишиб олиш вақти етди. Маэ дадил гапира бошлади. У бошини кўтарди-да, директорга қараб давом этди:

— Сизларнинг янги системаларингизга рози бўл-маслигимизни ўзингиз биласиз... Бизни тиргакларни омонат қўясизлар, дея айблашади. Тўғри, биз бу ишга керак бўлганича вақт сарфламаймиз. Агар бу ишни кўнгилдагидек қиладиган бўлсак, кунлик оладиган ҳақимиз янаям камайиб кетади. Шундоғам оладиган пулимиз бола-чақани боқишга зўрға етади, сиз айтгандек қиладиган бўлсак, уйимизни тополмай қоламиз-ку, ишчилар хонавайрон бўлади. Бизга кўпроқ ҳақ тўланглар, ана унда тиргакларни яхшилаб қўямиз, қанча вақт керак бўлса, шунча сарфлаймиз, фақат ҳозир бизни боқиб турган ягона иш — кўмир қазиш билан банд бўлиб қолмаймиз. Акс қолда ҳеч нарса қилиб бўлмайди: иш бажарилиши учун унга ҳақ тўлаш керак-да... Хўш, сизлар нимани ўйлаб топдиларинг? Шундай ишни ўйлаб топдиларингки, бунга ақлимиз ҳам етмайди! Сизлар ҳар бир вагонеткага тўланадиган ҳақни камайтириб, тиргаклар учун алоҳида тўлаяпмиз-ку, дея бизни юпатмоқчи бўласизлар. Бу иш тўғри бўлганда ҳам, бари бир бизга зиён бўлади: тиргак қўйиб чиқишга қарийб ҳамма вақтмиз кетиб қолади. Лекин бизни ғазабга солган нарса, бу ишларнинг ҳаммаси адолатсизлик билан бўлаётгани. Ширкат илтимосларимизнинг бирортасини ҳам қондирмасдан, ҳар вагонеткадан икки сантиметдан уриб қолади, бошқа ҳеч гап йўқ!

— Ҳа, ҳа, жуда тўғри,— дейишди бошқа делегатлар Энбонинг кескин ҳаракат билан Маэни тўхтатмоқчи бўлганини кўришиб.

Бироқ Маэ директорнинг оғзини очирмади. У кишииб кетиб, сўзлар ўз-ўзидан қуйилиб келаверди. Вақт-вақти билан у ўзининг гапларига ўзи қулоқ соларди — гўё гаплари ўзиники эмас-у, бировникидек эди! Бу гаплар юрагига шунчалик кўп йиғилиб қолган эканки, ичидан қайнаб чиқаётганини ўзи ҳам билмасди. Кекса кончи ҳамманинг ялпи қашшоқлиги тўғрисида, ишнинг оғирлиги, молдан ҳам хор яшаётганликлари-ю, бир парча нонга зор бола-чақалар тўғрисида гапирди. У кейинги вақтларда жуда кам ҳақ олишаётгани, жарима ва бекор туриб қолишлар учун чегириб қолингач, қўлга теккан икки ҳафталик моянанинг кулгили даражада озлиги, оила аъзоларига

тегадиган улушнинг қанча қолгани-ю, уйдагиларнинг кўз ёшлари тўғрисида сўзлади. Наҳотки Ширкат ишчиларни бутунлай хонавайрон қилмоқчи бўлса?

— Мана шунинг учун ҳам жаноби директор,— деди гапни тугатаркан Маэ,— биз сизнинг олдингизга модомики ўладиган бўлсак, ишда силламиз қуриб ҳалок бўлгандан кўра, қирилиб кетишни афзал кўрганимизни айтгани келдик... Биз шахтадан кетдик, Ширкат шартимизга рози бўлмагунча конга қайтиб тушмаймиз. Ширкат ҳар бир вагонеткага тўланадиган ҳақни камайтириб, тиргак қўйиш учун алоҳида пул бермоқчи. Лекин биз ҳаммаси эскича қолишини истаймиз, биз яна ҳар бир вагонетка кўмир учун беш сантим ортиқроқ тўланишини хоҳлаймиз... Адолат ва меҳнат тарафидамисизлар ё йўқми, ўзларингни кўрсатиш навбати энди сизларга.

Шахтёрларнинг овозлари янгради:

— Тўғри... У ҳаммамизнинг дилимиздаги гапларни айтди... Биз инсоф ва адолат билан иш тутилишини истаймиз холос.

Бошқалар бир оғиз ҳам гапирмай, бошларини қимирлатиб маъқуллаб туришди. Улар серҳашам уйда эканликларини ҳам, олтин буюмлар, қимматбаҳо матоларни ҳам, талайгина антиқа кўҳна нарсаларни ҳам унутгандилар; улар ҳатто оғир пойабзаллари билан топташаётган гиламни ҳам сезишмасди.

— Менга ҳам гал беринглар, жавоб берай-да!— жаҳли чиқиб кичқирди ниҳоят Энбо.— Биринчидан, Ширкат ҳар бир вагонеткадан икки сантимдан уриб қоляпти, деган гап ёлғон... Мана ўзларинг ҳисоблаб кўринглар.

Бетартиб муҳокама бошланди. Директор шахтёрлар орасига нифоқ солиш мақсадида Пьерронга мурожаат қилган эди, лекин у ўртоқларининг орасига бекиниб, бир нима деб гўлдиради. Левак бўлса, аксинча, олдинда бўлиб, энг аҳди қаттиқ одамлар билан бирга эди, у ҳаммасини аралаштириб юбориб, ўзи билмаган нарсаларни гапирарди. Меҳмонхонанинг иссиқ ҳавосига сингиб бораётган қаттиқ ғала-ғовурни қалин парда сирилган девор ташқарига чиқармасди.

— Агар ҳамманглар шунақа баравар гапирадиган

бўлсанглар, — деб давом этди Энбо, — биз ҳеч қачон келишиб ололмаймиз.

У ўзини одатдагидек босиб олди, жиддий, лекин қаттиқ-қурум гапирмай, йўл-йўриқ олган мулойим бошлиқ қиёфасига кириб, ўзини буйруқни бажаришга мажбур эта олди. У гапни бошлаши биланоқ Этьендан кўзини узмай, уни гапга аралаштиришга уринди; лекин йигит миқ этмай ўтираверди. Энбо икки сантиметр ҳақидаги баҳсни тўхтатиб, қўққисдан масалани жуда кенг қилиб қўйди.

— Йўқ, яхшиси, ростини айтақолинглар: сизлар аллақандай галамиснинг ногорасига ўйнаяпсизлар. Бу касаллик ҳамма ишчиларга юқиб, ҳатто энг яхшилари ҳам иритяпти... Э, қўйинглар, менга иқрор бўлишларингнинг хожати йўқ, шундоқ ҳам кўриб турибман, бутунлай ўзгариб қолганга ўхшайсизлар; илгарилари тинчгина яшардиларинг. Сизларга олтин тоғлар ваъда қилишган, сенларнинг ҳам хўжайин бўладиган галларинг келди, деб қўйнилариингни пуч ёнғоққа тўлдиришган, ҳа, хўп деяверинглар... Хуллас, сизларни бу машҳур Интернационалга, фақат жамиятни емиришнигина ўйлайдиган қароқчилар тўдасига ёллашяпти...

Шунда Этьен унинг гапини бўлиб деди:

— Сиз янглишяпсиз, директор жаноблари. Монсунинг битта ҳам шахтёри ҳалигача союзга кирган эмас. Лекин шароит мажбур қилса, ҳамма шахтанинг ишчилари унга киради. Бу тамомила Ширкатнинг ўзига боғлиқ.

Шу минутдан бошлаб гўё бошқа шахтёрлар йўқдек баҳс фақат Энбо билан Этьен ўртасида кетди.

— Ширкат — ишчиларнинг ризқ-рўзи; унга таҳдид қилишга ҳақларинг йўқ. Бу йил Ширкат посёлкалар қуришга уч юз минг франк берди, бу маблағ икки фоиз ҳам наф келтирмайди. Мен ҳали пенсиялар тўлаш, кўмир, дори-дармон бериш... ҳақида гапираётганим йўқ. Менимча, сиз, ақлли одам кўринасиз, бир ойда етар-етмас энг яхши ишчиларимиздан бири бўлиб олдингиз, сиз ҳақиқий аҳволни тўғри идрок қилиш учун ўртоқларнинг кўзини очиб қўйингиз, бадном бўлган кишиларга қўшилиб ўзингизни жувонмарг қилмасангиз бўларди. Ҳа, ҳа, мен Раснёрни гапир-

япман: шахтамизни социализм маразидан жалос қилиш учун биз уни ишдан бўшатдик... Сиз доимо уникада бўлармишсиз; турган гапки ўзаро ёрдам кассаси тузишга сизни худди ўша ундаган, лекин у фақат кассанинг ўзи бўлса, гўрга эди-я, биз бир нарса демасдик; бироқ бу кассаларинг бизга қарши қаратилган қурол экан, мабодо уруш бўлиб қолгудек бўлса, резерв фонд экан. Шуни айтиб қўйишим керакки, Ширкат кассаларнинг устидан назорат ўрнатишни хоҳлайди.

Эъён гапни бўлмайд, директорга тикилиб тураркан, унинг асабийлашганидан лаблари сал-пал титраётганини сизди. Директорнинг кейинги гапидан кулиб, жавоб берди:

— Демак, бу янги талаб экан-да, шу чоққача директор жаноблари бу назорат ҳақида лом-мим дейишни лозим кўрмаган эканлар-да... Биз бўлсак, афсуски, Ширкат биз тўғримизда куйиб-пишмаса ҳам бўлади, худонинг ёзмиши шу дея сафсата сотгандан кўра, олаётган фойдасига қараб, адолат билан ҳақимизни тўғри бераверсин, деймиз. Ахир ҳар бир кризис чоғида акционерларнинг дивидендларини сақлаб қолиш учун ишчиларни очдан ўлдириш инсофданми?.. Сиз, директор жаноблари, нима десангиз денг-у, аммо янги системаларингиз — иш ҳақини пасайтиришнинг пинҳона усулидан бошқа нарса эмас. Бизни ғазаблантирган нарса — шу. Агар Ширкат фақат ишчилар ҳисобига тежашга мажбур бўлган бўлса, жуда адолатсизлик қилган бўлади.

— Ҳа, мана энди муддаога келдик? — хитоб қилди Энбо. — Ўзим ҳам шундай айб қўйишингизни кутиб тургандим: биз халқни очлик билан қийнаймиз, унинг пешона тери ва қони ҳисобига яшаймиз! Бунақа безмаъни гапларни айтишга тилингиз қандай борди? Индустрияга сарфланган маблағлар, жилла қурса тошкўмир корхоналарига сарфланган маблағлар қанчалик ҳавф остида қолганлиги сизга аён бўлиши керак-ку! Шахтани тўла-тўқис ускуналаш ҳозирги замонда бир ярим миллиондан икки миллион франкка тушади. Сарфланган маблағдан лоақал ўртача фойда чиқариб олиш нақадар машаққатли эканлигини билсаларинг эди! Барча француз тошкўмир жамиятларининг яр-

мига яқини инқирозга учраб, хонавайрон бўлди... Шундай бўлгач, омади келган корхона эгаларини бераҳмлиқда айблаш аҳмоқлик-ку. Агар ишчилар азият чексалар, Ширкат аъзоларининг ўзларига ҳам қийин бўлади. Ҳозирги кризисдан Ширкат бизга қараганда кам зиён кўради, деб ўйлайсизларми? Иш ҳақи масаласига Ширкатнинг ҳукми ўтмайди, агар у қўллашни истамаса, рақобат талабларига бўйсунини керак. Фактларга қараб иш тутинглар, бошқа ҳеч нарсанинг кераги йўқ... Лекин сизлар ҳеч нимани эшитишнинг, тушунишнинг хоҳламайсизлар!

— Аксинча,— эътироз билдириб деди йигит,— агар ишлар ҳозиргидек кетаверадиган бўлса, турмушимиз яхшиланишига умид боғлашдан фойда йўқлигини жуда яхши биламиз. Мана шунинг учун ҳам ишчилар аҳволни ўзгартириш учун эртами-кечми бошқа чоралар кўради.

Сиртдан қараганда босиқлик билан секин айтилган бу сўзлар ниҳоятда ишончли бўлиб, уларда дўқ оҳанги шу қадар кучли эдики, ҳамманинг дами ичига тушиб кетди. Қандайдир хижолатпазлик рўй берди: хонага ваҳимали сукунат чўмди. Қолган делегатлар ўртоқларининг гапларини унчалик тушунишмаган бўлишса-да, улар Этьен ишчиларнинг улушларини талаб қилаётганини билишарди, улар яна қопламаларнинг ранго-ранг гулларига, қулай креслоларга, барча зебу зийнатларга кўз қирларини ташлашди,— бу ердаги арзимаган нарса ҳам уларни бутун бир ой боқадиган пул бўларди.

Энбо жаноблари бир муддат хаёл суриб ўтиришда, ниҳоят, гап тамом, дегандек қилиб ўрнидан турди. Шахтёрлар ҳам туришди. Этьен Маэни тирсаги билан туртганди, у яна палапартиш деди:

— Хўш, демак, директор жаноблари, бизга айтадиган гапингиз бор-йўғи шуми?.. Сиз рад этаётган шартларимизни бошқаларга ҳавола қилишга тўғри келади.

— Менми? — хитоб қилди директор.— Мен, азизим, ҳеч нимани рад этаётганим йўқ!.. Мен ҳам сизларга ўхшаш бир хизматчиман; мен ҳам сизларнинг ёрдамчиларингиздек ўз ихтиёрим билан бирон нарса қилолмайман. Менга кўрсатма беришади, менинг ягона ва-

зифам — шу кўрсатмаларнинг кўнгилдагидек бажарилишини назорат қилишдан иборат холос. Мен сизларга ўз бурчимга доир гапларнигина айтдим, лекин ўзимча бирор қарор қабул қилолмайман... Сизлар менга ўз талабларингни айтдинглар, мен уларни Правлениега хабар қиламан, кейин натижасини айтаман.

У мартабали амалдорларга хос сира асабийлашмай хушмуомалалик билан мулоим оҳангда гапирарди: у ҳокимият қуроли — бошқа нарса эмас. Шахтёрлар ишончсизлик билан унга қарашарди. Улар ўзларидан: бу ким ўзи, ёлгон гапириб, нима фойда топаркин, биз билан чинакам хўжайинлар орасида туриб, қанча ҳақимизни ўғирлаб қолмоқчи? — дея сўрашарди. Балки у қип-қизил алдоқчидир; менга ҳам бир ишчининг маошини тўлашади, дейди-ку, аммо турмушини қаранг, мил-мил!

Эъён яна гапга қўшилди:

— Эҳ, аттанг, жаноби директор, ўз ишларимизни ўзимиз шахсан тушунтириб беролмасаканмиз-да. Ўзимиз талай нарсаларни тушунтириб берган, шундай далилларни келтирган бўлардикки, сиз уларнинг кўпини эсингиздан чиқариб қўясиз... Жилла қурса, кимга мурожаат қилишимиз кераклигини билсак эди.

Жаноб Энбо асло аччиқланмади. У ҳатто кулиб ҳам қўйди.

— О, сизлар модомики менга ишонмас экансизлар, иш мураккаблашади. Сизлар у ёққа мурожаат қилишларинг керак, — деди у қўлини мужмал қимирлатиб, дераза томонга ишора қиларкан.

Делегатлар уни кузатиб туришарди. «У ёққа» дегани қаёққа бўлдийкин? Парижга бўлса керак-да, албатта. Лекин улар бунга ишонишмасди. Кўзлари олдида кишининг капалагини учирадиган аллақандай олис ер, унинг ортида эса номаълум бир тангри меҳробида ўтириб, ҳукмронлик қилаётган, етишиш қийин ва сирли мамлакат намоён бўлди. Улар бу тангрини ҳеч қачон кўра олмайдилар, улар олисдан туриб Монсунинг ўн минг шахтёрини забтига олаётган тангрининг қудратини ҳис қиладилар, холос. Директор гапирганида, ана шу қудратга таянарди, шу қудрат ўз амр-фармонини директорнинг тили билан ифода этарди.

Кўмир қазувчиларнинг тарвузлари қўлтиқларидан

тушди; ҳатто Этьен ҳам энди кетишдан ўзга иложимиз йўқ, дегандек қилиб елкасини қисиб қўйди. Шу чоқ Энбо жаноблари Маэнинг елкасига дўстона қоқиб, Жанленнинг соғлигини сўради.

— Бу фалокат сизларга зўр сабоқ бўлиши керак, сизлар бўлсаларинг яна ярамас тиргакларга ёпишиб оласизлар!.. Дўстларим, яхшилаб ўйлаб кўринглар, а, забастовка — ҳаммага бахтсизлик келтиришини ўзларингиз ҳам тушунасизлар. Бир ҳафта ўтар-ўтмай ҳаммаларинг очликдан қирилиб кетасизлар. Унда нима қилаёсизлар?.. Бироқ мен сизларнинг оқилона фикр юритиб, узоғи билан душанба кунидан ишга тушишларингга умид қиламан.

Шахтёрлар букчайишиб, бўйсунишга умид боғлаган директорга бир калима сўз ҳам айтмай галалашиб чиқиб кетишди. Энбо уларни кузатиб чиқаркан, музокарадан хулоса чиқаришга қарор қилди: Ширкат билан унинг янги тарифи бир ёқда-ю, ҳар вагонеткага тўланадиган ҳақни беш сантимга оширишни талаб қилаётган ишчилар иккинчи ёқда қолди. Бўлмаган нарсага умид боғлаб юрманглар, дегандек қилиб, Ширкат шартларингга рози бўлмаслиги турган гап, дея огоҳлантиришни лозим топди.

— Обдан ўйланглар, бемаъни иш қилиб қўйманглар тагин,— такрорлади у шахтёрларнинг чурқ этмай чиқиб кетишаётганидан ташвишланиб.

Даҳлизда Пьеррон букилиб таъзим қилди, Левак бўлса, гўдаиб, картузини кўнқайтириб кийиб олди. Маэ хайрлашишда нима десам экан, дея гаранг бўлиб бораркан, Этьен яна тирсаги билан туртиб қўйди. Улар шу йўсинда чурқ этмай кетишди. Орқаларидан эшикнинг шарақлаб ёпилганигина эшитилди.

Энбо емакхонага қайтиб кирганида меҳмонлари рюмқаларига ликёр қуйиб, қимир этмай ўтиришганини кўрди. У суҳбат мазмунини икки оғиз сўз билан Денеленга етказди: у аввалгисидан ҳам гўссага ботиб кетди. Энбо совиб қолган кофени ичиб тугатаркан, ҳозир бўлганлар гапни бошқа ёққа буришга ҳаракат қилишди. Бироқ Грегуарларнинг ўзлари яна забастовкадан гап очиб, ишдан кетиб қолишни тақиқловчи қонун йўқлигидан ажабланаётганликларини изҳор қи-

лишди. Поль Сесилни юпатиб, ҳадемай жандармлар келади, деб уни ишонтирди...

Ниҳоят Энбо хоним малайни чақирди-да:

— Ипполит, меҳмонхонанинг деразаларини очиб, яхшилаб шамоллатинг: биз ўша ёққа ўтамиз,— деди.

III

Икки ҳафта ўтди. Лекин маъмуриятга топширилдиган табеллар учинчи ҳафтанинг душанба куни шахтага тушган ишчилар сони яна камайиб кетганидан далолат берарди. Шу тонг иш яна бошланиб кетади, деб ҳисоблашганди, лекин Правление ҳеч қандай ён босмай, кўмир қазувчиларнинг ғазабини оширди холос. Ворё, Кручина, Миру, Мадлена шахталари ишламасди; Ғалаба ва Фетри-Кантель шахталарида эса ишчиларнинг чорагига яқинигина ишга чиққанди, ҳатто Сен-Тома ҳам шу ҳаракат гирдобига тортилганди. Забастовка умумий тус олди.

Ворё участкасида кишини эзадиган жимлик чўкканди; ишлаб чиқариш тўхтаганди, ҳувиллаб қолган ташландиқ устахоналарда иш ўлганди. Хира декабрь осмони, баланддаги кўприкларда унутиб қолдирилган бир неча вагонетка,— ҳаммаси шумшайиб турарди. Пастда, ингичка тиргаклар орасида яна бир уюм кўмир тўплаб қўйилганди; лекин у секин-аста эриб, қора ер-кўриниб турарди; омбордаги тахталар билан ходалар шариллаб ёғаётган ёмғирда чириб борарди. Каналнинг лойқа сувида, пристань ёнида ярмигача кўмир ортилган сол худди мудроқ босгандек қимир этмай турарди; жала қуяётганига қарамасдан олтингургурт жинслари буруқсаб турган кимсасиз майдонда шотилари осмонга кўтарилган арава мунгайиб кўринарди. Ҳаммадан ҳам бино: дераза қопқоқлари ёпиқ саралаш саройи, минора, вагонеткалар тарақ-туруғи тинган қабулхона ҳам, улкан трубасидан заиф тутун буралиб чиқаётган совуқ қозонхона ҳам нохуш туюларди. Кўтарма машина устахонасини фақат азондагина ёқишади. Отбоқарлар ем-хашак бериш учун пастга тушишади; пастда яна оддий ишчиларга айланган штейгерларгина ишлашарди. Улар энг муҳим шикастланган жойларни тузатишарди. Тиргакларга ҳеч ким

қарамай қўйганидан штольнялар босиб қолиши мумкин эди. Зинапоялар соат тўққиздан бери ишлайди. Бутун бино қора чангга бурканган; тиқ этган товуш эшитилмайдиган жимжитликда шахталардаги ҳаётнинг сўнгги нишонаси — сув чиқариб ташлайдиган насоснинг оғир, чўзиқ ҳансирашигина эшитилиб турарди. Агар насос тўхтаб қолса, сизот сувлар шахталарни вайрон қиларди.

Шахта рўпарасидаги тепага жойлашган Икки юз зағизгон посёлкасида ҳам жон зоти қолмагандек эди. Лилдан префект келди; жандармлар йўлларни эгаллаб олишганди. Лекин забастовкачиларнинг хотиржамлигини кўрган префект билан жандармлар жўнаб қолишди. Шу чоққача бутун текисликдаги битта ҳам посёлка намуналироқ бўлишга интилмади. Эркаклар қовоқхонага бормаслик учун кун бўйи ухларди; хотинлар ҳам инсофга келиб, кофени камроқ ичиб, камроқ гап сотиб, камроқ қарғашарди. Ҳатто болалар ҳам нима бўлаётганини тушунишгандай эди; болалар жуда қобил бўлиб, яланг оёқ югуришар, уришганларида ҳам товуш чиқаришмас эди. «Оқилона иш тут!» деган шиор оғиздан-оғизга ўтиб юрарди.

Бироқ Маэллар уйи гавжум эди, келди-кетди узилмасди. Этьен котиб сифатида ўзаро ёрдам кассасининг уч минг франклик фондидан муҳтож оилаларга ёрдам пули улашарди. Турли жойлардан обуна ва иона йўли билан йиғилган яна бир неча юз франк келди. Бироқ энди ҳамма маблағ тугаб, забастовкани давом эттириш учун шахтёрларнинг пули қолмаган эди; очлик хавфи туғилди. Аввалига Мегра ярим ой муҳлат билан қарзга нарса беришга ваъда қилган бўлса-да, бир ҳафта ўтар-ўтмас бирдан айнаб қолди-ю, озиқ-овқат бермай қўйди. У одатда маъмуриятдан кўрғазма олиб иш тутарди; мазмунидан Ширкат бутун-бутун қишлоқларни очликка гирифтор этиб, масалани бир ёқлик қилиб қўя қолмоқчи бўлган бўлса керак. Аслини олганда Мегра инжиқ золимдан ҳам ўтиб тушди: ота-онаси озиқ-овқат олиб келгани юборган қизнинг ёқиш-ёқмаслигига қараб гоҳ нон берар, гоҳ бермас эди. У Маэнинг хотини келса, нуқул эшикни тарақлатиб ёпиб оларди: Катринадан қуруқ қолгани учун жаҳли чиқиб, бутун аламини Маэ хонимдан олмоқчи

бўларди. Қашшоқлик устига совуқ ҳам зўрайиб кетди, кўмир ҳам тугай деб қолди; хотинлар ҳам агар эр-каклар ишга чиқишмаса, шахтада кўмир кўпайиб қолмайди-ку, дея ташвишлана бошлашди. Очдан ўлиш камлик қилганидек яна совуққа қотиш ҳам бор эди.

Маэларнинг ҳеч вақоси қолмади. Леваклар Бутлу қарзга берган ўша йигирма франк билан жон сақлаб туришибди. Пьерронлар эса бошқа гап; ҳар доим уларда пул бўларди; лекин улар ўзларини эл қатори оч қолаётган қилиб кўрсатишарди-ю, битта-яримта қарз сўраб қолмаса эди, деб қўрқишарди. Шунинг учун ҳам улар озиқ-овқатни Меградан қарзга олишарди. Мегра эса, Пьеррон хоним этагини қилпиллатгудек бўлса, бутун дўконини унинг оёғи остига тўкиб солишга тайёр эди. Шанбадан бошлаб талайгина хонадонлар кечки овқатсиз ётадиган бўлди. Даҳшатли кунлар келди, лекин ҳеч ким шикоят қилмасди. Барча хотиржамлик ва мардлик билан қарорга бўйсунарди. Бу мутлоқ ишонч, ҳеч нима буза олмайдиган орзу-умид — эътиқодли халқнинг кўр-кўрона фидойилиги эди: уларга адолат ҳукм сурадиган кунлар келишини ваъда этишди, шу боисдан улар жумла мўминнинг бахт-саодатга эришиши йўлида азоб-уқубат чекишга тайёр эдилар. Очлик одамлар кўзини катта очди. Уларнинг тор дунёқарашлари ҳозиргидек, мана шу муҳтожликнинг ғира-шира кўринишлари пайтидагидек, шунчалик кенгайиб кетмаган эди. Зайфликдан кўзларни қоронғилик босарди, лекин улар бундай пайтда орзу-умидларнинг ғаройиб меваси ёғилаётганини кўрардилар; бу орзу-умидлар яқинлашиб, рўёбга чиққандай, унда қардош халқлар яшаётгандай бўларди, бу умумий меҳнат, умумий фаровонликнинг олтин даври эди. Ишчиларнинг охир-оқибатда шундай замонга етишлари ҳақидаги ишончларига ҳеч нима раҳна соломасди. Касса қуриди. Ширкат ён бермади, кундан-кун баттар бўлиб борди, лекин бари бир улар орзу-умидларини ардоқлаб, фактларга нафрат билан кулиб қарашарди. Агар оёқлари остидаги ер ўпирилгудек бўлса мўъжиза уларни сақлаб қолади. Ана шу ишонч нон ўрнини босиб, қоринларини тўйдирарди. Маэлар ҳам, бошқалар ҳам обиравон билан тамадди қилишганидан орадан кўп ўтмай нима еганларини ҳам эс-

лолмасдилар. Шунда улар жазавага тушиб алахлашарди-да, ўзларини йиртқишларга емиш учун ташланган шахидлар каби нариги дунёда кўришарди.

Шу кундан бошлаб Этьен ҳамма тан олган бошлиқ бўлиб қолди. Оқшом суҳбатларида у келажак ҳақида гапирарди. У китоб ўқиган сари фикри очилиб, ҳамма масалалардан анча хабардор бўлди. У тун бўйи ўқиб чиқар, жуда кўп хат олар эди; у ҳатто Бельгиянинг «Қасоскор» деган социалистик газетасига ҳам ёзилганди. Бу — посёлкага келадиган биринчи газета бўлиб, ўртоқлари наздида Этьеннинг обрўсини ошириб юборган эди. Ёш шахтёр шуҳратининг ошиб бориши кун сайин Этьен ғайратини кўпроқ жўш урдирарди. Этьен турли жойлар билан хат олди-берди қиларди, вилоятнинг барча еридаги вакиллар билан ишчиларнинг қисматини муҳокама қилиб, ворёлик шахтёрларга маслаҳатлар берарди; ана шу нарса ва хусусан, ҳамма нарсага бош-қош бўлиб қолганлигини англаш ҳисси собиқ механик, қўллари доимо кир-чир, қорамойга беланган кончининг кўнглини тоғ қилиб юборганди. У бир поғона кўтарилиб, нафратли буржуазия дунёсига киргач, оқибатини ўйламай туриб, ўзининг ақлий устунлиги, маъмурлигидан хурсанд бўлиб юрди. Этьен фақат ўзининг саводи камлигидан ўксиниб юрарди; шунинг учун ҳам у ҳар сафар сюртук кийган бирор жаноб билан масала талашганда чўчиб, тортинарди. У мутолаани давом эттирди, қўлига тушган ҳамма нарсани ўқийверди; лекин тартиб йўқлиги учун ўқиганларини ўзлаштириб ололмасди, бошида ҳамма нарса аралаш-қуралаш бўлиб кетганди: у ўзи мутлақо тушунмайдиган жуда кўп нарсаларни билиб олди. Эс-хушини йиғиштириб олган чоқларда Этьен ўз зиммасидаги бурчни ўйлаб, ташвишга тушарди; у бошқа соҳага қўл урганидан чўчирди. Балки бу ишга гапдон, ҳаракатчан, ўртоқларини доғда қолдирмайдиган олим ёки адвокат керакдир? Лекин у бундай фикрдан ғазабланарди, бу эса унда яна ишонч пайдо қиларди. Йўқ, йўқ, адвокатлар керак эмас! Бу муттаҳамлар ўз билимларидан фойдаланиб, халқ ҳисобига семириб кетишади! Нима бўлса бўлар — ишчиларнинг ўзлари ўз ҳуқуқлари учун курашишлари керак! Яна халқ сардори бўлиш орзуси унинг кўнглини кўтариб

юборди: Монсу унинг оёғи остида, Париж туман босган олисда, — ким билади дейсиз, — бир кун эмас, бир кун у депутат бўлару ҳашаматли залнинг нотиклар минбарида туриб, буржуазиянинг пўстагини қоқар, — бу ишчининг парламентдаги биринчи нутқи бўлади!

Бир неча кунгача Этьен босар-тусарини билмай юрди. Плюшар хат устига хат ёзиб, забастовкачиларни китиклаш учун бир келиб кет, дея таклиф қиларди. Гап маблағ тўплашни ташкил этиш ва йиғинда механикнинг раислик қилиши тўғрисида борарди. Бу лойиҳанинг мақсади ҳамон Интернационалга ишонмай келаётган кўмир қазувчиларни Интернационал сафларига жалб қилишда забастовкадан фойдаланиш эди. Этьен бу нарса жуда катта шов-шувга сабаб бўлади, дея хавотирланарди, лекин Раснёр бу аралашувга тиш-тирноги билан қаршилиқ қилмаганида Плюшарни таклиф этган бўларди. Ингит таъсири катталигига қарамай қовоқхоначининг эски хизматларини инобатга олиб, у билан ҳисоблашишга тўғри келди, бунинг устига мижозлари орасида Раснёрнинг тарафдорлари ҳам бор эди. Шунинг учун ҳам Этьен нима деб жавоб беришни билолмай пайсалга соларди.

Душанба куни, соат тўртларга яқин Лиллдан яна хат келди. Пастдаги хонада Этьен билан Маэ хоним ёлғиз қолишганди. Ишсизликдан зериккан Маэ балиқ овлашга кетган эди: омади келиб каналнинг шлюздан пастроғида дурустроқ балиқ тутиб олса, уни сотиб, нон олиб келиши мумкин эди. Кекса Ўлмас бобо билан ёш Жанлен оёқларининг қувватини синаш учун кўчага чиқишганди. Альзира бўлса, болаларни олиб кетганди — улар уюмга бориб, соатлаб майда кўмир теришарди. Корсажининг тугмаларини счиб олган Маэ хоним милтиллаб турган ўт қаршисида Эстеллани эмизиб ўтирарди; сийнаси осилиб, қорнигача тушиб турарди.

Этьен хатни букларкан, Маэ хоним ундан сўради: — Хушxabарми? Бизларга пул юборишарканми?

Этьен йўқ дегандек бошини қимирлатиб қўйгач, Маэ хоним давом этди:

— Бу ҳафта нима қиларканмиз, жуда бошим қотди-да... Лекин ҳарқанча қийин бўлса ҳам чидаш керак. Ҳақиқат сен томонда бўлганини ҳис қилсанг,

мард бўлиб кетаркансан. Тўғрими? Пировардида бизлар зўр чиқамиз.

Маэ хоним ҳам ўйлаб-ўйлаб забастовка қилиш керак, деган фикрга келганди. Албатта, ишни тўхтатмай туриб, Ширкатни инсофга келтириш соз бўларди-я. Аммо ишни ташлагандан кейин адолатни тикламай туриб, ишга чиқиб бўлмайди. Маэ хоним шу фикрида қаттиқ турарди. Ҳақиқат ўз томонингда бўлгандан кейин, айбни бўйнингга олгандан кўра, ўлганинг яхши-да!

— Эҳ!— хитоб қилди Этьен,— қани энди бир вабо келса-ю, Ширкатдаги қонхўрларни қириб, бизни улардан халос қилса!

— Йўқ, йўқ,— эътироз билдирди унга Маэ хоним,— ҳеч кимга ўлим тиламаслик керак. Бундан бизга нима фойда, бири ўлса, бошқалари келади ўрнига... Мен фақат уларнинг инсофга келишларини истайман, мен шунга умид қиламан, яхши одамлар ҳамма ерда бор... Ахир сизларнинг сиёсатларингга сира қўшилмаслигимни ўзингиз ҳам биласиз-ку.

Маэ хоним чиндан ҳам исёнкорлик нутқлари учун доимо унга дашном берар, уни жанжалкаш, деб ўйлар эди. Ишга яраша ҳақ талаб қилиш яхши: лекин яна буржуазия, ҳукумат каби ҳар хил бошқа масалалар билан шуғулланишнинг нима кераги бор? Бировларнинг ишларига аралашиб нима қилишади? Бунинг учун фақат дўппослашади. Аммо Маэ хоним Этьенни ичкиликбозлик қилмаслиги, об-овқати ва ётоғи учун ўз вақтида қирқ беш франк тўлаб келаётгани сабабли ҳурмат қиларди. Агар киши ўзини яхши тутиб юрса, унинг ҳамма камчилигини ҳам кечириш мумкин.

Этьен ҳар кимга нон берувчи Республика ҳақида гапириб кетди. Бироқ Маэ хоним бошини сарак-сарак қилиб қўйди: у 48-йилни эслади,— ўша даҳшатли йилда, у турмуш қурган дастлабки пайтларда эри билан ҳеч вақосиз қолишганди. Маэ хоним гапга тушиб, ўшанда бошларидан кечирганларини битта қўймай гапириб берди: овози бўғиқ, кўзлари шуурсизлик билан олазарак бўларди, кўкраги очиқ эди; Эстелла бўлса она тиззасида унинг сийнасига ёпишиб ухлаб қолганди. Этьен ҳам ана шу жабрдийда заъфарон

чехрадан оппоқлиги билан кескин ажралиб турган улкан сийнага тикилиб, ўйланиб қолди.

— Бир тийин ҳам пул йўқ,— гўлдираб дерди у,— ейишга ҳеч нима қолмаган, ҳамма шахталарда иш тўхтаган эди. Э, нимасини айтасиз! Камбағаллар худди ҳозиргидек қириларди!

Шу чоқ эшик очилиб, кутилмаган воқеадан икковлари қотиб қолишди: хонага Катрина кириб келганди. У Шавалникига кетиб қолганидан бери посёлкада кўринмасди. Катрина шу қадар саросимага тушгандики, ҳатто эшикни ёпишни ҳам унутган, аъзойи бадани дағ-дағ қалтирар, тили калимага келмас эди. Катрина онамнинг ўзини ёлғиз учратарман, деб ўйлаганди, лекин уйда йигитни кўриб, йўлда ўйлаб қўйганларининг барини унутди.

— Нима керак сенга бу ерда?— қичқирди она, ўрнидан ҳам турмай...— Қайтиб башарангни кўрмай энди, йўқол!

Катрина бир нима демоқчи бўлиб уриниб кўрди.

— Ойи, мана кофе билан қанд... Ҳа, болаларга... Ишдан ташқари вақтда ишлаганимга олдим, сизларни ўйладим...

Катрина чўнтагидан кофе билан қанд солинган бир қадоқли икки пакетни чиқарди-да, хайиқиб стол устига қўйди. Ворёдаги забастовка ҳақидаги фикр уни қийнарди: у Жан-Барт шахтасида ишларди, болаларга гамхўрлик баҳонасида ота-онасига ёрдам беришдан бошқа илож топа олмаганди. Лекин унинг меҳрибонлиги онанинг кўнглини асло юмшатмади.

— Бизга ширинликлар олиб келгунча, уйингда бўлиб, нон топсанг бўлмасмиди,— жавоб берди Маэ хоним.

Она Катринага дашномлар ёғдира кетди: қалбида бир ойдан бери йиғилиб қолган ҳамма гина-кудуратни юзига айтиб солди. Ота-онанг шунчалик қашшоқликда яшаётган бир пайтда, ўн олти яшар қиз бола, наҳотки бир эркакка илашиб кетсанг! Энг ярамас, бориб турган бузуқ қизгина бундай иш қилиши мумкин. Аҳмоқликни кечирса бўлади, аммо она бунақа қилиқни умрбод унутмайди. Уни бойлаб қўйган бўлса ҳам майли эди! Ихтиёри ўзида эди, шамолдек эркин эди, фақат кечаси тунагани уйга келса бас эди.

— Қани, айтгин-чи ўзинг, нима бало бўлди сенга? Ҳозир шундоқ бўлсанг, кейин нима бўласаи?

Катрина бошини қуйи солганича стол ёнида қимир этмай тинглаб турарди. Унинг ориққина, нимжон жусаси қалтирарди; у титроқ, узук-юлуқ товуш билан бир нима деб жавоб қилмоқчи бўларди...

— Қани энди, гап битта менинг ўзимда бўлса. Ростини айтганда, бундан ўзим ҳам хурсанд эмасман!.. Ҳаммасини қилган ўша. У хоҳлаб тургандан кейин мен нима қилардим; ахир у мендан кучли-ку... Кети нима бўлишини билиб бўлармиди? Начора, бўлган иш бўлди, нима ҳам қилардим, у бўлмаса бошқаси қиларди шу ишни. Ишқилиб менга уйланса бўлди энди.

Катрина ўзини жуда эрта хотин бўлиб қолган кўпгина қизлардек сира нафратланмай, беихтиёр, аччиқтирсиксиз ҳимоя қиларди. Ҳамма ҳам шундай. У ҳеч қачон ҳеч нимани ўйламаган ҳам эди. Ун олти яшар бу қизни уюм орқасига олиб бориб, зўрлик билан бадном қилди; кейин ўйнаши унга уйланган чоғида ҳам эри билан бўладиган турмуши турмуш бўлармиди. Катрина шарм-ҳаёдан қизармади ҳам, қалт-қалт титрагани бу йигит олдида онасининг унга саёқ қизларга қилгандек муомала қилганидан эди: Этьеннинг шу ердалиги Катринани хижолатга солиб, фиғонини оширарди.

Бу орада Этьен ўрнидан туриб, ўзини гўё милтиллаб турган оловни қовлаштираётган қилиб кўрсатди. У уларнинг гапларига халақит беришни истамади. Бироқ уларнинг нигоҳлари тўқнашиб қолди. Йигит қизнинг ранги қочиб, адоий тамом бўлиб қолганини пайқади: шундай бўлса ҳам Катрина анча дилбар эди — дағаллашган чехрадаги кўзлар порлаб турарди; шундан кейин йигит ғалати туйғу туйди: хафалиги ёзилиб, Катринанинг ўзи маъқул кўрган йигит билан бахтли бўлишини истаб қолди. Этьенда Катринага ёқадиган бирор иш қилиш истаги пайдо бўлди — Монсуга бориб, ўша одамни қизга яхши муносабатда бўлишга мажбур этмоқчи бўлди. Бироқ Катрина унинг узукун меҳрибонлик қилишини раҳмдилликка йўйди. У менга шундай қараяптими, демак, у мендан жирканиши керак! Шу боисдан Катринанинг юраги сиқи-

либ, овози чиқмай қолди-ю, ўзини оқлаш учун бирор калима сўз тополмади.

— Яхшиси, овозингни ўчир, ҳа! — жаврарди қаҳри қаттиқ она. — Қоламан деб келган бўлсанг майли-ю, аммо кетаман десанг, ҳозироқ жўнаб қол, ўрнимдан туrolмаганим учун шукур қил, йўқса шундай бошлаб тепардимки, учиб кетардинг.

Катрина қўққисдан бу дўқ чинга айланиб, биров кетига қаттиқ тепиб юборгандай бўлди; Катрина бу кутилмаган тепки ва оғриқдан тамомила эсанкираб қолди. Бу — Шаваль эди; у бир сакраб хонага кирди-ю, худди ваҳший ҳайвондек Катринага ташланди. Шаваль бунгача бир муддат остонада туриб, ҳамма гапни эшитганди.

— Ҳа, ярамас! — бўкирди у. — Атайлаб кетингдан пойлаб келдим: у билан ўйнашгани шу ёққа келарсан, деб ўйловдим-а ўзим ҳам! Уни меҳмон ҳам қиласанми ҳали, а? Менинг пулчамга кофе олиб бериб сийламоқчимисан?

Маэ хоним билан Этьен кутилмаган бу воқеадан ҳанг-манг бўлиб қолишди. Шаваль қутуриб Катринани уйдан турткилаб чиқара бошлади.

— Борасанми, йўқми, жин ургур?

Лекин Катрина бурчакка тикилиб олганди. Шунда Шаваль онасига ёпишиб кетди:

— Жуда яхши иш топибсан-да: қизинг тепада оёқларини кўтариб у билан ётганда сен уй пойлайсан...

Ниҳоят, Шаваль Катринанинг қўлидан маҳкам ушлади-да, уни силкиб-силкиб, судраб кетди. У эшикка етганда яна ўгирилиб, гўё стулга қапишиб кетган Маэ хонимга қаради. У кўксини бекитишни унутганди. Эстелла онасининг юбкасига бурнини тираб, юзтубан ухлаб ётарди; улкан, яланғоч сийна худди тирсиллаб турган сигир елинидек лорсиллаб турарди.

— Қизи бўлмаганда онаси ўрнини босади-да! — шанғиллади Шаваль. — Ҳа, ҳа, шунақа, баданларингни кўрсатиб қўй! Бу мол ижарачинг ҳазар қилмайди!

Этьен дик ўрнидан туриб, бир тарсаки туширмоқчи бўлди. Лекин бу муштлашиш посёлкада дув-дув гап бўлиб юрмасин, деган андишага борди, шунинг учунгина Катринани Шавалнинг қўлидан юлиб олмади. Лекин ҳозир газаби қайнаб кетди. Иккови юзма-юз

турарди, уларнинг кўзларига қон тўлганди. Бу эски адоват, беҳуда рашиқ бўлиб, энди сиртга тепкан эди. Худди биттаси нобуд бўлиши керакдек эди.

— Шощмай тур ҳали! — деди Этьен тишларини қисиб. — Тагинга етаман бир кун.

— Етиб кўр, қани! — жавоб берди Шаваль.

Бир неча дақиқа улар бир-бирларига ўқрайиб туришди; улар шу қадар яқин туришардики, бир-бирининг иссиқ нафаси юзларига урилаётганини сезар эдилар. Катрина ўртага тушиб, уларнинг гўдайиб туришларига барҳам берди; у ялинқираб жазманининг қўлидан олди-да, судраб кетди. Катрина бутун посёлка бўйлаб Шавални судраб бораркан, ҳеч ёққа қарамай чопарди.

— Ҳайвон экан-ку! — гўлдиради Этьен жаҳл билан эшикни ёпаркан; унинг газаби шунчалик қайнаган эдики, оёғида аранг турарди.

Маэ хоним ҳатто қимирламади ҳам. У фақат қўлини силкиб қўйди. Юракни эзадиган жимлик чўкди; юракдаги жуда кўп гаплар айтилмай қолди. Этьен ўчакишгандай унинг сийнасига, оппоқлиги энди уни хижолатга солаётган катта кўкрагига нигоҳ ташлади. Тўғри, Маэ хоним қирқ ёшларда бўлиб, кўп туғаверганидан сўлиб қолганига қарамай, ҳамон кўпларнинг ҳирсини кўзғата оларди. Бу қад-қомати келишган, бақувват хотин бўлиб, чўзинчоқ юзида илгариги ҳуснинг излари сақланиб қолганди. У икки қўли билан шошмай, бамайлихотир сийнасини олиб яширди. Пуштиранг учи кўриниб қолганидан бармоғи билан ичкарига тиқиб қўйди, кейин тугмаларини қадади. Энди Этьеннинг олдида эски қора кофта кийган бўш-баёв хотин ўтирарди.

— У чўчқа-ку, — деди хотин ниҳоят. — Бунақа пасткашлик шунақа ифлос чўчқаларнинг хаёлига келади, холос. Тупурдим унга! Жавоб қайтаришга ҳам арзимайди.

Кейин Маэ хоним йигитдан кўзини узмай очиқчасига қўшиб қўйди:

— Албатта, менинг ҳам ўзимга яраша камчиликларим бору, аммо бунақа номаъқулчилик қилган эмасман... Мен умримда бор-йўғи иккита эркакни кўрдим холос: биттаси бир юккаш эди — бунга анча бўлди,

энди ўн бешга тўлган эди, иккинчиси — Маэ. Маэ ҳам анавидек мени ташлаб кетганида нима бўлишимни ўзим ҳам билмасдим. Мен тўйдан кейин ўзимни яхши тутдим, деб мақтана олмайман: ахир кўпинча имконият бўлмагани учун ҳеч қандай бемаънилик қилолмайсан-да. Лекин мен бор гапни айтяпман; ахир ўзлари ҳақида шунақа гапни айта олмайдиган қўшнилари борлигини биламан-ку, тўғрими?

— Ҳа, рост,— тасдиқлади Этьен ўрнидан тураркан.

Этьен ташқарига чиқди. Маэ ухлаб қолган Эстеллани бир-бирига тақаб қўйилган стулга ётқизиб, олов ёқмоқчи бўлди: борди-ю, эри балиқ тутиб, сотиб келса, лоақал ёвгон шўрва қилади-ку.

Ташқарида қош қорайиб, совуқ тун тушганди. Этьен бошини эгиб борарди; уни ғам-ғусса босганди. Бу ғам-ғусса Шавалдан ғазабланганидан ҳам, камбағал, хўрланган қизга ачинишдан ҳам эмасди. Бу даҳшатли можаро йироқлашиб, кўздан йўқолди; у яна ҳамма аламдийдалар ҳақида, даҳшатли муҳтожлик ҳақида ўйлай бошлади. У, хаёлан нонсиз қолган посёлкани, кечқурун ейишга ҳеч вақоси йўқ аёллар, болаларни, курашда силласи қуриган оч-наҳор халқни кўз олдига келтирарди. Шу ваҳимали оқшомда унда шубҳа туғилди, бундай шубҳа баъзан унинг вужудини қамраб оларди; бу фикр энди Этьенни ҳар қачонгидан ҳам қаттиқроқ эза бошлади. Қандай даҳшатли масъулият елкасидан оғир тошдек босиб ётибди-я! Пул ҳам, қарз-ҳавола қилиш иложи ҳам қолмаган бир пайтда одамларни мардона бўлишга, таслим бўлмасликка ишонтириб, уларни олға бошлайверса бўлармикин? Бирор жойдан ёрдам келмаса, очлик мардликни енггудек бўлса, бу уринишларнинг оқибати нима бўлади? Бирдан кўз олдида ҳалокат манзараси жонланди: ўлаётган болалар, оналарнинг кўзларида ёш, ранглари оппоқ, силласи қуриган эркаклар эса яна шахтага тушиб кетишяпти. Этьен тошларга қоқилиб, ҳамон йўлда давом этарди; борди-ю, Ширкат зўр чиқса, ўртоқларимнинг бахтига мен зомин бўламан, деган фикрдан унинг аъзойи бадани ўртаниб кетди.

Этьен бошини кўтариб, рўпарасидаги Ворёни кўрди. Қоронғи тушиб қолгани учун нохуш бинолар ғуж

бўлиб кўринарди. Иморатларнинг кимир этмайдиган соялари ўраб олган бўш майдон ташландиқ қалъа бурчагига ўшарди. Кўтарма машина тўхтаганидан буён бу ерда ҳаёт сўнгандек эди. Шу бемаҳалда ҳаёт асари сезилмасди — на фонарь бор, на товуш эшитилади: насоснинг пихиллаши аллақаяқдан келаётган кучсиз хуррак товушига ўхшайди; бутун шахта тақатақ тўхтаган эди.

Этьен конларга қараркан, юраги гупиллаб уриб кетди. Ҳа, ишчилар очликдан азоб чекапти, лекин Ширкатнинг миллионлари ҳам нест-нобуд бўляпти. Нима учун энди меҳнат билан капиталнинг бу курашида Ширкат ғолиб чиқар экан? Ҳар қалай ғалаба Ширкатга қимматга тушади. Зиёнлар кейин ҳисоблаб чиқилади. Этьенни жонни фидо қилиб бўлса ҳам қашшоқликдан бутунлай қутулиш керак, деган шижоат, жўшқин истак қамраб олди. Бутун посёлка балки бу адолатсизлик ва очликдан битта-битта ўлгандан кўра бирданига ўлиб қўяқолгани яхши. У гарчи яхши ўзлаштириб олмаган бўлса ҳам ўқиганларининг ҳаммасини эслади; душманнинг ҳаракатини тўхтатиш учун халқлар ўз шаҳарларини мардонавор ёндирганликлари ҳақидаги, оналарнинг ўз болаларини қулликдан қутқариш учун уларнинг бошларини кўча тошларига уриб ёрганликлари ҳақидаги, эркакларнинг эса зolimлар нонини ейишдан кўра силлалари қуриб ўлишни афзал билганликлари тўғрисидаги ҳикояларни элас-элас эслади. Буларнинг ҳаммаси Этьенни илҳомлантириб юборди, оташин шодлик қайгули ғамгуссаларни енгди, шубҳалар чекинди ва у бирров қўрқувга тушганидан уялиб кетди. У яна ўзини аввалгидек дадил тутди, шу билан бирга унда яна қанот бағишлаган ғурур пайдо бўлди; у ўзининг бошлиқ эканлигидан, ҳамма унга итоат этиб, жон фидо қилиши мумкинлигидан қувониб кетди. У ўзининг қудрати ва оқибатда ғалаба қилажаги ҳақида янада қувнаб хаёл сурарди; хаёлан у буюк ва содда орзулари амалга ошган манзарани кўз олдига келтирди: у ҳукмдор бўлгач, ҳокимиятдан воз кечиб, уни халққа инъом этади.

Этьен ҳушига келиб, сесканиб кетди: у ови бароридан келганини гапирётган Маэнинг товушини эшит-

ганди. Маэнинг омади келиб, ажойиб хонбалиқ тутган ва уни уч франкка пуллаган эди. Энди уйига бирон егулик олиши мумкин. Этъен Маэга, сен посёлкага боравер, мен тез қайтаман, деди-да, ўзи «Авантаж»га жўнади. У қовоқхоначининг миждози кетгунча кутиб турди-да, Раснёрга қатъий қилиб, Плюшарга тезда етиб кел, деган мазмунда хат ёзажагини айтди. У хусусий жамғарма тўплашни йўлга қўйишга қатъий қарор қилган эди; у Монсудаги ҳамма кўмир қазувчилар Интернационалга кирсалар, ғалаба қозонишга ишонар эди.

IV

Мажлис бева Дезирнинг «Қувноқ» қовоқхонаси биносида пайшанба куни соат иккига белгиланган эди. Бева кўмирчи-болалари дучор қилинган кулфатлар туфайли бениҳоя даргазаб эди; айниқса дўкони бўшаб қолганидан бери қаттиқ хафа эди. Бирорта забастовкада ҳам ҳозиргидек кам ичишмаганди; ҳатто энг ашаддий майхўрлар ҳам шартни бузиб қўйишдан қўрқиб, уйларида ўтиришарди. Ярмарка кунлари доимо гавжум бўладиган Монсу ҳам сув сепгандек жимжит эди; чўзилиб кетган кенг кўча файзсиз бўлиб, ҳувиллаб турарди. Пештахтадан ҳам, қоринлардан ҳам пиво тўкилмасди; ариқчалар қовжираб қолганди. Кўчада, «Казимир» қовоқхонаси билан «Прогресс» қаҳвахонаси олдида шу дўконларнинг эгалари туришиб, ранглари ўчганича, йўлга ташвиш билан қарашарди. Монсунинг ўзида «Ланфан» дан тортиб, то «Ўчоқ», «Вино ертўласи» ва «Довюррак» қовоқхоналаригача ҳаммаси ҳувиллаб турарди, фақат одатда штейгерлар йиғилиб турадиган «Авлиё Элоа» қаҳвахонасидагина кунига бир неча кружка ичиларди. Ҳатто «Вулқон» ҳам бўм-бўш бўлганидан қизлар ишсиз ўтиришарди: замон оғир бўлгани учун баҳолари ўн судан беш суга туширилган бўлса-да, жазманлар топилмасди. Бутун ўлка чинакам қайғуга чўмганди.

— Жин урсин! — хитоб қилди бева Дезир сонига шапатилаб. — Ҳаммасига жандармлар айбдор! Агар лозим топишса, майли мени турмага қамашсин, лекин мен ҳам уларнинг таъзирини бераман!

Ҳокимлару хўжайинлар бу хотиннинг кўзига жан-дармлар бўлиб кўринарди,— у халқ душманларининг ҳаммасини ана шу машъум сўз билан атарди. Шунинг учун ҳам у Этьеннинг илтимосини бажо келтиришга жон-жон деб рози бўлди: унинг уйи кўмир қазувчилар хизматида бўлади, бир франк ҳам олмасдан базмлар залини беради, ўзи эса қонунга мувофиқ таклифномаларни тарқатади. Борди-ю, қаршилиқ қилишадиган бўлишса—ўзларига қийин! Кекирдакларини чўзиб қўйишади! Эртасига Этьен унга посёлкадаги саводхон қўшнилар кўчириб берган элликка яқин хатни имзо қўйиш учун олиб келиб берди. Хатларга делегатлар, содиқ кишиларнинг номларини ёзиб, шахталарга жўнатишди. Кун тартибини ҳам ишлаб чиқишиб, унга забастовкани давом эттириш масаласини муҳокама қилишни киритишди. Ҳақиқатда эса Плюшарнинг келишини кутишарди, унинг нутқига катта умид боғлашганди. Бунинг натижасида ишчилар оммавий тарзда Интернационалга киришлари керак эди.

Пайшанба куни Этьен эрталабданоқ хавотирлана бошлади. Собиқ бошлиғи Плюшар юборган хабарида чоршанба куни кечқурун етиб бораман, дея ваъда берган бўлса-да, шу чоққача дараги йўқ эди. Нима бўлдикин? Этьен йиғилиш бошлангунча Плюшар билан маслаҳатлашиб ололмайманми, дея диққати ошарди. Этьен соат тўққиздаёқ Плюшар Ворёда ушланиб қолмай тўппа-тўғри ўша ёққа кетган бўлса керак, деб Монсуга жўнади.

— Йўқ, ошнангизни кўрмадим,— деди Дезирнинг беваси.— Лекин ҳамма нарса тахт, ўзингиз бир кўринг-а.

Хотин Этьенни базмлар залига бошлади. Залнинг безаклари ўша-ўша: ўртаси қоғоз гулдаста билан бежалган шифтдаги нақшлар, деворларда авлиёларнинг номлари ёзилган зарҳалли картон жадвал. Фақат бурчакдаги созандалар ўтирадиган супа ўрнига стол билан учта стул, улардан берига бурчаклатиб скамейкалар қатор-қатор қилиб қўйилганди.

— Жуда яхши,— деди Этьен.

— Шуни ҳам билингки, сиз ўзингизни ўз уйингиздагидек ҳис қилишингиз мумкин,— деб давом этди бева,— истаганча бақириб гапираверинг... Борди-ю,

жандармлар келиб қолишса, жавобини ўзим бераман.

Этъен кўнгли нотинч бўлишига қарамай, кўкракларини қучоққа сигмайдиган даражадаги бу бақалоқ хотинга қараб кулиб қўйди, шунинг учун ҳам ҳозир олти ўйнашидан ҳар кеча иккитаси келади, дейишадиди-да.

Шу он Этъен залга кириб келган Раснёр билан Суваринни кўриб, ҳайрон бўлиб қолди. Бева кетиб, каттакон бўм-бўш залда учовлари қолишди.

— Ие! Қачон келдинглар?!— хитоб қилди Этъен.

Машинистлар забастовкада қатнашмаётгани учун Суварин кечаси Ворёда ишлаганди; шунчаки у ўзи қизиқиб келганди. Раснёр бир неча кундан бери таъби хира бўлиб юрарди; унинг лўппи юзидаги мулойим табассум сўнган эди.

— Плюшар келмаяпти, жуда хавотир оляпман, — деди Этъен.

— Ажабланадиган ери йўқ, мен энди уни кутмай қўйдим, — деди қовоқхоначи бошқа томонга қараркан, тишини қисиб.

— Нима учун?

Шунда Раснёр бор гапни айтишга журъат этди. У Этъеннинг кўзларига тик боқди-да, дадил деди:

— Агар билишни истасанг, мен ҳам унга хат ёзиб, келмагин, деб илтимос қилганман... Ҳа, ҳа, менимча, ўз ишларимизни бегоналарга мурожаат қилмасдан ўзимиз йўлга қўйишимиз керак.

Этъеннинг жон-пони чиқиб кетди; у ғазабдан титраб, Раснёрга тикилди-ю, тутила-тутила такрорлади:

— Шундай қилдингми-а? Шундай қилдингми-а?

— Ҳа, шундай қилдим! Плюшарга қанчалик ишончимни биласан-ку, ўзинг! У ақлли одам, ишончли йигит, унга таянса бўлади. Лекин сизларнинг ғояларингизга тупураман! Сиёсат билан ҳам, ҳукумат билан ҳам ҳеч қанақа ишим йўқ! Мен шахтёрларга яхши муомала қилишларини истайман. Мен ўша ер тагида, пастда йигирма йил ишладим, мана шу давр мобайнида ғам-ғуссани кўравериб, ўзимга ўзим ҳамон ўнгирларда терга ботиб ишлаётган шу камбағалларнинг аҳволини яхшилашга сўз берганман; сизлар бўлсангиз, чўпчакларингиз билан ҳеч нарсага эриша олмайсиз, буни аниқ биламан. Аксинча: сизлар ишчилар ҳаё-

тини бундан бадтар қиласизлар... Очлик уларни яна шахтага ҳайдаганида, уларга аввалгисидан ҳам ёмонроқ муомала қилишади. Ширкат уларни уриб-уриб инига киритилган саёқ итдек роса калтаклайди ҳали... Мен худди шундай бўлишига йўл қўймоқчи эмасман, билдингми?

Раснёр йўгон оёқларини маҳкам босганича, қорни чиқариб, Этьен олдида турар, тобора қаттиқ гапирар эди. Унинг ақлу заковати ва саботи ана шу аниқ, чертиб-чертиб айтган сўзларида ифодаланганди; у заррача ҳам тутилмай гапирарди. Хўш, ахир бу беақллик эмасми? Бир ҳамла билан оламини ўзгартиб, ишчиларни хўжайинлар ўрнига ўтказиб, пулларни худди олмани бўлгандек баравар тақсимлаб бериш мумкин, деган гапга ким ишонади? Буни амалга ошириш учун минглаб йиллар керак бўлади. Бунақа чўпчаклар билан унинг бошини қотириб юришмасин! Бурним пачақ бўлмасин десанг, энг яхшиси — тўғри йўлдан, яъни амалга оширса бўладиган реформалар талаб қилиш йўлидан бориш керак; қисқаси, ишчи халқи аҳволини яхшилаш учун ҳар бир воқеадан фойдаланиш лозим. Ҳозир ҳам энг маъқули — Ширкатни мақбул шартларни қабул қилишга кўндиришга ҳаракат қилиш керак; агар қайсарлик қилинаверса, ҳамма иш расво бўлади, одамлар очликдан ўлади.

Этьен унинг гапини бўлмади. У қаҳр-ғазабдан бир оғиз ҳам сўз айтолмасди.

— Оббо жин ургур-ей! — қичқирди у ниҳоят. — Томирларингдаги қонми ё сувми?

Яна бир минут шу алпозда турса, Этьен Раснёрни уриб юборган бўларди. У уриб юборишдан ўзини тийиш учун залда у ёқ-бу ёққа юра бошлади. Оёғига дуч келган скамейкаларни ағдариб, аламини улардан олди.

— Ҳеч бўлмаса эшикни ёпиб қўйинглар, — деди Суварин. — Эшитиб қолишса, яхши бўлмайди.

Суварин ўзи эшикни қарс этиб ёпди-да, кейин стол олдига келиб ўтирди. У тамаки ўраркан, икковига синчковлик билан мулойим боқди; унинг лабларида билинар-билинемас истеҳзоли табассум кезарди.

— Агар жаҳл қиладиган бўлсанг, ҳеч нимага эриша олмайсан, — насиҳатомуз давом этди Раснёр. — Мен аввал сени ақлли йигит, деб ўйлардим. Сен уларга

оғирроқ бўлинглар, уйдан чиқманглар, дея маслаҳат бериб, жуда яхши қилдинг; сен тартибни сақлаш учун ўз таъсиригдан фойдаландинг. Энди бўлса ишнинг пачавасини чиқармоқчисан!

Эъён ҳамон скамейкалар орасида у ёқдан-бу ёққа юрар эди. У ҳар сафар қовоқхоначининг олдига келганида унинг елкасидан ушлаб силкиб, бетига қараб қичқирар эди:

— Ахир мен бундан буёғига ҳам тинчлик бўлсин дейман, жин ургур! Ҳа, мен уларни интизомга бўйсунтиришга мажбур этдим! Ҳа, мен ҳозир ҳам уларни осойишталикка чақиряпман! Лекин мен бизни аҳмоқ қилишларини истамайман!.. Бунчалик совуққонлигинг — сенинг бахтинг. Мен бўлсам, баъзан бошим айланиб кетади.

Бу Эъённинг эътироф этиши эди. Йигит янги маслакни қабул қилган кишининг жўшқин тасавури тасвир этган ҳамма нарсдан, ҳадемай кишилар ўртасида адолат ҳукмрон бўладиган шаҳар ҳақидаги беозор орзулари устидан кулишга тайёр эди. Наҳотки одамлар умрларининг охиригача худди бўрилардек бир-бирларини ғажижса-ю, у қўл қовуштириб тураверса, зап иш бўлади-да! Йўқ! Курашиш керак, бўлмаса, адолатсизлик абадий давом этаверади, бойлар эса камбағалларнинг қонини сўришини қўймайди. Шунинг учун ҳам у бир вақтлар, гўё ижтимоий масалаларни ҳал қилганда сиёсатни бир ёққа йиғиштириб қўйиш керак, деганига ўзини кечира олмасди, шу гапи билан у бемаънилиқ қилганди. Лекин у чоқларда Эъён ҳали ҳеч нарсани билмасди, шундан бери у жуда кўп ўқиди, кўп нарсани билди. Ақли тўлишиб, ҳатто унинг ўз системаси пайдо бўлди. У фикрларини баён этишни билмасди холос: ҳамма назариялари, ҳатто у рад этган фикрлар билан қоришиб, чалкаш-чулкаш бўлиб кетарди. Ҳар қалай унда Карл Маркснинг капитал — эксплуатация натижасидир, меҳнат аҳли ўғирлаб тўпланган бойликни тортиб олиши керак ва бунга ҳақлидир, деган ғояси ҳукмрон эди. Дастлабки пайтларда у амалда Прудон кетидан бориб, ўзаро қарз бериш, ҳар қандай воситачиларни тугатадиган улкан айрибошлов банки ҳақидаги ҳавойи фикрларга берилиб, ўзини алдаб юрди. Кейин Лассал-

нинг давлатдан ёрдам олиб ишлашга асосланган кооператив жамиятларидан илҳомланди; бу жамиятлар секин-аста ерни ягона саноат шаҳарчасига айлантириб бориши керак эди; аммо кейинроқ бундай системада назорат қилишнинг қийинчиликларини кўриб, уни рад этди. Кейинги вақтларда у коллективизм ғоясига эътиқод қўйиб, ҳамма ишлаб чиқариш қуруллари коллектив ихтиёрига бериб қўйилиши керак, деб ҳисобларди. Лекин бу янги орзу ҳам ғира-шира эди; бу ғояни қандай рўёбга чиқаришни билмасди, шубҳалари, таъсирчанлиги халақит берарди, ақл-фаросати эса фидойиларнинг кескин талаблар билан чиқишига монелик қиларди. У фақат ҳаммадан олдин ҳокимиятни қўлга олиш керак, у ёғи кейин маълум бўлади, деб таъкидларди.

— Сенга нима бўлди ўзи? Нега сен буржуалар томонига ўтиб олдинг?— ғазаб билан гапини давом эттирди у яна қовоқхоначининг олдида тўхтаб.— Ахир ўзинг бир кун эмас, бир кун буларнинг ҳаммаси асфаласофилинга кетади, дегандинг-ку!

Раснёр бир оз қизарди.

— Ҳа, мен шундай дегандим. Ҳаммаси асфаласофилинга кетганда, менинг қўрқиб ўтирмаганимни кўрардинг... Бироқ мен ўз шахсий мавқеларини мустақамлаб олиш учун бошбошдоқликларни кучайтирувчиларга ҳам қўшила олмайман.

Энди Этьен ҳам қизариб кетди. Энди улар қичқиришмасди; гаплариям аччиқ ва ўйиб оладиган тусга кирди; икковлари ҳам бир-бирига рақиб эканлигини, орага совуқлик тушганини тушунгандилар. Аслини олганда, икковининг икки томондан келишининг боиси ҳам шунда эди: бири революцион жўшқинлик билан ҳаракат қилса, иккинчиси ниҳоятда эҳтиёткорлик билан иш тутарди. Улар ўзлари истамаган ҳолда ўз эътиқодларидан бўйин товлаб, ўз ихтиёрларига қарши бу таҳликали ўйинни бошлашганди. Суварин уларнинг гапларига қулоқ солиб турарди. Унинг заифона чехрасида нафрат аломати зоҳир бўлди — бу нафрат жонини беришга тайёр, ҳатто шохидлик ҳам тама қилмайдиган хоксор бир кишининг қаттиқ нафрати эди.

— Сен менга нимани шама қилиясан?— сўради Этьен. — Ҳасад қилиясанми?

— Нимангга ҳасад қиларканман?— жавоб берди Раснёр.— Мен ўзимни буюк одам қилиб кўрсатаётганим йўқ, Монсуда секция очиб, ўзим секретарь бўламан деб куйиб-пишаётганим ҳам йўқ.

Этьен унинг гапини бўлмоқчи эди, бироқ Раснёр илова қилди:

— Мард бўлиб бўйнингга олақол! Сени Интернационал билан бир пуллик ҳам ишинг йўқ; шунчаки бош-қош бўлиб олиб, ўзингни катта киши қилиб кўрсатишни, машҳур шимолий федераль кенгаш билан ёзишмалар олиб боришни истайсан холос.

Орага жимлик чўкди. Этьен ғазабдан қалтираб, гапира кетди:

— Хўп, яхши... Мен бирон нима деб ўзимдан гина қилолмайман. Мен ҳамиша сен билан маслаҳатладим, мен бу ерга келмасимдан анча илгари сен бу ерда кураш олиб бораётганингни билардим. Лекин сен ёнингда бировнинг бўлишига тоқат қилолмайсан. Яхши, бундан буён бир ўзим ҳаракат қиламан... Аммо ҳаммадан аввал сени огоҳлантириб қўяйки, башарти Плюшар келмаган тақдирда ҳам йиғилиш бўлади, гарчи сен қарши бўлсанг ҳам ўртоқлар Интернационалга қиришади.

— Хўп, улар Интернационалга кирди ҳам дейлик, бироқ шу билан иш битди деган гап эмас-ку,— деб тўнғиллади қовоқхоначи.— Уларни бадал ҳақи тўлашга мажбур этиш керак ҳали.

— Мутлақо ундай эмас. Интернационал забастовка қилаётган ишчиларга бадал тўлаш муддатини узайтиради. Биз кейин тўлаймиз, ҳозир эса Интернационал бизга ёрдам қилиб туради.

Бирдан Раснёр тутатиб кетди:

— Хўп, майли, кўрамиз... Мен сенинг йиғилишингда қатнашаман, нутқ ҳам сўзлайман... Уларнинг миясини ачитишингга йўл қўймайман, уларнинг ҳақиқий фойдалари қаёқда эканлигини тушунтириб бераман. Шунда улар сен билан боришадими ёки мен билан бўлишадими — кўрамиз. Улар мени бир неча ўн йилдан бери билишади, сени келганинга эса ҳеч қанча вақт бўлгани йўқ, шундоқ бўлсаям ҳаммаёқни остинустин қилиб юбординг... Йўқ, йўқ! Тупурдим сенга! Вақти келди, ким кимни енгаркин — кўрамиз!

Раснёр шу гапдан кейин эшикни қарс этиб ёпиб, чиқиб кетди. Шифтдаги қоғоз нақшин гуллар силкиниб, деворлардаги зарҳал ёзувлар қимирлаб кетди. Кейин катта залга яна оғир жимлик чўкди.

Суварин пинагини бузмай чекиб ўтирарди. Этьен бирпас индамай у ёқдан-бу ёққа бориб-келиб турди-да, кейин гапга тушиб кетди: у дилидагини тўкиб солгиси келди. Агар шу семиз бекорчи ёпишаверса, у айбдор эканми? Этьен Раснёрнинг сен шуҳрат кетидан қувяпсан, дея қўйган айбни ўзидан соқит қилишга айниқса зўр бериб уринарди: у қандай қилиб посёлкадагилар билан дўстлашиб кетганига, кўмир қазувчиларнинг ишончини қандай қозонгани ва улар орасида таъсири қандай ошиб кетганига ўзининг ҳам ақли етмасди. Шуҳратпарастлигинг танг аҳволни баттар ёмонлантиряпти, дея тўнкалган айб Этьеннинг ғазабини қайнатарди; у кўкрагига муштлаб, ҳис-туйғулари биродарона эканлигини таъкидларди.

Бирдан у Суварин қаршисида тўхтаб, хитоб қилди:

— Биласанми, бу ишда ўртоқлардан битта-яримтасининг томчи қони тўкилади дейишганида, мен ўша заҳотиёқ Америкага қочиб кетган бўлардим!

Машинист елкасини қисди; тиржайиб лаблари қийшайиб кетди:

— Қони нимаси?!— деди у пичирлаб.— Бунинг ҳеч аҳамияти йўқ. Ер қонсираб ётипти.

Этьен тинчланди, стулни олди-да, Сувариннинг рўбарўсига ўтиб, столга тирсақларини қўйиб ўтирди. Сувариннинг оқ-сарик сочлари, афти, гоҳо-гоҳо қаҳр билан чақнайдиган сузик кўзлари — буларнинг ҳаммаси Этьенни ташвишлантириб, унинг иродасига ниҳоятда қаттиқ таъсир қиларди. Суварин чурқ этмасди, лекин унинг индамаслиги ҳам Этьенни ҳайратда қолдирарди — у борган сари машинистга кўпроқ муте бўлиб бораётганини кучлироқ ҳис этарди.

— Қани, ўзинг айт-чи, менинг ўрнимда бўлганинг-да, сен нима қилардинг?— деб сўради Этьен.— Ҳаракат қилишга даъват этиб, ҳато қилибманми? Энг яхшиси ўртоқликка қўшилиш-ку ахир, тўғри эмасми?

Суварин оғзидаги тутунни секин чиқараркан, унга жавобан ўзининг севимли гапини айтди:

— Сафсата! Лекин дастлабки пайтларда бу ҳам

ҳар қалай керак бўлади... Ростини айтганда, уларнинг Интернационали тез орада ўзини кўрсатади. У шу-гулланияпти бу масала билан.

— Ким?

— У!

Суварин шарқ томонга нигоҳ ташларкан, товушини пастлатиб, бу гапни қандайдир эҳтиром билан айтди. У ўз мураббийси, анархист Бакунин ҳақида гапирган эди.

— Қақшатғич зарбани ёлғиз ўшанинг ўзи бериши мумкин,— давом этди Суварин,— эволюция ҳақида сафсата сотаётган ўша олимларингнинг бари қўрқоқ... Уч йил ўтар-ўтмас Интернационал унинг раҳбарлигида эски дунёни яксон қилади.

Этъен диққат билан қулоқ соларди. У билиш иштиёқида ёнарди. Этъен ҳар замонда машинист оғзидан чиқадиган сўзларни уқиб олишга, яксон этиш ғоясининг магзини қақишга ҳаракат қиларди; бироқ Сувариннинг гаплари мужмал бўлиб, гўё бу сирни фақат ўзи учун сақламоқчи бўлгандек эди.

— Бундоқ тушунтириб берсанг-чи, мақсадларинг нима ўзи?

— Ҳаммасини яксон этиш, миллатлар ҳам, ҳукуматлар ҳам, хусусий мулк ҳам, худо ҳам, сиғиниш ҳам бўлмаслиги керак.

— Тушунаман. Лекин бу нимага олиб келади?

— Ҳеч қандай синфлари бўлмаган ибтидоий жамоага, янги дунёга олиб келади, ҳамма нарса янгитдан бошланади.

— Буни амалга ошириш воситалари қандай? Ишга қандай киришмоқчисизлар ўзи?

— Восита — ўт, оғу, ханжар. Қароқчи,— шу чинакам қахрамон, халқ қасоскори, китобий гаплардан холи бўлган амалдаги инқилобчидир. Бир неча қонли суиқасдлар уюштириш керак; бу ишлар мулкдорлар ҳоқимиятини чўчитиб, халқни уйғотади.

Суварин бу гапларни айтаркан, башараси қўрқинчли бўлиб кетганди. У жазаваси тутиб, ўрнидан турди, хира кўзларида сирли олов чақнади, худди синдириб юбормоқчи бўлгандек, назик қўллари билан стол четини қаттиқ ушлади. Этъен капалаги учиб, унга тикилиб қолди; у вақт-вақти билан Суварин хи-

коя қилиб берган гапларни — шоҳ саройи остига қўйилган бомбаларни, худди тўнғизларга санчилгандек пичоқ урилган жандармларнинг бошлиқларини, Сувариннинг маъшуқасини эслади. Суварин учун азиз бўлган бу ягона аёлни ёмғирли кунларнинг бирида Москвада осиганди. Шунда Суварин оломон срасида туриб, унга сўнгги бор меҳр билан тикилган эди.

— Йўқ, йўқ! — деди Этьен қўлларини силтаб гўё даҳшатли тушни ҳайдамоқчи бўлгандек. — Биз ҳали бу даражага етиб келганимиз йўқ. Қотиллик, ўт қўйишлар — асло бўлмайди! Бу — даҳшат, бу адолатсизлик! Ўртоқларнинг ҳаммаси бир кишидек бунга қарши қўзғалиб, айбдорни тилка-пора қилиб ташлашади!

Этьен буни тушунмасди, у бутун борлиғи билан ана шу ёмон ниятга — чалғи солинган бугдой бошогидек ағдариладиган дунёнинг яксон бўлишига қарши эди. Хўш, кейин нима бўлади? Халқлар яна бақувват бўлиб кетишлари учун нима қилиш керак? У жавоб истарди.

— Менга ўз программангни тушунтириб бер. Қаерга бораётганимизни билишни истаймиз...

Суварин хира кўзларини қаёққадир тикиб, хотиржамлик билан жавоб берди:

— Келажак ҳақидаги ҳар қандай мушоҳада — жиной иш: бу мушоҳадалар бутунлай емирилишга тўсқинлик қилади, революциянинг ривожланиш жараёнини секинлатади холос.

Бундай жавобни эшитган Этьеннинг эти увушиб кетган бўлса ҳам, кулгидан ўзини тияолмади. Лекин шунга қарамай, ўзининг соддалиги билан мафтун этувчи бу даҳшатли гоёнинг ўзича яхши томони ҳам бўлгани учун Этьен уни тан олишга тайёр эди. Аммо бундай гапларни шахтёрларга айтиш — Раснёрга каттакон дастак тутқизиш эканлигини тушунарди. Тадбир билан иш тутиш лозим.

Бева Дезир хоним уларга нонушта қилишни таклиф этди. Улар миннатдорлик билдиришиб, қовоқхона жойлашган қўшни бинога ўтишди: бегим кунлари бу хона тўсиқ билан залдан ажратиб қўйиларди. Машинист қуймоқ билан пишлоқни еб бўлгач, кетишга чоғланди. Этьен уни қолишга даъват этди.

— Нима кераги бор?— жавоб берди Суварин.— Сизларни ҳеч натижа чиқмайдиган сафсаталарингни эшитиш учунми?.. Бунақа сафсатабозликларни жуда кўп кўрганман. Хайр!

Суварин папирос тортиб, ҳар қачонгидек вазмин ва жиддий қиёфада чиқиб кетди.

Эъённинг ташвиши ортди. Соат кундузи бир эди. Афтидан, Плюшар сўзининг устидан чиқа олмаган бўлса керак. Соат бир яримда делегатлар йигила бошлади. Делегатларни ўзи кутиб олишига тўғри келди,— маъмурият ўз жосусларини киритиб юбормасин, деб кўрққан Эъён эшик олдида ўзи турмоқчи бўлди. Эъён ҳар бир таклифномани текширди, кишиларнинг юзларига диққат билан тикилди; лекин кўпгина киши таклифномасиз келипти. Эъён шахсан таниганларини қаршиликсиз ўтказиб юбораверди. Соат иккига занг урганда Эъён Раснёрни кўриб қолди; у пештахта олдида туриб гап сотар ва бамайлихотир трубкасини торгар эди. Унинг хотиржамлигидан масхара қилаётгани яққол сезилиб тургани Эъёни жуда даргазаб қилди, бунинг устига Захария, Муке ва бошқа майнабозлар ҳам йиғилишга келишипти. Уларнинг майнабозчилик қилишга келишгани аниқ: уларни стачка кам қизиқтирарди, бир амаллаб вақт ўтказсалар бўлди эди. Улар столга ўтиришгач, қолган-қутган пулларига пиво буюришди ва маслакдош забастовкачиларни мазақ қилишиб, ҳиринглашди; забастовкачилар эса аламларидан эснай бошлашди.

Яна чорак соат ўтди. Залдагиларнинг тоқати тоқ бўла бошлади. Эъён жаҳл билан қўлини силкиди-да, мажлисни очишга қарор қилди. У энди залга кирмоқчи бўлиб турувди, бирдан ҳадсганда кўчага қараб турган бева Дезир хоним қичқириб қолди:

— Э, ана, сиз кутаётган ўша одам келди!

Ҳақиқатан ҳам бу Плюшар эди. Ориқ қирчанги қўшилган аравада келган Плюшар кўчанинг ўртасидаёқ сакраб тушди. Бу ўрта бўйли, олифтанома, калласи ниҳоятда катта киши эди; у байрамга ясанган, ўзига тўқ кишилардек қора сюртук кийиб олганди. У беш йилдан бери қўлига эгов ушламай, сиртига оро берар, айниқса сочини эринмай тараб, ўзининг нотиқлик маҳорати билан жуда фахрланар эди; бироқ

унинг уқувсизлиги касб-коридан далолат бериб турарди; улкан қўлларининг тирноқлари темирга ишқала-навериб, ейилиб кетиб, ўсиб чиқмаганди. Ишчан, шуҳратпараст Плюшар вилоятларни тинимсиз кезар, ўз гоёларини тарғиб қилар эди.

— Кечикканимни айбга буюрмайсизлар-да! — деди у ҳар турли савол ва таъналарнинг олдини олиб. — Кеча эрталаб Прейида йиғилиш, кечқурун Валансей-да мажлис ўтказдим. Бугун эрталаб Сованья билан Маршьенда нонушта қилдим... Ниҳоят от ёллашга муваффақ бўлдим. Ғипна бўғилиб қолдим, эшитяп-сизлар-ку овозимни. Лекин ҳечқиси йўқ, мен бари бир сўзга чиқаман. Жсин урсин! Аъзолик билетим эсимдан чиқибди! Узимиз ҳам жуда бўлганимизча бўлибмиз-да!

Плюшар кучер аравани энди саройга қўяётган ерига борди-да, чамадонидан қора ёғоч қутини олиб, қўлтиғига қисиб келди.

Этъен оғзи қулоғига етиб, унинг кетидан келар, ханг-манг бўлиб қолган Раснёр эса кўришишга ҳам журъат этмас эди. Лекин Плюшарнинг ўзи унинг ол-дига келиб, қўлини қисди-да, хат тўғрисида гап очиб, бу қанақа бемаъни гап, нега йиғилиш ўтказилмас экан, иложи бўлса, доимо мажлис ўтказиш керак, деди. Бева Дезир хоним у-бу еб-ичиб олишни таклиф этди, бироқ Плюшар рад этди. Кераги йўқ, шундоқ ҳам гапираверади. Аммо у жуда шошяпти-да, чунки кечқурун Жуазелда бўлиб, у ерда Легуже билан келишиб олиши лозим. Ҳаммалари гурр этиб залга йўл олишди. Маэ билан Левак кечикишган бўлиб, уларнинг кетидан залга киришди. Ҳеч ким халақит бермасин, деб эшикни ичидан қулфлаб олишди. Майнабозчилар овозларини баралла қўйиб бундан кулишди; Захария ошнаси Мукега қичқириб, мартабали йиғилиш ҳақи-қатан ҳам туғиб бермоқчи шекилли, дея сўз қотди.

Скамейкаларга юзга яқин шахтёр жойлашди, ҳам-ма кутарди; ҳавоси оғир залда сўнгги рақс оқшоми-нинг ҳиди бор эди. Залда шивир-шивир бошланди, янги келганлар бўш жойни топиб ўтиргунларича ҳам-ма уларга ўгирилиб қараб туришди. Лиллдан келган киши ҳамманинг эътиборини тортди. Унинг эғнидаги қора сюртук ҳамманинг гашига тегарди.

Шу ондаёқ мажлис бошланди. Этъен президиум

сайлашни таклиф қилди. У номзодларни кўрсатди, қатнашувчилар эса ризоликларини билдиришиб, қўлларини кўтаришди. Президиум раислигига Плюшар, Маэ билан Этьен эса аъзолигига сайланишди. Стуллар сурилиб, президиум аъзолари жойларини эгаллашди; ҳамма раисни қидириб қолди, маълум бўлишича у доимо ёнида олиб юрадиган қутчасини стол тагига қўйиш учун энгашган экан. У қаддини ростлаб, мушти билан столни оҳиста тақиллатди-да, кутиб турди, жимлик чўккач, хирилдоқ товуш билан бошлади:

— Гражданлар...

Шу чоқ ён эшик очилди-да, у гапини тўхтатишга мажбур бўлди: бева Дезир ошхонани айланиб ўтиб, патнисда олти кружка пиво келтирди.

— Давом эттираверинг, марҳамат, — деди у секингина. — Гапираётганингда ҳамиша томоғингни хўллаб олгинг келади.

Маэ унинг қўлидан патнисни олди Плюшар давом эттириши мумкин эди. У иззат-икром қилганлари учун Монсу ишчиларига ташаккур айтиб, чарчагани ва бўғилиб қолгани туфайли кечиккани учун узр сўради. Кейин у граждан Раснёр гапиришни сўрагани учун унга сўз берди.

Бу вақт Раснёр стол ёнида, пиволи кружкалар турган патнис олдида турарди. Суянчиғи халойиққа қаратилган стул унга минбар вазифасини бажарарди. Раснёр афтидан ниҳоятда ҳаяжонланаётган эди; у йўталиб олди-да, баланд товуш билан бошлади:

— Ўртоқлар!..

Одатда унинг енгил, бемалол гапириши ишчиларда катта таассурот қолдирарди; у соатлаб гапирса ҳам чехрасидан мулойимлик ифодаси аримас ва сира чарчамас эди. Бундай пайтларда у қўлларини ўйнатмай, қоққан қозиқдек туриб, жилмайганича гапираверарди; пайдар-пай сўзлаб, тингловчиларни бутунлай гангитиб ташларди; оқибатда тингловчилар: «Ҳа, ҳа, гапинг тўғри, сен ҳақсан!» — дея қичқиришга тушардилар. Лекин у ҳозир биринчи сўзлариданоқ зимдан бир қаршилиқ сезди-ю, ҳар бир қилимини яхшилаб ўйлай бошлади. У фақат забастовкани чўзиш масаласини тилга олди, бу фикри яққол маъқулланса, Интернационалга ёпишмоқчи эди. Ён бериш, Ширкат-

нинг талабларига бўйсуниб, албатта, мумкин эмас— бу ишчилар шаънига путур етказди; лекин олдинда қанчадан-қанча гам-ғусса кутиб турибди! Ишчилар яна забастовкани давом эттиргудек бўлишса, гоё аянчли кунларга қолишлари турган гап! Раснёр забастовкани тугатиш керак, деб очиқ айтмаса ҳам, уларни гангитиб қўймоқчи бўлиб посёлкадаги одамларнинг ордан ўлаётганини тасвирлади ва забастовка тарафдорлари кимнинг ёрдамига орқа қиладилар, деб сўради. Дўстларидан икки-учтаси Раснёрнинг сўзларини маъқулламоқчи бўлганди, бироқ кўпчиликнинг энсаси қотиб, уларнинг гапларини индамай совуқ қарши олди: унга хайрихоҳ эмасликлари аниқ бўлиб қолди. Шундан кейин шахтёрларни гапга кўндиришдан умидини узган Раснёр хуноби ошиб, агар чет кишиларнинг гапига лаққа тушадиган бўлсаларинг, қулоқ эшитмаган балоларга дучор бўласизлар, деб каромат қилди. Ўтирганларнинг учдан икки қисми ўринларидан туришиб, унинг унини ўчирмоқчи бўлишди, чунки Раснёр уларга беақл болалардек муомала қилиб, иззат-нафсларига қаттиқ текканди. У бўлса ҳатто одамлар шовқин солишса ҳам пиводан ҳўллаб-ҳўллаб, нутқини давом эттираверди; бурчимни бажаришимга тўсқинлик қиладиган ким экан, бир кўриб қўяй-чи, дегандек жонжаҳди билан қичқираверди!

Плюшар ўрнидан турди. Қўнгироқча бўлмагани учун столни муштлаб, хириллаган товуш билан:

— Гражданлар... гражданлар... — дея такрорларди.

Ниҳоят у сал жимлик ўрнатишга муваффақ бўлди. Қисқа маслахатлашувдан сўнг йигилиш Раснёрни гапни давом эттириш ҳуқуқидан маҳрум этишга қарор қилди. Шахталарнинг директор билан гаплашиб келган делегатлари очликдан силласи қуриган, янги гоёлардан миялари ғовлаб кетган ишчиларга таъсир қилишди. Ҳаммаси олдиндан ҳал қилиб қўйилганди.

— Сен ҳаммасига тупуриб кетаверасан, чунки кунинг ўтаверади! — ўшқирди Левак Раснёрга мушт ўқталиб.

Этьен раиснинг орқасидан бўйинини чўзиб қаҳвахоначининг мунофиқона нутқидан ғазабланиб қичқизариб кетган Маэни тинчителишга ҳаракат қилди.

— Гражданлар,— деди Плюшар,— гапириш учун менга рухсат беринглар.

У гапини бошлади; ҳамма жим бўлиб қолди. Овози оғир, бўғилиб чиқарди, лекин шунга одатланиб қолганди — ҳамма нутқларини хириллаб ирод қиларди. Секин-аста Плюшар товушини баландлатиб борди, овозида тантанавор оҳанг янграй бошлади. У қулочини кенг ёзиб, сўз оҳангига қараб бутун гавдаси билан чайқаларди. Унинг моҳирона нутқи тиловатга ўхшарди; у нутқини тамомларкан, худди черковдагидек, ҳар сафар овозини пасайтирарди, ана шу бир маромда пичирлаб айтилган сўзлар ишончли ва таъсирли бўларди.

У Интернационалнинг улуғворлиги ва саховати ҳақида гапирди. Плюшар биринчи марта нутқ сўзлайдиган йиғилишларда гапни шундан бошларди. У мазкур ташкилотнинг меҳнаткашларни озод қилишдан иборат мақсадларини тушунтириб берди ва унинг олижаноб тузилишини баён этди; куйида — жамоа, юқорироқда — округ, яна баландроқда — миллат ва ниҳоят энг чўққида — бутун инсоният туради. Унинг қўли секин-аста кўтарилиб борарди: у гўё қаватмақават иморат қуриб, бўлажак дунёнинг улкан биносини бунёд этаётгандек эди. Сўнг Плюшар ички бошқарув масалаларига ўтди: уставни ўқиб берди, съездлар ҳақида, Ўртоқликнинг аҳамияти ошиб бораётганлиги, программанинг кенгайганлиги тўғрисида сўзлади. Аввалига фақат иш ҳақи масаласинигина кўзда тутган программанинг ҳозирда ижтимоий тузумни тубдан ўзгартириб юборишга жиддий киришганини айтиб, программанинг мақсади — ёлланма меҳнат системасини бекор қилишдан иборат эканлигини таъкидлади. Ҳеч қандай миллий айирмачиликлар бўлмаслиги керак: бутун жаҳон ишчилари адолат учун кураш йўлида бирлашиб, биргаликда чиркин буржуазияни супуриб ташлайди ва ишламаган ҳеч нарса олмайдиган эркин жамиятни барпо этадилар! Унинг овози гумбурлаб юқорига ўрларди, ис босган шифтдаги қоғоз гулларни ҳилпиратарди.

Кўмир қазувчилар жонланиб қолишди. Ҳар томондан:

— Тўғри!.. Биз бунга қўшиламыз!— деган садолар эшитилди.

Плюшар гапида давом этди. Уч йил ўтар-ўтмас улар ғалаба қилишади. Нотиқ бу ҳаракатга қўшилган халқларни санаб кетди. Ташкилотга кириш ҳақида илтимос қилиб ёзилган аризалар ҳар тарафдан келяпти. Шу чоққача бирор диний таълимотнинг бунчалик кўп муриди бўлган эмасди. Улар ҳукмрон бўлиб олишгач, хўжайинларга ўз ҳукмларини ўтказиб, уларнинг шохларини қайириб қўядилар.

— Ҳа!.. Ҳа!.. Уларнинг ўзлари шахталарга тушиб, ишлашаверишсин!

Плюшар ишора қилиб, ҳаммани жим бўлишга чақирди. Энди у забастовка масаласига ўтди. Сирасини айтганда, у забастовкаларни маъқулламасди: бу жудаям секин таъсир этадиган восита бўлиб, ишчиларнинг азоб-уқубатларини чўзиб юборади холос. Аммо ҳозир забастовка бўлиши муқаррар бўлиб, у бошланган экан, уни жиддий ўтказиш керак; забастовкаларнинг яна бир устунлиги шундаки, улар капиталистларнинг сафларини пароканда қилиб юборади. Бундай пайтда Интернационал забастовкачиларга таянч бўлади. Масалан, Парижда бронзачи-темирчиларнинг забастовкаси юз берди. Хўш, нима бўлди? Интернационал забастовкачиларни қўллаётганмиш, деган гап тарқалиши биланок, корхона эгалари шунчалик қўрқиб кетишдики, дарҳол ҳамма масалада ён беришди. Лондонда бутун бир шахта забастовка қилди, унинг хўжайини эса Бельгиядан ишчилар ёллаб, олдириб келди; шунда Интернационал кира ҳақини ёнидан тўлаб, ҳалиги ишчиларни изига қайтариб юборди. Ана шу тадбир туфайли забастовкачи шахтёрларнинг қўли баланд келди. Хўжайинларни саросимага солиб қўйиш учун Интернационалга қўшилишнинг ўзи кифоя: чунки хўжайинлар ишчилар капиталистик тузум қуллари бўлиб ётгандан кўра бир-бирлари учун қурбон бўлишни афзал билиб, меҳнаткашларнинг буюк лашкарлари сафига кираётганликларини яхши тушунадилар.

Қарсақлар янграб, унинг сўзи бўлинди. Плюшар янги дастрўмоли билан пешонасидаги терни артди, Маэ таклиф этган бир кружка пивони ўжарлик билан

рад этди. У гапине бошловди ҳамки, яна қарсақлар янграб, нутқини бўлди.

— Тайёр!— деди Плюшар Этьенга мурожаат қилиб.— Буларга шунинг ўзи ҳам етар... Қани, тезроқ аъзолик билетларини ол!

У стол тагига энгашиб, қора қутичани олди.

— Гражданлар!— қичқирди у шовқинни босишга уриниб.— Мана аъзолик билетлари. Делегатлар стол ёнига келишсин, мен уларга билетларни бераман, улар эса сизларга тарқатишади... Қолганларини кейин расмийлаштирамиз.

Ҳамон норозилик билдиришга уринган Раснёр дик этиб олдинга ўтди. Нутқ сўзлаш ниятида Этьен ҳам ўрнидан турди. Саросима бошланди. Левак муштлашишга тайёрлангандек, қўлларини силкита бошлади. Маэ туриб олиб, алланималар дер, лекин сўзларини тушуниб бўлмасди. Тўс-тўполон кучайди, яқинда бўлиб ўтган базмлардан кейин полга инган чанг кўтарилди: ҳавога қўланса тер ҳиди анқиди.

Қўққисдан ён томондаги эшик очилди-да, бева Дезир кўринди, гавдаси билан эшикни тўсиб, овозини гулдуратиб қичқирди:

— Жим бўлинглар, худо ҳаққи!.. Жандармлар!

Келган киши округ комиссари эди, тўрт жандарм билан келган комиссар протокол тузиб, йиғилишни тақиқламоқчи эди, бироқ кечикканди. Бека ўз уйимда хоҳлаган одамимни қабул қиламан, буни ҳеч ким тақиқлай олмайди, дея уларни беш минутча ичкарига киритмай турди. Лекин зўрлик билан уни ён беришга мажбур қилишгач, у йигитларини огоҳлантиргани юғуриб келди.

— Манови эшикдан қочиш керак,— давом этди у.— Ҳовлида ярамас жандарм қоровул бўлиб турибди, лекин ҳечқиси йўқ: ўтинхонадан жинкўчага чиқса бўлади... Қани, тез бўлинглар!

Комиссар бу чоқ эшикни тақиллатарди; эшикни очишмагани учун у синдириб кираман, деб дўк урарди. Афтидан, бирор жосус йиғилиш бўляпти, дея хабар берганга ўхшайди. Комиссар бу йиғилиш қонунга хилоф, чунки жуда кўп ишчи таклифномасиз келган деб бақирарди.

Бу орада залдаги тўс-тўполон тобора кучайиб бо-

рарди. Шу аҳволда кетиш мумкин эмасди: на Ўртоқликка аъзо бўлиш, на забастовкани давом эттириш масаласига овоз беришга улгуришганди. Ҳамма барабар гапирарди. Ниҳоят, раис иккала масалани бир йўла очик овозга қўйишга жазм этди. Қўллар кўтарилди; делегатлар шошиб-пишиб, биз бу ерда йўқ ўртоқларимиз учун ҳам овоз беряпмиз, дейишди. Шундай қилиб, Монсунинг ўн минг шахтёри Интернационал аъзоси бўлиб қолди.

Ҳамма апил-тапил тарқала бошлади. Уларнинг чиқиб кетишларига имкон бериш учун бева Дезир жандармлар милтиқ қўндоқлари билан тўқиллатаётган эшикни маҳкам ёпиб турарди. Шахтёрлар скамейкалардан ҳатлаб, бирин-кетин ошхона ва ўтинхона орқали қочишаётганди. Раснёр ҳаммадан аввал ғойиб бўлди, тезгина жаҳлидан тушган Левак унинг кетидан кетди; у фақат ўзимга келиб олиш учун бир кружка пивони қаердан ичсам бўларкин, деб ўйларди. Эъён қутичани олиб, уни қўлидан қўймасди; у Плюшар ва Маэ билан бирга кутиб турарди: улар ҳаммадан кейин кетишни шараф деб билардилар. Улар чиқиб кетишмасданок, эшикнинг илғаги чиқиб кетиб, комиссар бекага рўбарў бўлиб қолди: унинг сийнаси ва қорни сўнги тўсиққа айланди.

— Ҳаммаёқни бузиб-янчиб, шохларинг чиқдими? — деди бева. — Кўряпислар-ку, ҳеч ким йўқ!

Тепса тебранмас ва ишни чалкаштириб юришга сира тоқати йўқ комиссар бевага қараб, сени турмага ўтказаман, дея дўқ қилиб қўйди. Кейин у протокол ёзгани жўнади; тўртала жандарм ҳам унинг кетидан юришди. Ўртоқлари ишни бошлаб кетишганига қойил қолган Захария билан Муке энди қуролли полициячилардан заррача ҳам чўчимай, уларни мазах қилишарди.

Эъён жинкўчага чиқиб олгач, қутичани қўлтиғига қисганича бошқалар билан бирга қочиб кетаверди. Бирдан Пьерронни эслади-ю: «Нима учун мажлисга келмадийкин?» деб ўйлади. Чолиб бораётган Маэ унинг бетоб бўлиб қолганини, тоби қочгани ҳам чакки бўлмаганини айтди; маъмурият кўзига шумшук кўриниб қолмай, дегандир-да. Плюшарни қолинг, дея қисташди, лекин у тўхтамай, ҳозироқ Жуазелга жўнашим керак,

у ерда Легуже фармойишларимни кутиб турибди, деб жавоб берди. Унга оқ йўл тилаб, кузатиб қолишди. Шахтёрлар қадамларини секинлатмай, тўғри Монсу йўлидан чошиб боришаркан, нафаслари тиқилиб, аҳён-аҳёнда бир-бирларига луқма ташлаб қўйишарди. Этьен билан Маэ хурсанд бўлиб кулишарди. Энди улар ғалабаларига ишончлари комил эди: Интернационал маблағ юбориши биланоқ Ширкатнинг ўзи ишга чиқа қолинглар, деб ялинади. Уларнинг дадиллашиб қолганида, қўпол пойабзалларнинг катта кўча тошларига тегиб тўп-тўп этишида умид туғилишигина эмас, яна бошқачароқ бир нима, қандайдир даҳшатли ва шафқатсиз нарса — ҳамма ишчи посёлкаларига ёйилиб, бутун округни курашга отлантирувчи ғазаб ҳам бор эди.

V

Яна икки ҳафта ўтди. Январнинг бошлари эди. Поёнсиз текислик қаҳратон қиш туманида музлаб ётганди. Аҳвол оғирлашганди, посёлкаларда очлик авжга чиқиб, кун кўриш соат сайин ёмонлашиб борарди. Интернационал Лондондан юборган тўрт минг франк уч кунга зўрға етди. Бошқа ердан ҳеч вақо келмади. Ҳамманинг руҳи тушиб кетганди, катта умидлар рўёбга чиқмаганди. Ҳатто биродарлари ҳам ташлаб кетса, кимдан ҳам умид қилиш мумкин? Улар бутун дунёдан умидларини узиб, энди ўзларини қиш авжга чиққан пайтда ўлиб кетадигандек ҳис этардилар.

Сешанба куни Икки юз зағизгон посёлкасида охириги емишлар ҳам тугади. Этьен билан делегатлар тиниб-тинчишмади: атроф шаҳарларга, ҳатто Парижга хитобнома варақалари юборишди, ионалар йиғишди, мажлислар ўтказишди. Бироқ бу уринишларнинг бари бирор натижа бермади. Аввалига тугёнга келтирган тап-сўзлар забастовка чўзилиб, ҳайратга солувчи ҳеч қандай воқеа юз бермагач, мутлақо тинчиб қолди. Айрим одамлар қилган озгина иона энг муҳтож оилаларгагина аранг етарди. Бошқалар эса кийим-бошларини гаровга қўйиб, секин-аста рўзгор буюмларини сотиб, тирикчилик қилишди. Ҳамма нарса — тўшакларнинг жунлари, рўзгор идишлари, ҳатто мебеллар

ҳам эскичиларнинг қўлларига ўтди. Бир умид учқуни ялт этгандай бўлди: Монсудаги Мегра билан рақобатга дош беролмай синган майда чайқовчилар унинг харидорларини оғдириб олиш учун қарз бериб турадиган бўлишди; шундай қилиб, бир ҳафтадирки, Вердонканинг баққолчилик дўкони билан Карубль ва Смелътенларнинг икки нон дўқонига одам сиғмай кетди; лекин озиқ-овқат тамом бўлиши билан бу иш ҳам барҳам топди. Суд ижрочиларнинг иши юриб қолди — қарзлар ҳаддан зиёд кўпайди; кўмир қазувчилар энди бу қарзлар жадида ҳам азоб чекишлари аён бўлиб қолди. Энди ҳеч ким қарзга нарса бермасди, сотадиган нарсанинг ўзи йўқ — ҳатто эски кастрюлка ҳам қолмагани; дайди итдек бир бурчакка бориб, чўзилиб ўлишдан бошқа илож йўқ эди.

Этъен ҳеч қандай қурбондан қўрқмасди. У ойлигидан орттирган нарсаларининг ҳаммасини аллақачон берганди. Маршьенндаги судхўрга мовут сюртугини, яхши шимини топширди ва ўзи туфайли Маэ оиласи ҳали яшаб туриши мумкинлигидан бахтиёр эди. Энди этигигина қолганди, лекин ўзининг таъбири билан айтганда, оёқда маҳкам туриш учун этикни эҳтиёт қиларди. Бироқ уни ҳамма нарсдан ҳам хуноб қилаётган нарса — ўзаро ёрдам кассаси кучайиб олмасдан забастовканинг жуда эрта бошлангани эди. У фалокатнинг ягона сабаби шу деб биларди; ахир ишчилар шу ишсизлик даврига бардош бериш учун етадиган пул жамгашиб қўйишганида, шубҳасиз, хўжайинлар устидан галаба қилган бўлардилар. Этъен Сувариннинг: кассани дастлабки кунларидаёқ, ҳали фонд қилиб олмасиданоқ барбод этиш мақсадида Ширкатнинг ўзи ишчиларни забастовка қилишга ундади, деб Ширкатни айблаб гапирганини эслади.

Этъен посёлкада нони ҳам, ёқилғиси ҳам йўқ бахтсиз кишиларни кўрганида юрак-бағри эзилиб кетарди. У посёлкадан чиқиб кетиб, узоқ вақт дарбадарликда кун ўтказишни афзал кўрарди. Бир куни кечқурун уйга қайтаётган Этъен Рекийяр ёнидан ўтаётиб, шундоққина йўлда беҳуш ётган бир кампирни кўриб қолди: у кампирни кўтарди-ю, шу заҳоти ихотанинг нарёғидаги қандайдир қизга кўзи тушди.

— Э, сенмидинг? — деди у Мукеттани таниб. — Менга ёрдамлашиб юбор-чи. Унга бирор нима бериш керак.

Бундан таъсирланиб, кўзларига ёш келган Мукетта отаси харобалар орасида қўнқайтирган кулбага югуриб кетди. Қиз шу заҳоти қораарча ароғи билан бир тишлам нон олиб келди. Ароқ кампирни хушига келтирди, у бир огиз ҳам гапирмай, очкўзлик билан нонга ёпишди. Бу кампир бир кўмир қазувчининг онаси экан: У Кунья ёнидаги посёлкада тураркан, бечора Жуазелда яшайдиган синглисидан жилла курса ўн су пул қарз олиб келгани борган экан-у, қайтишида хушидан кетиб йиқилиб тушибди. Кампир нонни еб бўлгач, гандираклаб йўлига қараб кетди.

Этъен Рекийярнинг бўм-бўш яланглигида қолди: атрофдаги омонат бинолар қалин бутазор ичидан кўриниб турарди.

— Хўш, нима қилиб турибсан, кириб бир стакан ичмайсанми?— сўради Мукетта қувноқлик билан.

Этъен иккиланди.

— Сен ҳалиям мендан қўрқиб юрибсанми? — гапида давом этди Мукетта.

Қизнинг кулгисига маҳлиё бўлган Этъен унинг кетидан кетаверди. Қизнинг сахийлик билан кампирга нон тутиши Этъенни эритиб юборганди. Мукетта меҳмонни отасининг уйида кутишни истамай, ўз бўлмасига олиб кирди-да, дарҳол қораарча ароғидан бир стакандан қуйди. Хона ниҳоятда озода, саранжом эди; Этъен Мукеттани мақтади. Афтидан, бу хонадон муҳтожликни билмасди: отаси аввалгидек Ворёда отбоқарлик қиларди, ўзи эса қўл қовуштириб ўтирмай, кир ювишга бориб, кунига ўттиз су ишлаб келарди. У эркаклар билан дон олишиб юрса ҳам, уни сира ҳам бекорчи деб бўлмасди.

— Қани,— деди у пичирлаб, бирдан мулойимлик билан Этъеннинг белидан қучиб.— Қани айт-чи, нега мени севишни хоҳламайсан?

Энди Этъен ҳам кулгидан ўзини тўхтата олмади, унинг саволи шунақаям ёқимли чиқдики, асти қўяверасиз.

— Ие, мен сени жуда севаман,— жавоб берди у.

— Йўқ, йўқ, мен хоҳлагандек севмайсан-да... Сенга етаман деб ўлиб бўлдим-ку. Хўш? Агар севсанг, бошим осмонга етарди!

Унинг гапи тўғри эди — Мукетта ярим йилдан бери унга тинчлик бермасди. Этъен ҳамон унга қараб ту-

рарди, Мукетта бўлса унинг пинжига тиқилганча титроқ қўллари билан қучоқлаб, диққат билан унга тикиларди; унинг бу нигоҳида шундай ҳароратли илтижо бор эдики, Этьен ийиб кетди. Унинг тахир кўмирчангидан сарғиш тусга кирган лўппи юзини чиройли деб бўлмасди; лекин кўзлари чақнаб, аъзойи бадани ишқ ва эҳтирос ўтида ёнарди; Мукетта қип-қизариб, гўё ёшариб кетганди. Шу боисдан Этьен Мукеттанинг шунчалар мутелик ва эҳтирос билан тортиқ этган аргумонини қайтара олмади.

— Сен розисан, а? — қувонч билан бидирларди қиз. — Розисан!

Кейин Мукетта худди биринчи марта эркак билан ётгандек, бундан олдин ҳеч кимни кўрмагандек, аллақандай бир довдираш ва бесўнақайлик билан ўзини унинг ихтиёрига топширди. Этьен кетаркан, Мукетта ўз миннатдорчилигини қандай изҳор этишини билмай, унга раҳматлар айтар, қўлларини ўпар эди.

Бу учрашувдан кейин Этьен бир оз уялиб юрди. Мукетта билан ётиш дуруст, лекин буни ғалаба деб бўлмайди-да! У кетаркан, энди унинг олдига қайтмайман, дея қасам ичди. Ҳар қалай, қиз ҳақида Этьенда яхши таассурот қолган эди: ажойиб қиз-да, қургур!

Этьен посёлкага қайтиб келганида муҳим янгиликларни эшитиб, шу ондаёқ саргузаштларини унутди. Агар делегатлар яна директорга мурожаат қилгудек бўлишса, Ширкат ён берармиш, деган гап тарқалибди. Штейгерларнинг ўзлари шундай дейишаётганмиш. Бир нарса шубҳасиз эди: узоқ давом этган курашдан корхона ҳам кўмир қазувчилардан кам зиён кўрмаганди. Бу қайсарлик ҳар иккала томон учун ҳам ҳалокатли эди: ишчилар очдан ўла бошладилар, капитал эса зиён кўрарди. Забастовканинг ҳар бир куни юз минглаб франкка тушарди. Машина тўхтадими — у ўлик нарса, деявер. Материал билан асбоб-ускуналар ишдан чиқар, корхонага сарф этилган пуллар қумга сингган сувдек йўқоларди. Конларнинг омборларидаги озгина кўмир запаси ҳам тугаб бораётгани учун мижозлар энди кўмирни Бельгиядан оламиз дейишаётганди; бунинг оқибати эса келажакда жуда хавфли эди. Лекин Ширкатни ҳаммадан ҳам кўпроқ қўрқитаётган нарса йўлак ва ўнгирларнинг доимий емирилиб бориши бўлиб, маъмурият бу ташвишни зўр бе-

риб яширишга ҳаракат қиларди. Штейгерлар жуда озчилик бўлишганидан, бузилган жойларни ўзлари ремонт қилишга олишмасди: ҳаммаёқда тўсинлар қулаб, деярли ҳар соатда бирон ер ўпирилиб турарди. Шахтадаги вайронгарчиликлар шу даражага бориб етдики, яна кўмир қазиб олишга киришишдан олдин бир неча ой ремонт қилиш талаб этиларди. Бутун округда Кручинадаги бир йўлакни узунлиги уч юз метр келадиган кўчки босиб, Беш Шар кўмир қатлами йўлини тўсиб қўйибди; Мадленадаги Могрету қатлами босиб қолиб, сув тошиб кетибди, деган гаплар юрарди. Маъмурият буларни инкор қилиб ҳам турган эдики, кетма-кет рўй берган икки ҳодиса уни бу шовшувларда жон бор, дея тан олишга мажбур этди. Бир куни эрталаб Пиоленага яқин жойда тўсатдан ер чўқди, Миру конларининг шимолий штольняси шу жойдаги ер остидан ўтганди; эртасига эса Ворё шахтасида шундай зўр кўчки юз бердики, унинг зарбидан яқиндаги бутун бир маҳалла силкиниб, икки бино эса қулаб тушай деди.

Этъен билан делегатлар Правлениенинг ниятларини билмай туриб, бирор иш қилишга ботина олмасдилар. Дансартдан сўрашганида, у очиқ жавоб беришдан бўйин товлади: албатта, Правление бирор битимга келмаганидан жуда афсусланди; имконияти бўлган ҳамма нарса қилинади. Лекин Дансарт бирор аниқ гап айтмади. Делегатлар ўйлаб-ўйлаб охири Энбо жаноблари ҳузурига бориб, унга ўз даъволарини баён қилишга қарор бердилар: кўмир қазувчилар кейинчалик Ширкат ўз ноҳақлигимизни тушуниб олишимизга қўймади, деб бизни айблаб юрмасин, деган андишага бордилар. Бироқ улар ҳеч қандай ён бермасликка, ўзларининг тамомила адолатли шартларини қаттиқ туриб ҳимоя этишга қасамёд қилдилар.

Учрашув душанба куни эрталаб бўлиб ўтди; шу кунга келиб посёлкадаги муҳтожлик энг охири нуқтасига етгандай эди. Учрашув биринчи дафъадагига қараганда анча нохушлик билан ўтди. Яна Маэ гапирди; у ўртоқларим менга маъмурият бирор янгилик айта олармикин, шуни билиб келинг, деб топширувди, деди. Аввалига жаноб Энбо ҳайрон қолган киши бўлиб, мен ҳеч қандай кўрсатма олганим йўқ, кўмир қазувчилар ҳамон қайсарлик қилиб, забастовкани да-

вом эттираверсалар, аҳвол заррача ҳам ўзгармайди, деди. Унинг бошлиқларга хос совуқ оҳангда гапириши делегатларда ёмон таассурот қолдирди; улар келишиш ниятида келишган бўлишса ҳам, бундай совуқ муомалани кўриб, аҳдларида янада қаттиқроқ туришга жазм этишди. Кейин директор ўзаро битимга келиш йўлларини қидирди: майли, ишчилар маҳкамлашга оид ишлар учун алоҳида ҳақ олиша қолишсин, Ширкат, кўмирчиларнинг фикрича, ўз фойдасига босиб қолаётган ўша икки сантиметр пулни шу ишлари учун қўшиб бера қолар. Шуни писанда қилиб қўяйки, бу таклиф шахсан ўзимнинг таклифим,— Правление ҳали ҳеч қандай қарор қабул қилгани йўқ, лекин бу таклифга Париждан ижобий жавоб олсам керак, деган умиддаман, деди у давом этиб. Делегатлар буни рад этиб, ўзларининг аввалги талабларини такрорлашди: ишга аввалгисича пул тўлаш сақлангани ҳолда ҳар бир вагонеткага беш сантиметрдан қўшиб беришларини талаб этишди. Шунда директор у ёки бу қарорни қабул қилишга ваколат олганлигини очиқ айтди-ю, очдан ўлаётган хотин, бола-чақаларингизга раҳм қилинглар, деб уларни ён беришга кўндиришга уринди. Улар ерга қараганларича бошларини сарак-сарак қилишиб, аввалгидек қатъият билан йўқ-йўқ деб такрорлашди. Улар бир-бирларига хўмрайишиб тарқалишди. Жаноб Энбо эшикни қарс этиб ёпди. Эъён, Маэ ва бошқалар этиклари билан тош кўчани тўқиллатиб, энгилганлари учун ғазабга тўлиб, чурқ этмай боришарди.

Кундузи соат иккиларда посёлкадаги хотинлар ҳам ўзларича Мегра билан келишишга ҳаракат қилиб кўришди. Бу сўнгги умид эди: бу одамни лоақал яна бир ҳафта қарзга озиқ-овқат бериб туришга кўндирмоқчи эди. Бу фикрни ҳамон одамларнинг саховатига ишончини йўқотмаган Маэ хоним ўртага ташлади. У Ашаддий кампир ва Левакнинг хотинини ўзи билан бирга боришга кўндирди; Пьерроннинг хотини боришдан бош тортди; бетоб эримни бир минут ҳам ташлаб кетолмайман, деб туриб олди. Яна бир неча хотин келиб қўшилди; уларнинг аввалига кичкина бўлган тўпи шундай қилиб, йигирма кишига бориб қолди. Монсу йўлларида уларнинг сўлгин ва ғамгин

юзларини кўрганлар ташвишланиб, бошларини сарак-сарак қилишарди. Ҳамма эшикларини ёпиб оларди; аллақандай битта хоним бўлса кумуш тақинчқолларини яширишга шошилди. Улар биринчи марта ана шундай боришарди, бу яхшилик аломати эмасди: хотинхалаж тўдалашиб йўлга чиқса, одатда бир фалокат бўлмай қолмасди. Мегра дўкони олдида жанжал кўтарилди. Аввалига Мегра булар ҳаммаси тил бириктиришиб, пул тўлагани келишган, дея кулиб, уларни дўконига киритди; тиржайиб, қарзни тўлашга жазм қилишгани мақтовга лойиқ иш, деб мақтади. Маэ хоним гапира бошлагандан кейин эса у ўзини жаҳли чиққан қилиб кўрсатди. Нима, улар калака қилишяптими? Яна уларга қарзга мол берсинми? Нима, улар Меграни хонавайрон қилишмоқчими? Йўқ, йўқ, энди биттаям картошка, бир тишлам нон ҳам бермайди! Кейин Мегра уларга баққол Вердонкага, Карубль билан Смелътеннинг нон дўконларига мурожаат қилишни маслаҳат берди,— ахир ўзлари ҳам кейинги пайтларда ўша дўкондорлардан харид қилишяпти шекилли. Хотинлар Меграни ийдирса бўлармикин, дея унинг кўзларига қараб, ўзларини ниҳоятда паст олиб, кўрққан қилиб кўрсатдилар. У яна хотинларни мазах қилишга ўтди, Ашаддий кампирга, агар менга ўйнаш бўлишга рози бўлсанг, бутун дўконимни берардим, дея тегишди. Улар ниҳоятда кўрқиб кетганларидан кулиб юборишди, Левакнинг хотини бўлса, юзини сидириб ташлаб, сен билан ўйнашишга мана, мен тайёрман, деди. Бироқ Мегра кўполлик қилиб, уларни туртиб чиқара бошлади. Улар ялиниб-ёлборишда давом этишди; шунда Мегра жон-жаҳди билан битта хотинга ташланди. Хотинлар кўчага чиққач, уни пасткаш чайқовчи, дея қарғашга тушишди, алами ва газабига чидай олмаган Маэ хоним эса кўллларини кўтариб, унга ўлим тилади, бундай одам нон ейишга лойиқ эмас, дея қичқирди.

Улар посёлкага диллари сиёҳ бўлиб қайтишди. Хотинларнинг уйга қуруқ қайтишганини кўрган эрлари бошларини қуйи солишди. Ҳаммаси тамом: кун кеч бўляпти-ю, бир қошиқ овқатдан дарак йўқ; бундан буёнги кунлар совуқ, зимистон бўлиб, йилт этган умид учқуни кўринмайди! Лекин уларнинг ўзлари шу

йўлни танлашгани учун ҳеч ким таслим бўлиш ҳақида оғиз очмади. Қашшоқлик даҳшати уларнинг қайсарлигини оширди холос, улар худди қафасга қамалган ҳайвондек, чурқ этмай ён бергандан кўра ўз инимизда очдан ўлганимиз яхши, деган қарорга келишди. Қани, таслим бўламиз, деган таклифни биринчи бўлиб ким айтади? Улар шахтада ўртоқларидан битта-яримтаси кўчки остида қолганида ҳаммалари бир ёқадан бош чиқарганидек, эндиликда ҳам бир жон-бир тан бўлишга қасам ичишди. Узи шундоқ ҳам бўлиши керак-да: у ерда, пастда, ўнгирларда тақдирга тан бериш борасида яхши сабоқ олишган; модомики улар ўн икки ёшлариданоқ сув ва ўтга қарши курашиб келишяптими, яна бир ҳафта очликка чидаш мумкин. Бу аҳду паймонга яна бир туйғу — аскарлик шон-шарафига ўхшаган туйғу қўшилиб, бу ҳар соатда ўз ҳаётини таҳликада қолдиришга, ҳар қандай қурбонликка тайёр туришни ўрганишга мажбур этувчи касб кишининг ғурури эди.

Маэ хонадонида оқшом ниҳоятда аянчли ўтди. Ҳамма сўнгги чўғлар милтиллаб ўчиб бораётган ўчоқ олдида индамай ўтирарди. Улар тўшак юнглариини оздан сотиб тамомлашди-ю, кеча кукулайдиган соатни ҳам уч франкка сотишга жазм этишди; энди уйга файз бағишлайдиган чиқ-чиқ ҳам эшитилмасди, жона бўм-бўш, кимсасиздек эди. Буфетда бир вақтлар эри совға қилган картон қутигина қолганди; Маэ хоним буни худди қимматбаҳо нарсадек асраб келарди. Иккала яхши стулни аллақачон сотиб юборишганди; бобо билан болаларнинг ҳаммаси боғдан олиб келишган, замша қопланган шалоқ скамейкада сиқилишиб ўтиришарди. Кўкимтир гира-шира гўё совуқни кучайтираётгандек эди.

— Нима қиламиз?— деб такрорлади ўчоқ ёнида қунушиб ўтирган Маэ хоним.

Этьен тик турганича, император билан рафиқасининг деворга осиглик суратларини томоша қиларди. У аллақачон бу суратларни юлқиб олган бўларди-ю, лекин хонадон соҳиблари уларни безак сифатида қадрлашиб, бундай қилишга қўйишмасди...

— Бу малъунларни элтиб сотсанг, икки су ҳам беришмайди; очдан тиришиб ўлишимизни томоша қи-

лишаётгандек, кўзларини лўқ қилиб туришларини-я,— деди гижиниб Эъен.

Маэ хоним бир оз иккиланиб тургандан кейин:
— Қутини сотсак-чи?— деди-ю, оқариб кетди.

Столда оёғини осилтириб, бошини қуйи солиб ўтирган Маэ хотинининг гапини эшитиб, қаддини ростлади-да:

— Йўқ, мен буни хоҳламайман,— деди.

Маэ хоним зўр қийинчилик билаң ўрнидан туриб, хонани айланиб чиқди. Э, худо, шунчалик ҳам қашшоқликка тушиб қолишадими-а! Буфетда ушоқ ҳам йўқ, сотадиган ҳеч вақо қолмаган, нон топишнинг ҳам ҳисоби йўқ! Мана энди ўт ёқишга ҳеч нима қолмади! Маэ хоним Альзирани қарғаб кетди: уни эрталаб уюмлардан бир-икки бўлак кўмир топиб кел, деб юборса, қуруқ қайтиб келди — Ширкат кўмир териб олишни тақиқлаган экан. Ширкат тақиқлайверади-да! Қолган-қутган кўмирни териб келиш ўғирлик эканми? Қиз бечора худонинг зорини қилиб, қандайдир бир одам, агар кўмирдан олсанг, савалайман, дея дўқ қилганини, аммо у калтак еса ҳам эртагаёқ боришини айтди.

— Анови ярамас Жанлен қани?— қичқирди она.— Қаерларда йўқолиб юради у? Мен сизлардан сўраяпман... Салат ўт териб келиши керак эди-ку: ҳеч бўлмаса молга ўхшаб хомлигича чайнаб турардик-ку! Мана кўрасизлар, у келмайди. У кеча ҳам уйга келиб ётмовди. Унинг нима қилиб юрганини билмайман-у, лекин назаримда доимо қорни ёрилгудек бўлиб юради.

— Балки у тиланчилик қилиб юргандир?— деди Эъен.

Маэ хоним ғазабдан қутуриб муштини тугди.

— Тиланчилик қилганини бир билай!.. Менинг болаларим гадойчилик қиладими энди? Ундан кўра болаларимни ҳам, ўзимни ҳам ўлдирарман.

Маэ яна столга ўтирди. Уларнинг овқатлангани ўтиришмаётганларидан ажабланган Ленора билан Анри хархаша қила бошлашди; бобо индамай чинакам донишмандлардек тақдирга тан бериб, очликни алдаш учун оғзида тилини айлантитарди. Ҳеч ким чурқ этмасди; гўё ҳаммалари азоб-уқубат исканжасида тошдек қотганди. Бобо йўталиб, қоп-қора балғам таш-

ларди: унинг яна боди тута бошлаганди — истиқсо касалига айланай деб қолганди; ота зикнафас касалига мубтало бўлганди, доимо захда юрганидан тиззаларининг кўзи шишганди; она билан болаларнинг ширинча хасталиги зўрайди, наслдан наслга ўтиб келаётган камқонлик касаллиги ҳам кўзиди. Тўғри, бу иллатларнинг ҳаммаси огир меҳнат натижаси эди, лекин ҳеч ким зорланмасди, — ҳаммасидан ҳам ёмони — очлик азоби эди: посёлкадаги одамлар пашшадек қирила бошлаганди. Нима қилиб бўлса ҳам емиш топиш керак эди. Нима қилиш керак, қаердан кўмак излаш лозим?

Қош қорайиб, хона янада қоронгироқ, янада қайғулироқ бўлиб кетди. Этьеннинг юраги тарс ёрилгудек бўлди; у бир лаҳза иккиланиб тургандан сўнг бирор фикрга келди шекилли:

— Бир оз сабр қилиб туринглар-чи, — деди. Мен бориб бир уриниб кўрай-чи, зора ейишга бирор нарса топиб келсам.

У чиқиб кетди. У Мукетгани эслаб, ўшаникига боришга қарор қилганди. Мукеттада нон бўлиши керак, унга жон деб беради. Рекийярга қайтиб бориш унга наша қиларди: қиз яна худди ошиқ чўридек қўлларини ўпади-да. Лекин дўстларни кулфатда қолдириб бўлмайди-да, шунинг учун у агар шу зарур бўлса, яна бориб Мукетгани эркалатади-да.

— Мен ҳам бораман, — деди Маэ хоним. — Уйда қўл қовуштириб ўтиришдан ёмони йўқ.

У Этьен кетидан чиқди-да, кучи борича эшикни қарсиллатиб ёпди. Қолганларнинг ҳаммаси Альзира ёққан пиликнинг хирагина ёругида чурқ этмай, қимирламай ўтирарди. Кўчага чиққан Маэ хоним хаёл суриб тўхтади, кейин Левакларнинг уйини тақиллатди.

— Менга қара, тунов куни мен сенга нон қарз берувдим. Ушани менга беролмайсанми, а?

Лекин у беихтиёр жим бўлиб қолди: бу ерда кўргани жудаям аянчли эди, — бу уйдаги муҳтожлик ўз уйдагидан ҳам баттар эди.

Левакнинг хотини ўти сўнган ўчоққа меровсираб тикилганча ўтирибди: михсоз оғайнилари оч қоринга ичирган эри бўлса, стол устида чўзилиб, ухлаб ётар-

ди. Деворга суянган Бутлу елкасини деворга ишқаларди; қўли очиқ кишининг кўриниши паришон эди: Левак оиласи унинг ҳамма жамғармасини ютиб бўлганди, энди ўзим ҳам қорнимни сириб юрарканман-да, дея хайрон бўлиб турганга ўхшарди.

— Нон дейсан-а! Эй, дугонажоним-ей! — жавоб берди Левак хоним. — Мен ўзим сендан яна битта нон қарз олсаммикин, деб турувдим.

Левак уйқусида инграб, бир нима деб гўлдиради; хотини жаҳл билан унинг юзини шалоп этиб столга урди.

— Жим бўл-е, чўчқа! Ичакларинг ачишаётган бўлса, баттар бўл!.. Бировнинг ҳисобига ичгандан кўра, оғайниларингдан йигирма су қарз олсанг бўлмасмиди!

Хотини аламини кимдан олишни билмай қаргашга тушди. Унинг рўзгорида анчадан бери сира ҳузур-ҳаловат қолмаганди, хона шу қадар ифлос бўлиб кетгандики, полдан кўтарилаётган қўланса ҳидга тоқат қилиб бўлмасди. Ҳаммаси сабиллар қолсин, жин урсин! Уғли, ярамас Бебер ҳам эрталабдан бери келгани йўқ эди, шу боисдан она умуман келмай қўя қолганинг ҳам яхшийди, ташвишим қамаярди, деб қичқирарди. Кейин у, энди ётмасам бўлмайди, лоақал исиниб оламан-ку, деди-да, Бутлуни туртди.

— Қани, ҳой, тепага чиқа қолайлик! Олов ўчган, шамни ёқишнинг ҳожати йўқ: бўш ликопчаларга қараб ўтираммизми?.. Қани, борасанми, Луи? Сенга айт-япман, бирга ётамиз; қапишиб олсак — яхши бўлади... Манови, жин ургур алкаш бир ўзи музлаб ётаверсин!

Леваклар уйдан чиққан Маэ хоним шахдам қадамлар билан боғ-роғларни кесиб ўтиб, Пьерронларникига равона бўлди. Уларнинг уйдан кулги эшитилди, Маэ хоним тақиллатиши билан, кўққисдан ҳаммаёқ сув қуйгандек жим бўлиб қолди. Анча вақтгача эшикни очишмади.

— Э, сенмидинг! — хитоб қилди Пьеррон хоним таажжублангандек. — Мен докторми, деб ўйлабман.

У Маэни эс-ҳушини йигиб олишига қўймай, ўт гуриллаб турган камин олдида ўтирган эрини кўрсатиб, гапида давом этди:

— Вой, бояқиш ҳалиям касал, ханузгача тузал-

маяпти. Ранг-рўйига қарасанг — туппа-тузук, лекин қорнида бир касали бор-да. Унга иссиқ керак, шунинг учун каминни ёққанимиз-ёққан, кўмир ўрнига бори-мизни ёқиб битиряпмиз.

Ҳақиқатан ҳам семиз Пьеррон кўринишдан соппа-соғ, оғир-оғир нафас олиб, ўзини касалликка солишга ҳар қанча уринмасин, бари бир милтиқнинг ўқидек эканлиги шундоқ билиниб турарди. Маэ хонага кириши билан қоврилган қуён гўштининг ўткир ҳидини дарров сезди: у келиши билан овқатни олиб қўйишган бўлишса керак. Дастурхон устида нон увоқлари сочилиб ётарди, ўртада эса бир шиша вино кўзга яққол ташланиб турарди, уни олиб қўйишни унутишган шекилли.

— Онам нон-нон олиб қелгани Монсуга кетди,— деди гапида давом этиб Пьеррон хоним.— Кўзимиз тўрт бўлиб кутиб ўтирибмиз.

Шу чоқ унинг овози бўшашди: у Маэнинг қаёққа қараётганини пайқади-ю, шишани кўриб қолди, у дарҳол ўзини тутиб олиб, бир воқеани узундан-узоқ гапириб кетди: ҳа, ҳалиги, пиоленалик жаноблар бетоб эрига доктор ичишни буюрган винони олиб келишган эди. Кейин уларни мақтаб кетди... Мунчаям яхши одамлар экан булар! Айниқса қизларини айтинг — шундай хоксор, ишчиларнинг уйларига кириб, нафақаларини ўзи улашиб юрибди-я!

— Э, нимасини айтасиз,— деди Маэ хоним,— мен уларни биламан.

Маэ хоним, доимо ёрдамни асло муҳтож бўлмаганларга беришади, мен эса нуқул қуруқ қоламан, деб ўйлади-ю, юраги сиқилди; Пиоленадан ксладиган жаноблар сувни тубсиз бочкага қуйишади. Нега посёлкада уларни кўрмай қолдийкин? Балки у улардан бирор нарса ундириб қолармиди.

— Мен,— деди Маэ хоним ниҳоят журъат этиб,— сизлар ҳам менга ўхшаб қийналяпсизларми, шуни бир билай-чи, деб кирувдим... Сен менга пича вермишель қарз бериб туролмайсанми, а?

Пьеррон хоним шангиллаб оҳ-воҳ қилишга тушди.

— Ҳеч вақо йўқ, азизим, на унимиз, на донимиз бор!.. Онам ҳанузгача қайтиб келмаяпти, бу эса иши

юришмаганидан далолат беради. Оч ётишга тўғри келади.

Шу чоқ пастдан, ертўладан йиғи овози эшитилди. Пьеррон хоним даргазаб бўлиб, эшикни муштлади. Бу ярамас қиз Лидия кун бўйи қаерларда санқиб юриб, соат бешгача уйга келмагани учун қамаб қўйишган экан. Сира нафи тегмаётганмиш, борган сари қўлдан чиқиб кетаётганмиш.

Маэ хоним бўлса, ҳамон хонада қаққайиб турар, ўзини уйдан чиқиб кетишга мажбур қилолмасди. Каминдан шундай ёқимли иссиқлик урилардики, бу ҳузур-ҳаловатдан Маэнинг юраги орзиқиб кетди; бу хонадондагиларнинг егани олдида, емагани орқасида, деган фикр хаёлига келиб, очлиги ҳаддан зиёд азоблай бошлади. Пьерронлар қовурдоқни ўзлари мазза қилиб ейиш учун кампирни бир ёққа жўнатиб, қизни қамаб қўйишгани аниқ. Ғарнинг уйи ғарра-шарра, деб бежиз айтмайдилар-да!

— Хайр, яхши ётиб туринглар!— деди тўсатдан Маэ хоним.

Ташқари қоронғи эди; булутлар орасидаги ой ерни хира ёритарди. Маэ хоним яна боғлар оралаб келиш ўрнига, айланма йўлдан юрди, у шундай умидсизликка тушган эдики, уйига қайтиб келишга юраги дов бермасди. Ҳамма уйларнинг одамлари қирилиб кетгандек эди, ҳаммаёқда очлик ҳукм сурарди, эшиклар маҳкам тамбаланганди. Эшик қоқиб нима ҳам қиларди? Бу уйда ҳам муҳтожлик, ғам-ғусса. Одамлар ҳафталаб ҳеч нима еганлари йўқ; ҳатто олис далада юрганингда ҳам посёлканинг қаердалигини сездириб турадиган пиёз ҳиди ҳам ариб кетганди; энди бўлса жон зоти қирилиб битган эски ертўла, зах харобаларнинг ҳиди анқирди холос. Ҳаракат бутунлай тўхтаганди, на бўғиқ йиғлашлар, на сўкиш-қарғашлар эшитиларди; сукунат тобора қаттиқроқ эзарди, очлик азобларидан силласи қуриб, адойи тамом бўлган одамларнинг бир амаллаб ўринларига ётиб, оғир уйқуга кетадиган палла яқинлашаётганди.

Маэ хоним черков ёнидан ўтаркан, олдинда бировнинг сояси лип этиб ўтганини пайқаб қолди. Бирдан туғилган умиддан қувонган хотин қадамини тезлатди; бу одам монсулик кюре, аббат Жуар бўлиб, як-

шанба кунлари шу посёлкадаги ибодатхонада хизмат қиларди. Афтидан, у черков қазногидаги баъзи ишларини битириб қайтаётган бўлса керак. У бир оз букчайиб, шошиб келарди; одатдагидек, тўла юзи мулойим эди — ҳамма билан муроа қилиб яшашга интилаётгани сезилиб турарди. У, чамаси, кўмир қазувчилар орасида кўришиб, ёмонотлиқ бўлмаслик учун ишларини бажаргани кечаси борса керак. У кўтарилибди, деган гап тарқалганди. Уни ҳатто ўрнига тайинланган одам билан бирга ҳам кўришибди, — бу кўзларида ўт чақнаб турадиган ориққина кюре эди.

— Жаноби кюре, жаноби кюре, — тутилиб-тутилиб деди Маэ. Бироқ аббат тўхтамай йўлда давом этаркан, ёлдираб деди:

— Ваалайкум ассалом, ваалайкум ассалом, азизим!

Маэ хоним ўз уйи эшигига келиб туриб қолди. Унинг оёқлари чалишиб кетаётганди; хотин уйига кирди.

Ҳеч ким қимир этмади. Маэ аввалгидек тумшайиб стол четида ўтирарди. Бобо билан болалар жилла курсида бир оз исирмиз, деган ниятда скамейкада бир-бирларининг пинжигига тиқилиб ўтиришарди. Ҳеч ким чурқ этмади. Шам ёниб бўлай деб қолганди; ҳадемай улар ёруғликдан ҳам маҳрум бўлишади. Маэ хоним эшикни очганда болалар қайрилиб қарашди; бироқ оналари ҳеч нима олиб келмаганини кўришгач, яна полга тикилиб, сўкиш эшитмайлик, дея кўз ёшларини гилт-гилт ютиб ўтираверишди. Маэ хоним ўчай деб турган ўчоқ ёнидаги ўз жойига оғир ўтирди. Ундан ҳеч нима сўрашмади; аввалгидек жимлик ҳукм сурарди. Ҳамма нима гаплигини шундоқ ҳам тушуниб турибди-ку, гапириб ўзларини чарчатишнинг ҳожати йўқ. Балки Этьен тасодифан бирор нарса топиб келар? Лекин бу — энг сўнгги умид, унча ишонмаса ҳам бўладиган умид эди; вақт ўтиб бораётгани учун бу ҳақда ўйламай ҳам қўйишди.

Ниҳоят Этьен қайтиб келди; у ўнтача қайнатилган картошкани латтага ўраб олиб келибди; картошка совиб қолганди.

— Мана, топганим шу бўлди, — деди у.

Мукеттада ҳам нон қолмаган экан. Этьен ҳар қанча қаршилиқ қилса ҳам, қиз тушликка олиб қўйган нар-

сасининг борини латтага ўраб берди-да, уни чин юракдан ўпди.

— Раҳмат,— деди Эъен Маэ хоним унинг улушини берганида.

Бу ёлғон эди. У ҳўмрайиб, болаларнинг овқатга ташланганликларини кузатиб турарди. Ота билан она ҳам болаларга кўпроқ тегсин, дея ўзлари камроқ олишди; лекин чол борини очкўзлик билан ютарди. Унинг битта картошқасини Альзирага олиб беришга тўғри келди.

Кейин Эъен баъзи янгилдикларни айтиб берди; у бу янгилдикларни кечқурун эшитиб келганди. Айтишларича, Правление иш ташлаганларнинг қайсарлигидан дарғазаб бўлиб, забастовкани уюштиришга аралашган кўмир қазувчиларни ишдан ҳайдамоқчимиш. Афтидан, Правление очиқ курашишга ўтган кўринади. Яна бир жиддий гап оралаб қолганди: Ширкат гўё ишчиларнинг кўпчилигини шахтага тушишга кўндирдик, дея мақтанганмиш, гўё Ғалаба, Фетри-Кантелдагилар эртагаёқ ҳаммалари тўла-тўқис ишга чиқшармиш ва ҳатто Мадлена билан Мируда ҳам камида учдан бир қисм ишчи ишга тушармиш.

Маэлар туюқиб кетишди.

— Жин ургурлар!— хитоб қилди ота.— Борди-ю, у ерда хоинлар пайдо бўлса, уларни бир ёқлик қилиш керак!

Маэ дик этиб турди-ю, ғазаб билан қичқирди:

— Эртага кечқурун ўрмонга!.. Агар ишларимизни «Қувноқ»да гаплашиб олишимизга қўймайдиган бўлсалар, ўрмонда ҳеч ким бизга тегмайди.

Бу қичқириқ овқатдан кейин мудрай бошлаган Ўлмас бобони уйғотиб юборди. Бу — бурунгиларнинг йиғинга даъватига ўхшарди: қадим замонларда кўмир қазувчилар шундай чақириқни эшитиб, подшоҳ аскарларига зарба бергани йиғилишарди.

— Ҳа, ҳа, Вандамга! Агар йиғин ўша ерга тайин қилинган бўлса, мен ҳам бораман!

Маэ хоним қатъият билан муштани силкиб қўйди.

— Ҳаммамиз борамиз. Ахир бу адолатсизликлар ва сотқинликларнинг ҳам охири бордир-ку!

Эъен эртага кечқурун катта йиғин бўлади, деб

ҳамма посёлкаларга хабар қилишга жазм этди. Бироқ каминдаги олов Левакларникидек сўниб, шам бирдан ўчиб қолди. Энди на кўмир, на керосин қолганди; қоронгида пайпасланиб ётишга тўғри келди; уй ниҳоятда совуқ бўлганидан эт жунжикарди, болалар йиғлашарди.

VI

Жанлен тузалиб, юрадиган бўлиб қолди, лекин суяклари нотўғри битганидан иккала оёғи оқсарди: ўрдакка ўхшаб лапанглаб юрар, лекин аввалгидек ёввойи, ўғри мушукка ўхшаб чаққон югурарди.

Шу куни қош қорайганда Жанлен доимий йўлдошлари Бебер ва Лидия билан Рекийярга борадиган йўлга пистирма қўйди. Улар майдондаги девор орқасига, жинкўча бурчагидаги дўконча рўбарўсига бекиниб олишди; дўкончада кўзлари заиф бир кампир савдо қиларди; унинг чангдан қорайиб кетган уч-тўрт қоп ясмиқ билан нўхати бўлиб, эшиги тепасида эса пашша талаб ётган қоқ балиқ осиглиқ эди. Ана шу балиқ боланинг ҳавасини келтираётганди, шунинг учун у балиқдан кўзини узмасди. У балиқни ўғирлаб келишга Беберни икки марта юборди. Лекин ҳар сафар муюлишдан катта кишилар чиқиб қолишди. Қаерга борсанг ҳам аҳвол шу, бирор ишингни бемалол қилмайсан!

Бир сувори кўринди, шу боисдан девор ортидаги болалар дарров ерга ётиб олишди: улар директор Энбони танишди. У забастовка бошланганидан бери кўпинча йўлларни, исёнкор посёлкаларни ёлғиз айланиб юрарди; вазмин ва қаттиққўл бўлган бу одам, ҳар қачонгидек, округдаги аҳволни ўз кўзи билан кўриб, ишонч ҳосил қилишни хоҳларди. Ҳали унинг қулоғи ёнидан битта ҳам тош гизиллаб ўтмаганди: у фақат ҳўмрайган одамларни учратарди, улар зўр-базўр таъзим қилишарди. Кўпроқ севилган жуфтларга дуч келарди; уларнинг сиёсат билан асло ишлари йўқ эди, — улар хилват жойларда вақтларини хуш ўтказишарди. Эмбо ҳеч кимга халақит беришни истамай, отини йўрттириб, улар ёнидан ўтиб кетарди; ч ошиқ-маъшукларнинг сайр этиб юришганини ҳар

кўрганда орзулари ушалмаганини эслаб, юраги гуп-гуп урарди. У гуж бўлиб олган болаларни кўрди; ўғил болалар бир қизалоқни тағларига босиб олишганди. Болалар — шулар ҳам нохуш ҳаётларини мароқли ўтказишни ўйлашади-я! Унинг кўзлари намланди; у эгарда қаққайиб ўтирганича ўтиб кетди; у сюртугини ҳарбийчасига кийиб, ҳамма тугмаларини қадаб олганди.

— Вой лаънатилар-ей! — деди Жанлен. — Бу одамларнинг кети узилмайди шекилли. Қани, Бебер, тез бўл! Балиқни думидан тортиб кел-чи!

Лекин йўлда яна иккита ўткинчи кўринди, Жанлен яна сўкинди; у Захариянинг овозини эшитиб қолди. Захария ошнаси Мукега хотини юбкасига тикиб қўйилган қирқ сулик тангани қандай топиб олганини гапириб келарди. Иккови ҳам хурсанд бўлиб, бир-бирининг елкасига қоқиб, кулишарди. Муке, эртага мириқиб соққа ўйнайлик, деди; улар иккиларда «Авантаж» қовоқхонасидан чиқиб, Маршьенн яқинидаги Монтуарга жўнашади. Захария рози бўлди. Забастовка билан ишлари нима? Бекор бўлишгандан кейин вақтни кўнгилдагидек ўтказиш керак-да! Икковлари муюлишга бурилишлари билан канал томондан Этьен кўринди; у йигитларни тўхтатиб, гапга тутди.

— Нима бало, шу ерда тунаб қолмоқчимиз булар ўзи?! — хитоб қилди Жанлен қони қайнаб. — Кечаси бўлиб қолай деяпти, ҳали замон кампир қопларини йиғиштириб олади.

Рекийяр томонга яна бир шахтёр тушиб келарди. Этьен ўша билан бирга кетди. Улар девор ёнидан ўтишаётганларида болалар ўрмонда йиғин бўлиши ҳақида гап бўлаётганини пайқаб қолишди: йиғинни эртага қолдиришга тўғри келибди, бир кунда ҳамма посёлкаларни хабарлашга улгуролмаймиз, деб кўрқишибди.

— Э, гап бу ёқда дегин! Эртага зўр иш бўларканда, — деди секингина Жанлен шерикларига мурожаат қилиб. — Ўша ёққа бориш керак. Эшитяпсизларми? Биз кундузи бориб оламиз.

Ниҳоят йўлда ҳеч ким кўринмай қолди, шунинг учун Жанлен Беберни кампирнинг дўконига юборди:

— Қани, тезроқ бўл! Думидан тортиб келавер!.. Лекин эҳтиёт бўл, кампирнинг супургиси бор-а!

Уларнинг бахтига қоп-қоронги бўлиб қолганди. Бебер бир сакраб балиққа ёпишган эди, тизимча узилиб кетди. У ўлжасини худди орқасидан ҳавога кўтарилиши лозим бўлган варракдек судраб чопиб кетаверди; қолган иккови ҳам унинг кетидан югуришди. Чайқовчи нима бўлганига ақли етмай, ҳайрон бўлиб дўкончасидан чиқди-ю, қоронгида ғойиб бўлган болаларни кўрмади.

Бу зумрашалар бутун округга даҳшат сола бошлашди. Улар худди чинакам қароқчилар тўдасидек секин-аста босқинчилик ишлари доирасини кенгайтиравердилар. Аввалига улар Ворё территорияси билан кифояланишди, худди ўтиб бўлмайдиган чакалакзордек қалин ходалар орасида бекинмачоқ ўйнашиб, кўмир уюми ёнида ивирсиб, худди негрларга ўхшаб кетишарди. Кейин ўйинларини чиқитлар ағдариб кетиладиган жой — уюмга кўчиришди: ер ости ёнгинларининг тапти кетмаган тақир, илиқ жойларни топиб ўтиришарди-да, худди чана учгандек сирпанишарди ёки уюмнинг эскироқ қисмидаги тиканзорларда эмак-лаб юришарди; улар худди шўх сичқон болаларидек жимгина ўйнашарди. Болалар янги-янги жойларни эгаллаб боришарди; гоҳ гишт уюмлари орасида ҳаммаёқларини қора қонга белаб ёқалашишар, гоҳ ўтлоқларда чопқиллашиб, ширали ўтларнинг пояларини нонсиз ейишар, гоҳ канал бўйида тентираб, балчиқларда балиқ тутушиб, хомлигича ейишарди. Мана энди улар янада узоққа, бир неча километр нарига, ҳатто Вандам ўрмонларигача ҳам боришадиган бўлишди; у ерларда баҳорда ер тути, ёзда ёнғоқ билан черника ейишарди. Тез орада улар улкан текисликни эгаллаб олишди.

Хўш, уларни худди бўри болаларидек Монсу билан Маршьенн ўртасидаги йўлда тинмай елиб-югуришга нима мажбур қилдйкин? Албатта, нафсни қондириш иштиёқи, бу хоҳиш кун сайин кучайиб борарди. Жанлен аввалгидек тўданинг атамани эди; у ўғирликларга бош-қош бўлар, пиёз экилган жўякларни шипшийдам қилиш, узумларни ўғирлаш, дўкон деразасига қўйилган молларни олиб қочишнинг энг яхши йўл-йўриқларини кўрсатиб турарди. Маҳаллий аҳоли

буларнинг ҳаммасига забастовкачи шахтёрлар сабабчи, деб билардилар.

Катта, уюшган бандитлар тўдаси бор, деган мишмиш тарқалганди. Кунларнинг бирида Жанлен Лидияни ҳатто онасининг нарсасини — Пьеррон хоним дераза тоқчасига қўйган вазалардан биридаги йигирматача обакидандонни ўғирлаб келишга мажбур этди. Қизни бу иши учун ўлардек уришди, лекин Жанленнинг таъсири шунчалик катта, даҳшатли бўлганидан Лидия уни айтиб бермади. Энг ёмони — Жанлен ўлжанинг катта қисмини ўзига олиб қоларди. Бебер ҳам ўз ўлжасини унга келтириб берарди, бунинг устига яна ҳаммасини олган атаман уни калтакламаса, хурсанд ҳам бўларди.

Анчадан бери Жанлен ўз зуғумини ўтказадиган бўлиб қолганди. У Лидияни худди ўзининг қонуний хотинидек калтакларди, Бебернинг лақмалигидан фойдаланиб, энг қалтис ишларни бажаришга уни мажбур қиларди. Ўзини ҳам бир мушт тушириб қулата оладиган бу найнов боланинг ҳамиша аҳмоқ бўлиб қолишидан Жанлен жуда ҳузур қиларди. Жанлен икковини ҳам ўлгудек ёмон кўрарди, уларга худди қулларидек муомала қилар, менинг зўр маъшуқам бор — ўзи малика, сенлар маъшуқамнинг кўзига кўринишга ҳам арзимайсанлар, дер эди. Чиндан ҳам бир воқеа бўлиб, у қўққисдан бир ҳафта қаёққадир йўқолиб кетди; у ҳамроҳларини турли жойларда — бирон кўчанинг охиридами, йўл бурилишидами қолдирарди-да, афтини қийшайтириб хайрлашар ва уларга посёлкага қайтиб кетишни буюрарди. Ғойиб бўлишидан олдин ҳамма ўлжаларини тортиб оларди.

Уша оқшом ҳам шундай бўлди.

Учови йўлнинг Рекийярга буриладиган жойига етиб, ниҳоят тўхташганида, у балиқни ўртогининг қўлидан юлқиб оларкан:

Бу ёққа бэр! — деб буюрди.

Бебер норози бўлди

Гап шуки ўзимга ҳам керак. Ахир буни мен олиб келдим-ку.

— Бу нима деганинг? — бақирди Жанлен. — Сен ўз улушингни оласан, ўшандаям берсам, аммо бугун эмас; агар қолгудек бўлса, балки эртага оларсан.

У Лидияни итариб, худди машқ қилаётган солдатлардек икковини бир қатор қилди-да, кейин ўзи уларнинг орқасида туриб команда берди:

— Шу ерда ҳеч ёққа қарамай беш минут туринглар!.. Агар у ёқ-бу ёққа қарайдиган бўлсаларинг, йиртқич ҳайвонлар югуриб келишиб сизларни ейди... Кейин тўппа-тўғри уйларингга кетинглар, борди-ю, Бебер йўлда Лидияга тегишадиган бўлса, мен буни билиб оламан, икковингни ҳам таъзирингни бераман.

Кейин у қоронғиликда шундай сездирмай ғойиб бўлдики, ҳатто яланг оёқларининг тўпиллагани ҳам эшитилмади. Болалар кўринмас Жанленнинг тарсакисини ейшдан қўриқиб, беш минутгача ҳеч ёққа аланг-ламасдан қимирламай туришди. Икковининг ҳам қўрқиши уларни сездирмай бир-бирига яқинлаштирди. Бебер фақат кўпинча катталарда кўрганидек, қизни бағрига босиб, маҳкам қучоқлашни ўйларди; қиз ҳам худди шуни истарди: агар уни меҳрибонлик билан эркалатишса, у тамомила бошқача қиз бўлиб қоларди. Бирок на Бебер, на Лидия буйруқни бузишга журъат этарди. Болалар уйларига қайтишаётганда зим-зиё қоронғи бўлса ҳам, улар бари бир қучоқлашишга журъат этолмай ёнма-ён боришарди; уларнинг юраклари орзиқиб, гупурарди: иккови ҳам бир-бирларига қўл тегизсак, шу заҳоти атаман пайдо бўлиб, яхшигина мушт туширишига ишонарди.

Худди шу дамда Этьен Рекийярга етиб келди. Кеча Мукетта, келгин, деб илтижо қилганди; қизни алдашга уялди-да, уникига йўл олди. Уни сидқидилдан ҳурмат этувчи бу қиз Этьен учун нимаси биландир азиз бўлиб қолганди,— бироқ унинг ўзи бунга иқрор бўлишни хоҳламасди. Шундай бўлса ҳам у, алоқани узаман, деган қатъий ният билан борарди. У бақамти бўлиб, менинг орқамдан югураверма, ўртоқларим олдида яхшимас, деб рўйирост айтади. Ҳозир унақа замонмас: одамлар очликдан ўлаётган бир пайтда ўпишиб-қучоқлашиб юриш уят бўлар. Этьен Мукеттани уйдан топмай, келишини кутишга қарор қилди ва кўчада пайдо бўлган ҳар бир соядан кўз-қулоқ бўлиб турди.

Минора харобалари остида ярми кўмилган шахтага тушиладиган йўл бор эди. Ана шу қора чоҳ

узра томнинг қолдиғи — дорга ўхшаган устун юксалиб турарди; гиштин девор қулаб тушган жойда икки дарахт — четан билан чинор ўсиб чиққан бўлиб, улар гўё ер қаъридан қад кўтаргандай эди. Бу ер қаровсиз ташландиқ жой бўлиб, шахтага тушаверишда эски ходалар уйилиб ётарди, қалин ўт-ўланлар, олхўрисимон буталар, дўлана туплари босиб кетганди; баҳорда сайроқи қушчалар бу буталарга ин солишарди. Ширкат ремонтга катта сарф-харажат бўлишидан қочиб, ўн йил бурун бу шахтани кўмиб ташлашга қарор қилганди. Ворёга вентилятор қўйилишини кутиб туришарди холос, чунки бир-бири билан боғланган иккала шахтага хизмат қиладиган вентиляция печи Рекийярнинг ўзига жойлашганди; эски штольняларнинг бири мўркон хизматини ўтарди. Кўндалангига тўсин ташлаб, қопламасини бекитган бўлишди; ана шу тўсинлар шахтага тушиш йўлини тўсиб турарди. Юқори йўлакларни бутунлай ўз ҳолига ташлаб қўйиб, фақат вентиляция печи бўлган энг пастки йўлакка қараб туришарди, бу печда тошкўмир уюми гуруллаб турарди; мўркон яхши тортганидан қўшни шахтада қаттиқ шамол ўкираётганга ўхшарди. Запас йўл сифатида Рекийяр шахтаси орқали тушиб-чиқиб туриш учун эҳтиёт юзасидан зинали штольняга қараб туришга буйруқ берилганди. Бироқ ҳеч ким бунинг ғамини емасди, ёғочлари захда чириб, жуда кўп майдончалари босиб тушганди. Тепада катта бир туп маймунжон штольняга тушиладиган йўлни тўсиб турарди, биринчи нарвоннинг бир неча зинаси тушиб кетганди, то таянч нуқтасига етгунча рябина илдизига осилиб, таваккалига қоронғиликка тушиш лозим эди.

Этьен бута орқасига ўтиб, сабот билан кута бошлади; мана у, ниҳоят шох-шаббаларнинг шитирлаганини эшитди, бу шитир-шитир анчагача тинмади. Аввалига у, илонни чўчитиб юбордим шекилли, деб ўйлади; бироқ бирдан гугурт ёқилганини кўриб ҳайрон бўлди; Жанленни танигач, қотиб қолди; бола шамни ёқди-да, ер остига кириб ғойиб бўлди. Этьен қизиқиб, шахтанинг оғзига яқинлашди; бола ғойиб бўлган, афтидан у иккинчи майдончага етганди; пастда ғирашира нур кўринарди. Этьен бир оз ўйлаб турди-да, кейин илдизга осилиб, сирғалиб пастга тушди; наза-

рида худди беш юз йигирма тўрт метрга — шахтанинг тубигача сирпаниб тушгандек бўлди; ниҳоят у оёғи зинага текканини сезиб, эҳтиёткорлик билан туша бошлади. Жанлен ҳеч нимани эшитмаган бўлиши керак. Эъён остидаги чиरोқни кўрди: ўт тобора пастга, ер қаърига тушиб борарди; боланинг улкан ваҳимали сояси унинг оқсоқланиб юришига мос чайқаларди. Жанлен маймундек чаққонлик билан тирмашарди; зиналар йўқ жойда қўлларини, оёқларини, ҳатто иягини ишга соларди. Ҳар бири етти метрлик нарвон бирин-кетин тушиб кетганди; баъзилари ҳамон мустаҳкам бўлса, бошқалари ағдарилиб тушадигандек қирсиллаб, қимирларди; нарвонлар орасидаги тор майдончалар кўкариб, чириб кетганидан оёқ худди йўсинга теккандек бўларди. Эъён пастга тушган сари ҳарорат худди печдагидек кўтарилаверди, бу иссиқ вентиляция штольнясидан келарди, у ер ҳайриятки забастовка бошлангандан бери тинч эди: иш пайтида печь ҳар куни беш минг килограмм тошқўмирни ютиб турганида-ку, бу ёққа тушиш йўл бўлсин, нақ тириклай кабоб бўлади киши.

— Бақанинг ўзи-я! — тўнғиллади Эъён бўғилиб. — Қаёққа тушиб кетяпти бу жин ургур!

Эъён икки марта йиқилиб кетай деди: ҳўл хода устида оёғи сирганиб кетди. Жанленникига ўхшаган шами бўлсаям майли эди, узоқда милтиллаб кўринган чироқ кетидан эргашиб бораётгани учун ҳар лаҳза у ер-бу ерини уриб оларди. Бу йигирманчи нарвон бўлса керак, тушиш эса ҳамон давом этарди. Шундан кейин у санай бошлади: йигирма биринчи, йигирма иккинчи, йигирма учинчи... Жанлен бўлса ҳамон пастга тушиб борарди. Эъённинг боши худди ўтдагидек ёнарди, назарида нақ печ ичига йиқилиб тушаётгандай эди. Ниҳоят у юклаш хонасига етиб келди, қараса, чироқ йўлакнинг энг чуқур ерига қараб кетяпти. Ўттиз нарвон бу — икки юз ўн метр бўлади!

«Мени у яна кўп эргаштириб юрармикин? — ўйлади Эъён. — Чамаси, у отхонага кетяпти».

Лекин чап томондаги, отхонага олиб борадиган йўлак босиб тушганди. Яна янги, янада огирроқ, хавфлироқ сарсонлик бошланди. Қўрқиб кетган кўршапа-

лаклар ҳар томонга учиб, охири равоқларга осилишди. Чироқни кўздан йўқотиб қўймаслик учун қадамни тезлатишга тўғри келди. Этьен ҳам ўша йўлакдан юрди; лекин бола илондек осонгина ўтган жойлардан ўтаётганида, у албатта у ер-бу ерини қириб оларди. Барча эски штольнялар каби, йўлак ер чўкаверганидан кун сайин торайиб борарди, баъзи жойлари эса ўт ўчириш алангасидек бўлиб қолганди; ҳализамон йўл бекилиб қоладигандек эди. Тупроқ оғирлигидан тирговичлар синар, қирсилларди; юриш хатарли бўла борди: синган ёғочларнинг учлари қиличдек чўччайиб, йўлни тўсиб турарди; минут сайин уларга урилиб, қаттиқ ярадор бўлиш мумкин эди. Этьен гоҳ эмаклаб, гоҳ судралиб, эҳтиёткорлик билан силжир, олдинда лип этиб кўриниб қолувчи Жанленнинг соясини йўқотиб қўймасликка ҳаракат қилар эди. Қўққисдан у алланимадан қочаётган бир гала каламуш ҳамма ёғидан югуриб ўтгандек бўлди.

— Етиб қолдикмикин, жин урсин! — пўнгиллади Этьен толиққанидан ҳарсиллаб; унинг аъзойи бадани қақшарди.

Аммо мана, бир километрча узунликдаги йўлак кенгайиб бора бошлади; штольнянинг шу ери ҳайрон қоларли даражада яхши сақланганди. Бу йўлакнинг охири бўлиб, илгари ундан вагонеткаларни ғилдиратиб келишарди; йўлак тош қатлаמידан кесиб ясалган бўлиб, табиий ғорга ўхшарди. Тўхташга тўғри келди; Этьен олисда туриб, бола икки тош орасига шамни ўрнатиб, кайфи чоғ бўлиб уйига қайтган кишидек қулай ва хотиржам ўрнашиб олганини кўрди. Йўлакнинг бу боши росмана, яхши жиҳозланган тураржойга айланганди. Ерга, бурчакка пичан тўшалган бўлиб, у юмшоқ ўрин вазифасини бажарарди; эски тахталардан столга ўхшаган нарса ясалган бўлиб, унинг устида турли-туман озиқ-овқат: нон, олма, бир шиша қорарча ароғи турарди. Хуллас, чинакам қароқчилар макони эди, бу ерда ҳафталаб олиб келинган ўлжалар, ҳатто бутунлай кераксиз совундан тортиб этик мойигача бор эди, булар чамаси, касбига ихлос қўйгани учун ўғирлаб келтирилганди. Кичкина худбин танҳоликда ана шу ўғирлаб келинган нарсалардан ҳузур қиларди.

— Бу қанақаси, одамларни калака қиляпсанми, а?
— кичқирди Этьен сал нафасини ростлаб олгач.—
Сен бу ерга келиб, мазза қилиб юргин-да, биз у ёқда,
тепада очдан ўлайлик!

Ўлгудек қўрқиб кетган Жанлен даг-даг титрарди.
Бироқ у Этьенни таниши биланоқ ўзига келди.

— Мен билан овқатланмайсанми? — таклиф қилди
бола.— Бир бўлак қовурилган балиқ бор, а?.. Ҳозир
тайёр бўлади.

У ҳалиги балиқни олиб келган экан, энди бўлса
янги ажойиб пичоғи билан унинг ифлос устини қира
бошлади,— бунақа дандон сопли кичкина ханжар-пи-
чоқларга одатда бирор сўз битилган бўларди. Пичоқ-
қа бор-йўғи битта сўз — «Муҳаббат» деб ёзилганди.

— Пичоғинг зўр экан,— деб қўйди Этьен.

— Бу Лидиянинг совғаси,— жавоб берди Жанлен.
Аммо у пичоқчани Монсудаги «Довюрак» майхонаси
ёнида нарсаларни кўтариб сотиб юрадиган кишидан
Жанленнинг буйругига кўра Лидия ўғирлаб бергани
ҳақида лом-мим демади.

У балиқ тозалай туриб, гурур билан қўшиб қўйди:

— Қалай, жойим чакки эмас, а?.. Тепадагига қа-
раганда иссиқроқ, ҳиди ҳам хушбўй!

Этьен чўнқайди; у Жанленнинг гапларига қизи-
қиб қолганди. У ғазабидан тушди; уни бу кичкина
ярамаснинг номақбул майлларига қарамай шунчалик
ботир, шунчалик уддабурро бўлиб кетгани қизиқ-
тириб қолди. Ҳақиқатан ҳам бу ин яхши эди-да:
унчалик иссиқмас, йилнинг қайси фасли бўлишидан
қатъий назар ҳарорат бир хил — ҳаммомдек иссиқ;
тепада бўлса, декабрь совуқлари авжга чиқиб, камба-
ғалларни қақшатарди. Эски йўлақларда зарарли газ-
лар бўлмайдди, кон гази чиқиб бўлган, фақат эски
ёғочларнинг ҳиди, эфирнинг енгил иси сезилади, унга
қалампирмунчоқнинг иси омихта бўлиб кетгандек тую-
ларди. Ходаларнинг кўриниши ҳам ғаройиб; оч-сарик
мармарга ўхшаган бу ёғочларни нафис тўрсимон оқиш
хол-хол ўсимлик қоллаганидан марваридли ипак ли-
бос кийгандек бўлиб кўринарди; кўпларини қўзиқорин
босиб кетганди. Оқ капалақлар билан пашшалар учиб
ўтишди, қордек оппоқ ўргимчаклар ўрмалашарди —
бу жониворлар қуёшни асло кўришмаганидан тамо-
ман рангсиз эди.

— Сен қўрқмайсанми? — сўради Этьен.

Жанлен ҳайратланиб унга қаради:

— Нимадан қўрқаман? Ахир бу ерда ёлғиз ўзим-ку.

Шу орада балиқ топ-тоза бўлди. Жанлен пайраха териб олов ёқди-да, устига кўмир қалади, еўнг балиқни товлаб пиширди. Кейин у бир бўлак нонни иккига бўлди. Бу, жуда шўрлигига қарамай, соғлом киши учун зўр овқат эди.

Этьен улушини олди.

— Биз ҳаммамиз озиб кетаётган бир чоқда сенинг семириб кетаётганингга энди ажабланмасак ҳам бўлади. Биласанми, ахир бу хилда қорин тўйғазиш ҳайвонлик-ку!.. Нима, сен бошқаларни ўйламайсанми?

— Гапингни қара-ю! Бошқалар нега бунчалик ақмоқлик қилишади?

— Сирасини айтганда, қочиб юриб, тўғри қиласан; агар отанг ўғирлик қилаётганингни билиб қолса борми, адабингни берарди-я.

— Нима, буржуйлар бизникини ўғирлашмайдими? Сен ўзинг бир неча марта айтгансан-ку. Мен Мегранинг нонини ўмарганимда, албатта, ўзимдан уриб қолганини олдим холос.

Иигит индамади: оғзи овқатга тўла эди, қолаверса, жавоб ҳам топиб беролмасди. Этьен бу разил, оғзи катта, кўккўз, шалпангқулоқ болага индамай қараб турарди. Ёввойи махлуқларга хос онгсизлик ва ҳийлакорлик секин-аста бу болани ибтидоий, ҳайвонсифат қилиб қўйганди. Уни шахта шу кўйга солганди; унинг оёқларини синдириб, хароб қилиб қўйган ҳам шу шахта эди.

— Хўш, Лидия-чи? — сўрашда давом этди Этьен. — Сен уни ҳам баъзан шу ёққа олиб келасанми?

Жанлен заҳархандалик билан кулди.

— Қиз болани-я? Э, йўқ!.. Аёлларнинг ҳаммаси ҳам оғзидан гуллаб қўяди.

У Лидия ва Бебердан беҳад нафратланиб, кулаверди. У умрида бунақа меровларни кўрмаганди. Жанлен хаёлига ҳам меровлар менинг ёлгон гапларимга чиппа-чин ишониб, уйларига қуруқ қайтаверишади, мен бўлсам, иссиқ жойда ўтириб, масалан, мана шу балиқни мазза қилиб ейман, деган фикр келиши биланоқ кулгидан ўзини тўхтата олмасди. Пировардида у кичкина файласуфга хос виқор билан деди:

— Бир ўзинг бўлганинг яхши-да, жуда бўлмаганда биров билан гижиллашиб ўтирмайсан-ку.

Эъен нонни еб бўлди, кейин қораарча ароғидан бир култум ичди. Эъен бир минутча нима қилсам экан, дея ўйланиб турди. Жанленнинг бу меҳмондорчилигига жавобан қулогингдан чўзиб, ташқарига олиб чиқаман, деб дўқ урсин-у, бундан буён ўғирлик қилма, бўлмаса, ҳаммасини отанга айтаман, дея қўрқитсинми? Лекин Эъен ер қаъридаги бу маконни обдан кўздан кечиранкан, миясига: тепада ишларимиз юришмай қолса, бу ғор менга ёки баъзи ўртоқларимга асқатиб қолмасмикин? — деган фикр келди. Эъен Жанлендан энди бу ерда тунаб қолмасликка сўз олди, чунки Жанлен баъзан пичан устида мазза қилиб ётгиси келса, шу ерга келарди. Йигит шамнинг қолганини олди-да, болакайни ўз ҳолига қўйиб бир ўзи жўнади.

Бу орада совуқ қаттиқлигига қарамай Мукетта хода устида ўтирганча Эъенни сабр билан кутарди. Қиз уни кўриши билан бўйнига ташланди; йигит бундан буён учрашмайлик деганидан кейин қиз ўзини юрагига ханжар санчилгандек ҳис этди. Вой худойимей, нега энди? Наҳотки уни астойдил севмаган бўлса? Эъеннинг ўзи шайтон васвасасига учиб, уйига кирманми, дея қўрқа бошлади; шунинг учун у қиз билан тош йўл томонга қараб кетди ва имкони борича мулойимлик билан ўртамиздаги алоқа ўртоқларим олдида обрўйимга, қолаверса, сиёсий ишимизга путур етказди, дея тушунтирди. Бунинг сиёсатга нима алоқаси бор экан, дея Мукетта ҳайрон эди. Кейин унинг миясига Эъен мен билан яқинликдан номус қилаётган бўлса керак, деган фикр келди; бунга у хафа ҳам бўлмади, чунки бу одатдаги гап; шунинг учун қиз унга ҳамманинг олдида мени бир шапалоқ ур, шунда одамлар булар ўртасидаги алоқа тамоман узилди, деб ўйлашади, дея маслаҳат берди. Лекин улар оз муддатга бўлса ҳам гоҳо-гоҳо кўришиб турадиган бўлишади. Қиз астойдил ялиниб, ҳеч ким билмайди, ахир сени беш минутдан ортиқ тутмайман-ку, дея қасам ичди. Эъен эриб кетган бўлса ҳам, бари бир кўнмади. Мумкин эмас. Бироқ хайрлашаётганида ҳар қалай уни ўпгиси келди. Улар қучоқлашиб, бир-бир босиб, Мон-

су четидаги дастлабки уйлар ёнига келиб тўхташди. Тўлин ой уларни ёритиб турарди. Улар олдида қандайдир бир хотин ўтди; худди тошга қоқилгандек гандираклаб кетди.

— Ким экан бу?— сўради Этьен ташвишланиб.

— Катрина,— жавоб берди Мукетта.— Жан-Бартдан қайтиб келяпти.

Аёл бошини қуйи солганича оёқларини зўрга босиб ўтиб кетди; унинг бутун қиёфасидан адою тамом бўлганлиги билиниб турарди. Йигит унинг орқасидан тикиларкан, жувонга дуч келганидан таъби хира бўлди; қалбини виждон азоби ўртарди; нима учун бунчалик куйинганини ўзи ҳам билмасди. Нима, жувон бошқа билан турмаяптими? Нима, қиз у ерда, Рекийяр йўлида, ўша одам билан дон олишаётганида унга ҳам шундай азоб бермаганмиди? Шунга қарамай Этьен унинг қилмишига яраша иш тутганидан хафа эди.

— Биласанми мен сенга нима демоқчима?— деб шивирлади Мукетта кўз ёшини оқиздириб, Катрина кетгач.— Сен бошқани севганинг учунгина мени яхши кўрмайсан.

Эртасига ҳаво жуда ажойиб бўлди; музлаган ер оёқ остида биллурдек гижирлайдиган, совуқ осмон эсатиниқ бўлган ажойиб қиш кунларидан бири эди бу. Жанлен уйдан соат бирларда қочиб кетди; лекин бутхона орқасида Беберни кутишга тўғри келди. Улар иккови Лидиясиз жўнашмоқчи бўлиб туришувди; чунки Лидиянинг онаси яна ертўлага қамаб қўйганди; бироқ шу чоқ қизалоқнинг қўлига корзинка бериб, шакароб учун қоқи ўт териб келмасанг, кечаси билан яна қамаб қўямиз, каламушларга ем бўласан, дея қўрқитиб, уни чиқариб юборишганди. Лидия жудаям қўрқиб кетганидан шу заҳоти қайтиб кетмоқчи бўлди. Лекин Жанлен кейин бир гап бўлар, деб уни йўлдан урди. Кўпдан бери у Раснёрнинг семиз ургочи куёни — Польшани кўз остига олиб юарди. Болалар «Авантаж» ёнидан ўтишаётганда, бирдан куён йўлга чиқиб қолди. Жанлен бир сакраб, унга етиб олди-ю, қулогидан ушлаб, ўлжани қизнинг корзинкасига тиқди-да, кейин учови ура қочишди. Итни ҳайдагандек уни ўрмонгача ҳайдаб бориш зўр эрмак бўлади-да.

Лекин улар кўп ўтмай, икки ошнаси билан бир

кружкадан пиво ичиб, энди соққа ўйнамоқчи бўлиб турган Захария билан Мукенинг ўйинини томоша қилгани тўхташди. Янги фуражка билан қизил ипак рўмол дов тикилганди; бу буюмларни Раснёрга топшириб қўйишди. Тўрт ўйинчи икки кишидан бўлиб, биринчи гана хусусида гаров ўйнашди: соққани Ворёдан Пайо фермасигача тахминан уч километр жойгача суриб бориш керак эди. Захария етти зарб билан соққани маррага етказаман, деса, Муке саккиз зарб билан деди; шундай қилиб ўйинни Захария бошлаши керак эди. Мана соққани — сирасини айтганда, шамшод ёғочидан қилинган тухумсимон шохсоққани — учини осмонга қаратиб, кўча ўртасига қўйишди. Ҳар бир ўйинчининг қўлида соққани урадиган таёқ бор эди; бу учи қайрилган, устига тунука қопланган, узун дастасига ингичка каноп маҳкам ўралган калтак эди. Соат иккига занг уриши билан ўйин бошланди. Захария биринчи ўйинчи бўлгани учун уч зарб уришга ҳақли эди, у дарҳол маҳорат билан соққани уриб, лавлаги экилган ерлардан тўрт юз метрдан зиёд жойга етказди; посёлкада, йўлларда ўйнаш тақиқланганди, чунки пиёдаларга тегиб, майиб қилиш хавфи бор эди. Муке ҳам моҳир ўйинчи бўлганидан соққани шундай қаттиқ урдик, соққа кетига юз эллик метрча қайтди. Ўйин қизиб кетди; бир жуфт ўйинчи соққани олдинга ҳайдаса, иккинчиси орқага қайтарарди, улар соққани чопиб юриб урганларидан оёқларини шудгорнинг мувланган кесакларига уриб олардилар.

Ўйинчиларнинг кучли зарбларига қойил қолган Жанлен, Бебер ва Лидия аввалига ўйинчилар кетидан югуришди. Бироқ корзинка ичида типирчилаётган Поляша эсларига тушиб, даладаги ўйинчиларни қўйишди-да, қуённи қўйиб юборишди ва тез чопармики, дея қизиқиб қараб туришди. Қуён сакраб-сакраб қочди, болалар кетидан югуришди; улар бир соатча тинмай уни ҳар томонга қувиб, жинни қилишди; вақт-вақти билан қичқариб, қулочларини кериб, чапак чалиб уни қўрқитишарди. Агар қуён оғир бўлмаганда, болалар унга ета олмасдилар.

Ҳарсиллаб қолган болалар тўхташганида орқаларидан сўкиш эшитишди; бу уларни ўгирилиб қарашга мажбур этди. Улар яна ўйинчиларнинг оёқлари

остида ўралишиб қолишганди, оз бўлмаса Захария укасининг калласини ёриб юборай деди. Тўртинчи ганак бошланганди: ўйинчилар соққани Пайо фермасидан Тўрткўча томон, сўнг Тўрткўчадан Монтуарга ҳайдашди; энди улар олти зарб билан соққани Монтуардан Сигир ўтлоққа етказишлари лозим эди. Бу йўл икки ярим лье бўлиб, бу масофани бир соатда ўтдилар, шу орада яна «Венсан» қовоқхонасида, «Уч донишманд» майхонасида бир кружкадан пиво ҳам ичишди. Энди Муке олдинга чиқиб олганди. Маррага етиш учун икки марта урса бас эди, у ютай деб турганди, ногаҳон ўйнаш навбати келган Захария кулиб, қулочкашлаб чаққонлик билан шундай урдики, соққа чуқур бир ўрага тушиб кетди. Мукенинг шериги соққани у ердан уриб чиқара олмади; оқибатда уларнинг ютқазиб қўйишлари тайин эди. Тўртови қизишиб, қичқиритарди, чунки ҳар икки томоннинг имкониятлари баравар эди; ўйинни янгитдан бошлашга тўғри келди. Сигир ўтлоқдан Енгансойга икки километр ҳам келмасди; демак, беш марта уриш керак. У ерга етгач, Леренар дўконидан тамадди қилиб олиш мумкин.

Шу чоқ Жанленнинг калласига яна бир шумлик келди. Ўйинчилар кўздан йўқолгач, у чўнтагидан чизимча чиқарди-да, уни Польшанинг чап оёғига боғлади. Қуённинг уч зolim қўлидан қочиб қутулишга ўлибтирилиб уринганини томоша қилиш жудаям мароқли эди, шўрлик оёғини силкитар, ночор бурар эди; болалар шу чоққача бунақа кулишмаганди. Кейин улар сакраб-сакраб чопсин, деб қуёни бўйнидан боғлашди. Польша чарчагандан кейин болалар уни чинакам кичкина аравадек гоҳ қорни билан, гоҳ чалқанчасига судрашди. Бу эрмак бир соатдан кўпроқ давом этди; қуён хириллай бошлади. Шу пайт Крюшо дарахтзори ёнидан ўйинчиларнинг овозлари эшитила бошлади; болалар яна уларга халақит бермайлик, дея қўрқишиб, қуёни апил-тапил корзинкага солиб олишди.

Энди Захария, Муке ва бошқа икки ўйинчи зўр-базўр нафасларини ростлаб, барча майхоналардан бир кружкадан пиво симириб югуриб боришарди. Улар ҳар бир ганақда майхонага кириб чиқишни мақсад қилиб қўйишганди. Улар Енгансойдан Бюшига, у ердан Топшбутга, кейин эса Шамблега тушишди. Улар

соққа кетидан қутуриб, тўхтовсиз югурганларида ер гурсилларди, соққа эса музлаган кўлмакларда сак-рарди, ҳаво яхши бўлганидан ҳеч қаерда ботиб қо-лишмасди, лекин оёқларини синдириб олиш хавфи йўқ эмасди. Қуруқ ҳавода таёқ овози ўқ овозидек эшитиларди. Мускулдор қўллар чизимча ўралган дас-тани маҳкам сиқиб олганди; ўйинчилар соққани ура-ётганларида худди бир уриб ҳўкизни қулатадиган-дек, бутун гавдалари билан олдинга энгашардилар; бу хатти-ҳаракатлар бутун текислик бўйлаб, унинг бир четидан иккинчи четигача, зовур ва ихоталар, тепалик ва пастак боғ деворлари орасида бир неча соат давом этди. Яхши, энгил темир мускуллар керак эди бу ўйинга. Кончилар шахтадаги ишдан сўнг шу йўл билан баданларининг чигилини ёзишни жуда ях-ши кўришарди. Баъзи йигирма беш ёшлик азаматлар бу ўйинга берилиб кетиб, ўн лъелаб йўл босадилар. Қирқ ёшга борган кўмир қазувчилар қайтиб бу ўйин-ни ўйнамасдилар, тепаликка югуриб чиқиш оғирлик қиларди.

Соат беш; қош қорайиб қолай деди. Ниҳоят фу-ражка билан ҳарир рўмол кимга тегишини аниқлаш учун Вандам ўрмонигача яна бир ганак қолганди, шу боисдан сиёсатга мутлақо лоқайд қарайдиган За-хария одатича майнабозчилик қилиб, қани энди ўр-монга, ўртоқларимиз тўпига шартга учиб тушсак, де-ди. Жанлен бўлса, посёлкадан чиқаётгандаёқ сайрни ўрмонда тугатаман, деб кўнглига тугиб қўйган бўлса ҳам, ўзини далада санқиб юргандек кўрсатарди. Виж-дон азоби ва қўрқувдан эзилиб келаётган Лидия қоқи ўт тергани Ворёга борсам бўларди, деганида Жанлен жаҳл билан унга дўқ қилиб, ахир биз катта йигинга кетмаяпмизми? — деди. Унинг катталар нима дейиши-ни эшитгиси келаётганмиш. У йўлнинг ўрмон этаги-гача бўлган қисмини қувноқлик билан ўтиш учун Беберни туртиб, Польшани қўйиб юборамиз, мабодо қочадиган бўлса, тош билан урамиз, деб таклиф қил-ди. Унинг нияти бошқача эди: қуённи ўлдириб, Ре-кийярдаги маконига олиб бормоқчи, кейин мазза қи-либ емоқчи эди. Қуён қулоқларини қисиб, ерни ҳид-лаб-ҳидлаб, чошиб кетди; унга тош-кесаклар отилди — биттаси унинг белини шилиб кетди, иккинчиси думи-

ни яралади, борган сари қоронгилик қуюқлашаётганига қарамасдан болалар қуённи ўлдириб қўйишлари ҳеч гап эмасди, лекин улар ўрмон яланглигида Эъён билан Маэни кўриб қолишди. Шунда улар шоша-пиша қуённи тутиб олишди-да, яна корзинкага тиқишди. Деярли шу пайт Захария, Муке ва бошқа ишчилар сўнгги бор соққани отдилар, соққа бориб, ялангликдан бир неча метр берига тушди. Улар нақ йигиннинг ичига келиб қолишди.

Қош қорая бошлаши билан узоқдан нопормон рангда кўриниб турган ўрмонга қип-яданғоч кенг ялангликнинг ҳамма йўл ва сўқмоқларидан кишилар чурқ этмай якка-якка, гала-гала бўлиб кела бошлашди. Посёлкалар бўшаб қолди. Хотинлар билан болалар ҳам очиқ оқшом ҳавосида ўйнаб келишга чиқишганди. Йўллар қоронғи бўлиб қолди; энди шошилмай қадам ташлаб, бир жойга кетаётган оломонни илғаб бўлмасди. Бу оломоннинг фикри битта эканлиги сал-пал сезиларди холос. Буталар ва дарахтлар орасидан энгил шитир-шитир, туннинг тушуниб бўлмайдиган гувиллаши эшитилиб турарди.

Шу соатда Энбо жаноблари уйига қайтаётганди; у ноаниқ шовқинга диққат билан қулоқ соларди. Ажойиб қиш оқшоми бўлганидан жаноб Энбо жуда кўп ошиқ-маъшукларни, турнақатор бўлиб юрган сайр қилувчиларни кўрди. Ҳузур қилиш учун тўсиқ ортидан хилват жой қидириб, аланглаган ошиқ-маъшуклар йўлда ўпишиб, олдидан ўтиб кетишарди. Директорга бу учрашувлар одатдаги бир нарса бўлиб кўринди,— қарийб ҳар бир чуқур-чаноқда учрайдиган қашшоқлар ўз вақтларини шу билан чоғ этардилар, бу эса уларга ҳеч гап эмасди. Яна бу аҳмоқлар турмушимиз ёмон деб шикоят қилишади: ахир олло уларга саховат қилиб, бемисл бахтни — севиш ва севилиш бахтини қўш-қўллаб бериб қўйибди-ку! Агар бутун вужуди ва қалбини бағишлаган бир хотин билан лоақал йўл четидаги тошлар орасида бўлса ҳам ҳаётини қайта бошлаш иложи бўлганда эди, у ановилар сингари оч қолишга жон-жон дерди. Энбонинг ғам-ғуссаси эса бедаво эди. Шунинг учун бу камбағалларга унинг ҳаваси келарди. У бошини қуйи солганча борарди; от эса битта-битта

қадам ташларди; зим-зиё далада йўқолиб кетаётган бу тинимсиз шитир-шитирлар кўнглини ғаш қилаётганди,— бу шитир-шитирлар унга бўса олишдек бўлиб эшитиларди.

VII

Бу воқеа Қиз тақирда бўлаётганди. Ҳурмоннинг пастга қиялаб тушган бу сайхонлиги жуда катта бўлиб, атрофини тўғри, текис таналарини моғор босган азамат шамшодлар худди оқ устунлардек ўраб турарди; ўт устида кесилган улкан дарахтлар ётарди, чап томонда эса арраланган ўтинлар чиройли қилиб тахлаб қўйилганди. Қоронғи тушиши билан совуқ кучайиб, музлаган йўсин оёқ остида ғижирларди. Паст томон батамом қоронғи эди, яланғоч шохлар оқиш осмонда чўччайиб кўринарди, уфқда эса юлдузларни хиралаштириб, тўлин ой чиқиб келмоқда эди.

Йигинга уч мингга яқин шахтёр тўпланди; ҳаммаёқда одамлар уймалашарди, секин-аста бутун яланглик, энг чеккадаги дарахтларнинг тагигача эркак, хотин-халаж, бола-чақа билан тўлиб кетди. Кечикканлар ҳамон келишарди: яқин тўқайлар ва қимир этмай қотиб турган ўрмонда қоронғиликда гавдалар кўриниб қоларди, ғовур-ғувур овозлар бўрон шамолидек тараларди.

Тепароқда, сайхонлик устида Этьен билан Раснёр ва Маэ туришарди. Улар баҳслашаётганлари учун кескин қичқириқлар эшитилиб турарди. Уларнинг атрофига йиғилган эркаклар бўлаётган гап-сўзларга қуроқ солишарди. Левак муштани сиқар, орқасини ўгириб олган Пьеррон ташвишланиб, кўпроқ ўзимни касалга солиб ётмадим-да, дея ўйларди; Улмас бобо билан қари Мук ўша ердаги тўнқада оғир хаёлга чўмиб ёнма-ён ўтирарди. Орқароқда, чеккароқда бу ерга эрмак ахтариб келган Захария, Муке ва бошқа майнабозлар жойлашиб олишганди; хотинлар эса аксинча, худди ибодатхонадагидек сипо, жиддий бўлиб, алоҳида тўпланиб туришарди. Маэ хоним бўғиқ овозда қарғанаётган Левак хонимга жавобан индамай бошини сарак-сарак қиларди. Филомена йўталарди,— қишда унинг бронхит касали кучаярди; фақат Мукет-

тагина Ашаддий кампирнинг қарғишларини эшитиб кулиб турарди; кампир беномус қизини койирди, қизи эса қовурилган қуёнга тўйиб олай, деб кампирни уйдан чиқариб юборибди, эрининг разил ишлари туфайли семириб ётибди бу манжалақи. Ҳаммадан баландда, ўтинлар устида Жанлен ўтирарди; у Лидияни ҳам, Беберни ҳам шу ёққа чиқиб олишга мажбур этганди.

Баҳсни қоидага биноан президиум сайламоқчи бўлган Раснёр бошлаганди. У «Қувноқ» қовоқхонасидаги мағлубияти аламига чидай олмасди, шунинг учун ҳам мухолифларидан ўч олишга жазм этган, делегатлар билан эмас, балки шахтёрлар оммаси билан бақамти бўлганимда илгариги обрўйимни тиклаб оларман, деб умид қилган эди. Ғазабланган Этьен мана шу жойда, шу ўрмонда президиум сайлаш ҳақидаги фикрнинг ўзи бемаъни-ку, дер эди. Модомики, уларни бўрилардек гиж-гижлатгандан кейин, улар ҳам кескин, инқилобчасига ҳаракат қилишлари керак-да.

Баҳс чўзилиб кетди; шунда Этьен тўнканинг устига чиқиб: «Уртоқлар, ўртоқлар!» — дея қичқирди-да, оломонни ўзига оғдириб олди қўйди.

Одамларнинг ғовур-ғувури босилиб, чўзиқ оҳга айланди. Маэ Раснёр билан баҳсини тўхтатди, Этьен бўлса овозини гулдуратиб, гапини давом эттирди:

— Уртоқлар, модомики, бизнинг оғзимизни юмдирарканлар, модомики худди биз қароқчидек устимизга жандармларни юборар эканлар, демак, биз худди мана шу ерда гапни бир жойга қўйишимиз зарур! Биз бу ерда озодмиз, худди ўз уйимиздагидек; бу ерда қушу ҳайвонларни жим бўлишга мажбур этиб бўлмаганидек, бизни ҳам оғзимизга ура олишмайди.

Оломон гуриллаб жавоб берди, ҳар томондан садолар янгради:

— Ҳа, ҳа, ўрмон ўзимизники, бу ерда гапиришга тўла ҳақимиз бор. Бошла!

Этьен тўнка устида бир минутча қимирламай турди. Уfqда кўтарилиб келаётган ой дарахтларнинг учларинигина ёритарди; қоронғиликдаги оломон секин-аста тинчланиб, кута бошлади. Қоронғиликка бурканган Этьен ҳам оломон узра қора соядек юксалиб турарди.

У қўлини оҳиста кўтариб, гапга тушди. Лекин энди унинг овози гулдурамасди. Этьен шахтёрларнинг халқ олдида ҳисоб бераётган оддий бир вакилидек босиқ гапирарди. У «Қувноқ» қовоқхонасида полиция комиссари халақит бергани учун айтолмай қолган гапларини ниҳоят энди гапириши мумкин эди. Этьен стачканинг боришини наридан-бери, лекин изчиллик билан ҳамма нарсани — фактларни, нуқул фактларни аниқ ифодалашга ҳаракат қилди. Аввалига у забастовкага қарши кескин гапирди — шахтёрлар уни хоҳламагандилар, дирекциянинг ўзи тирговичлар учун янги нарх қўйиб, уларни забастовка қилишга қўзғаб қўйди. Кейин у делегациянинг директорга биринчи бор учрашганини, Ширкатнинг фирромлик қилганини, кейинроқ эса иккинчи марта мурасага келиш учун уриниб кўрилганини — Ширкат ўғирлаб қолмоқчи бўлган икки сантимни қайтиб беришга кўниб, кечикиб ён берганини эслатиб ўтди. Ҳозирги кунга келиб аҳвол қуйидагича: ўзаро ёрдам кассаси қуруқ, Этьен бу гапни рақамлар билан таъкидлади, юборилган ёрдам пулларининг нималарга сарфланганини маълум қилди, шахтёрларга кўпроқ ёрдам бера олмаган Интернационални, Плюшарни ва бошқаларни оқлаш учун бир-икки оғиз сўз айтди, чунки уларнинг халқаро кўламда ишлари кўп эди. Аҳвол кун сайин оғирлашиб бормоқда, маъмурият ҳисоб дафтарларини қайтариб бериб, Бельгиядан ишчилар ёллаймиз, дея дўқ қилмоқда; бунинг устига маъмурият ланжроқ одамларни қўрқитиб, баъзиларини шахтага тушишга кўндирди ҳам. Этьен бу гапларни аҳволнинг ёмонлашганини писанда қилиш учун атайлаб бир оҳангда айтди, очликнинг тантана қилаётганидан, умид учқунлари сўнаётганидан, кураш гоят зўр жасорат талаб қилаётганидан огоҳлантирди. Бирдан товушини баландлатмай, гапининг охирида деди:

— Мана шундай шароитда, ўртоқлар, бугун бир қарорга келишимиз керак. Забастовкани давом эттиришни истайсизларми? Ширкат устидан ғалаба қилиш учун нимага ишонасизлар?

Юлдузлар чарақлаб турган осмон жимжит эди. Этьеннинг гапларидан эзилиб кетган, қоронгиликда кўринмаётган оломон жим эди, дарахтлар тагида умидсизлик нафаси кезарди.

Бироқ Этьен гапини давом эттирар, унинг овози ўзгарган эди. Энди ташкилот секретари эмас, балки омманинг йўлбошчиси, ҳақиқат йўлини кўрсатувчи валий гапираётган эди. Наҳотки ўз сўзига хиёнат қилувчи қўрқоқлар ҳам бўлса орамизда? Қаёқдан чиқди улар? Бутун бир ой азоб-уқубат чекиб, яна бош эгиб, шахтага қайтамизми, яна ўша қашшоқ турмушимизни бошлаймизми? Жонимизни фидо қилиб бўлса ҳам ишчиларни очлик билан ўз амрига бўйсундирадиган капитал зулмини парчалаб ташлаганимиз яхши эмасми? Бу очлик ҳатто энг қўрқоқларни ҳам яна ўз домига тортгунча индамай қараб тураверамизми? Йўқ, бу бемаъни ишга барҳам бериш керак...

Сўнг Этьен эксплуатация қилинаётган шахтёрлар ҳақида, уларнинг кризис оқибатларини елкаларида кўтариб бораётганликлари, рақобат хўжайинларни кўмир таннархини камайтиришга мажбур этганида уларнинг оч қолишга мажбур бўлаётганликлари тўғрисида гапирди. Йўқ, тирговичларга қўйилган янги баҳога кўниб бўлмайди, бунинг замирида ҳар биримизнинг иш қунимиздан бир соатини ўғирлаб қолиш нияти бор. Бу энди ҳаддан ташқари, жони бўғзига келтирилган кафангадоларнинг адолат талаб қиладиган вақти келди.

У қўлини кўтарганча жимиб қолди. «Адолат» сўзини эшитганда оломон чайқалиб, қўлларини силкитишди, бу қуруқ баргларнинг шитирлашини эслатарди.

— Адолат!.. Адолат ўрнатиш вақти аллақачон етган!.. — деган садолар эшитилди.

Секин-аста Этьен қизишиб кетди. У Раснёрга ўхшаб осон, силлиқ гапира олмасди. Кўпинча у сўз тополмай қолар, имо-ишоралар билан бир азобда жумла тузар эди. Лекин шу билан бирга бехосдан тингловчиларга ниҳоятда манзур бўладиган зўр образлар топарди; унинг қурилишда ишлаган кишига хос имо-ишоралари, тирсагини баданига босиб туриш одати, сўнг бирдан муштини олдинга ташлаши, худди тишлаб олишга тайёрдек кўринган жағлари ўртоқларида доимо катта таассурот қолдирарди. Ҳамма уни бўйи баланд бўлмаса ҳам лекин одамларни оғзига қарата олади, дерди.

— Елланма меҳнат — қулликнинг янги шакли, —

дея давом этди Эъен тўлқинланган товуш билан.— Денгиз балиқчиники, ер эса деҳқонники бўлгани каби шахта ҳам шахтёрники бўлиши керак... Эшитяпсизларми?.. Шахта сизларники, бутун аср мобайнида тер ва қон тўкиб келаётган сизларники, ҳаммангизники!

У баҳсли ҳуқуқ масалаларини дадиллик билан муҳокама қилишга киришди, гарчи ўзи яхши тушунмаса ҳам шахталарга доир махсус қонунлар тўғрисида гапирди. Ер ости бойликлари, ерга ўхшаб бутун халқнинг мулкидир, турли-туман ширкатлар эса қабихона имтиёзлар туфайлигина бу бойликлардан фақат ўзлари фойдаланиб ётишибди; Монсу масаласига келганда шунини айтиш керакки, кўмир қазиб чиқаришга оид шубҳали қонунлар Энодаги қадимги ер эгалари билан тузилган эски шартномалар туфайли қоришиб, чигаллашиб кетган. Бу ўша даврларда одатга кирган эди. Шахтёрлар яна ўз мулкларига эгалик қилишлари керак. Эъен гўё ўрмон ортидаги бутун ўлкани қучоғига оладигандай қўлларини чўзиб қўйди. Шу пайт баланд шохлар ёнидан сузиб чиққан ой ўз нурлари билан Эъенни ёритди. Ҳамон қоронғиликда турган оломон очиқ қўллари билан гўё ҳаёт неъматларини улашаётган Эъеннинг равшан ёритилган қоматини кўргач, яна қўлларини узоқ силкитишиб:

— Тўғри, тўғри айтдинг! У ҳақ! Қойил, яша!— дейишди.

Шу ерга келганда Эъен севимли мавзусига кўчдида, меҳнат қуролларининг коллективга қарашли эканлигини айтиб, асаб торларини ёқимли чертаётган бу иборани ҳузур қилиб такрорларди. У анча билимдон бўлиб қолганди. Ишни биродарликни ялиниб-ёлбориб тарғиб қилиш, меҳнат шаклини ўзгартиришдан бошлаган Эъен ёлланма меҳнатни батамом тугатиш керак, деган сиёсий хулосага келганди. Унинг «Қувноқ» қовоқхонасидаги коллективизмга нисбатан инсоний меҳр билан тўлган, аммо ҳали бирор формулага солинмаган қарашлари энди мураккаб система шаклида кўрина бошлаганди, фиклари қайралиб, ўз ақидаларини илмий тилда баён этарди. Даставвал, деди Эъен,

бутун давлат тузуми яксон этилиб, халқ ҳокимиятни ўз қўлига олган тақдирдагина озодликка эришиш мумкин. Ана унда ислохотлар бошланади: ибтидоий коммунага қайтилади, ахлоқий жиҳатдан эзилган оила тенг ҳуқуқликка асосланган эркин оилавий муносабатлар билан алмашинади. Гражданлик, сиёсий ва иқтисодий жиҳатдан тўла тенглик жорий этилади, ишлаб чиқариш қуроллари ва барча меҳнат маҳсулотларидан фойдаланиш туфайли шахсий мустақиллик таъминланади, ниҳоят ҳунар таълими коллектив ҳисобига текин олинади. Бу эса эски, чиркин жамиятни тубдан қайта қуришга олиб келади. Эъён никоҳ, ворислик ҳуқуқига ҳужум қилди, айрим шахсларнинг мол-мулкани аниқлаб чиқди, ўтган асрларнинг машъум ёдгорликларини яксон қилиш керак, деди, у гапираркан, худди етилган экинни ўраётган ўроқчидек бир қўлини кенг ёзиб туширарди, иккинчи қўли билан эса бўлажак инсоният жамиятини қуради, йигирманчи аср бўлажак сағасида қад кўтарадиган ҳақиқат ва адолат биносини бунёд этар эди. Эъён жазавага тушиб гапирганидан, энди мулоҳаза қилиб ўтирмай, фақат бир жоҳилонга гоёга ёпишиб олганди. Ҳиссиёт ёки соғлом ақл ишора қиладиган ҳар қандай шубҳалар йўқолди: ана шу янги дунёни қуришдан осон нарса йўқдек эди, гўё ҳаммаси режалаб қўйилган: Эъён худди икки соат ичида йиғиб, юргизиб кетса бўладиган машина ҳақида гапирётгандек эди, гўё унга ўт билан қоннинг аҳамияти йўқ эди.

— Энди навбат бизга келди, — ёниб деди Эъён гапини тугатаркан, — бундан буён ҳокимият ва бойликлар бизники бўлиши лозим.

Ўрмон қаъридан келган қувончли қичқириқлар Эъён қулоғига урилди; энди ой бутун сайхонликни энг узоқдаги ниҳолларигача ёритиб юборган эди, чайқалаётган каллалар билан улкан дарахтларнинг кулранг таналари ойдинда аниқ кўриниб турарди. Совуқ ҳавода очликдан силласи қуриган кишиларнинг кўзлари ялтиллаган, оғизларини катта очган, олға ташланиб, жанг қилиб, ўзларининг тортиб олинган қадимги мол-мулкларини қайтариб олишга шай турган эркаклар, хотин-халажлар, болаларнинг ташвишли чехралари кўриниб қоларди. Энди улар Эъённинг эҳтиросли нут-

қидан қизиб кетганликлари учун совуқни сезишмасди. Фидойиларнинг ҳайратли нидолари уларни осмонга чиқариб қўйганди; улар дастлабки христианларга ўхшаб яқин келажакда адолат салтанатининг ўрнатилишини умид, зўр иштиёқ билан кутишарди. Улар кўп нарсани тушунишмас, техник ва мавҳум мушоҳадаларнинг мағзини чақиша олишмас, лекин Этьен сўзларидаги ноаниқлик ва мавҳумликни унинг ваъдалари пардалаб кетарди. Қандай гўзал орзу бу! Ўзингга ўзинг хўжайин бўлсанг, азоб чекмасанг, ҳаётдан лаззатлансанг!..

— Рост, жин урсин!.. Бизнинг навбатимиз келди! Эксплуататорларга ўлим!

Хотинлар алаҳлаётганга ўхшарди; одатда босиқ Маэ хоним безовталаниб қолди, очликдан унинг боши айланарди, Левакнинг хотини инграрди, Ашаддий кампир ғазабланиб, жодугарникидек озгин қўлларини силкитарди, Филомена йўталавериб, бўғилиб қолди, Мукетта бўлса, жўшиб кетганидан қичқириб, нотиқ шаънига ширин сўзлар айта бошлади. Маэнинг ўзи маҳлиё бўлиб, ғазаб билан бақирарди, Пьеррон қўрққанидан дағ-дағ титрарди, Левак бўлса, тинмай жаврарди. Захария билан Муке ҳазил-мазах қилишга уринишса ҳам ўзларини қўярга жой топиша олишмасди, шу боисдан оғайнимиз бир қултум ҳам ичмасдан шунча узоқ гапирадими, дея ажабланишарди. Польша солинган корзинкани силкитаётган Жанлен, Лидия ва Бебер ўтин устида ҳаммадан кўп шовқин солишарди.

Яна ғала-ғовур кўтарилди. Этьен муваффақиятдан маст эди. У уч минг кишилик оломонни ўзига қаратиб, бир оғиз сўзи билан уларнинг юрагини ўйнатиб юборганди. Мабодо Суварин лутфан бу ёққа келиб, Этьеннинг нутқини эшитганида, анархистча фикрларни баён қилган ўз шогирдининг ғояларини табриклар, муваффақиятларидан қувонган бўларди; у фақат маорифга оид моддадан бошқа бутун программани маъқулларди. Суварин буни аҳмоқона кўнгилчанлик сарқити деб биларди, чунки муқаддас нодонлик осий бандаларни гуноҳлардан фориг этишга хизмат қилиши лозим эди. Раснёр бўлса жирканиб, жаҳл билан елкасини қисарди холос.

— Қўйвор, мен ҳам гапирай! — қичқирди у Этьенга.

Этъен тўнкадан сакраб тушди.

— Хўп, гапир, кўрамиз, сенга қулоқ солишармикин.

Раснёр энди унинг ўрнига туриб олди-да, қўллари-ни силкитиб, қулоқ солишларини талаб этди. Лекин ғала-ғовур босилмади; Раснёрнинг номи уни билганларнинг олдинги қаторларидан то олисдаги шамшодлар тагидаги қаторларгача бориб етди. Ҳеч ким унинг гапига қулоқ солишни истамасди. Бу энди мағлуб бўлган бошчи эди, шу боисдан башарасининг ўзиёқ собиқ муридларининг ғазабини кўзгарди. Унинг сўзамоллиги, илгарилари ҳаммани мафтун қиладиган меҳр тўла равон нутқи энди қўрқоқларни ухлатадиган илиққина ичимликка ўхшарди. Раснёр бу ғала-ғовурда гапиришга беҳуда уринарди; у босиқ гапириб, янги қонунлар эълон қилиш билангина ижтимоий тартибни ўзгартириш мумкин эмаслигини, ижтимоий тараққиёт учун вақт кераклигини тушунтирмоқчи бўларди; қийқиришиб уни майна қилишди, «Қувноқ» қовоқхонасида обрўсининг бир пул бўлгани ҳам ҳолва бўлиб қолди. Унга ҳатто музлаб ётган йўсинни кўчириб олишди, аллақандай бир хотин чинқириб:

— Йўқолсин хоин!— деди.

Раснёр тўқиш дастгоҳи тўқувчиники бўла олмаганидек, шахта ҳам шахтёрларники бўлмаслигини тушунтиришга уринди ва фойдани олншда қатнашининг афзаллигини, ишчиларни корхонанинг тенгхуққли пайчилари қилиб, манфаатдор этишнинг яхшилигини таъкидлади.

— Йўқолсин хоин!— дея қичқирди минглаб овозлар ва ҳар томондан Раснёрга ғувиллатиб тошлар отилди.

Унинг ранги қув учиб, хўрлиги келди-ю, кўзларига ёш тўлди. Унинг бутун ҳаёти барбод бўлди, нобакор оломон унинг шухратпарастлик умидларига асосланган йигирма йилдан бери қилиб келаётган ошначилик муносабатларини йўққа чиқариб юборди. Дили қаттиқ ранжиган Раснёр бир оғиз ҳам гапиришга мажолли келмай, тўнкадан тушди.

— Ҳа, сенга кулгили,— тўнғиллади Раснёр гердайиб турган Этъенга қараб.— Яхши, сени бошингга ҳам шундай иш тушсин... Шундай бўлади ҳам, эшитдингми?..

Келажакда бўладиган бахтсизликларни сезиб турган Раснёр гўё масъулиятни ўз зиммасидан соқит қилмоқчи бўлгандек, қўлини силтади ва жимжит оппоқ даладан танҳо қадам ташлаб узоқлашди.

Кетидан уни роса масхара қилишди, лекин ҳамма тўнка устига чиқиб, шовқинга ҳам қарамай гапирмоқчи бўлиб турган Ўлмас бобони кўрди-ю, хайрон қолди, шу чоққача Мук бобо билан бир чеккада турарди, эски одатларига кўра, ўтган кунларини эслашаётгандай кўринишлари ҳам жиддий эди. Афтидан, ўтмиш хотиралари уни жон-қолига қўймагану бирдан Ўлмас бобонинг гапиргиси қистаб қолганди, бунақа пайтларда бобо соатлаб гапириб, юрагини бўшатиб оларди. Ҳамма жим бўлиб, чолнинг гапини эшита бошлади; у ойдинда арвоҳдек оппоқ кўринарди. Унинг нутқи йиғилишда айтилган гапларга бевосита алоқадор эмасди, у узундан-узоқ, тушуниб бўлмайдиган, аммо шунга қарамай, гоят ҳаяжонли воқеаларни ҳикоя қиларди. У ёшлигини эслади, Ворё шахтаси босиб қолиб, икки амакисининг ўлиб кетганини гапирди, кейин хасталиклар ёдига тушиб, зотилжам касали хотинини гўрга тикқанини айтди. Унинг ҳамма гапидан битта маъно чиқарди: ҳамиша ёмон бўлиб келган, ҳеч қачон яхши бўлмайди. Бир куни беш юз киши ўрмонга йиғилишибди, чунки қирол иш соатини қисқартиришни истамаган экан; лекин чол бу ҳақда эзилиб ўтирмай, бошқа стачкани гапириб кетди; э, бунақа ишларнинг озмунчасини кўрдими! Ҳамма воқеалар мана шу дарахтлар остида, мана шу Қизтақирда, анови ерда, Кўмир ўраларида, ёки яна ундан ҳам нарида, Бўрижарда бўлиб ўтганди. Бу йиғинлар баъзан совуқда, баъзан иссиқда бўлган. Бир гал шундай ёмғир ёғибдики, бир оғиз ҳам гаплаша олмай тарқалиб кетишибди. Қирол аскарлари келиб қолиб, иш отишма билан тугабди.

— Биз ҳам қўлларимизни кўтариб, шахтага тушмаймиз, дея қасам ичганмиз... Мен ҳам қасам ичганман, ичганда қандоқ!..

Оломон диққат билан тингларди, одамлар алланечук бўлиб қолишди; лекин шу чоқ воқеаларни кузатиб турган Этьен тўнкага сакраб, чолнинг ёнига чиқди. У биринчи қаторда ўртоқлари билан турган Ша-

вални таниб қолди. Катрина шу ерда, деган фикр Этьеннинг бағрига яна ўт ёқди; у сўзини шахтёрлар маъқуллашганини Катрина кўришини истарди.

— Уртоқлар, сизлар қариямизнинг гапини эшитинглар, унинг не-не азобларни кўрганини эшитинглар, агар биз ўғри ва жаллодларни тугатмасак, болачақаларимиз ҳам азоб чекаверади.

Этьен қаҳру-ғазабга тўлган, ҳеч қачон бунчалик ёниб гапирмаган эди. У қўли билан Ўлмас бобони тутиб, уни қашшоқлик ва ғам-ғусса байроғи қилиб кўрсатар, қасос олишга чақирар эди. У қисқагина қилиб, Маэ хонадонининг аждодлари ҳақида гапирди, унинг бутун ота-боболари секин-аста Ширкат шахталарида силласи қуриб тамом бўлганини, юз йил ишлаб, тутдек тўкилганини айтди ва оч шахтёрларни пулнинг сассигига ётолмайдиган қорни катта Правление аъзолари билан қиёслади: бу мечкайлар акционерлар галаси билан оғиз-бурун ўпишиб, юз йилдирки, фоҳишахона сатангларидек айш-ишрат қилиб юришибди. Ахир бу қанақа бедодликки, министрлар порахўрлик қилишлари, бадавлат жаноблар билан буржуйлар зиёфатлар бериб, ҳашаматли иссиқ уйларда семириб ётишлари учун эркакларнинг бутун бир авлоди — отадан тортиб болагача ер тубида — шахтада бўғилиб ётса! У шахтёрларнинг хасталиklarини яхши ўрганиб олгани учун камқонлик, ширинча, сил, кишини бўғадиган зикнафас, одамни фалаж қилиб қўядиган бод касалликларини бутун даҳшатли тафсилотлари билан санаб кетди. Бахтсиз кишилар машиналарга ем бўлишади, уларни мол подасидек посёлкаларга ҳайдайдилар, йирик ширкатлар секин-аста уларни домига тортиб, қулга айлантиришади, бутун бир миллат ишчиларни, миллион-миллион қўлларни кишанга солмоқчи бўладилар — буларнинг ҳаммаси қандайдир минггача текинхўрни деб қилинади. Лекин шахтёр энди илгаригидек нодон, ер тубида эзилиб ётаверадиган мол эмас. Шахталар қаърида гражданлар армияси, мўл-кўл уруғ уняптики, ажойиб бир кун келиб, ҳаммаси ер юзига ёриб чиқади. Ана ўшанда қирқ йил хизмат қилиб, кўмир кукуни туфлайдиган, кон захидан оёқлари шишиб кетган олтмиш яшар чолга бир юз эллик франк нафақа тайинлашга журъат эта-

диган инсофсиз билан гаплашиб қўямиз. Ҳа! Меҳнат капиталдан, номи бору ўзи йўқ худодан, ўзининг арши аълосида ўтириб олиб, камбағаллар қонини сўриб ётган, улар ҳисобига яшаб келаётган махлуқдан ҳисоб беришни талаб этади! Меҳнаткашлар ўша арши аълога боришади, гулхан шуъласи билан унинг афтини ёритадилар, ўша ярамас махлуқни, инсон зот-зурриётини қомига тортаётган ўша даҳшатли иблисни ўз қонига ботирадилар!

Эъён жимиб қолди, лекин унинг кўтарилган қўли ҳамон узоқдаги, аллақайдаги, уфқдаги душманга ишора қилиб турарди. Бу сафар оломон унинг гапига шундай ҳайқириб жавоб бердики, ҳатто Монсудагилар ҳам эшитишиб, Вандам томонга олазарак бўлишиб, нима бало, бирон ер катта ўпирилиб кетдими, дея хавотирга тушишди. Тунги қушлар ўрмон узра кўтарилиб, ёруғ, бепоеъ осмонда тарқалиб кетишди.

Эъён вақтни ўтказмай сўради:

— Уртоқлар, хўш, нима дейсизлар?.. Стачкани давом эттиришга розимисизлар?

— Ҳа! Ҳа!— деган ғазабнок садолар янгради.

— Қандай чора кўрмоқчисизлар?.. Мабодо эртага кўрқоқлар шахтага тушгудай бўлишса, мағлубиятимиз муқаррар бўлиб қолади.

— Кўрқоқларга ўлим!— деган хитоб довулдек гулдиради.

— Демак, сизлар уларни тартибга чақириб, уларга қасам ичганликларини эслатиб қўясизлар... Мана бундай қилиш мумкин: шахтага бориб, сотқинларга таъсир ўтказишларингиз, Ширкатга ҳаммамизнинг якдиллигимизни, ўлсак ўламиз-у, лекин ён бермаслигимизни исбот қилишларингиз мумкин.

— Тўғри! Қани, шахтага! Шахтага!

Эъён сўз олган замониёқ атрофини ўраб турган, ранглари ўчган, қаттиқ қичқираётган кишилар орасидан Катринани излади. Афтидан у йўқ бўлса керак. У нуқул Шавални кўрарди; ҳасаддан ич-этини еяётган Шаваль елкасини қисарди, афтини бужмайтириб, иржайрди, у мана шундай шуҳрат қозониш учун бор давлатини беришга тайёр эди.

— Уртоқлар, борди-ю, орамиздан жосуслар чиқиб қолса, эҳтиёт бўлсин, бари бир бизга маълум улар...

Ҳув анави ерда Вандам шахтёрларини кўряпман, улар ҳалиям ишни давом эттиришяпти...

— Сен менга шама қиялсанми? — сўради Шаваль ғўдайиб.

— Сенгами, бошқагами... Бас, ўзинг сўз очиб қолдингми, қорни тўқнинг қорни оч билан иши йўқ, деган гапни билишинг керак. Сен Жан-Бартда ишляпсан-ку...

— Қаёқда ишлайди... Унинг учун хотини ишлайди, гап бу ёқда, — деди кимдир гапни бўлиб пичинг билан. Шаваль қип-қизариб сўкинди.

— Жин урсин! Демак, ишлаш тақиқланаркан-да?

— Ҳа, — қичқирди Этьен, — ўртоқларинг умум манфаати деб муҳтожлик тортиб турган бир пайтда, фақат ўзингни ўйлашинг ва хўжайинларга қуллуқ қилишинг инсофдан эмас-да. Агар стачкамиз ялписига бўлганда, биз аллақачон ғалаба қилган бўлардик. Монсуда забастовка бўлиб турган бир пайтда Вандам шахтасига бирор одам тушишга журъат этармиди? Улканинг ҳамма ерида, бу ердагидек Денеленда ҳам иш тўхташи жуда зарур. Эшитяпсанми? Жан-Барт шахталаридагилар сотқин экан, у ердагиларнинг ҳаммаси сотқин!

Ғазабга тўлган оломон муштини дўлайтириб, Шавални ўраб олди, «Унга ўлим! Ўлим!» — деган садолар янгради. Унинг ранги бўздек оқариб кетди. Этьенни энгиш истаги туфайли унинг миясига бир фикр келди:

— Гапимга қулоқ солинглар! Эртага Жан-Бартга боринглар-да, ишлаш-ишламаслигимни ўзларинг кўринглар!.. Биз улар билан биргамиз, бориб шу гапни айт, деб мени юборишди. Утхоналарни ўчириш керак, машинистларни ҳам забастовка қилишга мажбур этиш керак! Майли, насослар ҳам тўхтатиб қўйилсин, қайтага яхши бўлади! Шахталарни сув босиб, ҳаммаси асфаласофилинга кетади.

Шавалнинг гапларига одамлар қўлларини силкитишди, у ҳатто Этьендан ҳам ўтиб кетди. Бирин-кетин тўнкага нотиқлар чиқишиб, ғала-говурда қўллари билан имо-ишоралар қилишар, даҳшатли таклифларни ўртага ташлашар эди. Ҳамма жазавага тушиб, мўъжизадан умидини узиб, уни ҳасёларида тасаввур этувчи сектантлардек типирчилаб қолганди. Қизил туман

— Яхши... қаррди, ёнғин ва қон қўмсаган, умум-
Денелар... — буюк тантана ҳақидаги орзулар би-
са ҳам... ар очликдан айланарди. Сокин ой ҳая-
... омонга ўз ёғдуларини аямай сочарди,
ўрмоннинг жимжит қўйнидан ўлимга чорловчи қич-
қириқ эшитиларди, фақат оёқ остидаги тузлаган йў-
синларгина гижирларди; азамат шамш... тар эса сут-
дек ойдинда ингичка қора шохларини кўкка чўзиб,
остларида ҳаяжонланиб турган камбағалларни пай-
қамаетгандек, дарду ҳасратларини эшитмаётгандек
эди.

Оломон аралашиб кетди; Маэ хоним эрининг ёнига
келиб қолди, иккови ҳам ойлаб йиғилиб қолган газаб-
нафрат таъсирида одатдаги андишани йиғиштириб
қўйди-да, ҳаддан ошиб, инженерларнинг бошини олиш
керак, дея бақираётган Левакнинг гапини маъқуллай-
верди. Пьеррон ғойиб бўлиб қолди. Улмас бобо билан
Мук бараварига қовушмаган ва газабли гапларни ай-
тишар, уларнинг гапларига ҳеч ким тушунмас эди.
Захария тентаклик қилиб, черковларни бузишни та-
лаб қиларди, Муке бўлса шовқин кучайсин, деб қў-
лидаги таёкни дўқиллатиб ерга урарди. Хотинлар жи-
гибийрон эди: Левакнинг хотини икки қўлини белига
тираб, нега куласан, дея қизи Филоменани қарғарди.
Мукетта бўлса жандармлар бирор ёққа жуфтагини
ростлаб қолса бўларди, дея қичқирарди; Ашаддий
кампир Лидияни корзинкасиз, салатсиз кўриб, шапа-
лоқ тортиб юборди ва гўё олдида турган хўжайинларни
саваламоқчи бўлгандек, қўлларини ҳар томонга сил-
китаверди. Бебер аллақайси ёрдамчи ишчидан Раснёр
хоним болалар Польшани ўғирлаб кетишганини кўр-
ганини билиб олибди, бу хабардан Жанлен бир лаҳза
саросимада қолди; шу учун бўлса керак, у қайтишида
қуённи секин «Авантаж» эшиги олдида қўйиб юбо-
ришга жазм қилди-да, пичоғини кўтариб, ялтироқ
тигини дабдаба билан ўйнатиб бақирди.

— Уртоқлар! Уртоқлар! — деди овози бўғилиб қол-
ган Этъен, узил-кесил келишиб олиш учун бир лаҳза
жим бўлишга даъват этиб.

Ниҳоят ҳамма унга қулоқ солди.

— Уртоқлар! Эртага эрталаб Жан-Бартга борамиз,
розимисизлар?

I

Эрталаб соат тўртларда ой ботиб, зим-зиё тун пардаси ҳаммаёқни чулғади.

Денеленлар ҳали ухлаб ётишганди. Эшик ва деразалари зич ёпилган кўҳна ғиштин уй қаровсиз улкан боғ этагида жимжит, мунгайиб турарди, унинг орқасида эса Жан-Барт шахтаси бошланарди. Уй орқасидан Вандамга олиб борадиган уч километрлик кам қатнов йўл бошланарди. Бу катта қишлоқ ўрмон орқасида бўлиб, кўринмасди.

Кун бўйи шахтада бўлиб, чарчаган Денелен деворга қараб хуррак отиб ётарди. Ногаҳон уни биров чақиргандек бўлди. У уйғониб, ҳақиқатан ҳам бировнинг овозини эшитди-да, деразани очишга югурди. Рўбарўсидаги боғда штейгерларидан бири турарди.

— Нима гап?— сўради Денелен.

— Шахтамизда исён кўтарилди, тақсир!.. Ишчиларнинг ярми ишламаймиз деяпти, бошқаларни ҳам шахтага туширишмаяпти.

Денелен нима гаплигини дарров пайқаб ололмади; уйқуси бузилганидан боши ғувилларди; худди музхонадан чиқаётгандек деразадан совуқ кириб, юзига урилди.

— Ундай бўлса, ишлашга мажбур қилинглр-да, жин урсин!— деди зарда билан.

— Бир соатдан бери аҳвол шу,— деди штейгер.— Биз сизни чақириб келишга қарор қилдик. Фақат сиз уларни инсофга келтира олсангиз керак.

— Яхши, бораман.

Денелен тез кийинди. У тамоман ўзига келган бўлса ҳам, ниҳоятда ҳаяжонланган эди. Уйни кўтариб кетса ҳам бўларди: хизматкорлар ҳам, чўрилар ҳам — ҳеч ким қимир этмасди. Лекин майдоннинг нариги томонидан ҳаяжонли овозлар эшитиларди, Денелен ташқарига чиққанида, эшик ланг очилиб, оппоқ пеньюарларини апил-тапил кийиб олишган иккала қизи кўринди: катта қизи Люси йигирма икки ёшда бўлиб, баланд бўйли, тўлагина, қорачадан келган; энди ўн тўққизга тўлган Жаннанинг эса сочлари сариқ бўлиб, мулоким, истараси иссиққина эди.

— Дада, нима бўлди?

— Айтарлик ҳеч нарса,— жавоб берди Денелен қизларини тинчитиш учун.— У ёқда бебошлар галва кўтаришибди шекилли. Бориб кўриб келаман.

Бироқ қизлари унамай, ҳеч бўлмаса иссиқ чой-пой ичиб кетинг, дея қўйишмади: йўқса касал бўлиб қайтасиз, ошқозонингизни чатоқлигини унутманг, дейишди.

Ота тез бормасам бўлмайти, дея қўнмади.

— Менга қаранг,— деди Жанна унинг бўйнига осилиб,— иккита бисквит билан бир рюмка ром ичиб кетасиз, бўлмаса, сиздан қолмайман, мени шу туришимда кўтариб олиб бориб, олиб келасиз.

Денелен, шу бисквитларинг томоғимдан ўтмаса, нима қилай, дея вайсаб, кўнишдан бошқа илож топмади. Лекин қизлари ёқилган шамларни тутиб, унинг олдида зинадан пастга туша бошлашганди. Улар пастда, емакхонада апил-тапил нонушта ҳозирлашга тушиб кетишди: биттаси рюмкага ром қўйса, иккинчиси бисквит олиб келиш учун буфетга югурди.

Оналаридан ёш қолган қизларни ота эркалатиб юборганди, қаровнинг мазаси бўлмаганидан улар анча ёмон тарбияланган эдилар. Катта қизи опера қўшиқчиси бўлишни орзу қилса, кичиги рассомчиликни жондилидан севарди, бунисининг диди ўткир бўлиб, бошқалар орасида ажралиб турарди. Ишлар чаппасига кетиб, уларни рўзгор тутиш йўлини ўзгартиришга мажбур этганида, ҳисоб-китобда қўлдан чиқаётган ҳар бир сантим кўзларини очиб қўйган олифта оймқизлар жуда уддабурон, тадбирли бекаларга айланишди қўйишди.

Энди улар ўзларининг тамтам санъаткорликларига қарамай, бошқарув жиловини қўлларида маҳкам туттишар, ҳар бир суни тежашар, мижозлар билан таллашиб-тортишишар, эски кийимларини қайта-қайта бичиб-тикиб кийшар ва шу йўл билан гарчи муҳтожлик кучайиб бораётган бўлса ҳам, рўзгорнинг саранжом-саришта, тўкин бўлишига эришган эдилар.

— Дада, ҳеч нима смаяпсиз-ку!— дея такрорлади Люси унинг ташвишга тушиб, тунд бўлиб ўтирганини пайқагач; Люси кўрқиб кетди.— Демак, жиддий эканда, а? Кўринишингиз шунчаликки... Бир оғиз айтсангиз бўлди, биз ҳеч қаёққа бормаймиз; ўша меҳмондорчилик бизсиз ҳам ўтар.

Люси эрталаб сайр қилгани боққа боришлари ҳақида гап очди. Энобо хоним извошда аввал Сесилни олгани Грегуарларникига кириб ўтиши, сўнг ҳаммалари биргалашиб, Маршьендаги пўлат қуйиш заводига жўнаш учун буларникига келиши керак эди. Директорнинг хотини нонуштага таклиф этганди. Устахоналарни, домна ва кокс печларини томоша қилиш учун бу жуда яхши баҳона эди.

— Албатта, қоламиз,— деди Жанна Люсининг гапини маъқуллаб.

Бироқ Денеленнинг жаҳли чиқди.

— Нимага? Сизларга айтяпман-ку, бу арзимаган гап деб... Мени хурсанд қиламан десаларинг, ўринларингга кириб ётинглар-у, яхшилаб ухлаб олинглар, келишиб олинганидек соат ўнга тайёр бўлиб туринглар.

У қизларини кучиб, шошилиб уйдан чиқди. У боғнинг музлаган еридан бораркан, этиги тўқ-тўқ қиларди; кейин қадам товуши узоқлашиб, сўнди.

Жанна ром шишасининг огзини ҳафсала билан беркитди, Люси бўлса, бисквитларни буфетга қўйиб, эшигини қулфлади. Хонадаги барча нарса гарчи саранжом-саришта бўлса ҳам, онда-сонда овқат ейиладиган емакхоналардагидек хунук кўринарди. Иккала қиз барвақт туришганидан фойдаланиб, кечқурун йиғиштирилмай қолган нарса йўқмикин, дея ҳаммаёқни қараб чиқишди. Мана эсда чиқиб қолган салфетка ивирсиб ётибди; оқсочни койиб қўйиш керак. Ниҳоят керак. Ниҳоят, улар юқорига, ўз хоналарига кўтарилишди.

Денелен энг яқин йўлдан, полиздаги тор сўқмоқдан борар эди. У мол-мулки омонат бўлиб қолгани, Монсу акцияларини сотиб юборгани, ўн баробар кўпайтиришни орзу қилиб, ишга туширган бир миллиони, ҳозир бу маблағнинг ишкали чиқиб тургани ҳақида ўйлаб борарди. Ишининг кетма-кет орқага кетиши, кўзда тутилмаган каттакон ремонт, эксплуатация қилишининг хонавайрон этувчи шарт-шароитлари, корхона энди даромад бера бошлаган бир вақтда рўй берган даҳшатли саноат кризиси... Забастовка ҳам бир бало бўлди. У кичкина эшикчани итарди; тун қоронғисида шахта иморатларининг қорайиб турган тарҳини зўр-базўр ажратиш мумкин эди, узоқда бир неча фонарь милтил-лаб кўринарди.

Жан-Бартни кўлами жиҳатидан Ворё шахтасига қиёслаб бўлмаса ҳам, иморатлари янгитдан қилингани учун инженерларнинг таъбирича, «чиройли» бўлиб қолганди. Шахта қудуғини бир ярим метр кенгайтириш, чуқурлигини эса етти юз саккиз метрга етказиш билан кифояланмасдан корxonани янгитдан ускуна-лашди, ишчилар тушиб-чиқиши учун янги машина, янги кажава ўрнатишди, асбоб-анжомларнинг ҳаммасини техниканинг энг янги ашёлари билан янгилашди. Иморатларда қатто баъзи зеб-зийнат ҳам пайдо бўлди: саралаш хонаси ўймакорлик нақшлари билан безатилди, минорага соат ўрнатилди, қабулхона билан машина бўлими худди Уйғониш даври услубидаги капелла сингари меҳробнамо қилиб ишланди. Бино тепасида юксалган улкан труба сирти айланаси қизил ва қора кошинлар билан безатилган эди. Сув насоси форақат сув чиқариб ташлашга мўлжалланган эски Гастон-Мари шахтасига яқин шахтага жойлаштирилганди. Жан-Бартда асосий шахтанинг ўнг чап томонида икки-тагина йўл бўлиб, бири вентиляция учун, иккинчиси пастга олиб тушадиган зина учун қилинганди.

Шаваль эрталаб соат учда биринчи бўлиб келди-да, ўртоқларини, келинлар, бизлар ҳам Монсу шахтёрларига ўхшаб, ҳар бир вагонетка учун беш сантимдан қўшиб беришларини талаб қиламиз, дея аврашга тушди. Кўп ўтмай шахтанинг энг тубида ишловчи юз киши қўлларини силкитишиб, бақиритиб, бараклардан кўмир қабул қилинадиган хонага келишди. Ишни да-

вом эттиришни хоҳловчилар эса яланг оёқ бўлиб, қўлтиқларига белкурак ёки чўкич қистириб, қўлларида лампочкаларини ушлаб туришарди; совуқ бўлгани учун бошмоқ ва пальто кийиб олган бошқа кўмирчилар эса шахта йўлини тўсиб олишганди. Штейгерлар бирор тартиб ўрнатиш учун хириллагунча қичқиришарди; улар ишчиларни инсофга чақиришар, жилла курса ишловчиларга халақит берманглар, дея илтижо қилишарди.

Катринанинг куртка, шим, кўк чепчик кийиб келганини кўрган Шаваль фиғони фалакка чиқиб кетди. Уйдаёқ у Катринага ўрнингдан турма, деб буюрганди. Иш тўхтаб қолишидан ваҳимага тушган Катрина унинг кетидан йўлга тушганди: Шаваль Катринага ҳеч қачон пул бермасди, кўпинча Катрина ўзи ва унинг учун тўлаб юборарди; агар ўзи ишлаб пул топмаса, ҳоли нима кечади? Бир даҳшатли фикр унинг хаёлидан нари кетмасди — бошпанасиз, ейишга нон тополмай қолган юккашларнинг қисматига учраб, Маршьенндаги фоҳишаҳонага тушиб қолишдан қўрқарди.

— Ҳой, жин ургур! — қичқирди Шаваль. — Бу ёққа нимага келдинг?

Катрина ғўлдираб, рентам йўқ эди, шунинг учун ишламоқчиман, деди.

— Э, сен, ойимча, ҳали менга қарши чиқмоқчимисан? Қани, ҳозироқ жўнаб қол, бўлмаса бошлаб кетингга тепаман!..

Қўрқиб кетган Катрина бир четга чиқиб, бу воқеалар нима билан тугагини кўриш ниятида бекиниб турди.

Депелен саралаш хонасига олиб чиқадиган зина томондан борди. Фонарларнинг нури хира бўлишига қарамай, у бир назар ташлашдаёқ бутун манзарани, қоронғиликда тўпланиб турган одамларнинг ҳаммасини кўрди; у ҳар бир кончини, ҳар бир юкчини, қабул қилувчини, ҳар бир юккашни, умуман ҳаммани, ҳатто ёрдамчи ишчиларни юзидан танирди.

Яп-янги, озода бош корпусда тўхтаб қолган иш қачон бошлашларига махтал эди; тўхтатиб қўйилган машинадан майин вишиллаб буг чиқиб турарди; ишчиларни пастга тушириш учун арқонларга осилган кажавалар қимир этмасди; чўян плиталар усти таш-

лаб кетилган вагонеткалар билан тўлганди. Бор-йўғи саксонта лампа олинганди, қолганлари лампахонада милтиллаб турибди. Лекин ишларнинг юришиб кетиши учун Денеленнинг бир оғиз сўзи кифоя эди.

— Нима бўляпти ўзи бу ерда, йигитлар? — сўради у бақириб.— Нимадан норозисизлар? Менга тушунтириб беринглар-чи, бир муросага келиб қолармиз.

Одатда Денелен ишчилар билан суҳбатлашганида гарчи уларнинг кўп ишлашини талаб қилса-да, оталардек меҳрибон бўлиб кетарди. Шижоатли, дағалроқ бўлса ҳам у аввало ҳарбийлар карнайидек гумбурлайдиган овозини мулойим қилиб, уларни эгиб олишга уринарди. Ишчилар уни севишар, айниқса мардлиги учун ҳурмат қилишарди: Денелем штольняларда ҳаммиса улар билан бирга бўлар, бахтсиз ҳодиса туфайли шахтада ваҳима кўтарилган пайтларда хавфли жойларга ўзи биринчи бўлиб борарди. Икки марта, — портлашдан кейин энг дадил кишилар ҳам юрак бетламай турганда, — уни қўлтиқларига арқон боғлаб шахтага туширишганди.

— Хўш, қалай? — деди у. — Сизлар кафил турганим учун пушаймон қилишимга йўл қўймайсизлар-а? Ўзларингиз биласизлар-ку, ахир мен жандармлар муҳофазасидан воз кечганман. Бафуржа гапиринглар! Қулоғим сизларда.

Ҳамма ундан сал ўзини тортиб, қимтиниб, жим бўлиб қолди. Ниҳоят Шаваль гап бошлади:

— Гап бундай, Денелен жаноблари, ҳар бир вагонеткага беш сантимдан қўшиб беришмаса, биз ишни давом эттира олмаймиз.

Денелен ажабланди.

— Нима-нима? Беш сантимдан? Бу талаб қаёқдан чиқди? Тиргакларни яхши қўймаётганларинг учун мен шикоят қилаётганим йўқ-ку!.. Мен Монсу маъмурия-тига ўхшаб янги тариф билан сизларни қийнаётганим йўқ-ку!..

— Балки шундайдир, лекин монсулик ўртоқлар ҳақ. Улар ҳақ тўлашнинг янги тарифини қабул қилмаяптилар ва ҳақни беш сантимга оширишни талаб қилаётирлар, чунки ҳозирги шароитларда ҳалол, пок ишлаш мумкин эмас... Шунинг учун биз беш сантим қўшишларингни талаб қиламиз... Ҳой, менга қаранглар, шундайми, ахир?

Тасдиқловчи садолар эшитилди, говур-гувур кучайди; катти-ҳаракатлар хавфли тус олди. Секин-аста ҳамма жифтлашиб, зич давра олди.

Денеленнинг кўзларида ўт чақнади, унинг мушти — каттиққўл бўлишни ҳаддан ташқари севадиган кишининг мушти — битта-яримтасини ёқасидан олмаслик учун беихтиёр тугилди. Бироқ у баҳслашишни, инсофга даъват этишни афзал кўрди.

— Сизларга беш сантим керакми? Боринг, иш шунчага арзийди ҳам дейлик. Лекин мен сизларга шунча тўлолмаймам-да. Агар мен шунчадан ҳақ берадиган бўлсам, уйимни тополмай қоламан... Тушунсаларингчи, ахир сизларнинг яшашларинг учун мен ҳам яшашим керак... Ортиғига қурбим етмайди: кўмир қазиб олиш таннархини зиғирча ҳам оширсам, хонавайрон бўламан... Икки йил бурун эсинглардами, охирги стачкаларингда мен шартларингга кўнгандим; у пайтда мумкин эди. Лекин ўша ҳақни оширганим мени роса чув туширди, мана ўшандан бери жоним ҳалак... Энди бўлса, бир ойдан кейин сизларга тўлаш учун қаёқдан пул топсам экан, деб бошимни қотириб юргандан кўра ҳозироқ дўконимни ёпиб қўя қолишга ҳам розиман.

Шаваль ўз ишларини шунчалик очиқ-ойдин айтган хўжайинининг афтига қараб, заҳархандалик билан кулиб юборди. Бошқаларнинг димоғи кўтарилди; қайсар, ҳадикчи кишиларга хўжайин ўз ишчилари орқасидан миллион-миллион су ишламаётганини тушунтириб, бўлармиди.

Шундан кейин Денелен каттиқроқ турди. У қоқилиб, ийиги чиқиб кетгудек бўлса, икки ямлаб ютишини пойлаб ётган Монсу билан доимо курашиб келаётганини тушунтиришга тушди. Бу даҳшатли рақобат уни тежамкор бўлишга мажбур қилади, устига-устак Жан-Барт шахтасининг анча чуқурликда бўлиши кўмир қазиб олиш учун бўладиган сарфларни кўпайтириб юборади; шарт-шароитлар ниҳоятда оғир, яхшиям кўмир қатлами қалинроқ, бўлмаса, расво бўларди-я! Уша охирги забастовкадан кейин Монсуга эргашиб иш тушиш зарурати бўлмаганида, ишчиларим кетиб қолмасин, деб қўрқмаганида, ўлса ҳам иш ҳақини оширмасди-я. Ҳозир бўлса-чи... эртанги кунларини ўзлари ўй-

лашсин! Хўш, у ҳамма нарсасини сотишга мажбур бўлиб, булар Правление исканжасига тушиб қолишса, нимага эришади? Ахир у арши аълода юргани йўқ-ку. Ахир у ишчиларни шилиш учун бошқарувчи сақлайдиган, бу ишчиларни умрида ўз кўзи билан кўрмайдиган акционерлардан ҳам эмас; у мол-мулкнигина эмас, буд-шудини, ақлу хушини, сиҳат-саломатлигини, ҳатто ҳаётини гаровга тиккан оддий бир хўжайин холос. Ишни тўхтатиш унинг учун ўлим билан баробар, чунки унинг запаслари йўқ, лекин буюртмани бари бир бажариши керак. Асбоб-ускунага сарфланган сармоя бекор туриши мумкинми ахир? Ахир у ўз устига мажбурият олган! Унинг дўстлари ишониб берган пулларни ким тўлайди? Бу синиб, хонавайрон бўлиш деган гап.

— Гап бундай, бўлмаса, дўстларим,— деди Денелен пировардида,— мен сизларни гапимга ишонтирмоқчийдим... Одам ўз оёғига болта урмайди, шундоқ эмасми? Сизларга беш сантимдан қўшиб бериш ёки забастовкаларингга индамай қараб туриш — ўзимни ўзим бўғизлашим билан баробар.

У жим бўлиб қолди. Шивир-шивир бошланди. Кўмир қазувчиларнинг бир қисми иккиланиб қолди. Баъзилар шахта томон юра бошлашди.

— Ҳар қалай,— деди штейгерлардан бири,— ҳамма ўз хоҳишига қараб иш кўриши мумкин. Ишлашни хоҳловчилар борми?

Катрина биринчилардан бири бўлиб келди. Лекин Шаваль қутуриб, уни итариб юбораркан, бақирди:

— Биз ҳаммамиз яктанмиз. Аблаҳларгина ўртоқларини ташлаб кетади!

Шу дақиқадан бошлаб мурасага келиш мумкин эмаслиги аён бўлди. Ғовур-ғувур яна кучайди. Кишиларни шахтадан муштлаб, туртиб чиқаришди, уларнинг оёқ остида қолиб кетишлари ҳеч гап эмасди. Директор жиғибийрон бўлиб, бир ўзи бу оломон билан курашишга, дўқ-пўниса билан эгиб олишга ҳаракат қилди, аммо уринишлари зое кетди ва у чекинишга мажбур бўлди.

Денелен яна бир неча минут қабулхонада қолди, ожизлигидан таассуфланиб, стулга ўтирди, калласига бирор фикр келмай бўғиларди. Ниҳоят у, эс-хушини

йигиб, назоратчилардан биттасига Шавални чақириб келишни буюрди. Шаваль келиб, уни тинглашга рози эканлигини айтгач, хўжайин, бошқаларга чиқиб ту-ринглар, деб ишора қилди.

— Бизни холи қўйинглар.

Денеленнинг миясига бу тирранча нима балони ўй-лаб юрибдийкин, бир билай-чи, деган фикр келди. Би-ринчи сўзлариданоқ Шавалнинг шуҳратпарастлигини, ҳасаддан ич-этини еяётганини сезиб олди. Денелен уни яхши гап билан қўлга олишга жазм этди-да, шундай қобилиятли ишчи ўз келажagini ўзи забун қилаётга-нига ҳайрон қолди. У анча вақтдан бери кўз остига олиб, уни бирон ишга кўтармоқчи бўлиб юрган экан. Пировардида Денелен уни бир неча муддатдан сўнг штейгер қилиб тайинлашини дангал айтди: Шаваль муштини қисиб, чурқ этмай тингларди, лекин секин-аста бармоқлари ёзилди унинг. Мияси говлаб кетди: агар у забастовка бўлишига зўр берса, жуда нари борганда Этьеннинг ёрдамчиси бўлади, бу ерда эса мут-лақо янги йўл очилапти: у бошлиқлар қаторига кириб олиши мумкин. У шуҳратпарастлиги васваса қилиб, уни маст этаётганини сездди. Бунинг устига у каллаи сахардан бери кутаётган забастовкачилар гуруҳи ҳали-ям келгани йўқ. Бирор нарса тўсқинлик қилган бўлса керак, балки, жандармлар ушлаб олишгандир; бўйсу-надиган пайт келди. Лекин у ҳамон бошини сарак-сарак қилиб, «йўқ» дейишда давом этар, ғазаб билан кўкрагига муштлаб, ўзини иродали киши қилиб кўрса-тишга уринарди. Ниҳоят Шаваль хўжайинига монсу-лик ўртоқлар билан учрашув ҳақида бир оғиз ҳам гапирмай, ўз одамларини тинчитишга ва шахтага ту-шишга кўндиришга ваъда берди.

Денелен турқини кўрсатмади, ҳатто штейгерлар ҳам панада туришди. Улар бир соат давомида қабулхона-даги вагонеткага чиқиб олиб, нутқ сўзлаб, баҳслаша-ётган Шавалнинг гапларини тинглаб туришди. Ишчи-ларнинг бир қисми унинг гапларига жавобан ҳуштак чалишди, бир юз йигирма киши унинг таклифларини қаттиқ қўллаб, тарқаб кетди. Соат еттидан ошди, очиқ, қувончли, совуқ кун бошланганди. Қўққисдан шахта яна ҳаракатга келди — тўхтаб қолган иш қайтадан бошланди. Бош дастак киргизилган машина валлар-

нинг арқонларини чуватиб, дириллаб кетди. Кейин сигнал кўнғироқлари чалиниб, ишчиларни пастга тушириш бошланди, кажавалар одамга тўлиб, кўздан ғойиб бўлар, яна кўринар эди, шахта ёрдамчи ишчилар, юккашлар ва қончиларнинг янги-янги гуруҳларини қомига тортар, қабул қилувчилар эса чўян плита ётқизилган ерда вагонеткаларни гумбурлатиб юргизардилар.

— Э, турқинг қурсин! Шамолда нима қилиб турибсан? — дея қичқирди Шаваль навбати келишини кутиб турган Катринага. — Туш! Дангасалик қиладиган пайт эмас!..

Эрталаб роса соат тўққизда Энбо хоним Сесиль билан извошда етиб келди. Жанна билан Люси кўйлаклари йиғирма мартадан қайта тикилган бўлишига қарамай, башанг кийинган эдилар. От миниб, хонимларга ҳамроҳ бўлиб келган Негрелни кўриб, Денелен ҳайрон бўлди. Ие, бундан чиқди, эркаклар ҳам таклиф этилган экан-да? Шунда Энбо хоним ҳомийлик қилаётган киши оҳангида, бу ерларда шубҳали одамлар кўпайиб кетгани ҳақида миш-мишлар тарқалгани учун кўрқиб, соқчи олиб олувдим, дея изоҳ берди. Негрель кулиб, хавотир олишнинг ҳожати йўқ, бу шунчаки бақироқларнинг дўқлари, уларнинг биттасиям деразангизга тош отмайди, дея таскин берди. Ҳамон ўз ғалабаси нашъасидан маст Денелен Жан-Бартдаги исёни қандай бостирганини гапириб берди. Энди у хотиржам. Хонимлар Вандам йўлида куннинг ажойиблигидан қувонишиб, извошга ўтиришган бир пайтда, ҳеч ким узоқда, посёлкаларда одамларнинг ташвиши ортиб, халқнинг кўзгалганини хаёлига ҳам келтирмаганди, агар ерга қулоқ тутиб кўрилса, оёқлар дупурини эшитиш мумкин эди.

— Жуда соз! Шундай қиламиз, — такрорлади Энбо хоним. — Кечкурун сиз ойимқизларни олиб келгани борасиз-да, бизникида овқатланасиз. Грегуар хоним ҳам Сесилни олиб келгани бораман, деб ваъда берган.

— Албатта бораман, — деди Денелен.

Извош Вандам томон ғизиллаб кетди. Жанна билан Люси яна бир марта извошдан бошларини чиқариб, йўл четида турган оталарига кулиб боқишди, Негрель бўлса, шундоқ извош ёнида йигитларга хос виқор билан гердайиб борарди.

Ўрмондан ўтиб, Вандамдан Маршьеннга элтадиган йўлга бурилишди. Тартарега яқинлашганда Жанна Энбо хонимдан, Яшил қияликни биласизми, деб сўради, лекин хоним бу ўлкага келганига беш йил бўлганига қарамай, у ерга бир марта ҳам бормаганини тан олди. Шунинг учун айланиб ўтадиган бўлишди. Тартаре ўрмон четида эди. Бу ер экин экилмайдиган, ҳосил битмайдиган, бир вақтларда вулқон отилган жой эди, у ернинг тубида, тунроқ остида кўмир қатламлари кўп асрлардан бери ёниб ётарди. Тартаре ҳақида қадимдан афсоналар тўқилганди; кўмир қазувчилар қизиқ-қизиқ воқеаларни сўзлашарди: юккашлар беҳаёлик билан дон олишиб ётишган пайтда ана шу Содом қаърига осмондан олов тушган экан; улар ҳатто чиқиб олишга ҳам улгуришмабди, ҳозиргача шу жаҳаннамда ёниб ётишганмиш. Қип-қизил чўғдек қоялар сачраган аччиқтошлардан ола-була эди. Ер ёриқларидан худди сариқ гулга ўхшаб олтингугурт кўринарди. Қоронғида ана шу ёриқларга қарашга журъат этган довюраклар қасам ичиб, у ерда гуноҳқорларнинг жони ёниб ётган алангани кўрдик, дейишарди. Ловиллаётган алангалар тили ер юзига чиқарди, иссиқ қўланса буғ паға-паға бўлиб кўтариларди, ифлос, машъум қўрхона эса тинимсиз бурқсигани бурқсиган эди. Худди абадий баҳор мўъжизасидаги каби мана шу машъум Тартаре ўртасидаги Яшил қиялик қад кўтарди — бу ерда ўтлоқ ҳамиша кўм-кўк бўлиб туради — шамшодлар доимо барг ёзиб, далалар йилига уч марта ҳосил беради. Ернинг чуқур қатламларида ёнаётган кўмир алангасидан қизийдиган бу жой табиий иссиқхона эди. Бу ерларда ҳеч қачон қор бўлмасди. Декабрнинг шу-кунида қип-яланғоч дарахтлар ёнидаги улкан, ям-яшил куша ҳатто япроқларининг учларига ҳам қиров инмай гуллаб турарди.

Извош текисликдан илдам борарди. Негрель, ривоятдан кулиб, шахта тагидаги олов кўмир кукунларининг бижишидан ҳосил бўлади, деб тушунтирди; уни босиб қўйилмаса, узлуксиз ёнаверади, деди. Сўнг Негрель Бельгиянинг бир шахтасидаги ўтти дарё оқимини ўша ёққа тўғрилаб ўчиришганини айтиб берди. Бирдан у жим бўлиб қолди. Извош бораётган йўлни ҳар минутда кўмирчилар тўда-тўда бўлиб кесиб ўтар-

ди. Улар ўзларини четга олишга мажбур этган бу басавлат кишиларга нигоҳ ташлаб, индамай ўтиб кетардилар. Улар тобора кўпаярди, отлар эса Скарп дарёсининг тор кўпригидан секин юришга мажбур бўлди. Нима бўляпти ўзи? Нега халқ кўққисдан йўлларда изғиб қолди? Хонимлар ваҳимага тушиб қолишди. Негрель бу бесаранжомлик замирида бир нохушлик борлигини сизди. Маршъеннга етишганда ҳамма енгил нафас олди. Домна ва кокс печларининг мўрконлари гўё офтобни тўсмоқчи бўлгандай, осмонга қурум бурқситарди; қурум эса туганмас қора ёмғирдек ёйилиб турарди.

II

Катрина смена алмашинишини кутиб, бир соатдан бери Жан-Бартда вагонеткасини у ёқдан-бу ёққа гилдиратарди; аъзойи баданидан шариллаб тер қуйилаётганидан у юзини артиш учун бир лаҳза тўхтади.

Штольня тубида ўртоқлари билан қатлам кўчираётган Шаваль гилдиракларнинг товуши эшитилмаётганига ҳайрон бўлди. Лампалар хира ёритарди, кўмир чангидан бирон нарсани кўриш амримаҳол эди.

— Яна нима гап у ёқда? — қичқирди Шаваль.

Катрина, юрагим ўйнаб, қинидан чиқиб кетай дегипти, сув бўлиб оқадиганга ўхшайман, деган эди, Шаваль ўшқирди:

— Тентак! Бизга ўхшаб кўйлагингни ечиб ташла!..

Бу ҳодиса Дезир тармоғидаги штольнянинг шимоллий қисмида, етти юз саккиз метр чуқурликда, кўмир ортиладиган жойдан уч километр нарида содир бўлаётганди. Бу жойнинг номини эшитган кўмирчиларнинг ранги ўчиб, гўё жаҳаннам ҳақида гапираётгандек, овозларини пасайтиришар, кўпинча шахтанинг чўғ бўлиб ётган қаъри ҳақида гапирмаслик учун бошларини сарак-сарак қилиб қўя қолардилар. Шимол томонда, Тартарега яқинлашган сари йўлаклар сиртқи жинсларни кўмирга айлантирган ер ости алангасига кириб борарди. Шу чоғ штольнядаги ҳарорат ўртача қирқ беш даража эди. Ер ёриқларидан олтингургурт буғлари билан аланга тиллари чиқаётган машъум жой худди шу ернинг ўзида эди. Ўткинчилар ана шуни кўрардилар.

Аллақачон куртқасини ечиб ташлаган Катрина ўй-ланиб турди-да, лозимини ҳам ечди; ичкўйлагини блуз-кага ўхшатиб белига боғлаб олганидан қўлу сонлари очилиб қолди-да, яна вагонетқасини гилдиратишга ту-тинди.

— Ҳар қалай енгил бўларкан-а,— деди у бақириб.

Катрина иссиқдангина эмас, балки қўрқувдан ҳам ҳарсилларди. Улар бу ерда беш кундан бери ишлаша-ётган бўлсалар ҳам, қиз нуқул болалигида эшитган эртақларни ўйларди; бу эртақлар қадим замонлардан буён ўз гуноҳлари учун Тартаре жаҳаннамиде жазо-сини тортиб, ёнаётган юккаш қиз-жувонлар ҳақида бў-либ, бу ҳақда ҳатто гапиришга ҳам қўрқишарди. Ал-батта, Катрина ҳнди улғайиб, бунақа бемаъни гапларга ишонмайдиган бўлиб қолганди; лекин шундай бўлса ҳам, бирдан девор орасидан кўзлари ёнаётган чалага ўхшаган, чўғ бўлиб кетган печка сингари қип-қизил қиз чиқиб қолса, нима қилади,а? Шу фикр миясига келиши биланоқ аъзойи баданидан тер шариллаб қуйиларди.

Штольнядан саксон метр наридаги бекатда вагонет-кани бошқа юккаш қабул қилиб олиб, қия штрекдан яна саксон метрга гилдиратиб борарди, у ерда қабул қилувчи тепадан тушаётган вагонетқалар билан бирга жўнатиб турарди.

— Боплабсан-ку! Жуда енгил бўлиб олибсан!—де-ди биргина ичкўйлақдаги Катринани кўрган ўттиз яшар ориққина бева хотин.— Мен бундай қилолмай-ман, ёрдамчи ишчилар тегишавериб безор қилади.

— Бўлмаса-чи!— жавоб берди қиз.— Эркақлар би-лан ишим нима!.. Иссиқдан ўзимни қаёққа уришимни билмаяпман-ку.

Катрина бўш вагонетқани келган изига судраб кет-ди. Ҳаммадан ёмони, Тартаренинг яқинлигидан ташқар-и, иссиқнинг чидаб бўлмас даражада бўлишига яна битта сабаб бор эди. Иш эски шахтага, жудаям чуқур, ташландиқ Гастон-Мари йўлагига шундоққина яқин келиб қолганди: бунда ўн йил бурун газ портлаб, тармоққа ўт кетганди, ҳалокатнинг йўлини тўсиш учун қилинган лой девор орқасида тармоқ ҳамон ёниб ётар-ди. Деворни доим тузатиб туриш лозим эди. Ҳаво

магани учун ўт ўчиши керак эди, аммо номаълум тоқлар уни ўчгани қўймай, ўн йилдан бери ёниб турарди, бундан девор шундай қизиқ кетгандики, ёнидан ўтаётганларга худди печкадан олов пуркаётгандек бўларди. Худди мана шу девор ёнгинасидан юз метрча жойга олтимиш даража иссиқда аравани гилдиратиб ўтиш керак эди.

Катрина икки марта бориб-келиб, яна бўғилиб кетди. Унинг бахтига, бу атрофдаги энг қалин қатлами Дезире тармоғининг штольняси кенг ва қулай эди. Қатлам қалинлиги қарийб икки метр бўлгани учун тик туриб ишлаш мумкин эди, лекин кўмир қазувчилар салқинроқ жойдаги энг оғир ишни афзал кўрардилар.

— Эй, менга қара! Ухлаб қолдингми, нима бало! — кўрслик билан қичқирди Шаваль Катринанинг қимирламаётганини сезиб. — Бу қирчангини менга ким раво кўрдийкин, а? Қани, вагонеткангни тезроқ ҳайда!

Катрина штольнянинг пастида белкуракка суялиб турарди. У ўзини тобора ёмон ҳис қилиб, ҳаммага лоқайдлик билан боқар, ҳеч нимани эшитмас эди. Кўмир қазувчилар лампочкаларнинг қизғиш нурида ҳайвонлардек қип-яланғоч бўлиб олиб ишлашарди. Улар тер ва кўмрдан шунчалик қоп-қора ва ифлос бўлиб кетгандиларки, уларнинг яланғочлиги қизни хижолат қилмасди. Бу оғир меҳнат, маймунникига ўхшаш умуртқаларнинг азоб чекиши, бўғиқ зарбалар, оҳ-воҳлар ичида зирқираб оғриётган, кўмир чангига беланган баданлар киши кўзи олдига дўзахни келтирарди. Ҳайтовур эркаклар Катринани бемалол кўришгани учун чўкич уришдан тўхтадилар; қиз иштонини ечганини аския қилишди.

— Эҳтиёт бўл, шамоллаб қолмагин тағин!

— Оёғи росаям зўр эканми? Ўзинг айта қол, Шаваль, икки кишигаям бўлади-я!

— Хўш, нима қипти! Кўриш керак! Қани, баландроқ кўтар-чи, яна баландроқ!

Шунда Шаваль ҳазил-мазах гаплардан жаҳли чиқмай, Катринага ёпишди:

— Нега қаққайиб қолдинг? Қўзгаласанми, йўқми, жин ургур?.. Ҳеч қандай шармандаликдан тоймайди-я... Қоққан қозикдек эрталабгача эшитиб тураверади.

Катрина бир азобда вагонеткага кўмир ташлай бошлади; кейин аравани итарди. Деворга суянай деса, йўлак жуда кенг эди; қизнинг яланг оёқлари зўр бериб темир йўл излари орасидан таянадиган жой қидирарди; у энгашиб, қўлларини чўзиб секин-аста олдинга силжирди. Катрина тупроқ девор ёнига келганида яна ўша азобга дучор бўлди; худди жалада қолгандек аъзойи баданидан йирик-йирик тер томчилари қуйилди. У бекаатгача бўлган йўлнинг бир қисмини амаллаб босиб ўтгунча шилтаю шалаббо бўлди, сочлари кўзини тўсиб, ҳаммаёғига кўмир қораси чаплашиб кетди. Тор ичкўйлаги худди сиёҳга ботириб олингандек, баданига ёпишди-ю, ҳаракатдан сонигача кўтарилиб қолди. Бу қизни шунчалик қийнаб юбордики, у яна тўхташга мажбур бўлди.

Унга нима бўлдийкин бугун? У худди ичига пахта тиқиб қўйилгандек ўзини сира бунчалик бўшашиб кетганини сезмаганди. Бу зарарли ҳаводан бўлса керак. Бу олис штольняга вентиляция етиб келмаганди. Ҳар хил буғлардан нафас олишга тўғри келади. Бу буғлар жиддираб оқаётган жилгадек майин вишиллаб, кўмир чангидан ажралиб чиқар, кўпинча ҳовур шунчалик кучли бурқсирдики, лампочкалар ўчиб қоларди; кон газига ишчилар эътибор бермай қўйишганди, чунки баъзан ҳафталаб димоғларига уриб турарди. Кўмирчилар «ўлик» ҳаво деб атайдиган бу зарарли газни яхши биларди: пастда оғир бўғувчи газлар, тепада эса ўз-ўзидан аланга олиб, худди яшиндек шахтанинг ерости қурилишларини, юзларча кишиларни яксон қиладиган енгил газ сузиб юрарди. Катрина ёшлигидан шу газларни шунчалик кўп ютган бўлса ҳам, ҳозир нима учун алланечук бўлиб кетаётганига, қулоқлари шанғиллаб, томоғи ачишаётганига тушунмасди.

Бу чинакам азоб эди. Оғриққа чидай олмаган Катрина ичкўйлагини ечиб ташлаш зарурлигини ҳис қилди: ичкўйлакнинг салгина буришган жойи ҳам баданига қаттиқ ботиб, куйдираётган эди. У ҳалиям бўш келмай, вагонеткани нарига ғилдиратишга уринди, лекин қаддини ростлаши зарур эди. Бекатта кийиниб олишга улгураман-ку, дея ўзини юпатиб, шоша-пиша ҳамма нарчасини: белидаги арқонни, ичкўйлагини ечиб ташлади; терисини ҳам шилиб ташлашга тайёр-

дай эди. Энди у қип-яланғоч, ифлос кўчаларда қўлингга қараб мўлтиллаб турган махлуқ ҳолига тушган, худди майиб қирчанғига ўхшаб, қурумдан қорайиб кетган лойқа қорнигача беланиб, эмаклаганча вагонеткани итариб борарди.

Шунда Катрина бутунлай умидсизликка тушди: яланғочлиги ҳам аҳволини енгиллаштирмади. Яна нимасини ечса экан? Қулоғи битиб, гаранг бўлиб қолди; бошини биров исканжа билан қисаётгандек эди. У тиз чўкиб қолди. Назарида вагонеткадаги кўмир бўлаклари орасида турган лампочка ўчиб қолаётгандай эди. Қизнинг хиралашиб қолган ақлига биргина фикр — чироқ пилигини кўтариш фикри келди. Катрина икки марта лампочкани кўздан кечириб қўйишга уринди, лекин ҳар сафар, қиз уни ерга қўйганида лампочка нури худди нафаси етмагандек хиралашиб қолди. Бирдан лампочка бутунлай ўчиб қолди. Шу он ҳаммаёқни қоронғилик босди, боши оғирлашиб ғувилларди, юраги увишиб, уришдан тўхтади, аъзойи баданини қаттиқ қорғинлик босиб, мудрата бошлади — Катрина бўғилиб ўлаётганини сезиб, энтикиб, юз тубан йиқилди.

— Аминманки, бу жин ургур бирон ерда салқинлаб ўтирибди! — деди шанғиллаб Шаваль.

У қулоқ солди, бироқ пастдан ғилдиракнинг тиқ этган товуши эшитилмасди.

— Эй! Катрина лаянати каламуш!

Унинг овози бўшликка сингиб кетди, жавобан бирор садо келмади.

— Қараб тур, яна ўзим бориб, танобингни тортиб қўймайин!

Яна ҳеч қандай жавоб йўқ, ҳамон тиқ этган товуш эшитилмасди. У қутуриб, лампочкаси билан пастга шундай югуриб тушдики, йўлда кўндаланг бўлиб ётган юккашга қоқилиб кетишига оз қолди. У ҳайрон бўлиб тўхтади. Бунга нима бўлдийкин? Устомонлик қилаётганга ўхшамайди. Йўқ, ухлаб олишга баҳона эмас бу. У лампочкани тутиб, қизнинг юзини ёритди, лекин у ўча бошлади. Йигит уни кўтариб олди, яна ерга қўйдида, ниҳоят билиб қолди: э, ҳа, газ билан захарланибди! У ғазабдан тушди, унда ўртоғи хавф-хатарда қолганини кўрган кўмирчига хос туйғу уйғонди; у энди, мена ичкўйлакни келтириб беринглар, деб қичқирди-да,

қип-яланғоч беҳуш қизни қўлида кўтариб, имкони борича уни баландроқ тутишга ҳаракат қилди. Елкасига кийим ташлаганларидан кейин, бир қўлида қизни, иккинчи қўлида иккала лампочкани ушлаганча чопиб кетди. Олдида чуқур йўлаклар чўзилиб кетар, гоҳ ўнга, гоҳ чапга бурилиб, ҳаётбахш жойга, вентилятор муздек ҳаво юбориб турган ерга тезроқ етиб олишга ошиқарди. У ниҳоят жинслар орасидан силқиб чиқаётган сувнинг шилдирашини эшитиб тўхтади. Бу ерда бир вақтлар Гастон-Мари тармоғига хизмат қилган катта йўлакнинг чорраҳаси бор эди. Бу жойда вентиляция гувиллаб ишлаётгани учун салқини шунчалик эдики, Шавалнинг эти жунжиб кетди. У маъшукасини ерга ўтқизди-да, уни тиргакка суяб қўйди; қиз ҳамон ҳушига келмас, кўзи аввалгидек юмуқ эди.

— Катрина! Ҳе, жин урсин, шунақаям бўларканми! Бу қанақа аҳмоқлик!.. Бир оз чидагин, қўйлагингни ҳўллаб олай.

Қизнинг ўзига келмаётгани Шавални қўрқитиб юборди. У мурданинг ўзи эди; ниҳолдек гавдаси, эндигина етила бошлаган ўсмирларникига ўхшаган жуссаси гўё ер бағрига кўмилгандек туюларди. Шундай бўлса ҳам у жилғада ичкўйлакни ҳўллаб, қизнинг юзини артди. Бирдан балоғатга етмай хазон бўлаётган маъсуманинг кўкраги, қорни, сони салгина титрагандек бўлди. Қиз кўзини очиб, шивирлади:

— Совуқ еб кетдим!..

— Э, бормисан! Худога шукур-эй! — енгил тортиб қичқирди Шаваль.

У чаққонлик билан қизнинг устига ичкўйлагини ташлаб кийинтирди, иштонини кийгизаркан, бир оз вайсади, чунки қизнинг ўзи кийиб олишга мутлақо қодир эмасди. Бўлиб ўтган воқеадан гангиб қолган Катрина ҳамон қаердалигини ҳам, нима учун қип-яланғочлигини ҳам тушуна олмасди. Эсига тушгач, қиз уялиб кетди. Ҳамма нарсасини ечиб ташлашга қандай журъат этдийкин-а! Қиз Шавалдан наҳотки мени яланғоч кўришган бўлишса, сонимга рўмол ҳам тутилмаганмиди, дея сўрай бошлади. У ҳар хил бўлмағур гапларни тўқиб, қатор бўлиб турган ўртоқларининг кўзи олдидан шундоқ кўтариб ўтдим, ўзинг ҳам жуда яхшисан-да, менинг гапимга кириб, нақ

орқангни кўз-кўз қилиб ўтдинг, дея мазах қилди. Кейин Шаваль, худо урсин агар, шундай чоғиб ўтдимки, биттасиям орқанг думалоқми, тўртбурчакми, билолмай қолди, дея қасам ичди.

— Э, сени қара-ю! Бу ерда совуқдан ўламан-ку,— деди Шаваль кийинаркан.

Шаваль ҳеч қачон қизга бунчалик илтифот қилмаган эди. Одатда Катрина Шавалнинг бир оғиз ширин сўзи учун бир талай сўкиш эшитарди. Қани энди, аҳил бўлиб яшашса қандай яхши-я! Ҳамон ўзига келолмаган Катрина йигитнинг мулойимликларидан эриб кетиб, жилмайди-да, пичирлаб:

— Мени ўп! — деди.

Шаваль уни ўпиб, ёнига чўзилди-да, қизнинг ўрнидан тура олишини кутди.

— Биласанми,— деди Катрина,— сен у ёқдан менга бекорга бақирдинг-да; тўғриси, ўшанда сира мадорим қолмаганди! Сенлар ишдаётган штольня унчалик иссиқ эмас; лекин у ер паст, дўзахнинг ўзи!..

— Ҳа, албатта-да! — деди у жавобан.— Дарахтлар таги яна ҳам яхши-я... Э, шўрликкинам-ей! Бу ер сенга қанчалик оғир эканини наҳотки билмасам!

Шавалнинг бу гапи уни шумчалик ийдириб юбордики, у анча дадилланиб қолди.

— Бугун мазам бўлмагани учун шундоқ бўлиб қолдим-да, ҳавоси заҳарли экан... Мана, кўрасан ҳали, мен каламуш эмасман! Ишлаш керак бўлганда, ишлайман: тўғри, а? Ишни ташлагандан кўра ўлишни афзал кўраман.

Орага сукунат чўкди. Шаваль бир қўли билан Катринанинг белгидан қучиб, шамоллаб қолмасин, дея кўксига босди. Гарчи Катрина қайтиб ишга боришга кучи етишини сезса ҳам, лекин ҳузур қилиб дам олгиси келди.

— Мен фақат бир нарсани истайман,— оҳистагина деди қиз,— менга меҳрибонроқ бўлсанг бас... Одамлар бир-бирларини салгина бўлса ҳам севишса қандоқ яхши.

Катрина шундай деди-ю, секингина йиғлаб юборди.

— Ахир мен сени севаман-ку! — хитоб қилди Шаваль.— Бўлмаса сени олиб нима қилардим?

Қиз бошини сарак-сарак қиларди холос. Кўпинча

эркаклар фақат ўз хирсларини қондириш учунгина хотин оладилар, уларнинг бахти ҳақида жуда кам қайғурадилар. Қани энди бошқа йигитга дуч келиб қолсам-у, у белимдан доимо қучиб юрса, ҳаётим қандай соз бўларди-я, деган фикр миясига келиши билан қайноқ кўз ёшлари шашқатор бўларди. Бошқа йигит? Ўша бошқа ёрнинг хира сиймоси ҳаяжонланган қизнинг хаёлида гавдаланди. Лекин у билан ора очиқ бўлган эди; энди умрининг охиригача манови билан яшаши керак, фақат кўп урмаса бас.

— Лоақал ҳар замонда ҳозирдагидек бўлишга ҳаракат қил!..

Йиғи унинг гапиришига халақит берарди. Шаваль яна уни қучоқлади.

— Вой тентаг-ей!.. Хўп, бўпти, қасам ичиб айтаманки, энди қўполлик қилмайман! Ахир бошқаларга қараганда раҳмдилман-ку!

Катрина кўз ёшларини оқизиб, унга жилмайиб қаради. Балки у ҳақдир; қани ўша бахтиёр аёллар? Катрина гарчи Шавалнинг қасамларига ишонмаса ҳам, ҳозир унинг шунчалик меҳрибонлигидан шодланарди. Э, худо! Қани энди доимо шунақа бўлса! Улар яна қучоқлашиб, бир-бирининг пинжига кирди, лекин яқинлашиб келаётган оёқ товушлари уларни дик этиб туришга мажбур этди. Шавалнинг Катринани кўтариб чошиб кетганини кўрган уч оғайниси уларга нима бўлганини билиш учун келишди.

Ҳаммалари биргалашиб орқага қайтишди. Эрталаб соат ўнга яқинлашиб қолганди. Яна штольняда тер тўкиш учун салқинроқ жойда нонушта қилишди. Улар кунлик нонларини еб, флягадаги қаҳвадан ичмоқчи бўлиб туришганида, ногаҳон олис йўллардан келган шовқинни эшитиб ташвишга тушиб қолишди. У ерда нима бўлдийкин ўзи? Балки яна бахтсиз ҳодиса юз бергандир? Улар сапчиб туриб, чошиб кетишди. Минут сайин олдиларидан қончилар, юккашлар, ёрдамчи ишчилар тўсиб чиқишаверди: ҳеч ким ҳеч нимани билмасди; ҳамма бақирарди; катта фалокат юз бергани аниқ эди. Сёкин-аста бутун шахта тўс-тўполон бўлиб кетди. Қоронғуликда аллақандай ҳовлиққан кўланкалар йўлаклардан югуриб чиқишар, лампочкалар ликиллар эди. Нима бўлдийкин? Нега ҳеч ким айтмайди?

Ногаҳон штейгерлардан бири:

— Арқонларни кесишяпти! Арқонларни кесишяпти! — деб қичкириб қолди.

Шундай кейин ҳамма чинакам ваҳимага тушди. Одамлар қоп-қоронғи йўлақлардан гуриллаб югура бошлашди. Ҳамма эс-ҳушини йўқотиб қўйганди. Нега арқонларни чопишади? Пастда одамлар бўлса, уларни ким чопади? Бу даҳшатли бир ҳол бўлиб туюлар эди.

Бошқа бир штейгернинг:

— Монсудан келиб, арқонларни кесишяпти! Ҳаммаларинг чиқинглар,— деган овози эшитилди, эшитилди-ю, тинди.

Шаваль нима бўлаётганини пайқаб, дарҳол Катринани тўхтатди. Тепада забастовкачиларга йўлиқаманда, деган фикр миясига келди-ю, оёқлари дармонсизланиб, чалишиб қолди. Демак, бу бебошлар тўдаси етиб келибди-да, Шаваль бўлса, улар жандармлар қўлида, деб ўйловди! У бир лаҳза орқага қайтиб, Гастон-Мари томондан ўтсаммикан, дея ўйлади; бироқ у ерда иш тўхтаганди. У сўкинар, иккиланиб тўхтаб қолар, қўрқувини яширишга уринар, бунақа қочиш бемаънилик-ку, дея гўлдирар эди. Уларни шахта қаърига ташлаб кетишармикин?..

Яна штейгернинг овози келди, бу сафар яқиндан эшитилди:

— Ҳамма юқорига! Нарвонлардан чиқинглар! Нарвонлардан!

Шавални ўртоқлари эргаштириб кетишди. У Катринани итарар, мунча имиллайсан, дея сўкиннар эди. Бу мегажин шу ерда қолиб, очликдан ўлмоқчи шекилли, а? Ахир монсулик қароқчилар одамларнинг чиқиб олишини кутиб ўтирмай, нарвонларни бузиб ташлашди-ку. Бу жирканч фикр ҳаммани батамом гаранг қилиб қўйди. Васвасага тушган одамлар нарвонга аввалроқ етиб келиш учун бир-бирини итариб-туртиб, жон ҳолатда йўлақлардан югуришарди. Ҳамма нарвон бузилган, ҳеч ким чиқиб кетолмайди, дея қичқирарди. Кўмир қазувчилар капалаклари учиб, юк ортиладиган жойга тўда-тўда бўлиб киришгач, чиндан ҳам бу ер тирбанд бўлиб кетди; улар бир-бирларини босиб-янчиб, ўзларини нарвонга олиб чиқадиган торгина эшикка уришди, отини шошмай оғилга етаклаб кетаётган кекса

отбоқар уларга жирканиб қараб-қараб қўярди: шахтада ухлашга ўрганиб қолганидан бари бир мени чиқариб олишади-ку, деб ишонарди.

— Жин ургур! Олдинга юр, деяпман сенга!— деди Шаваль Катринага.— Йиқилсанг, ушлаб қоламан.

Гангиб қолган, уч километр югуриб, қора терга ботган Катрина ҳарсиллаб, оломон ҳаракатига беихтиёр бўйсуниб бораверди. Шунда Шаваль кучи борича уни қўлидан торга бошлади. Қиз аянчли қичқириб юборди, кўзларидан ёш чиқиб кетди: нима, у қасамини унутдим? Йўқ! У ҳеч қачон бахтли бўлмайди.

— Ўт олдинга!— бўкирди Шаваль.

Лекин Катрина ундан жуда қўрқарди. Агар у олдинда борса, Шавал ҳамиша дағдаға қилади. Шунинг учун қиз тихирлик қиларди, бу орада эс-хушини йўқотган шахтёрлар оқими эса уларни четга чиқариб қўйди. Сизиб чиқаётган ер ости суви йирик-йирик томчилаб турарди; кўтарма машина хонасининг поли оломон тифизлигидан эгилиб, чуқурлиги ўн метр келадиган, оқова сувлар тўпланиб, балчиққа айланган ўра устида лопилларди. Худди мана шу ерда, Жан-Бартда икки йил бурун даҳшатли ҳалокат рўй берганди: арқон узилганди, кажава чуқур тубига учиб тушиб, икки киши чўкиб кетганди. Ҳамма шуни эслаб, борди-ю, тахталар дош беролмай синса, шу ерда қолиб кетамизми, деб ўйларди.

— Миясини еган аҳмоқ!— қичқирди Шаваль.— Ўлгинг келса, қолавер шу ерда! Ҳеч бўлмаса, сендан қутуламан-ку!

У олдинга ўтди, Катрина кетидан юрди.

Тепага ҳар бири етти метрча келадиган бир юзу икки нарвон билан чиқиларди; нарвоннинг ҳар бири кенглиги шахта стволи билан баробар торгина майдончага тираб қўйилганди: одамлар тўртбурчакли тешикдан зўрға ўтиб олишарди. Шахта стволи етти юз метрлик баланд ясси мўрконни эслатарди; қудуқ девори билан кўмир қазиб олинадиган бўлма ихотаси орасида ичакдай чўзилиб кетган йўлка бўлиб, нарвонлар деярли қия қўйилиб, бир-бирига мингашганди. Бундай улкан нарвондан кўтарилиш учун бақувват кишига ҳам йигирма беш минут вақт керак бўларди. Аслини олганда бу, ҳалокат юз бериб қолгудек бўлса, асқотадиган эҳтиёт йўли эди.

Катрина аввалига далил кўтарила борди. Унинг яланг оёқлари шахтанинг мустақкам бўлсин учун тўрт-бурчакли зиналарига тунука қопланган нарвонига ўрганиб қолганди; вагонеткани итаравериб, дағаллашиб кетган қўллари толмасдан йўғон панжарани ушлаб борарди. Кутилмаганда юқорига кўтарилиш ҳатто қизни қизиқтириб қайгули хаёллардан чалғитди. Уч кишидан бўлиб олган одамларнинг иланг-биланг колоннаси узундан-узоқ бўлиб, тўхтовсиз буралиб чиқиб турарди; колоннанинг боши ёруғликка чиққанида думи ҳали пастда, ўра устида эди. Ҳали ким чиқишга улгурмаганди, энг олдиндагилар ҳам энди йўлнинг учдан бирини ўтишганди. Ҳеч ким гапирмасди, фақат қадамларнинг бўғиқ шап-шупи эшитиларди; лампочкалар худди учаётган юлдузлар каби пастдан юқорига тик чизиқ бўйлаб милтиллаб кўринарди.

Катрина орқасидан келаётган ёрдамчи ишчининг нарвонни санаётганини эшитиб қолди. У ҳам санай бошлади. Ун беш нарвондан кейин кўтарма машина хонасига етишди. Лекин шу пайт қиз Шавалнинг оёғига қоқилиб кетди. У сўкиниб, анқайма, деб ўшқирди. Вақт-вақти билан бутун колонна тўхтаб қоларди. Нима гап? Нима бўлди? Ҳар бирининг товуши сўрашга-ю, кўрқувдан «тавба» дейишгагина ярарди холос. Ваҳима кучайди, айниқса пастдагиларнинг ўтакаси ёрилди; ёруғликка яқинлашилган сари тепада нима бўлаётганлигини билмаслик баттарроқ эзарди. Кимдир, нарвон бузиб ташланибди, яхшиси пастга тушиш керак, деб қолди. Айниқса ҳамма шундан кўрқарди,— улар ора йўлда қолиб кетишлари мумкин эди. Кончилардан биттаси нарвондан сирғаниб кетибди, деган бошқа бир хабар оғиздан-оғизга ўтди. Ҳеч ким ҳеч нимани билмасди: қичқириқлар гўнғиллаб эшитиларди. Шу ерда тунаб қолмасмиз ахир? Ниҳоят, ҳеч нарсани аниқлаша олмай, яна боягидай сўкин, оғир қадам ташлаб кўтарилаверишди; қадам товуши эшитилар, лампочкалар ликиллар эди. Афтидан, нарвонлар тепада бузилган бўлса керак.

Ўттиз иккинчи нарвонда, уч ярусни босиб ўтишганда Катрина оёқ-қўллари увушиб қолганини сизди. Аввалига бармоқларининг учлари игна санчилаётгандек жимирашди, мана энди у қўллари ҳам, оёқлари ҳам

темир билан ёгочни сезмаётганини пайқади. Кейин мускуллари жизиллаб кетди. У ўзидан кетиб қолай дерди; у Улмас бобонинг ўн ёшли қизлар четига панжара тутилмаган нарвонлардан кўмир ташиган замонлар ҳақидаги ҳикояларини эслади. Ушанда қизларнинг битта-яримтаси зинадан қуласа ёки корзинкадан кўмир тушиб кетса, уч-тўрт ўсмир пастга боши билан учиб кетаркан. У аъзойи баданининг қақшаб оғриётганига чидолмай қолди; йўқ, у охиригача ета олмайди.

Ҳар тўхташганида у нафасини ростлаб оларди, бироқ тепадан келаётган ваҳимали гаплар унинг дармонини қуритарди. Катринанинг тепасидагилар ҳам, пастдагилар ҳам оғир-оғир нафас олишарди, ниҳоясиз кўтарилишдан бош айланиш кучаярди, кўпларнинг қўнгли айнир эди. Қоронғиликдан карахт бўлиб, тўсиқлар деворига урилиб, абжағи чиқиб кетишидан қўрққан Катринанинг нафаси қайтиб кетаётганди. Гарчи ҳаммаёғидан йирик-йирик тер чиқаётган бўлса-да, у намликдан дағ-дағ титрарди. Халқ тепага етиб қолаёзди; ёмғир шундай қуярдики, лампочкаларни ўчириб қўйиб дерди.

Шаваль икки марта Катринага мурожаат қилди; аммо жавоб бўлмади. Катрина у ерда нима қилаётганикин? Балки тилдан қолгандир! Чиқяпман, деса бўлади-ку, ахир. Мана, ярим соатдан бери кўтарилиш-япти, аммо шунчалик секинки, эллик тўққизинчи нарвонга аранг етишди. Яна қирқ уч нарвон қолди. Ниҳоят Катрина мингиллаб, тузукман, деди. Борди-ю, чарчадим, деб нолиса, Шаваль, судралмай ўл, дея сўкарди. Зиналарнинг тунукаси оёғига шундай ботардики, гўё ҳатто суягини арралаётгандек эди. Қўллари қотиб, ҳаммаёғи моматалоқ бўлиб кетди. Катрина оёқлари, елкалари зил бўлиб кетганидан мана ҳозир қўлларим панжарани ушлашга ярамай қолади, деб қўрқарди. Худди юз тубан йиқилиб тушаётгандек бўлаверди. У, айниқса, тор, деярли тик нарвондан чиқишда жуда қийналарди; зинапояларга қони билан ёпишиб кўтарилишга тўғри келди.

Энди одамларнинг оғир-оғир ҳарсиллашларини оёқларнинг тап-тупи босиб кетди; қудуқ ихотасига урилиб қайтаётган даҳшатли хириллаш пастдан кўтарилиб, юқорида сўнарди. Инграган овоз эшитилди — аллақай-

си ёрдамчи ишчи майдонча қиррасига бошини уриб олиб ёрибди.

Катрина бўлса ҳамон кўтариларди. Яна бир ярусдан ўтишди. Ёмғир тинди. Туман ер ости ҳавосини баттар қуюқлаштирди. Эски темир билан ҳўл ёғоч ҳиди анқиб кетди. Қиз беихтиёр пичирлаб санагани санаган эди: саксон бир, саксон икки, саксон уч... яна ўнтўққизтаси бор. Рақамларни такрорлаши унга мадад берарди. Катрина шуурсиз ҳаракат қиларди. У кўзини очганда олдида лампочкалар ғалати бўлиб айланар эди. Катрина бадани қонга беланиб, ўлиб қолаётгандек бўлаверди; назарида салгина шабада ҳам уни итқитиб юборадигандек эди. Энг ёмони шу эдики, пастдагилар борган сари кучлироқ сиқишарди. Ғазабланган, чарчаган бутун колонна тезроқ қуёшни кўриш иштиёқида ёниб, тепага интиларди. Ниҳоят биринчи бўлиб нарвонга ёпишган ўртоқлар чиқиб олишди: демак, нарвон бузилмаган экан, бироқ бир фикр, бошқалар юқорига чиқиб, тоза ҳаводан нафас олишаётган бир пайтда, ҳар қалай нарвонларни бузиб, пастдагиларнинг чиқиб олишларига халал беришлари мумкин-ку, деган фикр қолганларни ақлдан оздираётган эди. Борди-ю, яна тўхтаб қолгудек бўлсалар, сўкиш бошланарди, ўзларининг чиқиб олишлари учун бир-бирини итариб-суриб, босиб-янчиб, олға интиларди.

Катрина йиқилди. У жонқолатда қичқириб, Шавални чақирди. У жавоб бермади: шу чоқ Шаваль ўзи тезроқ олдинга ўтиб олиш учун ўртоқларининг бири билан тепишаётганди. Катринани босиб-эзишди. Қиз ҳушини йўқотиб алаҳдай бошлади: хаёлида гўё қадимги замондаги кичкинагина юккашу худди тош тегиб, думалаб тушган чумчуқдек уни ҳам корзинкадан тўкилган бир кўмир ағдариб юборгандай, мана энди пастга, чоҳ тубига шитоб билан учиб бораётгандай эди. Бор-йўғи бешта нарвон қолди. Шунини босиб ўтишга бир соатча кетди. Аллакимларнинг елкалари орасида қисилган, икки ёнидан тор чоҳ деворлари тўсиб турган Катрина қандай қилиб кўққисдан ёруғликка чиқиб қолганини асло тушуна олмасди. Бирдан у ўзини қуёш чарақлаган ерда, ҳазил-мазах билан кутиб-олиб, ҳайқираётган оломон орасида кўрди.

Посёлка ишчилари эрта тонгданоқ ғазабдан дағ-дағ титрарди; бу қахру ғазаб кучайиб, бутун округ йўлларида борган сари кўпроқ тўлқинланиб борарди. Бироқ келишиб қўйилганидек забастовка амалға ошмайдиган бўлди: миш-мишларга қараганда, текисликда драгунлар билан жандармлар пайдо бўлганмиш. Айтишларича, улар Дуэдан кечаси келишибди. Раснёрни айблашарди: директор Энбони огоҳлантириб, ўртоқларини сотган шу эди. Юккаш аёллардан бири, директорнинг малайи телеграфга шошилинич телеграмма олиб борганини ўз кўзим билан кўрдим, деб қасам ичди. Кўмир қазувчилар муштларини тугиб, сал кўтарилган дарпардалар ортидан тонг ғира-ширасида ўтаётган солдатларга қараб туришарди.

Эрталаб соат етти яримда, қуёш чиққанда, энг бесабрларни ҳам дадиллантирадиган бошқа миш-миш тарқалди. Одамларнинг ташвиши беҳуда экан: генерал забастовка бошланиши Лилль префектининг қистовига кўра, одатдаги ҳарбий машқ-сайр уюштирибди. Забастовкачилар орага тушиб, сизларни Ширкат билан яраштириб қўяман, деб алдаган бу амалдорни ёмон кўришарди. У яраштириш ўрнига ишчиларни қўрқитиб қўйиш учун ҳафтада бир марта Монсуга қўшин юбориб турарди. Шундай қилиб, драгунлар билан жандармлар музлаган ерда от туёқларининг дуқури ишчиларнинг эсини чиқариб юборди, деб хурсанд бўлиб, Маршьенн йўлига бурилишганда, кўмир қазувчилар жиддий иш энди бошланганда содда префект ва унинг бу ердан кетиб қолган солдатлари устидан мириқиб кулишди.

Улар уйларидан чиқмай, узоқлашиб кетаётган сўнги жандармларнинг орқасидан қараб, соат тўққизларгача ҳузур қилишди. Бу вақтда Монсу буржуйлари болишларга кўмилиб, ўринларида тинчгина ухлашарди. Правленнедагилар Энбо хоним извошга тушиб жўнаб кетганини кўришди, эри уйда қолиб, ўз ишлари билан шуғулланди; қулфлоглик уй сув қуйгандек жимжит эди. Шундай хавфли фурсатда биронта ҳам шахтада ҳарбий соқчи йўқ-а; бу деярли доимо ҳалокатли воқеалар юз берадиган пайтларда йўл қўйилган

қалтис, аммо табиий нуқсон эди. Фактларни таҳлил қилиш лозим бўлганда ҳар сафар ҳукумат йўл қўйиб келган ўша хатолар яна такрорланганди. Соат тўққизга занг урди ва ниҳоят кўмир қазувчилар Вандам йўли билан ўрмонга жўнашди. Кеча шу ерга тўпланишга қарор қилинганди.

Этьен катта умид боғлаган ўша уч минг киши Жан-Бартга келмайди, деб ўйлаганди. Кўплар, намоиш қолдирилди, деб ўйлашганди, энг ёмони шу эдики, йўлда келаётган икки ёки уч гуруҳ кишилар, агар Этьен уларни учратиб, бошлаб келмаганида, иш-ни печева қилишлари мумкин эди. Сахарда кетганлар, — юзга яқин киши, — шамподзорга бекиниб, бошқаларни кутиши керак эди. Этьен маслаҳат сўраб, Суварин олдига кирганида, у елкасини қисиб қўя қолди. Унинг фикрича, ўнта ўктам йигит бирталай одамдан анча кўп иш қилади. У олдида турган китобни ўқишга тушиб кетди ва бу ишга қатнашишдан бутунлай бош тортди. Бу иш Монсуга ўт қўйиб юбориш зарур бўлиб турган бир пайтда яна одамларнинг ҳис-туйғусига боғлиқ бўлиб қолганди. Этьен уйдан чиқаётганида чўян печка ёнида ўтирган Раснёрга кўзи тушиб қолди. Раснёрнинг ранги бўздек оқариб кетганди. Доимо қора кийиб юрадиган хотинининг бўйи шу куни яна ҳам чўзилгандек эди; у ўткир, лекин мулоғим гаплар билан эрини ўйиб олаётганди.

Маэ, сўзнинг устидан чиқиш керак, деб ҳисобларди. Бундай йигин муқаддасдир. Лекин шу кеча, ҳатто энг ашаддий забастовкачилар ҳам ҳовурдан тушиб қолишди; бироқ у хавф борлигини пайқаса-да, ҳамма ўша ёқда бўлиши керак, ўртоқларнинг қонуний ҳуқуқларини ҳимоя қилиш лозим, бурч шуни тоқазо этади, деб тушунтирарди. Маэнинг хотини тасдиқлаб бош чайқарди. Этьен бировнинг ҳаётига қасд қилмасдан революциончасига ҳаракат қилиш лозимлигини ҳадеб таъкидларди. У уйдан чиқиб кетаркан, кеча беришган бир шиша қора арча ароғи билан бир парча нонни емайман, деди; аммо совуқ еб қолмай, деб кетма-кет уч стакан ароқ ичди; у ҳатто япалоқ идишни ароққа тўлдириб ҳам олди. Альзира уйда болаларга қараб қолди. Ўлмас бобо бўлса, кеча кўп йўл юрганида оёқлари оғриб қолиб, ўрнига ётишга мажбур бўлди.

Эҳтиёткорлик юзасидан бирга эмас, битта-битта тарқалишди. Жанлен аллақачон ғойиб бўлганди. Маэ хотини билан Монсу томон юрди, Этьен бўлса, ўртоқларига қўшилиб олиш учун ўрмонга жўнади. Йўлда у бир тўп хотинга етиб олди; улар орасидаги Ашаддий кампир билан Левакнинг хотинини дарров таниди; улар Мукетта олиб келиб берган каштанни ейишарди, қорнимиз қаппайсин, деб пўчоқ-мўчоғи билан ютишарди. Лекин ўрмонда ҳеч ким йўқ эди. Забастовкачилар Жан-Бартга ўтиб кетишганди. Этьен шошилиб, Левак ва бошқа юз чоқли шахтёр ҳовлига энди киришаётганда етиб келди. Кўмир қазувчилар ҳаммаёқдан келишарди; Маэлар катта йўлдан, хотинлар даладан кетаётганди; ҳамма худди қирғоқлардан тошиб, нишабликларда ёйилиб оқаётган дарёдек, раҳнамосиз, қуролсиз жўшиб борарди. Этьен кўприк панжарасига миниб олган Жанлейни кўриб қолди, болакай худди томошага келгандай ўтириб олганди. Этьен тезроқ юриб, олдин келган ўртоқлари билан бирга ичкарига кирди. Ҳаммалари кўпи билан уч юз кишига борарди.

Қабулхонага олиб чиқадиган нарвонда Денелени кўриб, қанг-манг бўлиб қолишди.

— Нима истайсизлар?— сўради у баланд товуш билан.

У қизлари жилмайиб ўтирган извош кетидан қараб турарди-да, юраги ғаш бўлиб шахтага қайтди. У ерда ҳамма нарса жойидагидек туюларди: ишчилар конга тушиб бўлишган, кўмир қазиб давом этапти. У хотиржам бўлиб, энди штейгер билан гаплашиб турувди ҳамки, бирдан забастовкачилар яқинлашиб келишаётганини айтиб қолишди. Денелен саралаш хонаси деразасига югуриб, ташқарига қаради-ю, тобора кўпайиб, қовлини тўлдириб юборган бу одамлар оқими олдига ўзининг ожизлигини тушунди. Ҳамма томони очиқ қурилишни қандай ҳимоя қилади? У атрофига зўр-базўр йигирматача ишчини йиға оларди холос. Ҳаммаси тамом бўлди.

— Нима демоқчисизлар ўзи?— такрорлади у қахру газабдан оқариб, юз берай деб турган фалокатни мардона қаршилаш учун бор кучини йиғиб.

Оломон шивир-шивирга тушиб қолди, аллақандай ҳаракатлар сезилди. Этьен олдинга чиқди.

— Денелен жаноблари, биз сизга бирон ёмонлик қилмаймиз, лекин иш ҳаммаёқда тўхтатилиши керак.

Денелен, эсингиз йўқ экан, деб унга эътироз билдирди.

— Наҳотки сизлар конимдаги ишни тўхтатиб, сизга яхшилик қиляпмиз, деб ўйласаларинг? Ахир бу мени орқамдан отиш билан баробар-ку... Ҳа! Менинг ишчиларим шахтада, улар у ердан чиқишмайди ёки аввал мени ўлдирасизлар!

Жаҳл билан айтилган бу сўзлар ҳаммани даргазаб қилди. Маэ муштрларини дўлайтириб, олдинга интилатётган Левакни босиб турди. Этьен революцион ҳаракатларнинг қонунийлигига Денеленни ишонтиришга уринарди. Лекин Денелен, яна меҳнат қилиш ҳуқуқи ҳам бор, дея эътироз билдирарди. Сирасини олганда, у бунақа икир-чикирларни муҳокама қилиб ўтиришга тоби йўқ, ўз конининг хўжайини бўлишни хоҳлайди, вассалом! У фақат бу ғаламислар тўдасини тарқатиб юбориш учун уч-тўрт жандарм йўқлигига афсусларди холос.

— Менинг хатом худди мана шунда, бу кўргиликка ўзим сабабчиман. Сиздақа безорилар билан фақат куч ишлатиб гаплашиш керак. Ҳукумат эса ён бериб, сизларни сотиб олиш мумкин, деб ўйлаяпти. Сизларни қуроллантириш биланоқ ундай ҳукуматнинг ўзини ҳам ағдариб ташлайсизлар.

Даг-даг қалтираётган Этьен ўзини зўр-базўр босиб турарди. У овозини пастлатиб деди:

— Сиздан илтимос, жаноби Денелен, ишчиларни юқорига олиб чиқиш ҳақида фармойиш берсангиз. Мен ўртоқларни тўхтатиб қолишга кафил бўлолмайман. Бахтсизликнинг олдини олиш учун вақт бор ҳали.

— Мени тинч қўйинглар. Мен сизни танимайман! Сизлар менинг шахтамда ишламайсизлар, сизлар билан гаплашадиган гапим ҳам йўқ. Фақат қароқчиларгина уйларни уриб кетиш учун қишлоқма-қишлоқ мана шунақа санқиб юришади.

Ғазабли кичқириқлар унинг овозини босиб кетди, айниқса хотинлар қаттиқроқ қаргашди. Лекин Денелен бўш келмади, амр этишга ўрганиб қолган бу одам қалбида йиғилиб қолган барча дард-аламларини очиқ-ойдин тўкиб солиб, қандайдир енгил тортгандек бўлди.

Модомики ҳар томонлама хонавайрон бўлар экан, бефойда қабихлик қилиш қўрқоқлик бўлади. Оломон эса ҳамон кўпайиб борар, дарвозага тикилиб келаётганлар беш юздан ортиқ эди. Денеленни бурда-бурда қилиб ташлашлари мумкин. Катта штейгер уни зўрлаб, орқага судради.

— Раҳм-шафқат қилинг, жаноб! Хунрезликнинг ҳиди келяпти. Арзимаган нарсаларни деб одамларни ўлдиришнинг нима кераги бор?

У қаршилиқ қиларди, эътироз билдирарди ва ниҳоят оломонга қараб дилидаги гапни қичқириб айтди:

— Газандалар тўдаси! Биз зўр чиққанзимизда кўрамиз, ўшанда нима дер экансизлар!

Уни олиб кетишди. Сур-сурда оломоннинг олдинги қаторлари зинага ёпирилиб, панжарани букиб ташлади. Ҳаммадан кўп хотинлар вайсаб, эркакларни гиж-гижлардилар. Эшик қулфланмасдан фақат зулфини суриб қўйилгани учун шу заҳоти очилиб кетди. Лекин зина жуда ҳам тор эди. Епирилган оломон зинага синмасди, кетинда турган забастовкачилар бошқа йўллардан кириш керак, деган фикрга келишди. Шунда улар ҳамма томондан: бараклардан, саралаш ҳонасидан, қозонхонадан ёпирилиб кира бошлашди. Беш минутга ҳам бормай улар шахтани эгаллашди; улар қаҳру ғазаб билан қичқиришиб, учала қаватда югуриб юришар, қаршилиқ кўрсатган хўжайин устидан қозонган ғалабаларини тантана қилишарди.

Маэ биринчилар қатори отилиб кирди. У қўрқиб кетганидан Этьенга деди:

— Уни ўлдирмаслик керак!

Этьен унинг кетидан югурди, аммо Денеленнинг штейгерлар хонасига кириб, бекиниб олганини фаҳмлади-да, деди:

— Борди-ю, ўлдирилса-чи? Бунга биз айбодорми? Ахир у бутунлай жинни бўлиб қолибди-ку.

Шунга қарамай Этьен ниҳоятда ҳаяжонланиб кетган, лекин ўзини вазмин тутиб, жўш ураётган ғазабини босарди. У омма мендек раҳнамога бўйсунмай, бебошлиқ қилади, халқ иродасини совуққонлик билан амалга оширмайди, дея кўнгли оғриб, эзиларди. У шундай бўлишини билганди. У осойишталикка даъват этар, бефойда вайронгарчилик фақат душманларимизга қўл келади, деб беҳуда бақирар эди.

— Қозонхонага! — шанғиллади Ашаддий кампир. — Оловларни ўчирамиз!

Левак топиб олган эговини ханжардек ўйнатди-да, даҳшатли товуши билан шовқинни босиб қичқирди:

— Арқонларни қирқамиз! Арқонларни қирқамиз!

Бу хитобни ҳамма такрорлади. Фақат гангиб қолган Этьен билан Маэ эътироз билдирарди, бироқ оломон шовқин-суронида уларнинг гапини ҳеч ким эшитмасди. Ниҳоят у:

— Ўртоқлар, ахир пастда одамлар қолган-ку, — дея олди.

Шовқин кучайди, ҳар томондан овозлар янгради:

— Баттар бўлишсин! Тушмасликлари керак эди!.. Улар хоин! Ҳа, ҳа, ўша ерда қолаверишсин!.. Бунинг устига уларнинг нарвонлари ҳам бор!

Нарвонлар ҳақидаги фикр уларнинг ўжарлигини баттар ошириб юборди. Этьен ён бериш кераклигини тушунди. Катта вайронгарчилик бўлишидан ҳадиксираб, жиллақурса кажавани кўтариб қолиш ниятида кўтарма машинага ёпишди, — ахир юқоридан арқонни эговлаб юборишса, пўлат арқонлар бутун оғирлиги билан тушиб, кажаваларни бир уюм пайрахага айлантиради-я! Машинист бир неча навбатчи ёрдамчилари билан ғойиб бўлганди. Этьен машина дастасини ушлаб, айлантира бошлади, Левак билан бошқа икки кўмир қазувчи эса шу чоқ ғилдиракка осилган арқонга чиқиб олишганди. Кажаваларнинг зулфинларини суриб, энди маҳкамлашган эди ҳамки, пўлатни арралаётган эговнинг хунук товуши эшитилди. Чуқур сукунат чўкди; бу товуш шахтани тутиб кетгандек бўлди; саросимага тушган одамлар бошларини кўтариб, қулоқ солиб қараб туришарди. Биринчи қаторда турган Маэ гўё лаънати чоҳнинг пўлат арқонини ғажийётган арра сингари, энди бу гурбатхонага ҳеч ким тушмайди, ҳамма умрбод умумий бахтсизликдан халос бўлади, дегандай, сиполик билан тишининг оқини кўрсатиб турарди.

Ашаддий кампир шанғиллаганча барак зинасида кўздан ғойиб бўлди.

— Қозонлар ёнига юринглар. Қозонлар ёнига! Ўтни ўчириглар!

Бошқа хотинлар унга эргашишди. Маэнинг хотини қозонхонани бузиб ташлашларига йўл қўймаслик учун

улар кетидан югурди; эри ҳам ўртоқларини ҳовурдан туширишга ҳаракат қилди. Маэ хоним бошқа аёлларга нисбатан ўзини вазмин тутди. Ўз ҳуқуқингга эга бўлиш учун кураш, майли, лекин вайрон қилишнинг нима кераги бор? У қозонхонага кирганида хотинлар икки гўлахни ҳайдаб чиқаришганди, Ашаддий кампир эса чўнқайиб, катта белкурак билан жонҳолатда ёниб бўлмаган кўмирларни сидириб, ердаги плиталар устига сочарди. Чала ёнган кўмирлар тутаб ётарди. Бу ерда беш генератор учун ўнта ўчоқ бор эди. Хотинхалаж жазаваси жўшиб, ўчоқларга ёпирилди. Левакнинг хотини белкуракни икки қўллаб ушлаб ишларди. Мукетта куймасин, деб юбкасини сонигача кўтариб қўйганди; терга ботган, жинлар базмидаги алвастилардай сочлар тўзиган хотинлар аланга шуъласида қонга белангандек кўринишарди. Кўмир уюлаверди, катта бинонинг шишти ўтнинг зўридан ёрила бошлади.

— Бўлди, бас! — қичқирди Маэ хоним. — Омборхонага ўт кетди.

— Яна яхши, — жавоб берди Ашаддий кампир. — Қиладиганимизни қилдик-ку... Ҳа, яшамагурлар! Эримни ўлдирганларинг учун хун тўлайсан, деб бекорга айтмовдим!

Шу он Жанленнинг чинқирган овози эшитилди:

— Тўхтанглар! Мен ҳозир ўчираман, буғини ўзим чиқараман!

Бола ана шу тўс-тўпслондан завқланиб кетиб, яна бирор ҳунар кўрсатишни ўйлади-да, оломон орасидан биринчилар қатори олдинга ўтиб олди. Унинг калласига кранларни бураб, ҳамма буғни чиқарсам, зўр бўлади, деган фикр келди. Буғ қалқаланиб, худди тўпдан отилган ўқдек чиқиб кетди; бешала қозон бир зумда бўрон нафасидек бўшаб қолди, унинг чинқиригидан қулоқлар қонаб кетди. Ҳаммаёқни буг босиб, кўмир оқ тусга кирди, хотинлар бўлса, қимирлаётган қингирқийшиқ сояларга ўхшарди. Фақат йўлак тепасидаги димоғи чоғ бола кўринарди; мен турғизган довулни кўриб қўйларинг, дегандек оғзи қулоғида эди!

Бу ҳол чорак соатча давом этди. Кўмир уюмига бир неча челақ сув сепишди, ёнғин хавфи бартараф бўлди, — лекин оломон ғазаби босилмади; аксинча, янада авжга чиқди: эркаклар болға топишди, хотинлар те-

мир-терсақлар билан қуролланишди; генераторни дабдала қилиш, машиналарни пачақлаш ва бутун шахтани вайрон этиш керак, деган қичқириқлар янгради.

Бу гаплардан хабар топган Этъен Маэ билан югуриб келди. Унинг ўзи ҳам қасос олиш иштиёқидан маст эди. Бироқ у ҳамон курашар, ҳаммани осойишталикка чақирарди. Ахир энди, пўлат арқонлар кесиб ташланган, оловлар ўчирилган ва қозонлар бўшаб қолган бир пайтда ҳеч қандай иш қилиб бўлмайди-ку. Унга ҳеч ким қулоқ солмасди,— ҳамма нарса унинг ихтиёридан ташқари бўлаётганди; лекин қўққисдан, ташқаридан қудуқдаги нарвонларга олиб тушадиган пастаккина эшик томондан дағдағали қичқириқлар эшитилди:

— Йўқолсин сотқинлар! Ҳа, қўрқоқлар, турқларинг курсин, ярамаслар! Йўқолинглар! Йўқолинглар!

Ишчиларнинг шахтадан чиқиши бошланди. Биринчи бўлиб ташқарига чиққанлар кун нуридан қамашган кўзларини пирпиратиб туришди-да, кейин йўлга чиқиб олиб, қочиб кетиш пайдан бўлишди.

— Пасткашлар йўқолсин! Алдоқчилар йўқолсин! Йўқолсин!

Забастовка қилган оломоннинг ҳаммаси югуриб келди. Уч минут ҳам ўтмай биноларда битта ҳам одам қолмади; монсулик беш юз ишчи шахтага тушишга журъат этган вандамлик сотқинларни саф орасидан ўтишга мажбур қилиш учун икки қатор бўлиб тизилди. Улар қудуқдан тўзиб, қоп-қорайиб, исқирт бўлиб чиқаётган ҳар бир кўмирчини ҳуштак чалиб: «Оббо сен-ей! Кимга тўю кимга аза экан-да! «Вулқон»ни гуллатадиган манови оймқизнинг бурнини еб қўйишибди-ку! Ановинисига қаранглар-а. Кўзидан оқаётган мум ўнта черковга етади! Анови тарашадай найновни қаранглар, арвоҳнинг ўзи-я!» — каби қалтис пичинглар билан кутиб олишарди. Гавдали, кўкраклари осилиб тушган, қорни катта, орқаси беҳад зўр юккаш кўринди; уни кўриб ҳамма хаҳолаб юборди. Ҳамма уни ушлаб кўргиси келарди; майнабозчиликлар авжга чиқиб, қаҳр-ғазабга айланди; яна бир лаҳзадан кейин калтак ейишлари турган гап эди, бадбахт, қалт-қалт титраётган, индамай ҳақоратга тоқат қилаётган, ҳашпаш дегунча дўппослаб қолишларини кутиб келаётган бечораларнинг кети узилмасди. Улар учун йўлга чиқиб олиб, қочиб кетишдан зўр бахт йўқ эди!

— Улар неча киши ўзи?— сўради Этьен.

Этьен уларнинг ҳамон чиқиб келишадиганидан ҳайрон эди. Штейгерлар қўрқитиб қўйган, очликдан бош эгишга мажбур бўлган ишчиларнинг бунчалик кўплиги Этьеннинг хунобини оширди. Демак, ўрмонда унга ёлгон гапиришган экан-да? Жан-Барт шахтасининг қарийб ҳаммаси ишга чиққан эди. У остонада Шавални кўриб қолиб олдинга интилди:

— Ҳа, иблис! Сен бизни шунақа йиғинга чақирган экансан-да, а?

Қаргишу сўкишлар ёғилиб кетди. Оломон сотқинга ташланишга тайёр эди. Бўлмаса-чи?! Ахир у кеча сизлар билан бирга бўламан, деб қасам ичиб, бугун ўзининг дили бир улфатлари билан бу ёқда юрибди-я! Бу — ўртоқларнинг юзига тупуриш-ку!

— Қудуққа! Қудуққа судранг уни!

Қўрқувдан сурати қолган Шаваль бир нима деб гўлдиради, тушунтирмақчи бўлди. Қутурган оломоннинг таъсири урган Этьен дарғазаб бўлиб, унинг сўзини бўлди:

— Биз билан бўлмақчи эдинг, бирга бўласан, искирт!

Одамларнинг шовқин-сурони унинг овозини босиб кетди. Катрина кўринди. Қуёш нуридан кўзлари қамашиб кетган қиз қаҳр-ғазабга тўлган ана шу одамлар ичида йиқилиб тушишдан қўрқарди. Бир юзу икки нарвондан кўтарилгани учун оёқлари майишиб кетарди, кафтлари қонаган, ўзи ҳарсилларди. Маэ хоним уни кўриши билан муштани дўлайтириб, унга қараб югурди.

— Ҳа, шарманда, сен ҳам ўшоғда экансан-да!.. Онанг очидан тиришиб ўлай деса-ю, сен ўша аблаҳингни деб ундан юз ўгирсанг!

Маэ хотинининг қўлидан тутиб қолди, шапалоқ туширишига йўл қўймади. Лекин у ҳам хотини сингари қизининг хулқидан ғазабланиб, Катринани силкиб ташлади. Ота-она жиғибийрон бўлиб, бири олиб, бири қўйиб таъна қилишар, ҳаммадан кўпроқ бақиршар эди.

Этьен Катринани кўриб, фиғони фалакка чиқди. У бетўхтов такрорларди:

— Олга! Бошқа шахталарга! Сен ҳам биз билан борасан, мочағар!

Шаваль баракдан ёғоч бошмогини олиб, қўлда тўқилган курткасини совуқ қотган елкасига ташлашга аранг улгурди. Уни судраб кетишди, ҳамма билан бирга югуришга тўғри келди. Гангиб қолган Катрина ҳам ёғоч бошмогини оёғига илиб, совуқда киядиган эски мардона куртканинг ёқа тугмаларини қадади-да, жазманининг кетидан югурди, у Шавални ўлдиришларига бутунлай ишониб, ундан қолишни истамади.

Икки-уч минут ичидаёқ Жан-Барт бўшади қолди. Жанлен аллақайдан карнайча топиб олди-да, гўё буқаларни чорлаётгандай, уни пуфлаб бўғиқ ватиллатаверди. Хотинлар — Ашаддий кампир, Левакнинг хотини, Мукетга — юбкаларини кўтариб чопишарди; Левак худди дўмбирачи чўпини ўйнатгандек болтани силкигарди. Уларга бошқа ўртоқлар ҳам қўшилиб, мингга етиб қолди, улар қирғоғидан тошган дарёдек далаларда ёйилиб, тартибсиз боришарди. Тўғри йўл жуда тор бўлганидан ихоталарни бузиб-янчишга тўғри келарди.

— Шахталарга! Йўқолсин сотқинлар! Ишни тўхта-тинглар!

Тўсатдан Жан-Барт сув қуйгандек бўлиб қолди. На жон зоти кўринарди, на товуш эшитиларди. Денелен штейгерлар хонасидан чиқиб, менга ҳамроҳ бўлманглар, дегандек ишора қилди-да, шахтага бир ўзи кетди. У ранги қув ўчган ва ниҳоятда хотиржам эди. У қудуқ олдида тўхтади, бошини кўтариб, кесилган пўлат арқонларга қаради; қирқилган пўлат арқонлар биланглаб осилиб турарди; арра тишлари теккан жойлар гўё янги ярадек қора мой орасидан йилтираб кўринарди. Кейин у машинага кўтарилди, шол бўлиб қолган аллақандай улкан гавданинг учига ўхшаш ҳаракатсиз дастакка қаради, совиб қолган металлни ушлаб кўрди-ю, худди муздек мурдага тегиб кетгандек сесканди; кейин қозонхонага тушди, ўти сўнган, дарз кетган, сув қуйилган ўчоқлар ёнидан шошмай ўтди, генераторларни тепган эди, жангиллаб кетди. Ҳа! Демак, тамом, бутунлай хонавайрон бўлибди! Борди-ю, арқонларни улатиб, ўт ёққанида ҳам қаёқдан одам топади? Забастовка яна икки ҳафта давом этса, бўлди, у бутунлай синади. Ҳар қалай, Денелен ўзининг шўри қуриб қолганлигини равшан англаса ҳам, монсулик қароқчилардан сира нафратланмасди: у бундай бўлишига ҳамманинг

жавобгарлигини, ўзи гуноҳкорлигини, умумий, асрий иллат сабаблигини ҳис қилди. Шубҳасиз, қўпол ва онгсиз одамлар; очликдан қирилиб кетишади бари бир.

IV

Оломон қировдан оқарган, қуёш хира ёритаётган яланг текисликдан ҳайқириб, бутун йўлни тўлдириб, лавлаги экилган далаларни тик кесиб, ёпирилиб борарди.

Ҳўкиз мўғиз деган жойдан ўтишгандан кейин Этьен ўзи йўл бошлади. У йўл-йўлакай фармойишлар берар, колоннани текислаб борарди. Олдинда Жанлен дик-дик сакраб, карнайини ғалати ғатиллатиб, югуриб борарди. Олдинги сафларда хотинлар боришарди, баъзилари калтак олиб олишганди; улар орасида гўё жаннатсимон адолат диёри рўпарасида аниқ кўринаётгандек кўзлари тиниб кетаётган Маэ хоним ҳам бор эди. Ашаддий кампир, Левакнинг хотини, Мукетта худди урушга кетаётган солдатлардек қадам ташлаб, жулдур кийимларини ҳилпиратиб боришарди. Нохуш учрашув юз бергудек бўлса, жандармлар хотинларга қараб ўқ узишга ботиниш-ботинмаслиги маълум бўлади. Тартибсиз оломон кетидан эркаклар келишяпти; кети тўзиб кетган колонна охирида узун-узун темирлар кўринади, Левак қўлидаги ягона болта қуёш нурида ялтиллади. Уртада Этьен борарди; у олдига Шавални солиб олиб, уни назардан қочирмасликка ҳаракат қиларди; ҳаммадан кейинда Маэ боряпти, у ўз жазманига яқинроқ бўлиш учун тихирлик қилиб эркаклар қаторига кириб олган Катринага хўмрайиб-хўмрайиб қараб қўярди. Катрина ишқилиб Шавални бир бало қилишмасайди, деб чўчирди. Бошлар яланг бўлганидан сочлар тутам-тутам бўлиб осилиб турарди. Жанлен карнайининг қулоқни қоматга келтирувчи садолари ичидан қўрадан чиқарилган поданинг тўп-тўпини эслатувчи ёғоч бошмоқларнинг тўқиллаши эшитиларди.

Яна қичқириқ эшитилди:

— Нон! Нон! Нон!

Туш бўлиб қолганди. Олти ҳафталик забастовкадан кейин очлик ўз кароматини кўрсатиб, очиқ далада

жаллослаб боришдан баттар қийнаб, ошқозонларни кемираётган эди. Мукетта эрталаб еган бир бурда нон билан бир неча каштан аллақачон эсдан чиқиб кетганди; очлик азоби оломонни сотқинларга нисбатан бадтар қутуртириб юборганди.

— Шахтага! Ишни тўхтатиш керак! Нон!

Посёлкада ўз улушини ейишдан воз кечган Этьен кўкраклари қапишиб кетаётганини ҳис қилди. У нолимасди, лекин совуқдан титраб, аҳён-аҳёнда беихтиёр флягасини оларди-да, уни оғзига тутарди; у шу қорарча ароги бўлмаса, конга етиб бора олмаслигини сезаётган эди. Унинг ёноқлари қизариб, кўзларида ўт чақнади. Лекин эс-ҳушини йўқотмай, ҳамон кераксиз вайронгарчиликларга йўл қўймасликка ҳаракат қиларди.

Жуазель йўлига чиқишганда хўжайинидан ўч олиш ниятида забастовкачиларга қўшилган кончилардан бири ўртоқларини ўннга бошлаб, қичқирди:

— Гастон-Марига борамиз! Сув чиқариб ташлайдиган насосни ёпамиз! Сув Жан-Бартни босиб кетсин!

Унинг гапига кирган оломон Этьеннинг насосни ўз ҳолига қўйинглар, деб илтижо қилишига қарамай, ўша ёққа қайилди. Йўлакларни бузишнинг нима кераги бор? У газабланганига қарамай, бу унинг жаҳлини, ишчининг жаҳлини чиқарган эди. Маэ ҳам қаҳру газабни машиналарга сочишни адолатсизлик деб биларди. Бироқ кончи бўш келмади, шунинг учун Этьен ундан ошириб, бақирди:

— Мируга! У ерда ҳали ҳам сотқинлар бор! Мируга! Мируга!

У ишора қилиб оломонни чапга буриб юборди. Жанлен колоннанинг олдига ўтиб олди-да, карнайчасини янада қаттиқроқ ғатиллатиб кетаверди. Бу сафар Гастон-Мари шахтаси сақлаб қолинди.

Забастовкачиларни Мирудан ажратиб турган тўрт километрлик масофа бепоён текисликдан ярим соатда қарийб чошиб ўтилди. Музлаган канал текисликнинг шу тсмонини узун ях лентадек кесиб ўтгайди. Канал бўйидаги қип-яланғоч дарахтлар қиров босганидан улкан шамдонга ўхшаб, уфқда осмон билан туташиб кетадиган денгиз каби текис водийнинг бир хил манзарасини бузиб турарди. Тепаликлар ортидан Маршьен билан Монсу кўзга кўринмасди, атрофда бепоён яланг-

лик ёстаниб ётарди. Забастовкачилар уларни саралаш хонасида кутиб турган штейгерни кўриб қолишди. Монсулик кекса штейгер, рангсиз, соч-соқоли оппоқ, Кандье бобони ҳамма жуда яхши биларди; у етмишга борган бўлса-да, ниҳоятда соғлом эди,— шахтёрлар орасида бунақаси жуда кам бўлади.

— Сизларга нима керак бу ерда, жин ургур, беҳаёллар!— қичқирди у.

Забастовкачилар тўхташди. Бу хўжайин эмас, балки ўртоқ бўлиб, кекса ишчига бўлган ҳурмат беихтиёр уларнинг шаштини қайтарди.

— Шахтада ишчилар бор экан, уларни чиқишга мажбур эт,— деди Этъен.

— Ҳа, у ерда одамлар бор,— жавоб берди Кандье,— олтмишга яқин киши, қолганлари сизлардан, сиз ишёқмаслардан қўрқди. Огоҳлантириб қўяйки, у ердан биттаси ҳам чиқмайди, нима гапларинг бўлса, мана мен билан гаплашинглар!

Шовқин-сурон кўтарилди, эркаклар бир-бирларини итаришиб, олдинга интилишди, хотин-халаж қисиб келаверди. Кўприкчадан лип этиб тушган штейгер эшикни тўсди.

Шунда Маэ гап бошлади.

— Менга қара, ҳей чол, бу ахир бизнинг ҳуқуқимиз-ку! Ўртоқларни бизга қўшилишга мажбур этолмасак, қанақасига умумий забастовка қиламиз?

Чол бир минутча жим қолди. Афтидан, у ҳам кончига ўхшаб бирдамликни яхши тушунмаса керак. Ниҳоят у жавоб берди:

— Ҳа, бу сизларнинг ҳуқуқларинг, бир нарса деб бўлмайди. Лекин менга буйруқ беришган, мен уни бажаришим керак-да. Мен бу ерда ёлғизман. Шахтёрлар шахтада соат учгача ишлашади, бинобарин улар учгача ўша ерда бўлишади.

Унинг сўнгги сўзларини ҳуштаклар босиб кетди. Кекса штейгерга мушт ўқталиб дўқ қилишди, хотинлар шангиллаб, қулогини қоматга келтиришди, уларнинг иссиқ нафаслари унинг юзига урилди. Лекин у қордек оппоқ бошини баланд кўтариб, кумушранг соқолини тикрайтириб қимирламай тураверди; дадиллиги кучига куч қўшди, шу боисдан шунчалик шовқин-сурон бўлишига қарамай, унинг овози баралла эшитилди:

— Жин ургурлар! Утиб бўпсанлар!.. Қуёшнинг чарақлаши қанчалик аниқ бўлса, бу гап шунчалик равшан. Ўлсам ўламанки, биттангни ҳам пўлат арқонларга йўлатмайман. Итаришиб-суқилавермаларинг, бўлмаса нақ кўзларинг олдида ўзимни шахтага ташлайман!

Оломон сесканиб, тисарилди. Чол гапида давом этди:

— Тушунмаслик учун ҳайвон бўлиш керак... Мен ҳам сизларга ўхшаган бир ишчиман. Мени қоровулликка қўйишган, шунинг учун қўриқлаб турибман.

Бошқа яна бирон нима дейишга Кандье бобонинг ақли етмади; узоқни ўйламайдиган, ярим аср қоронғи шахтада ишлаб, кўзлари хиралашиб, киртайиб қолган штейгер бурчимни бажаришим керак, вассалом, деб туриб олди. Ҳамкасблари кекса шахтёрга хавотирланиб тикилиб қолишди, унинг сўзлари ишчилар қалби қаърида хавфли лаҳзаларда уйғонадиган солдатларга хос итоаткорлик, биродарликка ва тақдирга тан бериш туйғусини қўзғатиб юборганди. Кандье забастовкачилар ҳамон иккиланиб туришибди, деб ўйлаб, яна такрорлади:

— Кўзларинг олдида ўзимни пастга ташлайман!

Худди оломонни қуюн кўтаргандек, забастовкачилар орқаларига бурилиб, яна тўғри йўлдан, бепоён далалардан йўртиб кетишди. Яна:

— Мадленага юр! Кручинага юр! Иш тўхтатилсин! Нон! Нон!— деган хитоблар эшитилди.

Колонна ўртасида қандайдир саросималик юз берди. Вақтдан фойдаланиб, Шаваль жуфтакни уриб қолмоқчи бўлган экан. Этьен уни қўлидан ушлаб олиб, агар яна бирор хоинликни ўйлаган бўлсанг, жиғингни эзиб қўяман, деб пўписа қиларди. У бўлса, жонжаҳди билан ўзини ҳар қаёққа ташлаб:

— Нима кераги бор бу гапларнинг? Ахир ҳар ким хоҳлаганини қилолмайдимми?.. Бир соатдан бери музлаб юрибман, ювиниб олишим керак. Қўйвор мени!— деди.

Ҳақиқатан ҳам кўмир чанги терга қоришиб, бада-нига ёпишганди, фуфайкаси иситмасди.

— Биз билан бирга югур, бўлмаса, ўзимиз ювинтириб қўямиз,— жавоб берди Этьен.— Мақтанишни, қон талаб қилишни сенга ким қўйибди.

Забастовкачилар тўхтамай чопишарди; Этьен ўзини яхши тутиб келаётган Катринага ўгирилди. Катринанинг шу ердалиги, анови билан ёнма-ёнлиги, эски эркакча куртка, жулдур шимда совуқ еб, аянчли бир ҳолда юришидан Этьеннинг жаҳли чиқарди. Афтидан, қиз ўлгудек чарчагану, лекин ҳар қалай чопишда давом этарди.

— Кетишинг мумкин, — деди у ниҳоят.

Катрина эшитмади шекилли. Унинг кўзи Этьеннинг кўзига тушганида қиз нигоҳида гина ифодаси бор эди. Шу боисдан Катрина тўхтамай чопарди. Нега Этьен эримни ташлаб кетишимни истайди? Шаваль, албатта, унга ёмон муносабатда бўлади, ҳатто уради ҳам. Лекин нима бўлса ҳам у эрим, қизлигимни олган ҳам ўша-да; минглаб одамларнинг битта ўшани ёмон кўриши Катринанинг жаҳлини чиқарарди. У ҳатто севмаса ҳам лоақал нафсоният учун уни ҳимоя қиларди.

— Йўқол! — ғазаб билан такрорлади Маэ.

Отанинг ўшқириниши бир лаҳза қизни шаштидан қайтарди: У қалтирарди, кўзларига ёш келди. Кейин кўрққанига қарамасдан, чопиб жойига келди, шундан сўнг уни ўз ҳолига қўйишди.

Забастовкачилар Жуазель йўлидан ўтишди, Крон томон юришди, сўнг Куньига кўтарилишди. Шу ёқдан текис уфқда завод трубалари кўриниб турарди, йўл бўйлаб ёғоч бостирмалар, кенг деразаларини чанг босган гиштин устахоналар чўзилиб кетганди. Биринкетин икки посёлкадан ўтишди, уйлари пастак-пастак Юз саксон ва Етмиш олти посёлкалари ортда қолди; ҳар сафар карнайча ғат-ғатлаганда, даъват овозлари янграганда, бутун-бутун оилалар — эркаклар, хотинлар, ҳатто болалар уйларидан югуриб чиқиб, ўртоқларга қўшилишарди. Мадленага яқинлашганларида забастовкачиларнинг сони бир ярим мингга етганди. Йўл шахтага нишаб бўлиб тушарди, забастовкачилар оқими шахта ҳовлисига ёйилишдан олдин кўмир уюмини айланиб ўтиши лозим эди.

Соат ҳали икки бўлмаганди. Бироқ огоҳлантирилган штейгерлар одамларни юқорига чиқариш учун шошилишди; забастовкачилар етиб келишганда, ишчилар кетиб бўлишган, пастда йигирма чоқли одам қолган-

ди, — улар ҳам апил-тапил ~~ва~~ жавалардан тушиб, қочиб кетишди; орқаларидан тош отилди. Иккитасини роса дўппослашди, учинчисининг курткаси енгини узиб олишди. Улар одамларга ёпишганларидан асбоб-ускуналар омон қолди, ҳеч ким пўлат арқонларга ҳам, қозонларга ҳам тегмади. Оқим энди ундан нарига, қўшни шахтага ошиққанди.

Кручина Мадленадан беш юз метр нарида эди. Забастовкачилар бу ерга ҳам шахтёрлар тарқалишаётганда етиб келишди. Хотинлар лозими бутунлай дабдала бўлган юккаш аёллардан бирини тутиб олишиб, ҳахолашаётган эркаклар кўзи олдида уриб кетишди. Ёрдамчи ишчиларга шапалоқ тортишди; ҳаммаёқлари мўматалоқ бўлиб кетган, бурунлари қонга бўялган кончилар қочиб қутулишди. Бостириб келганларнинг газаби жўшди, уларнинг яллиғланган мияларини кўпдан бери интиқом олиш фикри ловиллатарди, шунинг учун хоинларга ўлим тилашар, кам ҳақ тўланадиган ишни ўлгудек ёмон кўришар, уларнинг оч қоринлари нон талаб қилар эди; мана, қутурган кишилар бақириб-чақириб, пўлат арқонларни кесиб ташлашга ёпишди; бироқ эгов ўтмасди, кўп овора бўлишга тўғри келганидан ҳозир оломон жонҳолатда олға, нуқул олға қараб чопарди. Улар қозонлардан бирининг кранини синдиришди; ўчоққа сув тошиб кетгани учун чўян панжара ёрилиб кетди.

Ҳовлида Сен-Тома шахтасини ҳужум билан ишғол қилиш тўғрисида маслаҳатлашишди. У ерда қаттиқ интизом ўрнатилган бўлиб, бу шахта забастовка нима-лигини билмасди. Бу ерда етти юз киши ишларди, — бу ҳол айниқса забастовкачиларнинг жаҳлини чиқарарди: иш ташлаганлар сафларини жуфтлаб боришадди, ана ўшанда ким зўрлиги маълум бўлади. Лекин Сен-Томада жандармлар бор эмиш, деган хабар тарқалди. Эрталаб ана шу жандармлар устидан кулишганди. Бу миш-мишни ким тарқатгани маълум эмас, лекин бари бир эмасми? Ҳамма ваҳимага тушди, шунинг учун улар Фетри-Кантель томон йўл олишга қарор қилишди. Яна забастовкачиларнинг жазавалари тутиб қолди, шундан кейин ҳамма ёғоч бошмоқларини дўқиллатиб йўлга чиқишди ва: «Фетри-Кантелга, Фетри-Кантелга! У ерда ҳам қўрқоқлардан тўрт юзтача чи-

қади, роса қиёмат бўлади-да!» — дея қичқиришиб равона бўлишди.

Шахта Скарп тепалиги ортида, уч километрча нарида эди. Забастовкачилар колоннаси Боньи йўлини айланиб ўтиб, Платриер тепалигига чиқинган эди ҳамки, аллаким, эҳтимол, у ерда, Фетри-Кантель шахтасида драгунлар бордир, деб қолди. Шундан кейин ҳамма драгунлар худди ўша ерда, дея такрорлайверди. Забастовкачилар иккиланиб, қадамларини секинлатишди; ана шу ишчи халқи асрлар мобайнида меҳнат қилиб келган, забастовка туфайли сув қўйгандек бўлиб қолган бу ўлкани секин-аста ваҳима боса бошлади. Нима учун улар шу чоққача солдатларга дуч келишмади? Айниқса уларни жазога йўлиқмай бемалол юришлари хижолат қилаётган эди, ахир жазога гирифтор бўлишлари муқаррар-ку.

Қаёқдан чиққани маълум бўлмаган буйруқ оломони бошқа шахтага бошлади:

— Ғалаба шахтасига! Ғалаба шахтасига!

Демак, Ғалаба шахтасида драгунлар ҳам, жандармлар ҳам йўқ экан-да? Ҳеч ким ҳеч нимани билмасди. Забастовкачилар гўё тинчигандек эди. Улар орқага қайтиб, Бомонга борадиган йўлни қўйишди-да, далаларни кесиб, Жуазель томон юришди. Йўлни темир йўл полотноси тўсиб турарди, улар тўсиқдан ўтаётиб, айриларни ағдариб ташлашди-да, ундан у ёғига кетишди.

Энди улар Монсуга яқинлашиб қолишди; ўнқирчўнқир ерлар пастга қараб кета бошлади, лавлаги экиладиган далалар денгизи кенгайиб, узоқларга, Маршьеннинг қорайиб кўринаётган уйларига қараб кетган эди.

Ғалаба шахтасигача беш километрча бўлиб, жўшиб кетган забастовкачилар оёқлари қонаб, дабдала бўлганига қарамай, шу масофани тез босиб ўтишди-ю, ҳатто чарчаганларини ҳам сезишмади. Колонна тобора кўпаяверди, йўл-йўлакай посёлкалардан ўртоқлар қўшилаверди. Каналнинг Магаш кўпригидан ўтиб, шахтага яқинлашишганда камида икки мингтача киши бор эди. Лекин соат уч бўлгани учун Ғалаба шахтёрлари битта ҳам қолмай тарқаб кетишганди. Ҳафсаласи пир бўлган оломон аламини сўкишдан олди, аммо ўз сме-насига қайтиб келган ер қазувчилар балога қолишди,

забастовкачилар уларни ғишт парчаларини отиб, кутиб олишди. Ер қазувчилар оёқларини қўлларига олиб қочиб қолишди. Бўм-бўш шахта забастовкачилар қўлига ўтди, улар биронта ҳам хоиннинг тумшугига тушира олмаганликларидан жуноб эдилар. Шундан кейин улар асбоб-ускуналарга ташланишди. Қаҳру ғазаб чипқони секин-аста пишиб, ниҳоят ёрилиши керак эди; ҳисобсиз очлик йиллари уларда калтаклаш ва вайрон қилиб хумордан чиқиш истагини туғдирган эди.

Эъён бостирма остида икки ғилдиракли аравага кўмир ортаётган юкчиларни кўриб қолди.

— Қани, бу ердан жўнаб қолинглар-чи! — кичқирди у.— Бир бўлак ҳам кўмирни олиб кетишларингга йўл қўймаймиз!

Унинг ҳайқиригига юэлаб забастовкачилар югуриб келишди, юкловчилар зўрға қочиб қолишди. Баъзилари отни аравадан чиқариб, қамчи уришди, чўчиган отлар ҳар томонга қочиб кетди, бошқалари бўлса аравани ағдаришиб, шотини синдиришди.

Левак болтани гупиллатиб уриб, кўприкни бузиш учун эшакларни чопа бошлади, аммо эшаклар чопилавермағач, темир изларни олиб ташлаб, темир йўл полотносини бузишга киришди. Кўп ўтмай бошқа забастовкачилар ҳам ишга тушиб кетишди. Қўлидаги чорқирра темир таёқни дастак қилиб ишлатиб келаётган Маэ чўян болишларни кўчира бошлади. Шу чоқ Ашаддий кампир лампахонага хотинларни бошлаб кирди, шу заҳоти ҳаммаёқ шиша синиқлари билан тўлди. Маэ хоним ҳам Левакнинг хотинидан қолишмай, жон-жаҳди билан синдиради. Ҳаммаёққа лампа мой тўкилиб кетди. Мукетта қўлини юбкасига артди, шунчалик мойга беланганига кулгиси қистарди. Жанлен қизиқчилик қилиб, лампадаги мойни унинг бўйнидан ичига қўйиб юборди.

Лекин жонсиз нарсалардан ўч олингани ҳеч кимни тўйдирмади, бўш қоринлар эса бадтарроқ қулдурарди, яна қаттиқ фарёд кўтарилди:

— Нон! Нон! Нон!

Собиқ штейгерлардан бири Ғалаба шахтасида озиқ-овқат дўкончаси очганди. Афтидан, у кўрқиб дўконини ташлаб қочган эди. Хотинлар лампахонадан келишиб, эркаклар темир йўл полотносини дабдала қилиб

қайтганларидан кейин ҳамма дўконга ёпишди-да, бирпасда дераза ва эшик қопқоқларини бузишди. У ердан нон йўқ экан, икки бўлак хом гўшт билан бир қоп картошка бор экан холос. Кейин кўмиб қўйилган эллик шишача қораарча ароғини топиб олишди, бу ўлжа кумга синган бир томчи сувдек ғойиб бўлди.

Этьен флягасидаги ароқни ичди-да, уни яна тўлдириб олди. Секин-аста у маст бўлиб қолди, оч қоринга ичилган ароқ уни ёмон қилди, кўзларига қон тўлди, қонсиз милкларини очиб, тишларини гижирлата бошлади. Бирдан у Шавалнинг ғойиб бўлганини сезиб қолди. Этьен сўкинди, ўртоқлар югуриб келишиб, тўстўполонда Катрина билан тахланган ўтин орқасига бекинган Шаваль устига ёпирилишди.

— Сен сотқинсан! Ёмонотлиқ бўлиб қоламан, деб қўрқяпсанми? — бақирди Этьен. — Урмонда механиклар забастовка қилсин, сув чиқариб ташлайдиган насосларни тўхтатиш керак, деб жар солган сен эмасмидинг, энди бизга ёмонлик қилмоқчи экансан-да!.. Оббо жин ургур-ей! Биз Гастон-Мари шахтасига қайтиб борамиз-да, насосни бузишга ўзингни мажбур қиламиз. Ҳа, жин ургур! Насосни сен бузасан!

Этьен маст эди, у бир неча соат бурун ўртоқларини қайтарган бўлса, энди уларни насосни бузишга ўзи гижгижларди.

— Гастон-Марига юринглар! Гастон-Марига!

Ҳамма бақириб-чақириб, олға ташланди, Шавални эса елкасидан ушлаб судрашар ва кучлари борича турткилашар эди. Шаваль бўлса, ювиниб олишимга имкон беринглар, дея илтижо қилар эди.

Катрина ҳам ҳамма қатори чопиб бораётганди. Отаси Маэ унга қараб ўшқирди:

— Йўқол бу ердан!

Лекин қиз тўхтамади ҳам, кўзларини чақнатиб, отасига қаради-ю, чопиб кетаверди.

Оломон яна узун, тўғри йўллардан, кўз илғамас далалар ўртасидан юриб, текисликда из қолдириб борарди. Соат тўрт эди, қуёш уфққа ёнбошлаганди, қўлларини газаб билан ўйнатиб бораётган кишиларнинг узун-узун соялари яхлаган ерга тушиб турарди.

Забастовкачилар Монсудан чиқиб қолмаслик учун Жуазель йўлига бурилишди, Ҳўкиз мўғизни айланиб

Ўтмаслик учун Пиолена ёнидан кетишди. Худди шу пайт Грегуарлар чорбоғларидан чиқиб қолишди — улар Энболарникида Сесиль билан учрашмоқчи эди, шу боисдан у ерга зиёфатга боришдан олдин нотариусга кириб ўтишлари керак эди. Чорбоғда гўё ҳаёт асари сезилмасди — қишда шипшийдам бўлиб қолган жўка хиёбони ҳам, полиз ҳам, мевазор боғ ҳам ҳувиллаб турарди. Уйда ҳеч нима қимир этмасди, хона иссиқлигида ёпиқ деразалар терлаб кетганди; сув қуйгандек жимжитликда ҳузур-ҳаловат ва маъмурчилик сезиларди, яхши еб, ширин ухлашни ҳуш кўрадиган боқи беғамларнинг патриархал турмуши, ўзидан кетиб қолмаслик мана ман деб турарди.

Забастовкачилар тўхтамасдан панжараларга ўқрайиб қарашди, устига ойна синиқлари териб қўйилган ва уйни бостириб киришдан сақлаб турган деворга разм солишди. Яна қичқирдиқлар янгради:

— Нон! Нон! Нон!

Бу индоларга жавобан фақат иккита баҳайбат сариқ дания ити жағларини очиб, сакраб, жон-жаҳдлари билан вовиллашди, қичқирдиқларни эшитган хизматкорлар — ошпаз Мелани билан чўри Онорина ёпиқ эшик қопқоқлари орқасига бекиниб олишганди; улар забастовкачиларни кўришлари биланоқ кўрқувдан ранглари оқариб, қора терга ботиб кетганди. Икковлари ёнларидаги деразага битта тош тегиб ойнани синдиргандаёқ чўккалаб, кўрқувдан жонлари чиқиб кетишига сал қолди. Бу Жанленнинг ҳазили эди: у арқондан сопқон қилиб, Грегуарларникига тош отди ва шу заҳоти яна сурнайини фатиллатаверди; оломон аллақачон узоқлашиб кетган бўлиб, «Нон!» Нон! Нон!» деган хитоблар ҳам эшитилмай қолганди.

Гастон-Марига боргунча йўл-йўлакай одамлар қўшилиб, шахтага келганда улар икки ярим мингга етганди; қаҳру ғазабга тўлган бу оломон ҳайқирган оқимдек йўлида учраган нарсани супуриб борарди. Бу ерга бир соатча илгари етиб келган жандармлар деҳқонлар сўзига алданиб, эҳтиёт юзасидан шахтада лозқал бир неча соқчи қолдиришни унутиб, шоша-пиша Сен-Тома томонга жўнашганди. Чорак соат ўтар-ўтмас ўчоқлар вайрон қилишди, қозонлар қуритилди, қурилишлар бузиб ташланди. Бироқ одамлар ҳамма алами-

ни сув чиқариб ташлайдиган машиналардан олмоқчи эди: улар машинани тўхтатиш, сўнгги бугни чиқариб юбориш билан кифояланишмай, худди тирик одамни жонидан жудо қилишмоқчидек унга ташланишди.

— Биринчи бўлиб сен бузасан! — такрорлади Этьен Шавалнинг қўлига болга бераркан. — Хўш, қани! Ахир сен бошқалар қатори қасам ичгансан-ку!

Шаваль аъзойи бадани дағ-дағ титраб, тисарилди; тиқилинчда қўлидаги болга тушиб кетди, лекин бу чоқ бошқалар кутиб ўтирмасдан чорқирра темир таёқлар, гиштлар, қўлларига тушган нарсалар билан насосни дабдала қила бошлашди. Баъзиларининг қўлларидаги таёқлар машинага тегиб сиқарди. Гайкалар учиб кетар, пўлат ва мис қисмларнинг шалағи чиқиб, осилиб ликиллаб турарди. Кимдир қулочкашлаб чўкич билан туширган эди, чўян корпус ёрилди-да, билқиллаб сув оқиб кетди; бу товуш жон чиқар пайтдаги ҳиқичоқни эслатарди.

Сув чиқариб ташлайдиган насосни саранжомлашди; жазаваси тутган оломон Шавални ушлаб турган Этьен кетида тиқилиб турарди.

— Хоинларга ўлим! Чоҳга ташланглар уни! Чоҳга!

Бўздек оқариб кетган ярамас Шаваль тихирлик қилиб, ювиниб олишим керак, дейишини қўймасди.

— Тўхта, — деди Левак, — жудаям зарур бўлса, бу ёққа кел, мана сенга ванна!

Шу ерда насосдан сизган сув кўлмак ҳосил қилиб, юзини қалин муз қоплаганди; Шавални итариб юборишди, музни ёриб, унинг бошини совуқ сувга тиқишди.

— Шўнги! — такрорларди Ашаддий кампир. — Шўнги, яшамагур, бўлмаса, чўктириб юборамиз... Ана энди ич! Ҳа, ҳа, худди тумшуғини тоғорага тиққан молга ўхшаб ич!

Шаваль чўккалаб, қўлини тиради-да, кўлмак сувдан ичди. Ҳамма қаҳқаҳа урди, бу кулги замирида хусумат бор эди. Хотинлардан биттаси Шавалнинг қулоғидан юлқиди, бошқаси башарасига янги тезакни отди. Эғнидаги эски трико сирғалиб тушиб, парча-парча бўлиб осилиб турарди. У кўзларини аланг-жаланг қилиб, жуфтак уриб қолиш учун қолган-қутган кучини тўпларди.

Маэ Шавални итариб юборди, унинг хотини айниқса қаттиқ ҳужум қилаётган аёллар орасида эди,— иккови ҳам бу одамдан эски аламларини олаётган эди; ҳатто собиқ жазманларидан дўстлигини узмайдиган Мукетта ҳам уни ғажиб ташлагундай бўлиб, ярамас, дея ҳақорат қилар, қани бир кўрайлик-чи, эркакмикин ўзи, дея қичқирар эди.

Этьен пўписа қилиб уни тўхтатди:

— Бўлди! Ҳамманг бирдан ёпишаверма... Ҳей, менга қара, яккама-якка гаплашамиз.

У муштларини тугди, кўзлари қотил кўзларидек ёнди, бадмаслик унда одам ўлдириш истагини туғдирди.

— Қани, тайёрмисан? Бу жойда биттамиз қолишимиз керак... Унга пичоқ беринглар. Менда ўзимники бор.

Ҳолдан кетган Катрина капалаги учиб, Этьенга қаради. Қиз унинг гапини эслади: у маст бўлиб қолса— учинчи рюмкадан кейин кайфи ошарди,— одам ўлдиргиси келаверарди; бу ярамас одат болалигида майхўр ота-онасидан юққан эди. Қиз тўсатдан сакраб унинг олдига келди-да, иккала қўли билан шапалоқ тортиб юборди; ғазабдан бўғилиб, Этьеннинг афтига қараб деди:

— Ярамас! Пасткаш! Ифлос!.. Шунча ярамаслик қилганларинг каммиди? Энди, оёғида зўрға турганида уни ўлдирмоқчи бўляпсан!

У ота-онасига, қолган забастовкачиларга юзланиб деди:

— Ярамас одамларсиз! Ёвузлар!.. У билан бирга мени ҳам ўлдиришлар! Агар унга теккудек бўлсаларинг, башараларингга чанг соламан! Эҳ, ёвузлар!

Катрина гавдаси билан ошиғини тўсиб оларкан, унинг калтаклашларини, маҳкум этилган аянчли ҳаётини унутганди, қизлигимни шу олгандан кейин, мен уникаман-да, ахир уни шунчалик таҳқирлашларига номус қилмайманми, деган ёлғиз фикр уни шундай қилишга мажбур этганди.

Этьеннинг ранги қув ўчиб кетди: шапалоқлаётган қизни бўғишига сал қолди. Кейин мастлигини тарқатмоқчи бўлгандек юзини силади-да, ҳамма жим бўлиб қолган бир пайтда Шавалга мурожаат қилди:

— Катрина ҳақ, бас. Йўқол, жин урсин!

Шаваль шу ондаёқ қочиб кетди; Катрина ҳам кетидан чопди. Ҳанг-манг бўлиб қолган оломон улар йўл муюлишидан ўтиб, кўздан ғойиб бўлгунларича орқаларидан қараб турди. Фақат Маэнинг хотини:

— Бекорга қўйвординглар-да. У, эҳтимол, бизни қандай сотишни ўйлаётгандир,— деб қўйди.

Лекин забастовкачилар йўлга тушишганди. Соат тўртдан ошган эди, уфқда қизариб ловиллаётган қуёш бепоён текисликка қизгиш шуъла сочмоқда эди. Улар ёнидан ўтаётган ташувчи уларга драгунлар Кручина томондан бу ёққа келишяпти, деб айтди. Шунда забастовкачилар орқага қайтишди.

— Монсуга! Правлениега!.. Нон! Нон! Нон!— еган буйруқ эшитилди.

У

Жаноб Энбо кабинетининг деразаси ёнида хотинини зиёфатга Маршьеннга олиб кетаётган извош кетидан қараб турарди. У извош эшиги ёнида отини йўрғалатиб кетаётган Негрелга нигоҳ ташлади-ю, хотиржамланиб ёзув столига қайтди. Хотини билан жияни уйга жон киритиб турарди, улар йўқ пайтда ҳувиллаб қоларди. Шу куни ҳам шундай бўлди; бойвуччани извошчи олиб кетди; янги оқсоч Розага соат бешгача рухсат беришганди; уйда туфлисини хоналарда тўпиллатиб юрган малай Ипполит билан хонадон соҳиблари кечқурун берадиган зиёфатни тайёрлашга улгуриш учун каллаи саҳарлаб идиш-товоқлар билан ўралашиб ётган ошпаз хотиндан бўлак ҳеч ким қолмади. Шундай қилиб, жаноб Энбо ҳувиллаб қолган сокин уйда кечгача иш билан машғул бўлиши мумкин эди.

Ҳеч кимни қабул қилмаслик ҳақида буйруқ бўлганига қарамай, Ипполит Дансарт муҳим гап билан келганини айтди. Директор кеча ўрмонда йиғин бўлганини Дансартдан билди; ҳисобот ниҳоятда батафсил эди. Энбо Дансартнинг гапларини тингларкан, унинг Пьеррон хоним билан донлашиб юрганини ўйлади; бу шунчалик ошқорá эдики, директор ҳар ҳафтада катта штейгернинг саргузаштлари маълум қилинган имзосиз хатларни бир нечалаб оларди. Забастовкачилар ҳақи-

даги бу игво гаплардан ҳам эр-хотин нопоклигининг хиди келарди. Афтидан, эр оғзидан гуллаб қўйган. Энбо бу воқеадан фойдаланиб, ҳатто катта штейгерга, ҳамма нарсани биламан, жанжал чиқмаслиги учун эҳтиёт бўлгин, деб маслаҳат ҳам берди. Бу танбеҳдан маърузаси бўлиниб, хижолат чеккан Дансарт, бунақа гап йўқ дея тонди, кечирим сўраб, бир нималар деб гўлдираган бўлса-да, аммо катта, бирдан қизариб кетган бурни сирни фош қилиб қўйди. Лекин сирасини айтганда, шунчалик осон қутулганидан мамнун бўлиб, ижикилашиб ўтирмади. Одатда баадаб директор дўндикқина ишчиси билан ўйнашиб юрган ходимига нисбатан қаттиққўл эди. Забастовка мавзусидаги гап давом этди; ахир ўрмондаги мажлис бақироқларнинг мақтанчоқликларидан бошқа нарса эмас, жиддий бирор хавф солмайди-ку; ҳар қалай, ҳарбийларнинг эрталабки сайридан чўчиган посёлкаларнинг аҳолиси бир неча кунгача жимгина юради, деб ишонса бўларди-ку.

Елғиз ўзи қолган жаноб Энбо префектга телеграмма юбормоқчи бўлди. Бу билан ўзимнинг ўринсиз ташвишланганимни билдириб қўяманми, деган андиша уни шаштидан қайтарди. У шунчалик бўлишини билолмай қолгани учун ўзини кечира олмасди. Ахир забастовка нари борса икки ҳафта давом этади, деб ҳаммага айтган, ҳатто Правлениега хат ёзиб маълум қилган ўзи-ку. Забастовка эса, уни қарангки, икки ойчадан бери чўзилиб келяпти. Бундан унинг фиғони ошарди, кун сайин обрўси тушиб бораётганини, шарманда бўлаётганини, акционерларнинг марҳаматига яна сазовор бўлиш учун бирор фавқулодда чоралар кўриши зарурлигини пайқарди. Ҳозиргина у аҳвол жиддийлашгундай бўлса, қандай чоралар кўрай, деб сўраганди-ку.

Жавобдан дарак йўқ эди. Энбо кундузги почта билан жавоб келишини кутиб, ўзига ўзи телеграмма беришга улгурарман, дер эди. Бу жаноблар ҳам шу фикрда бўлсалар, у ҳолда Энбо шахтани қўриқлаш учун солдат чақиради. У отишма бўлиши, қон тўкилиши, қурбонлар берялишини тушунарди. У одатдагидек ғайратли бўлганига қарамай, бунақа масъулиятдан чўчирди.

Энбо соат ўн бирларгача хотиржам ишлаб ўтирди. Жимжит уйда иккинчи қаватнинг полини мумли чўтка билан қиртиллатиб артаётган Ипполитнинг тўқтўқидан бўлак тиқ этган товуш эшитилмасди. Кейин деярли бир вақтда иккита телеграмма келди: бирида Монсудан келган оломон Жан-Бартни забт этди, дейилганди, иккинчисида пўлат арқонлар кесилгани, ўчоқлар ўчирилгани, хуллас, чинакам вайронгарчилик тафсилотлари баён қилинганди. У ҳеч нима тушунмади. Нима учун забастовкачилар Ширкат шахталарини вайрон қилиш ўрнига Денелен олдига боришдийкин? Ҳа, айтгандай, улар Вандамни бузишган тақдирда ҳам, уларнинг шу шахтани эгаллаш ҳақидаги режаларини тезлатарди-ку. Тушда каттакон ошхонада ёлғиз ўзи овқатланаркан, индамай овқат олиб келган малай туфлисининг тўқиллашини ҳам эшитмади. Ёлғизлик ташвишига ташвиш қўшиб, юрагини баттар қисди; бирдан югуриб кирган штейгер забастовкачиларнинг Монсуга келишаётганини хабар қилди! Директор кофесини ичиб бўлмасиданоқ Мадлена билан Кручина хавф остида, деган телеграмма келди. Шундан кейин у ҳаддан ташқари гангиб қолди. Почта соат иккида келади. Нима қилиш керак? Дарҳол солдатларни чақирсинми ёки Правлениедан йўл-йўриқ кутсинми? Энбо кеча префектга юбориш учун Негрелга ёздирган хатни кўриб чиқиш мақсадида кабинетига қайтди. Лекин у хатни тополмади. Йигит уни ўз хонасида қолдириб кетган бўлиши керак. У кўпинча кечалари ўз хонасида ишлайди. Фикру зикри шу қоғозда бўлган Энбо бир қарорга келолмай жиянининг хонасини қидириш учун апил-тапил юқорига кўтарилди.

Жаноб Энбо кириши билан ҳанг-манг бўлиб қолди: афтидан, хона йиғиштирилмаганди. Ипполит ё унутган, ё эринган. Шамоллатилмаган ётоқхона ҳавоси илиқ, нам эди; калорифер очиқ бўлгани учун хона бадтар димиқиб кетгандай эди; аллақандай ўткир атирнинг нохуш ҳиди димоққа уриларди: бу энди тосни тўлдириб юборган ҳожатхона суриники бўлса керак. Хона ҳаддан ташқари тўзиб кетганди — кийимлар ҳар ерда сочилиб ётарди, ҳўл сочиқлар стул суянчигига ташланганди, ўрин йиғилмаганди, чойшаб сирғалиб гиламга тушганди. Энбо дастлаб буларга пари-

шон нигоҳ ташлади-да, йўқолган хужжатни қидириб, тўппа-тўғри қоғозлар уюлиб ётган стол ёнига борди. У гарчи ҳар бир қоғозни қайта-қайта кўриб чиққан бўлса-да, ўша қоғозни тополмади. Бу каллаварам, жин ургур Поль, хатни қаёққа тикдийкин?

Жаноб Энбо керакли нарсасини қидириб, ҳар бир стулга кўз югуртираркан, хонанинг ўртасига келди-ю, қўққисдан очиқ ўринда учқундек ялтираб турган қандайдир нуқтани кўриб қолди. У беихтиёр унга яқинлашиб, қўлини узатди. Урин қатида кичкинагина заррин шишача ётган эди. У дарров таниди: ифор мойли бу шишача Энбо хонимники бўлиб, уни асло ёнидан қўймасди. Лекин у бу буюм қандай қилиб Полнинг ўрнига тушиб қолганига тушунолмас эди. Бирдан Энонинг ранги бўздек оқариб кетди: унинг хотини шу ўринда ётган.

Эшик ортидан Ипполитнинг:

— Кечирасиз, бегим,— деган овози эшитилди,— Сизнинг юқорига кўтарилганингизни кўриб қолдим...

Хона тартибсизлигидан уялиб кетган малай ичкари кирди.

— Вой худойим-ей! Вой-бўй, шунақаям бўладими? Шу уйни йиғиштиришга улгурмовдим-а... Роза менга ҳамма ишни қолдириб, ўзи кетди қолди!

Энбо қўлидаги шишачани худди синдириб юбормоқчи бўлгандек қисди.

— Сизга нима керак?

— Бегим, яна бир одам келди... Кручинадан, хат олиб келибди.

— Яхши, мени ёлғиз қўйинг, кутиб тура турсин.

Унинг хотини шу ўринда ётган! У эшикни ёпиб, иллагини солди-да, бармоқларини ёзиб, шишачага қаради; кафтида шишача ўрни қип-қизил бўлиб қолган эди. У ҳаммасини кўрди, ҳаммасини тушунди. Бу ифлослик мана шу ерда, унинг уйда кўп ойлардан бери юз бериб келяпти. Энбо бир вақтлари шубҳаланганини эслади: ўшанда кечаси жимжит уйда эшик ортидан шитирлаш, яланг оёқнинг шипиллагани эшитилганди. Хотини бу хонага ётиш учун келган экан!

У ўрин қаршисидаги стулга чўкди-да, ўридан кўзини узмай, ич-ичидан эзилиб, узоқ ўтирди. Шовқин-сурон уни ҳушига келтирди: эшикни очишга уриниб, уни тақиллатишарди. У малайнинг овозини таниди.

— Бегим... Аҳ! Эшигингиз берк-ку...

— Яна нима гап?

— Э, анови ерда тўполон, ишчилар ҳамма нарсани синдириб ташлашяпти. Пастда сизни икки киши кутиб турибди... Телеграммалар ҳам бор.

— Мени ўз ҳолимга қўйинг, деяпман! Ҳозир!

Уйни йиғиштираётганида Ипполитнинг ўзи шишачани топиб олиши мумкин эди-ку, деган фикрдан Энбо муз-муз бўлиб кетди. Нима, бусиз ҳам малай билмас эканми? Ахир малай фаҳшона эркалашлардан ҳали совумаган шу ўринни тузатаётганида, ёстиқда аёл кишининг сочларини, чойшабга теккан жирканч ифлослик изларини кўрган, албатта. Энди бўлса, у атайлаб хиралик қилаётгандир, балки эшик орқасида қулоқ солиб, хўжайинларининг бузукликларидан ҳузур қилаётгандир.

Жаноб Энбо қимир этмай ўтирар ва ўриндан кўзини узмасди. Унинг кўзи олдидан ғам-ғуссали узоқ йиллар, шу хотинга уйланиши, кейин хотинининг ҳафсаласи пир бўлиб, ўзгаларга кўнгил бериши, у хаёлига келтирмаган ўйнашлар бирин-кетин ўта бошлади: бемор хотиннинг бузук нафсига қандай чидашса, у ҳам биттасига ўн йилгача ғинг демасдан келганди. Монсуга кўчиб келгани, хотиним тузалиб қолар, деган бемаъни умидда юрганлари, жимгина ўтган ойлар, худди тушдагидек қувғинда яшаганлари, ниҳоят, хотиним ҳадемай қариб, қуйилиб қолади, дея хомтама бўлганлари кўнглидан ўтди. Кейин Польш, жияни Польш пайдо бўлди. Хотини дарров унга она бўлиб олди-да, завол топиб, абадий кўмилган юраги ҳақида гапириб юрди. У бўлса, беақл эр, ҳеч нимани кўрмади; у шу хотинни, ўз хотинини ардоқлаб юраверди, хотини эса, қанчадан-қанча эркакнинг кўнглини хушлабди-ю, фақат бир ўзи мириқиб роҳат қилолмабди-я! У орномусни йиғиштириб қўйиб бутун вужуди билан унча яхши кўрарди, бошқалардан қолган сарқитини тиз чўкиб, тилаб олишга ҳам рози эди! У эса шу сарқитни ҳам манови болага раво кўрди.

Қўнгироқ узоқ чалинди. Энбо сесканди. Бу қўнгироқ ўзининг буйруғига мувофиқ жаранглаб, почталъон келганидан дарак берарди. У ўрнидан тураркан, қаттиқ сўкинди, гўё ана шу дағал сўзларни беихтиёр айтиб, хаста юрагини бўшатгандек бўлди.

— Э, ха, тупурдим мен уларнинг ҳаммасига, хатларигаям, телеграммаларигаям! Жин урсин ўшаларни!

Энбо фиғони фалакка чиқиб, ана шу ифлосгарчиликларнинг ҳаммасини ахлатхонага ағдаргиси, оёқлари билан эзиб ташлагиси келди. Бу хотин шунчаки бир ғар. У хотинига шапалоқ бўлиб тегадиган энг ярамас сўзларни топиб айтарди. Қўққисдан кўз олдида хотинининг тиржайиб, Поль билан Сесиль никоҳини ўтказаетгани келди. Бу ҳол унинг тепа сочини тикка қилиб юборди. Демак, эҳтирос ҳам, рашк ҳам, ҳеч нима йўқ экан-да, фақат ҳайвоний ҳирс бор экан-да. У шилта қўғирчоқдан бошқа нарса эмас, эркаклар унга одатдаги ширинликдек, фақат вақтичоғлик учун керак. Бу ишларга ўша ғарнинг бир ўзи айбдор.— Энбо жиянини деярли оқлади,— унинг иштаҳаси очилиб, йўлда ўғирланган хом мевага тишларини ботиргандек, унга тиш-тирноғи билан ёпишиб олди. У яна кимни бағрига оларкин, уйимиздан текин жой, овқат, аёл топиб, мулозамат қилиб юрган тажрибали жиянларга ўхшаган кишилар топилмаса, қай аҳволга тушаркин?

Эшикни эҳтиёткорлик билан тиқиллатишяпти; Ипполит қулф тешигидан шивирлади:

— Бегим... почта келди... Дансарт жаноблари ҳам; Дансарт у ёқда хунрезлик бўляпти, дейди...

— Кетяпман, жин ургурлар!..

Уларни нима қилади энди? Маршъендан келишлари биланоқ сассиқ моллардек ҳайдаб юбориш керак, уларни уйига яқинлаштиришга ортиқ тоби йўқ. Қўлга тўқмоқ олсангу қани, бу ердан туёқларингни шиқиллатинглар, ўша кучала еган жойларингга бориб тиришларинг, деб бақирсанг. Уларнинг оҳ-воҳлари, нафаслари аралашиб кетганидан хона ҳавоси намиқиб, дим бўлиб кетган; унинг кўнглини айнитаётган ҳид — хотини баданига сурган мушк-анбар, қўланса исларни кетказиш учун зўр бериб сепилган кучли атирлар эди. У наҳс босган мана шу хонадаги жамики нарсадан — йиғиштириб олинмаган кувачалардан, тўлиб кетган тослардан, сочилиб ётган кийим-кечаклардан, мебеллардан фаҳш ва бевафоликнинг сармаст этувчи ҳиди анқиб турганини сизди. У ғазабдан ҳолсизланиб, ўзини ўринга отди-да, назарида уларнинг таналари

изи тушиб қолган жойларни муштлайверди; у кўрпани юлқиб олди, чойшабни гижимлади, бу юмшоқ, мулойим нарсалар ҳам тунги эркалашлардан чарчагандек эди.

Бирдан у яна Ипполит келаётганини эшитгандек бўлди. Уялиб кетди. Эмбо ҳамон хансираб, юраги дукдук уриб, ўзини босиб олиш учун пешонасини арта бошлади; кейин ойна ёнига келиб, аксига қаради-ю, ўзини танимади, шу қадар ўзгариб кетибди. Эмбо сал эс-ҳушини йигиб, кучи борича ўзини босди-да, пастга тушди.

Пастда Дансартни ҳисобламаганда беш киши уни кутиб турарди. Уларнинг ҳаммаси забастовкачилар шахталарга юриш бошлагани ҳақида муҳим янгиликлар топиб келишганди. Катта штейгер Миру шахтасида нима бўлганини батафсил гапириб берди: у ерда Кандье бобо ўзини мардона тутгани туфайли ҳамма нарса сақлаб қолинган. Эмбо тингларкан, бошини сарак-сарак қилар, бироқ ҳеч нимани тушунмас эди; унинг фикру ёди ҳамон ўша хонада, кўқорида эди. Ниҳоят у чорасини кўраман, деб ҳаммага жавоб бериб юборди. Ёзув столи ёнида ёлғиз ўзи қолгач, бошини қўлларига қўйди-да, кўзларини юмди, у мудраётганга ўхшарди. Ҳозиргина олинган хатлар стол устида ётарди. У кутилаётган хабар — маъмуриятнинг жавоби йўқмикин, деган умидда қарашга тутинди. Аввалига сатрлар кўз олдидан сакраб ўта бошлади. Бироқ Эмбо бир оз муштлашув бўлса, бу жаноблар қарши эмаслигини тушунди. Аҳволни мураккаблаштириб юбориш маслаҳат берилмаган эди, албатта, аммо директорга мабодо тартибсизликлар авж олиб кетса, дарҳол бос-тирилиб, забастовкага барҳам берилиши шама қилинганди. Эмбо шу лаҳзадан бошлаб иккиланишни йиғиштириб, ҳар томонга — Лиллдаги префектга, Дуэдаги ҳарбий қисм командирига, Маршьенн жандармериясига телеграммалар жўнатди. Бу ишдан энгил тортди: мана энди подагра касалим тутиб қолди, деса бу гап бир зумда ҳаммаёққа ёйилишига бутунлай ишониб, кабинетини ичидан қулфлаб олса ҳам бўлади. Тушдан кейин у кабинетига кириб олди-да, ҳеч кимни қабул қилмай, ҳар томондан ёғилиб келаётган хат ва телеграммаларни ўқишга киришди. Шундай

қилиб, у Мадленадан Кручинагача, Кручинадан Ғалаба шахтасигача, у ердан то Гастон-Маригача бўлган жойлардаги забастовкачиларни кузатиши мумкин эди. Иккинчи тарафдан, унга жандармлар билан драгунлар саросимада қолганликлари тўғрисидаги маълумотлар ҳам келарди: шунчаки уларни йўлдан адаштиришарди, шу боисдан улар шахтёрлар ҳужум қилган конлар қолиб, бошқа томонга боришарди. Бари бир эмасми, — майли, ўлдираверишсин, вайрон қилишаверишсин... Энбо яна бошини кўлига қўйиб, бармоқлари билан кўзларини беркитди-да, ғам-ғуссаларига берилди. Ҳувиллаб турган уй жимжит эди; ахён-ахёнда кастрюланинг тарақ-туруқи эшитиларди: ошпаз хотин тушликка овқат пиширяпти; унинг иши бошидан ошиб ётибди.

Хона ичи қоронғилашиб қолди; соат беш эди; қўққисдан кўтарилган шовқин ҳамон тирсақларини қоғозлар устига қўйиб, қотиб ўтирган Энбони дик этиб туриб кетишга мажбур этди. У иккала бузуқ қайтиб келди, деб ўйлади. Лекин шовқин тобора кучайиб, Энбо дераза олдига борганида даҳшатли қичқириқ янгради:

— Нон! Нон! Нон!

Забастовкачилар Монсуга ёпирилиб киришганди. Жандармлар бўлса, улар Ворёга кетишяпти, деб шахтани қўриқлаш учун ўша ёққа от қўйишганди.

Дастлабки уйлардан икки километр нарида, катта тош йўл Вандам йўлини кесиб ўтадиган чорраҳадан салгина узоқроқда Энбо хоним билан ойимқизлар оломон юришини кузатиб туришарди. Маршённ сафари жуда кўнгилли ўтди: пўлат қуйиш заводи директорининг уйида роҳатланиб нонушта қилишди, тушдан кейин устaxonаларга, қўшни шиша заводига бориб, вақтларини хуш ўтказишди. Кечки пайт очиқ ҳавода уйга қайтишаркан, Сесилнинг йўл бўйидаги кичкина фермада бир чашка сут ичгиси келиб қолди. Ҳамма извошдан тушди; Негрель отдан енгилгина сакраб тушди; фермер хотин бундай ажойиб одамлардан истиҳола қилиб, шошиб қолди, дастурхон ёзмоқчи бўлди. Жанна билан Люси сигирни қандай соғишларини томоша қилиш учун ҳатто чашкаларини олиб, оғилхонага жўнашди, — бу ҳол сайл зиёфатига ўхшаб кетарди; иккови ҳам оёқлари хашакка ботиб кетаётганидан хахолаб куларди. 356

Ҳамиша оналардек меҳрибон Энобо хоним сутдан бир ҳўплаган эди ҳамки, қўққисдан юрагига гулгула тушди: кўчадан ғалати шовқин эшитилганди.

— Нима гап?

Молхона кўча четида бўлиб, дарвозаси кенглигидан арава бемалол кираверарди: охур айни вақтда хашак босадиган жўй хизматини ҳам ўтарди. Ойимқизлар ажабланганларича бўйинларини чўзиб қарашган эди, шу пайт ногаҳон чап томондан бетартиб оломон шовқин-сурон билан Вандам йўлини тўлдириб, бало-қазодай ёпирилиб келарди!

— Жин урсин!— гўлдиради Негрель ҳовлидан чиқаркан.— Бу бақироқларимиз роса ғаблабланишганга ўхшайди-ку.

— Булар кўмир қазувчилар бўлса керак,— деди фермер хотин.— Улар бу ердан икки марта марта ўтишди. Бир бало бўлганга ўхшайди; улар жуда бебошлик қилишяпти...

У ҳар бир сўзни қандай таассурот қолдиришини кузатиб, эҳтиёткорлик билан айтарди. У бўлажак учрашувдан ранглари ўчиб кетган чехраларни кўриб, шоша-пиша қўшиб қўйди:

— Оббо жулдирвоқилар-ей, қутурмай ўлгур яланг-оёқлар-ей!

Негрель Монсуга қайтишга кечикишганини англаб, кучерга извошни ферма ҳовлисига киритишни ва сарой йўлини тўсиб қўйишни буюрди. Бола юганидан ушлаб турган отини ўзи шийпон тагидаги қозиққа боғлаб қўйди. Негрель қайтиб келиб қараса, холаси билан ойимқизлар капалаклари учиб, фермер хотиннинг уйига бекинмоқчи бўлиб туришибди. Бироқ Негрель молхонада улар тинчроқ бўлади, деб ўйлади: уларни пичан орасидан излаш ҳеч кимнинг эсига келмайди. Лекин дарвоза яхши ёпилмасди, дарвоза тирқишларидан, чириган тахталар орасидан кўчани бемалол кўриш мумкин эди.

— Дадил бўлинглар!— деди у.— Осонгина жон бермаймиз.

Бу ҳазил уларнинг юрагини баттар ёрди. Гарчи ҳеч нима кўринмаса ҳам, шовқин-сурон кучайди; фақат бўм-бўш йўлда довул даракчиси бебош шамол қуштак чалаётгандек эди.

— Йўқ, йўқ, уларга қарашни истамайман, — деди Сесиль пичанхона томон кетаркан.

Роҳатини бузганлари учун бу одамлардан ғазабланган Энбо хоним ранги қув учиб, орқароқда турар, ҳаммага нафрат билан кўз қирини ташлар эди. Люси билан Жанна қўрқувдан дағ-дағ титрашар, бироқ ғаройиб томошанинг бирон нарсасидан қуруқ қолмаслик учун тирқишдан қарашарди.

Момақалдироқ гумбур-гумбури яқинлашарди, гўё ер ларзага келарди. Энг олдинда диканглаб, карнайини чалиб келаётган Жанлен кўринди.

— Атир шишангиз қани? Одамларнинг тер ҳиди босиб кетди! — шивирлади Негрель.

У республикачиларга тарафдор бўлишига қарамай, хонимлар олдида ишчиларни майна қилишни ёқтирарди. Лекин унинг қочирими беҳуда кетди: мушт ўқталишлар, қичқириқлар бадтар кучайди. Хотин-халаж кўринди, мингга яқин аёл; узоқ йўл босганлари ва шамолдан сочлари тўзиб кетганди; жулдур кийимлари йиртиқларидан яланғоч баданлари — очликка маҳкум этилган қашшоқларни кўтариб юриш ва туғишдан чарчаган яланғоч андомлари кўринарди. Баъзиларининг қўлларида чақалоқлари бор эди, улар болаларини кўтариб, худди ғам-гусса ва қасос байроғидек силкитишарди, анча ёшроқлари шаддодлик билан кўкракларини кериб, таёқ ўқталишарди, кампирлар бўлса, ялмоғизларга ўхшаб, шундай қаттиқ чинқиришардики, ориқ бўйинларининг томирлари узилиб кетай дерди. Улардан сўнг эркаклар — эс-ҳушини йўқотган икки мингтача киши келарди: ёрдамчи ишчилар, кончилар, ремонтчилар; улар шу қадар ғуж бўлиб, жипслашиб, қисилишиб келишардики, ранглари бир аҳвол қурама оломоннинг на ўнгиб кетган шимларини, на йиртиқ курткаларини ажратиб бўларди. Кўзлари чақнарди, «Марсельеза» ни айтаётган оғизлари кўриниб турарди. Қўшиқ бандлари музлаган ерга урилаётган ёғоч бошмоқларнинг бўғиқ гурс-гурсига қўшилиб йўқолиб кетарди. Одамларнинг бошлари устида, темир болтлар орасида болта ялтиради; ягона ўткир болта ёруғ ҳавода жоди дамига ўхшаб кўринарди.

— Вой-буй, важоҳатлари ёмон-ку! — деди Энбо хоним.

Негрель тишларини гижирлатиб деди:

— Бу нимаси энди! Биронтасиниям танимаяпман!
Бу газандалар қасрдан пайдо бўлдийкин?

Ҳақиқатан ҳам уларни таниб бўлмасди. Ғазаб, очлик, икки ойлик изтироб ва манови шахтама-шахта югуриб юришлардан кўмир қазувчиларнинг осуда чеҳралари бужмайиб, ёноқлари чўккан, жағлари ҳайвонникидек осилиб тушган эди. Қуёш ботаётганидан унинг сўнгги тўққизил нурлари текисликни қондай қизартириб юборганди. Гўё йўлдан қон оқаётгандек эди; югуриб бораётган эркагу аёллар қонга беланган қушхона қассобларига ўхшарди.

— Жуда ажойиб-а!— пичирлашди Люси билан Жанна: уларнинг бадий дидлари бу даҳшатли манзара гўзаллигидан лол эди.

Бироқ улар кўрқиб извошга суялиб турган Энбо хоним олдига югуриб келишди. Энбо хоним бу одамларнинг биттаси шалағи чиққан дарвоза тирқишидан мўраласа бас, бешаламизни қийма-қийма қилишади, деган фикрдан ссрайиб турарди. Негрель ҳам кўрқиб, рангида ранг қолмаганди: у кўрқоқ бўлмаса ҳам, аммо иродасидан ҳам кучлироқ аллақандай даҳшат — номаълум даҳшат яқинлашиб келаётганини ҳис қиларди. Пичан ичига уриб кетган Сесиль қимир этмай ётарди, бошқалар эса тескари қарагилари келатган бўлса ҳам, лекин кўзларини узолмасдилар.

Бу ичкилобнинг қизил арвоҳи эди. Бу арвоҳ аср охирида қондай қизариб турган шу кечки пайтда муқаррар фалокатдек ҳаммани бошлаб келарди. Ҳа! Шундай замонлар келадики, ўз эркини қўлига олган ҳур халқ кўчаларда мана шундай югуриб юради, бойларнинг қонларини тўкади, уларнинг бошларини узиб, сандиқларини дабдала қилади-ю, олтинларини тўкишади. Хотин-халаж мана шундай дод солади, эркаклар эса қаққирдек тишларини тақирлатишади. Кийимлари мана шундай жулдур, ёғоч бошмоқлари мана шундай тўқир-тўқир қиладиган кир-чир баданлар билан вабо нафаси мана шундай даҳшатли қоришади-ю, ҳаёт-мамот жангида эски дунёни супуриб ташлайди. Ёнғинлар гуриллайди, шаҳарлардан ном-нишон қолмайди, инсонлар яна ўрмон ёввойилари сингари яшай бошлайдилар: камбағаллар ёшасига бир кечадаёқ

барча ертўлалардаги ичимликларни ичиб тугатиб, бойларнинг хотинлари билан айш-ишрат қилиб бўлганларидан сўнг ҳеч нарса — аввалги бойликдан бир чакка, илгариги ҳақ-жуқуқдан асар ҳам қолмайди ва бу аҳвол эҳтимол, то янги ер пайдо бўлгунча давом этар. Йўлдан табиат куч-қудратидек, юзга урилаётган шамолдек елиб югураётган шарпа мана шу эди.

— Нон! Нон! Нон!— деган даҳшатли ҳайқириқ «Марсельеза» кўшиғини босиб кетди.

Ҳушдан кетаёзган Люси билан Жанна Энбо хонимнинг пинжига сукулиб олишди. Негрель гўё ўз танаси билан уларни ҳимоя қилмоқчи бўлгандек, уларнинг олдига ўтди. Балки Антик дунё ҳам шунақа оқшомда қулагандир? Кўрган нарсалари уларни бутунлай гангитиб қўйди. Оломон деярли ўтиб бўлганди, охирида орқада қолиб кетганлар ҳали судралиб келишарди, қўққисдан Мукетта кўриниб қолди. У боғ эшиклари ва деразалари олдида турган буржуйларни қидириб, секин келарди: у буржуйларни кўриши билан уларнинг афтларига тупуриш иложини тополмагани учун шундай ерни кўрсатардики, бу ҳар қандай нафратдан ортиқ нарсани ифода этар эди. Мана ҳозир Мукетта аллакимни кўриб қолди, шекилли; у юбкасини кўтарди-да, қуёшнинг сўнгги нурлари ёритиб турган каттакон яланғоч корсонини кўрсатди. Ҳатто бу қилиқда уят ҳам йўқ эди,— бу даҳшатли бўлганидан ҳеч ким кулмади ҳам.

Ҳаммаси ғойиб бўлди, оқим йўлдан, янги бўялган пастак уйлар орасидаги сўқмоқлардан Монсуга қараб кетди. Извошни ҳовлидан олиб чиқишди, лекин кучер агар забастовкачилар йўлни тўлдириб юрадиган бўлишса хонимларни эсон-омон етказишга кафил бўлолмаслигини айтди. Бахтга қарши бошқа иложи йўқ эди.

— Ҳар қалай, кетиш керак, тушлик маҳтал бўлиб қолди,— деди ўлгудек қўрқиб кетган Энбо хоним.— Бу исқирт ишчилар келиб-келиб мен меҳмон чақирган кунни танлашганини қаранг-а! Яхшилшкка ёмонлик деб шуни айтадилар-да!

Люси билан Жанна пичан орасидан Сесилни тортиб чиқармоқчи бўлишди; Сесиль эса бу ёввойилар ҳали ўтиб бўлишгани йўқ, ҳеч нимани кўришни истамай-

ман, дея такрорлаб, чиқмасди. Ниҳоят ҳамма извошга чиқиб жойлашди. Негрель отга минди, шундан кейин миясига Рекийяр орқали жинкўчалардан юрсак бўларди, деган фикр келди.

— Секин юраверинг,— деди у кучерга,— у ернинг йўли жуда ёмон. Борди-ю, оломон халақит бергудай бўлса, эски шахта орқасида тўхтайсиз, биз эса яёв юриб, боғнинг эшиги орқали бир амаллаб етиб оламиз. Извош билан отларни бирор равотда қолдирармиз.

Улар йўлга тушишди. Узоқда оломон Монсу томон кетаётганди. Аҳоли жандармлар билан драгунларни икки марта учратишганларидан буён ваҳимага тушиб қолганди: даҳшатли миш-мишлар кўп эди, буржуйларнинг қорнини ёриб ташлаш керак, дея пўписа гаплар ёзилган қўлёзма варақалар ҳақида гапиришарди. Уни ҳеч ким ўқимаган бўлса-да, бу ҳол ундаги гапларни сўзма-сўз айтишга монелик қилмасди. Нотариус ўлгудек қўрқиб кетганди: у имзосиз хат олган бўлиб, унда мабодо халқ фойдасига гапирмасанг, ертўлангга кўмилган бир бочка порох портлатиб юборилади, дея огоҳлантирилганди.

Ана шу хат туфайли Грегуарлар тушликка кечи-кишаётганди. Улар хатни муҳокама қилишиб, тагин бу битта-яримта ҳазилкашнинг иши бўлмасин, деб ўйлашарди; лекин шу чоғ пайдо бўлган оломон бутун хонадонни ваҳимага солиб қўйди. Грегуарлар ҳамон жилмайишарди. Улар дарпардаларнинг бир бурчагини хиёл кўтариб, бирор фалокат юз беришига ишонмай, ҳаммаси яхшилиқ билан тугайди, деган андишада қараб туришарди. Соат бешга занг урди: ҳали вақт эрта, улгуришади. Кўча тозаланади. Улар кўчани кесиб ўтишади-да, тўғри Энболарникига тушликка киришади. У ерда Сесиль кутиб турибди. Сесиль қайтиб келган бўлса керак. Бироқ Монсуда ҳеч ким уларнинг беғамликларига эътибор беришмасди; одамлар худди жиннидек елиб-югуришарди, деразалару эшиклар кўз очиб-юмгунча ёпиларди. Грегуарлар кўчанинг нариги бетига Мегра ўз дўконини катта темир болтлар билан тўсаётганини кўриб қолишди: уларнинг ранги сурпдек оқариб, шунчалик титрардики, касалманд хотини гайкаларни ўзи бурашга мажбур бўлди.

Оломон директор уйи олдида тўхтади.

— Нон! Нон! Нон!— деган қичқириқ янгради.

Ипполит тош билан уриб, ойнани синдиришмасин, дея дераза қопқаларини ёпиш учун кирганида жаноб Энбо дераза олдида турганди. Ипполит пастки қаватдаги қопқаларни ёпиб чиққан эди. Малай тепага кўтарилди: шпингалетларнинг шиқиллаши, ёғоч қопқоқларнинг бириг-кетин туширилиши эшитилди. Бахтга қарши, ертўла қаватидаги ошхонанинг катта ойнасини ёпиб бўлмасди — ўт устида ялтираб турган сихлар билан кастрюлкани кўриш мумкин бўлган бу дераза ташвишга солиб қўйган эди.

Жаноб Энбо кўчага қарамоқчи бўлиб, беихтиёр учинчи қаватга, Полнинг хонасига чиқди: бу ердан чап томондаги йўлнинг олис жойларини, Ширкатнинг омборларигача кўриш мумкин эди. У дераза қопқоғи панасига ўтиб, юқоридан оломонга қаради. Хонанинг кўриниши яна уни ҳаяжонлантирди: пардоз столи йиғиштириб қўйилганди, тоза чойшаб совуқ каравотга яхшилаб ёзилганди. Яқингинада фиғони ошгани, ич-этини еб, куйиб-пишганлари энди асар қилиб, тинкасини қурутганди. У ҳам салқин, эрталабки тартибсизликдан сўнг йиғиштирилиб, ораста қилинган, одатдагидек озода кўринаётган шу хонадек, ўзига келиб, қомати гоз бўлиб қолди. Жанжал кўтаришнинг нима ҳожати бор? Бирер нима ўзгариб қолибдими? Шунчаки хотини яна битта ўйнаш орттирди холос; хотини ўйнашни ўз хонадонидан орттириб, айтарли ёмон иш қилгани йўқ. Балки, бу ҳатто яхшироқ ҳамдир — ўзининг у ёқ-бу ёғига дурустроқ қарайди. У ўлгудек рашк қилиб юрганларини эслади-ю, ўзига раҳми келди. Мана шу ўринни муштлаб юрибди-я, вой аҳмоқ-ей! Бошқасига чидаганди-ку, бунисига ҳам чидайди-да. Нафрати сал ортади, вассалом. Оғзи какрадек тахир бўлиб кетганини сизди. Ҳаммаси — умрбод изтироб чекиб юришлари ҳам, шармандалик ботқоғига ботганида ҳам, индамай, шу хотинни суйгани ва уни кўнгли тилагани учун номус қилишлари ҳам фойдасизлиги равшан эди.

Деразаси тагида яна:

— Нон! Нон! Нон!— деган ҳайқириқ боягисидан баттарроқ янгради.

— Аҳмоқлар!— тишларини ғижирлатиб деди Энбо.

У катта ойлик олиши учун сўкканларини, қорни катта, ишەқмас, ишчилар очдан ўлаётган бир пайтда лаззатли таомларни еб, семираётган ифлос чўчқа, деб атаганларини эшитди.

Хотинлар ошхонани кўриб қолишди. Тустовуқ қовурилаётганини кўришлари ҳамано қарғишу лаънатлар ёғилиб кетди; ёглик қовурдоқ хиди оч қоринларни қитиқлаб, қийнай бошлаганиди, Пасткаш буржуйлар! Қани энди ичларига шампань виноси қуйиб, оғизларига дўлмаларни тиқиб ташласанг-у, ичаклари ёрилиб ўлишса!

— Нон! Нон! Нон!

— Аҳмоқлар! — такрорлади Энбо. — Нима, мен бахтли эканми?

Ҳеч нимани тушунмайдиган бу одамларга нисбатан унинг қаҳру ғазаби жўшди. У ўзининг катта маошини шуларнинг қалин териларига, уларнинг енгил, ғам-ғуссасиз муҳаббатларига жон деб алмашарди. Нима, у уларни ўз дастурхони ёнига ўтказиб, оғизларига тустовуқ қовурмасини тиқса, ўзи девор орқасига ўтиб, жонларни қучиб-эвса, аввал ишқибозлик қилган йигитлар устидан кулса бўлмайдими?

У лсақал бир кунгина ўз билганларича иш тутиб, қусурларини қондириб юрадиган, хотинларининг юзларига дағаллик билан туширадиган ва қўшни хотинлар билан дои олишадиган энг расво шумтака бўлиш учун ҳаммасидан — ўз тарбиясидан, бойлиги, дабдабаси, директорлик мансабидан воз кечган бўларди. У ҳам очликдан тиришиб ўлишни, оч қорни таталашидан боши айланганини сезишни истарди, — фақат ушалмаган армонини рўёбга чиқара олса бас. Ҳа! Қани энди молдек яшасанг-у, ҳеч ниманг бўлмаса, энг бад-башара, энг ифлос юккаш хотин билан жавдарзорда етаклашиб юрсанг ва шундан қувонсанг!

— Нон! Нон! Нон!

Энбо жаҳли чиқиб, шовқин-суронга жавобан жон-жаҳди билан қичқирди:

— Нон эмиш! Ҳамма гап шунда эканми, тўнқалар!

Мана, у доимо еб-ичиб юрибди, лекин кам азоб чекибдими? Хотинининг бевафолиги, аламли-армонли ҳаёти — ҳаммаси кўз олдига келди-ю, алами янгила-ниб, худди ўлим олдигаги ҳиқичоқ томоғига тиқилди.

Нон бўлгани билан ҳамма иш жойида бўлавермайди. Қайси бир телба одамларнинг бахти бойликнинг тўғри тақсимланишида, деб айтяпти? Қуруқ хаёлпараст — революционерларгина жамиятни вайрон этиб, янгисини барпо қилишлари мумкин, бироқ улар ҳар кимга озгина-озгина бойлик улашганлари билан инсониятга заррача ҳам шодлик бахш этолмайдилар, қайғу-ҳасратларини ҳам камайтиролмайдилар. Қайтага улар агар омма ўз инстинктини тинчгина қондиришдан эҳтиросларнинг интиҳосиз хуружига эркинлик бериш даражасига етсалар, оламда бахтсизликни кўпайтирадилар: унда фақат одамлар эмас, итлар ҳам умидсизликдан ўвиллаган бўларди. Йўқ! Ягона бахт туғилмасликдир, модомики туғилдингми, — майли, дарахт бўл, тош бўл, ҳатто ундан ҳам кичкина қум зарраси бўл — ўткинчилар оёғи остида қонга беланиб ётмайсан.

Чидаб бўлмайдиган ғам-ғуссадан Энонинг кўзлари шишиб кетди, қайноқ ёшлари ёноқларидан оқарди. Йўл қоронғиликда кўринмай қолди. Уй пештоқига тошлар ёғила бошлади. Энди унда бу оч кишиларга нисбатан адоват йўқ эди. У юрак-бағри қонга тўлиб, азоб чекаркан, кўз ёши аралаш ғўлдирарди:

— Тентаклар! Аҳмоқлар!

Бироқ бўш қориндан чиқаётган наъра супуриб, вайрон қилиб ташловчи қуюндек ҳаммасини босиб кетди:

— НОН! НОН! НОН!

VI

Катринанинг тарсакиси Этьенни ҳушига келтирди. У яна забастовкачилар олдига тушиб, бошлаб кетди; у бўғилиб, Монсуга даъват этаркан, бошқа, қалби қаъридан чиққан овоз, ақл-идрок садоси таажжубланиб, ундан: «Бу ишларнинг нима кераги бор?» — дея сўрарди. У бундай бўлиб чиқишини асло истамаганди-ку: бу қандай юз берди ўзи, совуққонлик билан ҳаракат қиламан, тартибсизликларга йўл қўймайман, деган ниятда Жан-Бартга йўл олган бўлса-ю, наҳотки қатор зўравонликлардан сўнг директор уйига ёпирилиб бориш билан кунни кеч қилса-я.

Ахир: «Тўхта!» деб қичқирган ўзи-ку. Лекин ав-

валига у Ширкат омборларини бутунлай вайрон бўлишдан сақлаб қолмоқчи эди холос: энди бўлса, директорнинг дангиллама уйи тошбўрон қилинганди, у бундан ҳам каттароқ фалокатнинг олдини олиш учун оломонни чалғитиш мақсадида қонуний бир қурбонни излаб, беҳуда уринди. Этьен кўча ўртасида ночор атрофга аланглаб турганида «Учоқ» қовоқхонаси остонасида турган бир одам уни чақириб қолди; қовоқхона бекаси қопқоқларни апил-тапил ёпиб, эшикни очиқ қолдирганди.

— Ҳа, бу мен.. Менга қара...

Бу Раснёр эди. Деярли ҳаммаси Икки юз зағизгон посёлкасида бўлган ўттиз чоқли эркак билан хотин яқинлашиб келаётган забастовкачиларни кўришиб, ўзларини ана шу қовоқхонага уришганди: булар эрталаб уйларидан чиқмаган кишилар бўлиб, ҳозир эса томоша қилиш учун келишганди. Столча теграсида Захария хотини Филомена билан, нарироқда, эшикка орқа ўгириб, юзини яшириб, Пьеррон билан унинг хотини ўтирарди. Аслини олганда ҳеч ким ичмаётганди, шунчаки қовоқхонага биқиниб олишганди холос.

Этьен Раснёрни таниб қолиб, нари кетди.

— Менинг борлигим сенга халақит беряптими?— деди қовоқхоначи.— Мен сени огоҳлантирувдим-ку, мана энди ўзларинг фалокатга йўлиқдиларинг. Хўп, майли, нон талаб қилаверинглар, нон эмас, қўрғошин оласизлар.

Шунда Этьен унга юзланиб, жавоб берди:

— Қўрқоқлар, биз жонимизни қурбон қилаётганимизда қўл қовуштириб, бамайлихотир томоша қилаётган қўрқоқлар,— ўшалар менга ҳақиқатан ҳам халақит беришяпти.

— Демак, сен очикдан-очик таламоқчи бўлибсан-да?

— Очимдан ўлсам ҳам охиригача ўртоқларим билан бирга бўламан.

Зардаси қайнаган Этьен ўлимига рози бўлган оломон ичига кириб кетди. Йўлда уч бола деразаларга тош отиб борарди; Этьен уларни бошлаб тепди-да, ўртоқларига ойна синдириш билан оғирларинг енгил бўлмайди, дея бақирди.

Бебер билан Лидия Жанленга етиб олишиб, ундан

сопқон отишни ўргана бошлашди. Улар ким кўп зарар етказишга бас бойлашиб, тош отишарди. Лидия уқувсизлик билан отган тош оломон орасидаги бир котиннинг бошига тегди, буни кўриб болалар ичаклари узилгудек бўлиб қизчадан кулишди. Уларнинг орқаларидаги скамейкада ўтирган Улмас бобо билан Мук бобо бу воқеаларни томоша қилишарди. Улмас бобо шишиб кетган оёқларини зўр-базўр қўзғатарди, юзига тупроқнинг акси урганди, бир оғиз ҳам гапирмаган вақтларидагидек чурқ этмасди: нима боисдан бир азобда бу ерга судралиб келганини бир худонинг ўзи билади.

Энди Этьеннинг гапига ҳеч ким қулоқ солмасди. Унинг ҳайҳайлашига қарамай, тошлар дўлдек ёғиларди, у эса ўзи гижгижлаган одамларнинг ҳаракатларидан яна ҳайрон бўлиб, гангиб қолган эди, одатда қўзғалишлари оғир бўлган бу одамлар ҳозир қутуриб, дарғазаб бўлиб кетган эди. Фламандларга хос қуюқ ва босиқ қон ойлар мобайнида қайнаб, ўз шафқатсизлигидан маст бўлиб, ақл нидосига қулоқ солмай, жиловсиз эҳтиросларга эрк берган эди. Этьеннинг юртида, жанубда, оломон тез ловиллаб кетса-да, лекин эҳтиёткорлик билан ҳаракат қиларди. У болтани тортиб оламан, деб Левак билан ғижиллашиб қолди, эр-хотин Маэларга ҳатто нима дейишини ҳам билмасди,— улар икки қўллаб тош отишарди. Уни кўпроқ аёллар — Левакнинг хотини, Мукетга ва бошқалар қўрқитарди: улар ўлгудай дарғазаб эди; учраган кишини бўғзидан олишга тайёр турган бу аёллар тишларини иржайтириб, оломон орасидан озгин гавдаси кўриниб бораётган Ашаддий кампир олқишлаётган итлардек акиллашарди.

Бирдан ҳамма жим бўлиб қолди, бир тасодиф оломонни ҳанг-манг қилиб, бир минутча нафасларини ичларига тушириб юборди, Этьен шунча уриниб, бунақа тинчитолмаганди. Маълум бўлишича, эр-хотин Грегуарлар ниҳоят нотариус билан ҳайрлашиб, рўбарўдаги уйга, директорникига ўтиб кетишаётган экан; улар шунчалик хотиржам бўлиб, ажойиб шахтёрларимиз итоткорлик билан бутун бир аср давомида оиламизни боқиб келишяпти-ку, энди бир ҳазил қилишгандир-да, дея шунчалик ишончлари комил эдики, ҳайратда қолган оломон худди осмондан тушгандек пайдо бўлиб

қолган хўжайинлари — чолу кампир Грегуарларга тегиб кетмасин, деб деразаларга тош отишни ҳам тўхтатишганди. Уларни боққа ўтказиб юборишди, чолкампир зинадан хотиржам кўтарилишиб, қўнғироқни босишди: ҳар хил нарсалар билан тўсиб ташланган эшикни ҳадеганда очаверишмади. Шу он ғазабланган шахтёрларга жилмайиб қараб, чўри Роза келиб қолди: у монсулик бўлганидан шахтёрларнинг ҳаммасини яхши танирди. Роза узоқ дукиллашиб, Ипполитни эшикни очишга мажбур қилди, эшик айна вақтида очилган экан: Грегуарлар кирар-кирмас яна тошбўрон бошланди. Узига келган оломон янада қаттиқроқ қичқирарди:

— Буржуйларга ўлим! Яшасин ижтимоий Республика!

Бу воқеа ёқиб қолгандек, Роза пешайвонда ҳам кулаверди.

— Улар яхши одамлар, мен уларни биламан! — дерди у қўрқиб кетган малайга қараб.

Жаноб Грегуар шляпасини яхшилаб илди, Грегуар хонимга оғир драп пальтосини ечишга кўмаклашаётиб деди:

— Албатта, аслини олганда, улар ёмон одамлар эмас, бақириб-бақириб, уйларига боришади-да, зўр иштаҳа билан овқатланишади.

Бу чоғ жаноб Энбо иккинчи қаватдан тушиб келаётганди. У ҳаммасини кўрганидан меҳмонларни одатдагича вазмин ва мулойимлик билан кутиб олди. Фақат оқариб кетган юзи қаттиқ ҳаяжонланганидан далолат бериб турарди. У ўз туйғуларини босди-да, бурчини бажаришга тайёр турган ишчан амалдорга айланди қолди.

— Биласизми, хонимлар ҳали қайтиб келишганича йўқ, — деди у.

Шунда Грегуарлар илк бор ҳаяжонланиб, ташвишга тушиб қолишди. Сесиль қайтиб келмапти-я! Бу шахтёрларнинг ҳазиллари тугамаса, Сесиль уйга қандай етиб келади?

— Мен уйга соқчилар қўйиш чораларини кўрмоқчийдим, — қўшиб қўйди жаноб Энбо, — лекин мен, афсуски, бу ерда ёлғизман, ҳатто менга тўртта солдат билан битта капрал юборинглар, деб малайни қаёққа

юборишни ҳам билмайман,— улар бу ярамаслар тўдасини тезда тарқатиб юборишарди.

Бу гапни эшитиб турган Роза яна ҳайқиб деди:

— Аҳ, бегим, улар ёмон одамлар эмас-ку, ахир.

Директор бошини сарак-сарак қилди, кўчадаги шовқин-сурон эса баттар авжга чиқиб, девор сувоқларини тошлар гурсиллаб уриларди.

— Мен улардан хафа эмасман, мен ҳатто уларни кечираман: фақат аҳмоқларгина бизни уларга ёмонликни раво кўришади, деб ўйлайдилар. Бироқ мен осойишталик учун жавобгарман... Ахир бир ўйлаб кўринг, айтишларича йўлларни жандармерия қўриқлаётган эмиш, мен бўлсам, эрталабдан бери битта ҳам жандармни тополмайман!

У гапдан тўхтаб, Грегуар хонимни олдинга ўтказиб юборди-да, давом этди:

— Марҳамат, хоним, меҳмонхонага ўтинг, бу ерда қолманг.

Лекин ертўла қаватидан кўтарилган ошпаз хотин уларни даҳлизда бир неча минут ушлаб қолди. У фиғони ошиб, мен тушлик овқатга оид ҳар қандай жавобгарликни зиммамдан соқит қиламан, чунки маршёнлик қандолатчи соат тўртга буюрилган варақини шу чоққача олиб келмади, афтидан, манави бандитлардан қўриқиб, йўлда адашиб қолган, ё бўлмаса уни йўлда талашган. У қаердадир бута орқасида оломон сомсаларни талашиб, нон талаб қилаётган уч минг бахти қора ана шу сомсаларни паққос туширганини ўз кўзи билан кўрибди. Ҳарқалай, у хўжайинни огоҳлантириб қўйди — революция туфайли овқатни бузиб қўйгандан кўра, уни оловга ташлаган яхши-да.

— Бир оз сабр қилиш керак,— деди Энбо жаноблари,— дарров ноумидликка тушмаслик керак, балки қандолатчи келиб қолар.

У меҳмонхона эшигини очиб, Грегуар хонимга юзланаркан, даҳлиздаги скамейкада ўтирган одамни кўриб ҳайрон қолди, аввалига қоронғи бўлгани учун уни кўрмаган эди.

— Ие, бу сизмисиз, Мегра? Нима бўлди?

Мегра ўрнидан турди: қоронғида унинг семиз, қўрқувдан оқариб, буришиб кетган юзи кўринди. Бақалок Мегранинг одатдаги бепарво қиёфасидан асар ҳам

қолмаган бўлиб, мулойимлик билан директор жаноблари, бу қароқчилар дўконимга ҳужум қилиб қолгудек бўлишса, сиздан ёрдам ва паноҳ истаб келдим, деб тушунтирди.

— Ўзим жонимни ҳовучлаб ўтирганимни ўзингиз ҳам кўриб турибсиз-ку, менда ҳеч ким йўқ,— жавоб берди Энбо.— Ўзингиз уйингизда қолиб, молингизни қўриқласангиз яхши бўларди.

— Э, ҳалиям дўконни темир тамбалар билан маҳкамлаб, бекитиб, уйга хотинимни қўйиб келдим.

Директор нафратини яширмай, шоша-пиша қўл силтади; топган қоровулини қара-ю, калтак еявериб, даққи бўлиб қолган нимжон бир кампир-да!

— Гапнинг қисқаси, сизга ёрдам беролмайман. Ўзингизни ўзингиз муҳофаза қилинг. Ҳозироқ уйингизга кетишингизни маслаҳат бераман, бўлмаса улар яна нон талаб қилишади... Эшитяпсизми?..

Ҳақиқатан ҳам яна шовқин кўтарилиб, Мегранинг назарида қичқириқлар орасида унинг ҳам номини айтишаётганга ўхшади. Уйга қайтишнинг асло иложи йўқ, дабдала қилиб ташлашлари мумкин... Иккинчи томондан, хонавайрон бўлишини ўйлаб, ақлдан озай дерди. У ойнабанд эшикка пешонасини тираганча қора терга ботиб қалтираб, фалокатни кутиб тураверди: бу орада Грегуарлар ниҳоят меҳмонхонага чиқишга қарор қилишди.

Энбо сохта хотиржамлик билан ўзини меҳмондўст мезбон қилиб кўрсатишга ҳаракат қиларди. Аммо у меҳмонларни ўтиришга таклиф этиб, чакки қилган экан: қулфланган, ҳар хил нарсалар билан тўсилган хона икки лампа билан ёритилган, ташқари ҳали ёруғ бўлишига қарамай, айниқса кўчадан шовқинсурон эшитилганда киши ўтакаси ёриларди. Юмшоқ мебеллар қўплигидан дим бўлиб кетган бу хонада оломоннинг ғазабли ҳайқириқлари янада қўрқинчлироқ ва даҳшатлироқ бўлиб эшитиларди. Зўрға қовушаётган гап-сўзлар айланиб, доимо ишчиларнинг ақл бовар қилмайдиган қаҳру ғазабига тақаларди. Энбо ҳайрон бўлиб, ўзим ҳечам бунақа бўлишини ўйламагандим, хабарчиларим бўлса, бир пақирга арзимайдиган одамлар экан, дерди,— у Раснёр шахтёрларга ёмон таъсир қиляпти, деб асосан ундан хафа эди.

Ҳарқалай, жандармлар келишади, — албатта, ахир уни ўз ҳолига ташлаб қўйишмас. Грегуарлар эса фақат ўз қизларини ўйлашарди: ширин қизлари жудаям қўрқоқ-да! Балки, кучер хавф-хатар борлигини кўриб, Маршьеннга буриб кетгандир?.. Чорак соатча кутишди — ҳаммалари кўчадаги шовқин-сурондан, тошларнинг аҳён-аҳёнда ёпиқ қопқоқларга урилиб тарақлашидан асабийлашарди. Аҳвол чидаб бўлмайдиган ҳолга келди, жаноб Энбо извошни кутиб олай, ҳам анави бақироқларни ўзим ҳайдаб юборай, дея энди кўчага чиқмоқчи бўлган эди, бирдан Ипполит кўринди.

— Бегим, бегим! Хоним шу ердалар, хонимни ўлдиришяпти! — деб қичқирди у.

Извош Рекийярнинг тор кўчасидан ўтаолмади, чунки, оломон кўчани босиб кетганди, шунинг учун Негрель Ширкат билан директор уйи орасидаги юз метрча масофани пиёда босиб ўтмоқчи, кейин эса қоровулхона ёнидаги боғ эшикчасини тақиллатсак, боғбонми ё бошқа биров эшитиб, эшикчани очар, деган умидда шу ёққа юрганди. Аввалига ишлар силлиқ кўчди, Энбо хоним билан ойимқизлар эшикчани тақиллата бошлагандиям, бироқ шу чоқ битта-яримта хўжайинлар келишди, дея шивирлаган бўлса керак, хотинлар жинкўчага ёпирилишди. Бу ҳол ишнинг пачавасини чиқарди; эшикчани очишмади. Негрель Энбо хонимни елкасига миндириб, девордан ошириб юборишга чандон уринди — бўлмади. Хотинлар зинага ёпирилишди: инженер ҳамроҳларини оқим олиб кетишидан қўрқиб, ҳамма томондан босиб келаётган забастовкачилар орасидан зинага ўтиб олишар, деган умидда Энбо хоним билан қизларни жон-жаҳди билан итара бошлади. Лекин унинг бу қилиги катта жанжалга сабаб бўлди: уларни ўтказишмади, одамлар нима гаплигини тушунмай, ҳатто бу ечинган хонимлар қаёқдан келиб қолишдийкин, дея ҳайрон бўлишиб, қийқира-қийқира қувлашга тушишди.

Шу чоқ ҳамма нарса шунчалик аралаш-қуралаш бўлиб кетдики, ҳамма гангиб турган бир пайтда мутлақо тушуниб бўлмайдиган бир воқеа юз берди. Люси билан Жанна зинага чиқиб олишди-ю, оқсочнинг қия очиқ эшигидан лип этиб кириб кетишди, Энбо хоним ҳам улар кетидан бир амаллаб ўтиб олди, улар кети-

дан Негрель кирди-ю, Сесиль биринчи бўлиб кириб кетди, деган комил ишонч билан эшикни тапбалади. Лекин Сесиль йўқ эди — у қўрқиб кетганидан уйнинг қарама-қарши томонига югуриб, ўзини хавф-хатарга урган эди.

— Яшасин ижтимоий Республика! Буржуйларга ўлим! Улим!..— деган қичқириқ янгради.

Баъзилар тўр парда юзини тўсиб турганидан Сесилни Энбо хоним, деб ўйлашди. Бошқалар бўлса, бу Энбо хонимнинг дугонаси, ишчилар ёмон кўради-ган кўшни фабрикантнинг ёшгина хотини, дейишди. Сирасини олганда бу гапларнинг аҳамияти йўқ эди — забастовкачиларнинг жигига теккан нарса унинг эгнидаги шоҳи кўйлак, мўйна манто, ҳатто шляпасига қадалган оқ укпар эди. Ундан атир анқирди, соати бор эди, ишламагани учун қўллари оппоқ бўлиб, кўмирга сира тегмаганди.

— Э, шошмай тур!— деб қичқирарди Ашаддий кампир.— Тўрларингни кўрсатиб қўямиз!

— Бу яшамагурлар нимамиз бўлса, ҳаммасини ўғирлашади,— гапни илиб кетди Левакнинг хотини.— Улар мўйнага ўралиб юришади, биз бўлсак совуққа қотиб ўламиз... Қани, келинлар, қип-яланғоч қилиб ечинтирамиз, яшашни ўргансин!

Мукетта Сесилга ташланди.

— Ҳа, ҳа, уни савалаш керак!

Шундан кейин хотинлар бир-биридан ўтиб тушиб, ярашмаган қилиқлар қилишиб, Сесилни ўрғиб олишди, улар қизга ўз жулдурларини кўрсатишиб, нима қилиб бўлса ҳам, қизнинг жигига тегишни истар эдилар. Унинг ҳам лойи бизнинг лойимиздан, албатта, бунақалар ёлғиз эмас, юз ясаниб-тусаниб юришсалар ҳам чириб битган оймчаларни кўрганмиз. Бас, адолатсизлик етар, эллик су бериб юбкасини ювдирадиган бу манжалақиларни ҳам ишчиларга ўхшаб кийинишга мажбур қилиш керак!

Даргазаб бўлган хотинлар қуршовида қолган Сесиль қалт-қалт қалтирарди, оёқлари чалишарди, шу боисдан тилига келиб қолган биргина гапни йигирма марта тасриқлаб такрорларди:

— Хонимлар, илтимос қиламан, менга тегманлар. Бирдан у бўғилиб қичқириб юборди: бўйинига алла-

кимнинг совуқ панжалари текканини сезди. Уни Улмас бобо ушлаб олганди, оқим қизни суриб, унинг олдига келтирганди. Чол, афтидан, очликдан сармаст эди; узоқ давом этиб келаётган очлик унинг ақлини ўтмаслаштириб қўйганди, унда қаёқдандир қаҳр-газаб пайдо бўлди-ю, у умрбод итоаткор бўлиб юриш одатини йиғиштириб қўйди. Кон газларидан бўғилиб, ўприлишлар даврида ўз ҳаётини хавф остида қолдириб, неча-неча ўртоқларини ўлимдан сақлаб қолган бу одам ҳозир шу қизни бўғиб ўлдириш васвасасидан ўзини тия олмади: қизнинг оппоқ бўйни нега диққатини жалб этганини Улмас бобонинг ўзи ҳам тушунтириб беролмасди. Майиб чол ўша куни бир оғиз ҳам сўз айтмади, у Сесилни томоғидан бўғар экан, ўз хотираларига берилиб кетгандек эди.

— Йўқ, йўқ! — бақир шарди хотинлар. — Лозимини тушириш керак! Корсонини очиш керак!

Уйдагилар кўчада бўлаётган бу синоатни кўрганлари ҳамон Негрель билан Энбо жаноблари шартта эшикни очди-да, Сесилни қутқаргани отилди. Лекин оломон боғ панжарасига ёпирилганидан ташқарига чиқишнинг иложи йўқ эди. Кураш бошланди, қўрқиб кетган Грегуарлар зинага чиқишди.

— Бобо, бу қизни қўйвор! Бу ойимқиз Пиоленадан келган! — қичқирди Маэнинг хотини Улмас бобога Сесилни танигач; хотинлардан бири унинг тўр рўминини юлқиб, йиртиб юборди.

Ешгина қизга қилинаётган бу хуружни кўриб қаттиқ ҳаяжонланган Этьен оломонни чалғитишга уринди. Қўққисдан миясига бир фикр келди: у Левакдан тортиб олган болтани силкитди-да, қичқирди:

— Меграникига, жин урсин!.. У ерда нон бор! Мегранинг дўконини дабдала қиламиз!

Этьен шундай деди-ю, қулочкашлаб болта билан дўкон эшигини урди. Унинг кетидан ўртоқлар — Левак ва бошқалар ташланишди. Бироқ хотинлар ҳамон тутақиб, Сесилга ёпишишарди: Сесиль Улмас бобо қўлидан Ашаддий кампир чангалига тушди, Лидия билан Бебер эса Жанлен раҳнамолигида Сесилнинг юбкаси тагига эмаклаб боришди. Сесилни ҳар тарафдан тортқилайверишди, кийимлари йиртила бошладди, лекин шу топ бир отлик пайдо бўлиб, оломон

орасини ёриб кирди-да, вақтида қочиб қололмаганларни савалай кетди.

— Ҳа, ярамаслар, ҳали бизнинг қизларни урадиган бўлиб қолдиларингми?!

Бу тушлик қилиш учун келган Денелен эди. У одан сакраб тушди-ю, Сесилнинг белидан қучди, иккинчи қўли билан отнинг юганидан тутиб, шундай зўр куч ва чаққонлик билан жонли понадек ёриб борардики, оломон четга чиқиб туришга мажбур бўлди. Панжара ёнидаги кураш давом этарди: бироқ у йўл-йўлакай аллакимни бошлаб эзиб, зина олдига ўтиб олди. Бу кутилмаган ёрдам Негрель билан Эбони катта хавфдан қутқарди — уларни ҳақорат қилиб, калтаклашаётганди. Ҳушидан кетган Сесилни кўтариб олган Негрель уйга кираётганида, баланд қомати билан директорни тўсиб турган Денеленга келиб теккан тош елкасини мажақлаб юбораёзди.

— Шунақами ҳали, — қичқирди у, — машиналаримни дабдала қилдиларинг, энди суякларимни синдирмоқчимисанлар!

У лип этиб ичкари кирди-да, эшикни ёлиб олди. Ёгоч қошқоққа тошлар ёғилиб кетди.

— Вой қутурганлар-ей! — давом этди у. — Яна бир лаҳза имилласам, нақ калламни қовоқдек ёриб ташлашарди... Улар билан гаплашиш ҳам бефойда. Улар ҳеч нарсани тушунмайди, уларни фақат калтаклаш керак.

Сесиль секин-аста ўзига кела бошлади, ота-онаси эса унга қараб, кўз ёшларини тўкишарди. Қизнинг ҳеч қаери оғримас, ҳатто бирор ери ҳам тирналмаган эди, фақат тўр рўмолини йиртиб юборишганди холос. Лекин қўрққанидан эси чиқиб кетган ошпаз хотин Мелани забастовкачилар Пиоленани тор-мор қилишганини айтиш учун югуриб келганини кўришганида Грегуарлар бутунлай ўзларини йўқотиб қўйишди. Мелани ҳам уриш-жанжал пайтида ҳеч кимга билдирмай қия очиқ эшикдан қочиб қолипти: унинг айтиб тугатолмаётган ҳикоясига қараганда Жанлен отган ягона тош бор-йўғи дераза ойнасини синдирган бўлса-да, худди деворни дабдала қилган чинакам тўп отишмасига айланган эди. Шундан кейин Грегуарнинг ҳамма ўй-хаёллари остин-устин бўлиб кетди: унинг уйини

яксон қилишипти, — демак, шахтёрлар уларнинг меҳнати ҳисобига ҳалол-пок яшагани учун унга қарши бош кўтаришипти-да?

Чўри хотин сочиқ билан атир олиб келди.

— Қизиқ, ахир улар ёмон одамлар эмас-ку, — такрорларди у.

Энбо хоним ранги докадек оқариб ўтирар ва ҳозиргина кўрган-кечирганларидан ўзига келолмас эди. Ҳамма Негрелни табриклаётганда, у унга қараб зўр-базўр жилмайиб қўйди. Еш инженерга ҳаммадан кўп Сесилнинг ота-онаси ташаккур айтишди, — энди никоҳ масаласи узил-кесил ҳал бўлди. Жаноб Энбо чуққ этмай хотинидан нигоҳини узиб, унинг ўйнашига боқди, шу нобакорни эрталаб ўлдирмоқчи бўлганди-я, кейин қизга тикилди; тез орада мана шу қиз уни рақибидан қутултиради. Энбо шошмасди: у битта нарсадан қўрқарди, — у ҳам бўлса, хотини энди малайни ўйнаш тутиб, янада тубанлашади-да.

— Хўш, нури дийдаларим, сизларга ҳеч нима бўлмадимми? — сўради Денелен қизларидан.

Люси билан Жанна ўтакалари ёрилган бўлишса ҳам, ҳаммасини кўрганликларидан хурсанд эдилар. Энди улар кулардилар.

— Жин урсин! — давом этди ота. — Роса гурбат кун бўлди-да! Агар сизларга сеп керак бўлса, ўзларинг ишлаб топишларингга тўғри келади: шунинг учун ҳозирданок қари оталарингги ҳам гамини енглар.

Денелен ҳазил қиларди, бироқ қизлари қучоғига отилишганда овози титраб, кўзлари жиққа ёшга тўлди...

Энбо жаноблари Денеленнинг хонавайрон бўлдим, деган гапини эшитиш билан чеҳраси ёришиб кетди. Вандам чиндан ҳам Монсу ихтиёрига ўтади ва фалакнинг гардиши билан унинг умиди ҳам рўёбга чиқади: у яна Пүлвение аъзоларининг ҳурмат-эътиборини қозонади. Ҳар сафар бошига фалокат тушганида, у буйруқларни қатъият билан бажарар, темир интизом жорий қилар ва унга даставвал ўзи итоат этар эди, — бу нарса шахсий ҳаётдаги бахтсизлиги учун бир мукофот бўларди.

Секин-аста ҳамма хотиржам бўлди, икки лампанинг майин нури ёритиб турган дим меҳмонхона жим-

жит бўлиб қолди. Шу топда кўчада нималар бўлаётган экан? Бақироқлар жимиб қолишганди, тош отилмасди, гўё узокдаги ўрмондан дарахт кесилётгандек бўғиқ тўқиллаган товушгипа эшитиларди. Эмбо билан меҳмонлар нима бўлаётганини билгилари келарди: ҳаммалари даҳлизга чиқиб, ойнабанд эшикдан қарай бошлашди. Хатто хонимлар билан ойимқизлар ҳам дераза қопқоқлари тирқишидан қарашарди.

— Анави ярамас Распёрни кўряписизми, ҳув ана, рўбарўмизда, ўзининг қовоқхонаси эшиги олдида турипти-ку? — деди Эмбо Денеленга мурожаат қилиб. — Менинг сезишимча, бу ишларда унинг қўли бор.

Бироқ Мегранинг дўконига болта урган Распёр эмас, Этьен эди. У, нима, дўкондаги моллар кўмир қазувчиларники эмасми, дея нуқул ўртоқларини чақирарди. Наҳотки Ширкатнинг бир оғиз гаши билан уларни узок вақтдан бери эксплуатация қилиб, очликдан силлаларини қуритаётган мана шу ўғридан ўз мол-мулкларини тортиб олишга ҳақлари бўлмаса? Секин-аста ҳамма директор уйини ўз ҳолига ташлаб, қўшни дўконни талашга киришиб кетди. Яна: «Нон! Нон! Нон!» деган хитоблар янгради. Шу эшик орқасида нон кўп! Даҳшатли очликдан уларнинг жазаваси тутганди, гўё ажал йўлда кутиб тургандек, ортиқ кутишга тоқатлари йўқ эди. Улар эшикка шу қадар қаттиқ ёпишишдики, Этьен болта билан битта-яримтасини чопишдан қўрқди.

Бу орада Мегра директорнинг даҳлизидан чиқиб, аввалига ошхонага бекинди: бироқ бу ерда ҳеч нима эшитилмасди. Нуқул назарида дўконини талон-торож қилишаётгандек бўлаверди: шундан кейин у юқорига кўтарилди-да, ҳовлидаги водокачканинг орқасига бекиниб олди. Бу ерда Мегра талончилик қилиб, сўкишиб-қарғашаётганларини аниқ эшитди: ҳақоратлар орасида ўзининг ҳам номи тилга олинаётганди. Демак, бу ёмон туш эмас: гарчи ҳеч нимани кўрмаса ҳам, дўконини яқсон қилишаётганини эшитаётганди, шу боисдан қулоқлари шанғиллаб кетди. Болта дўконга эмас, гўё нақ унинг юрагига уриларди. Афтидан, илгак чиқиб кетди, яна беш минутдан кейин дўкон забастовкачилар қўлида бўлади. Унинг хаёлида даҳшатли манзаралар аниқ-таниқ гавдаланди — мана, қа-

роқчилар босиб киришяпти, яшикларни бузишяпти, қопларни ёришяпти, ҳамма нарсани еб, ҳамма нарсани ичишяпти, бутун уйни остин-устин қилишяпти... Ҳаммаси таланди, ҳатто суяниб, қишлоқма-қишлоқ тиланчилик қилишга таёқ ҳам қолмади. Йўқ, уларга ҳамма нарсасини талатиб қараб туrolмайди, бундан кўра ўлгани яхши. Мегра бу ерга яширинганидан буён уйи орқасидаги деразаларнинг биттасидан нимжон хотинининг ноаниқ қорасини кўриб турарди — унинг ранги оқариб кетган бўлиб, калтакланган итдай эшикни тарақлатиб уришаётганларига қулоқ соларди.

Мегра ҳовлисининг этагида бир сарой бўлиб, унга директорнинг боғидан, дармиён девордан ошиб тушиш мумкин эди: у ердан эса том орқали деразадан кириш осон эди. Мегра шу йўл билан уйимга ўтиб олсам бўлади-ку, деган фикрдан қийналарди, — у уйдан чиқиб кетгани учун ўзини кечира олмасди. Эҳтимол, эшикни мебеллар билан маҳкамлаб олар: у мудрофаанинг бошқа қаҳрамонона воситаларини ҳам ўйлаб топганди — тепадан забастовкачилар устига қизиб турган ёғ қуйиш, ёнаётган лампамой сепиш мумкин эди. Қарама-қарши фикрлардан қаттиқ азоб чекаётганди — у мол-давлатни яхши кўрарди, айнаи чоқда кўрқувдан ўтакаси ёрилай дерди. Айниқса, болтанинг қаттиқ урилишини эшитиб, Мегра бирдан жазм этди. Хасислиги тутиб кетди, лоақал бир думалоқ нондан жудо бўлгунча хотини билан қоплар устида ўлган яхшироқ.

Шу чоқ ҳай-ҳайлаган овозлар эшитилди:

— Анавини қаранглар, қаран.лар-а, томда мушук юрипти!.. Ур мушукни!

Оломон сарой томидаги Меграни пайқаб қолганди. Баққол семиз бўлишига қарамай, қизишиб, ғайритабиий бир эпчиллик билан тахталарнинг синишига эътибор бермасдан, деворга тирмашган эди, энди бўлса томга қапишиб, деразага етиб олишга уринарди. Лекин том анча тик бўлганидан қорни халақит берарди, тирноқлари кўчиб кетганди. Бир амаллаб том тепасига чиқиб олай деганда, тошбўрон қилиб ўлдиришади, деган ваҳимадан дағ-дағ титрай бошлади, — кўзга кўринмаётган оломон пастда:

— Мушукни ур! Ур мушукни... Уни ўлдириш керак! — дея қичқирарди.

Бирдан унинг бармоқлари мадорсизланиб, сув тушадиган трубага ёпишди-ю, коптокдек шувиллаб тушди, дармиён девор тагига, кўчага шалоп этиб йиқилиб, боши супачага тегиб ёрилди. Миясининг қатиғи отилиб кетди. Мегра ўлган эди. Тепадаги хотини ранги оқариб, пешонасини ойнага тираганча, қараб турарди.

Аввалига ҳамма гангиб қолди. Этьсен тўхтади, қўлидаги болта тушиб кетди. Маэ, Левак ва бошқалар дўконни унутиб, ингичка қизил оқим сизиб тушаётган девор томон юзландилар. Қий-чув тинди, қоронғи тушаётган паллада ҳаммаёқ сув қуйгандек бўлиб қолди.

Лекин шу он яна шовқин-сурон бошланди. Қонни кўриб жазаваси тутган хотин-халаж олға ташланди.

— Демак, осмонда худо бор экан-да! Ҳа, тўнғиз, мана, кунинг битди-ку!

Улар ҳали совимаган мурдани ўраб олишди, марҳумнинг қонга ботган бошини кўрсатиб, ифлос тумшук, дея кулиб, мазах қилишди. Ризқ-рўзидан маҳрум бу шўрпешоналар марҳумнинг бетига юракларидаги қат-қат алам ва гиналарини тўкиб солдилар.

— Мен сендан олтмиш франк қарз эдим, ма, ол, ўғри!— қутуриб қичқирди Маэ хоним.— Энди сен қарз сўрасам, йўқ дея олмайсан... Тўхта! Тўхта ҳали! Сени боқинш керак ҳали!

У иккала қўли билан тупроқни таталаб, марҳумнинг оғзига лой тика бошлади.

— Ма, е, еб қол!.. Бизни жуда мужидинг, энди ўзинг е!

Бу қарғишлар ҳавода муаллақ бўлиб қолди, қимирламай чалқанча ётган марҳумнинг катта кўзлари эса тун пардасини ёяётган осмонга тикилганди. Маэ хоним унинг оғзига тикқан лой у бермаган ўша нон эди. Бугундан бошлаб у фақат ана шу нонни ейди. Қашшоқларни очликдан адою тамом қилишлари ҳам унга бахт ато этмади.

Бироқ хотинлар қайта-қайта ўч олишни истардилар. Улар мурда атрофида ургочи қашқирлардек айланишарди. Ҳар бири уни таҳқирлашга, бирор ножўя қилиқ билан аламдан чиқишга ҳаракат қиларди.

Ашаддий кампирнинг чинқириғи эшитилди:

— Уни худди мушукдек терисини шилиш керак!

— Ҳа, ҳа! Худди мушукдек!.. Мушукдек!.. Бу аблаҳ жуда кўп алам ўтказган бизга!

Мукетта унинг шимини еча бошлади, Левакнинг хотини оёғини кўтариб турди. Ашаддий кампир бўлса қоқсуяк қўллари билан мурданинг жонсиз олатига ёпишди ва ориқ белини қирсиллатиб, кучана-кучана уни сугурди. Осилиб қолган олат ҳадеганда узиларвермади, кампир икки марта зўр берди, ниҳоят қонга ботган жундор бир бурда гўштни кўтариб, силкитди-да, гердайиб кулиб, деди:

— Мана у, мана у!

Жирканч ўлжани кўрганлар қарғашга тушишди:

— Ҳа, аблаҳ, энди қизларимизни бадном қилиб бўйсан!

— Ҳа, албатта, энди бизларни хўрлай олмайсан, бир бурда нон учун хотинларнинг этагини кўтаролмайсан.

— Ҳэй, менга қара, мен сендан олти франк қарз эдим, закалатини олиб қўймайсанми? Борди-ю, ҳалиям қўлингдан келса, мен розиман!

Бу ҳазил аламли хоҳлашларга сабаб бўлди. Улар қонга беланган бир парча этни худди бошни пачоқланган захарли илондек бир-бирларига кўрсатишарди, улар гўё шунинг дастидан кўп азоб чекиб, ниҳоят уни эзиб ташлашгадек эди: мана, у қимир этмай ётипти, у уларнинг чангалида. Улар унга тупуришар, тишларини ғижирлатишар, ғазаб-нафрат билан такоррлашар эдилар:

— Энди у ҳеч нима қилолмайди! Ҳеч нима!.. У энди эркак эмас, энди ҳеч нимага ярамайди... Энди кўмиладиган ерида чириб ётсин!

Ашаддий кампир этни таёқ учига қўндириб, худди байроқдек кўтариб олди: у йўлдан югурарди, кетидан эса қий-чув қилиб, тўзиб, бошқа аёллар чопишарди. Гўшт дўқонидаги шалвиллаб ётган бир парча этни эслатувчи хунук олатдан қон томиб турарди.

Мегра хоним ҳамон тепадаги дераза ёнида қимир этмай ўтирарди: қуёшнинг сўнгги нурлари тушиб, ловиллаётган ойна унинг қонсиз юзини акс эттирарди,— гўё у кулаётгандай эди. Эри доимо хиёнат қилиб келган муштипар, эртадан-кечгача ҳисоб-китоб дафтарида бошини кўтармайдиган бу хотин дераза олтидан бир тўда аёллар шаҳватпараст махлуқ олатини таёқ учига илиб ўтишаётганда ҳақиқатан ҳам кулган.

дир. Бу даҳшатли ишни кўрганларнинг аъзойи бадани муз-муз бўлиб кетганди. На Маэ, на Этъен ва на бошқа эркаклар аралашшига улгурди — қутурган хотинларнинг шиддатли ғазаби гўё уларни ўз жойларига михлаб қўйгандек эди. «Учоқ» қаҳвахонаси эшигидан ғазабдан ранги оқариб кетган Раснёр ва таажжубланган Захария билан Филоменанинг бошлари кўришиб турарди. Қария Улмас бобо билан Мук ҳўмрайганларича бошларини чайқашарди. Фақат тирсаги билан Беберни туртиб, Лидияни бошингни кўтар, дея қистаётган Жанлен ҳиҳилаб куларди. Хотинлар эса энди орқаларига қайтиб, директор уйининг деразалари тагидан чошиб ўтишаётганди. Хонимлар билан оймқизлар дераза қопқоқларининг тирқишларидан қараб туришарди; улар уй муюлиши орқасида юз берган воқеаларни яхши кўра олмасдилар, бунинг устига қоронги ҳам тушиб қолганди.

— Таёқлари учидаги нима? — сўради юрак бетлаб Сесиль.

Люси билан Жанна бу қуённинг териси бўлса керак, дейишди.

— Йўқ, йўқ, — пичирлади Энбо хоним, — улар, афтидан, колбаса бўлимини талашибди, шекилли, бу чўчқа гўштига ўхшайди.

Шу ондаёқ у сесканиб, тилини тишлаб қолди. Грегуар хоним уни тиззаси билан туртиб қўйганди. Иккови ҳам хайратдан оғизларини очиб, анграйиб қолишганди. Ранглари қув ўчган қизлар қоронғиликда кўзга чалинмай қолган қонли нарса кетидан бақрайиб қарашаркан, бошқа савол беришмади.

Этъен яна болтани кўтарди. Бироқ ҳамма ҳам бўлганича бўлганди. Мурда йўлни тўсиб, дўконни кўриқлаб ётгандай эди. Кўплар тисарилди. Ҳамма гўё ўбдон тўйиб, тинчиб қолгандек эди. Маэнинг қовоғидан қор ёғарди: кўққисдан кимдир унинг қулогига: «Қоч!» дея шивирлади. У ўғирлиб қаради-да, доимо эркакларнинг эски куртқасини кийиб юрадиган Катринани таниди: қизи ҳансирарди, бошдан-оёқ қоп-қора эди. Маэ қизини итариб юборди, унинг гапини эшитгиси келмай, абжагингни чиқариб қўяман, деб пўписа қилди. Шундан кейин Катрина ҳафсаласи пир бўлиб,

қўлини силтади, бир лаҳза иккиланиб турди-да, таваккал қилиб, Этьен ёнига югуриб келди.

— Қоч, қоч, жандармлар! — деди унга.

Этьен ҳам сўкиб, уни ҳайдади: Катринанинг тарсақиси эсига тушиши билан ёноқлари қизариб кетди. Лекин Катрина бўш келмади, у Этьенни болтани ташлашга мажбур этиб, ғайритабий бир куч билан йигитни икки қўллаб судраб кетди.

— Жандармлар шу ерда деяпман сенга!.. Қулоқ сол, агар билгинг келса, айтай, бориб уларни бу ёққа бошлаб келган Шаваль бўлади. Кўзимга балодай кўринди, шу боисдан сенинг олдингга келдим... Қоч, сени қамашларини истамайман.

Тош йўл отларнинг оғир дукур-дукуридан ларзага келаётган бир пайтда Катрина Этьенни судраб кетди. «Жандармлар! Жандармлар!» деган қичқириқлар янгради. Гўё бўрон туриб, кишиларни учириб кетгандай йўл бир неча минут ичида чиннидай тозаланди. Йўлда фақат Мегранинг мурдаси қорайиб турарди. «Ўчоқ» қаҳвахонаси ёнида ёлғиз Раснёр қолди: у бениҳоя енгил тортиб, қурулнинг енгил ғалабасидан шодланди. Ҳувиллаб қолган Монсунинг битта ҳам чироқ ёқилмаган жимжит, зич ёпилган дераза қопқоқлари орқасида кишилар қўрқувдан қалтирашар, қора терга ботиб, бош чиқаришга ҳам чўчишар эдилар. Текислик қуюқ қоронғиликка чўмганди: баланд домна ва кокс печларигина гўё ёнғиндек, фожиали кўкни ёритарди. Жандармлар отларини йўрттиришиб яқинлашарди, улар зўрға кўринаётган бало-қазодай ғуж бўлишиб посёлкага кириб келишди. Улардан кейин, улар соқчилигида ниҳоят маршъенлик қандолатчининг изовиши ҳам етиб келди. Аравадан тушган пазанда йигит хотиржамлик билан варақиларни олиб қўя бошлади.

ОЛТИНЧИ ҚИСМ

I

Февралнинг биринчи ярми ўтди: қиш борган сари чўзилиб, қаҳратон совуқ камбагалларни қақшатарди. Маъмурлар — Лилль префекти, прокурори, генерали — яна шаҳар атроф йўллари айланадиган бўлиб қолишди. Жандармлар етишмади шекилли, Монсуга бир полк солдат келди: Боньидан тортиб, то Маршьенгача ҳамма ерга постлар қўйилди. Қуролланган отрядлар шахтани қўриқлашарди, ҳамма машина ёнида солдат турарди. Директор уйи, Ширкат омборлари ва ҳатто баъзи бадавлат одамларнинг уйлари олдига соқчилар қўйилди. Тош йўлдан фақат патрулларнинг қадам товушлари эшитиларди. Ворёдаги кўмир уюми олдида ўқтин-ўқтин шиддатли совуқ шамол эсиб турадиган бўм-бўш текисликдаги қўриқчига ўхшаб, эртаю кеч соқчи турарди; ҳар икки соатда, гўё ганим мамлакатидагидек, қоровулларнинг қичқирғи эшитиларди:

— Ким у келаётган?.. Пароль!

Ҳеч қаерда иш бошланмади. Аксинча, забастовка бадтар ёйилиб кетди: Кручинада, Мируда, Мадленада кўмир қазиб чиқариш тўхтатилди, Фетри-Кантелда, Ғалаба шахтасида худди Ворёдагидек ишга чиқувчиларнинг сони кун сайин камайиб борарди: ҳатто шу чоққача ишлар яхши бораётган Сен-Томада ҳам ишчилар етишмаётгани сезила бошлади. Энди бу кўмир қазувчиларнинг иззат-нафсини таҳқирлаган қуролли кучларга нисбатан уларнинг индамай қарши-

лик кўрсатиши эди. Лавлаги экиладиган ерлар ўрта-сидаги посёлкалар бўм-бўш бўлиб қолгандек туюларди. Ҳеч ким кўринмас, кўчада ёлғиз бораётган ишчини тасодифан учратиб қолиш мумкин: у ҳам бўлса қизил шим солдатлар ёнидан ўтаётганида кўз қирини ташлаб, бошини эгиб оларди. Ана шу ваҳимали сукунатда, қуролга индамай қаршилиқ кўрсатишда сохта бир итоаткорлик, тутқунликдаги ваҳший ҳайвоннинг мажбурий ва ноилож ювошлиги сезилиб турарди; ўз нигоҳини ўргатувчисидан узмайдиган бу ҳайвон эгаси орқасини ўгириши билан унга ташланиб, бўғизини ғажиб ташлашга тайёр эди. Ширкат Правлениясидагилар иш тўхтаб қолиши оқибатида хонавайрон бўлишдан қўрқиб, Бельгия чегарасидаги Боринаждан шахтёрлар ёллаш тўғрисида ҳам гапиришди-ю, лекин журъат этолмай туришарди: чунки кураш тўхтагани, кўмир қазувчилар уйларига бекиниб олишган, бўм-бўш шахталарни эса солдатлар қўриқлашарди.

Ўша даҳшатли куннинг эртасигаёқ бирдан ҳаммаёқ сув қуйгандек бўлди қолди: бу жимлик замирида шундай бир ваҳима яширинган эдики, етказилган шикастлар, шафқатсизликлар ҳақида иложи борича камроқ гапиришга ҳаракат қилишарди. Тергов Мегранинг ўзи йиқилиб тушиб ҳалок бўлганини аниқлади, бироқ мурдани ким бунчалик расво қилганини билиш мумкин бўлмади: бу хусусда ҳар хил ривоятлар тўқилди. Ширкат ўзи кўрган зарарни тан олмади, Грегуарлар ҳам можароли судда қизларининг гувоҳлик бериб, ўзини ўзи бадном қилишини асло исташмасди. Шунга қарамай, тасодифий кишилардан бир нечаси қамоққа олинди: бунақа пайтда бўладиганидек, улар эсанкираб, қўрқиб кетишди, ҳеч нимани билишмасди ҳам. Янглишиб, Пьерронни қамоққа олишди ва қўлларига кишан уришиб, Маршённга олиб келишди, ўртоқлари анча вақтдан кейин бу воқеани эслаб, кулиб юришди. Раснёрни ҳам икки жандарм олиб кетишига оз қолди. Маъмурият эса ишдан бўшатирилганларнинг рўйхатини тузиш билан кифояланди ва ана шу рўйхатга мувофиқ жуда кўп ҳисоб дафтарчалари тарқатилди: биргина Икки юз зағизгон посёлкасидан Маэ, Левак ва яна ўттиз тўрт киши ишдан бўшатилади. Ҳамма тар-

тибсизликлар куниёқ ғойиб бўлган Этьендан қаттиқ ғазабланарди: ҳар қанча қидиришмасин, бари бир, изига туша олишмади. Шаваль кўролмагани учун уни чаққан эди; у бошқаларнинг номини айтишдан бош тортди: ота-онасини қутқариб қолмоқчи бўлган Катрина сотиб қўйма, деб ялиниб-ёлборганди. Кунлар бирин-кетин ўтарди: ҳали ҳеч нима ниҳоясига етмаганди, шу боисдан одамлар юракларини ҳовучлаб, оқибатини кутишарди.

Шу вақтдан бошлаб монсуликлар ҳар кеча чўчиб уйғонишарди: қулоқларида хаёлий бонг садоси янгарди: ҳатто порох ҳидини сезишаётгандек бўлишарди. Аммо черковнинг янги руҳонийси, аббат Ранвье-нинг дуо-ибодатлари уларнинг силласини қуритарди; кўзлари ёниб турадиган ориққина аббат Ранвье аббат Жуарнинг ўрнига келганди. Ҳамма билан тинч-тотув, аҳил яшашдан бошқа нарсани ўйламайдиган бу кўркам ва юмшоқ одамнинг мулойим табассумини кўриш нақадар амри маҳол эди! Ахир бутун округнинг шармандасини чиқармоқчи бўлган ярамас қароқчиларни ўз ҳимоясига олган шу аббат Ранвье эмасми? У забастовкачиларнинг қабиҳ ишларини оқлаб, бутун маъсулиятни буржуазияга қўйди-да, унга қаттиқ ҳужум қилди. Ҳаммасига буржуазия айбдор экан: у ўз манфаати йўлида черковни азалий ҳуқуқларидан маҳрум қилиб, дунёни адолатсизлик ва азоб-уқубатларнинг лаънати ўлкасига айлантирибди: ҳамма англашилмовчиликлар шу туфайли келиб чиқаётганмиш; мака шу буржуазия ўзининг имонсизлиги туфайли черков бағрига, илк христианларнинг биродарона одатларига қайтиш ўрнига дунёни даҳшатли ҳалокатга гирифтор қилмоқчи. Аббат ҳатто бойларга дўқ қилишга ҳам журъат этди: агар улар бундан буён ҳам худодан келган ваҳига қулоқ солмайдиган бўлсалар, унда қодир худо ўз қудратини намойиш қилиш учун камбағаллар томонига ўтиб, адашган динсизларнинг мол-мулкани тортиб олса-ю, бу дунёнинг гадоларига бўлиб берса ҳам ажаб эмас. Художўйлар ваҳимага тушиб қолишди, нотариус бу гаплар социализмнинг ғирт ўзи, деб эълон қилди; ҳамманинг назарида бебошлар тўдаси бошида турган бу руҳоний қўлидаги бутни ўйнатиб, бир ҳамла билан 89-йилги буржуазия жамятини йўқ қилиб юборадигандай эди.

Бу гаплардан хабар топган жаноб Энбо елкасини кисиб қўйди-да, деди:

— Агар жигимизга тегаверадиган бўлса, епископ бизни ундан қутқаради қўяди-да.

Бутун текислик бўйлаб ваҳима тарқалган пайтда Этьен ер остида, Жанленнинг Рекийяр шахтасидаги маконида яшарди. Этьен шу ерга бекинганди. Унинг шунчалик яқинда, ташландиқ шахтанинг эски тормагида эканлигини ҳеч ким ўйламаганди: бундай жой шу қадар таҳликали эдики, ҳеч ким Этьенни Рекийярдан изламади. Тепадаги минораларнинг лиқиллаб қолган стропилалари орасидан ўсиб чиққан олхўрисимон дарахтлар билан дўлона буталари ўра оғзини бекитиб турарди; пастга тушишга ҳеч кимнинг юраги дов бермасди; тушиш учун ҳадисини олиш керак эди: рябина илдизларига осилиб, дадил пастга тушиш, бузилмай қолган зиналарга етиб олиш лозим эди. Бошқа тўсиқлар ҳам Этьенга қўл келганди: шахта тармоғидаги иссиқдан киши бўғиларди, юракни ҳовучлаб, бир юз йигирма метр пастга тушиш керак, сўнг йўлакнинг сурилган деворлари орасидан роса чорак мил масофани чалқанчасига ўтиш лозим,— шу машаққатлардан кейингина жиноятчининг озиқ-овқат билан тўла инига етиш мумкин эди. Этьен ҳузур қилиб яшарди; у ер остидан қораарча ароғи, бир парча қоқбалиқ ва бошқа емишлар топди. Катта бир қучоқ пичан унга ажойиб тўшак ўрнига ўтарди; ҳавоси ҳаммомдагидек бир меъёрда иссиқ бўлиб, елвизак сезилмасди. Фақат бир нарса — чироқ етишмасди. Унга ташимачи бўлиб олган, жандармларнинг жигига тегиб роҳат қиладиган Жанлен шумтакадек эҳтиёткорлик ва ҳушёрлик билан унга ҳамма нарсани, ҳатто лаб бўёғига етказиб берарди-ю, лекин шам тополмаганди.

Бешинчи кундан бошлаб Этьен чироқни фақат овқатланадиган пайтдагина ёқадиган бўлди. Оғзидагини қоронғида ютадиган бўлса, томоғига тикиларди. Заррача ҳам ёруғлик кўринмайдиган бу бениҳоя тун уни ҳаммасидан ҳам кўпроқ қийнарди. У тинчгина ухларди, уни нон билан таъминлаб туришипти, жойи иссиқ; лекин бу қулайликларга қарамай, қоронғилик ҳеч қачон унинг юрагини бунчалик қаттиқ қисмаганди. Қоронғилик уни жинни қилаёзганди. Бу нима

ўзи? Коммунистик назарияларга эътиқод қўйса-ю, ўзи ўғирланган нарсалар билан кун кўрса-я. Ёшлигиданоқ қон-қонига сингиб кетган инжиқлик яна қўзиб қолди; у қора нонга қаноат қилиб, кунлик емишини камай-тирди. Лекин нима қилиш керак? Ахир яшаши керак, ҳали бурчини бажаргани йўқ. У яна совуқ кунда оч қоринга қораарча ароғидан ичиб, кайфи ошгач, пичоқ билан Шавалга ташланганини эсларди-ю, етти номуси ерга кириб, пушаймон бўларди. Шу қилмишидан юраги орқасига тортиб кетарди, шу чоққача асло бундай даҳшатга тушмаганди. Бу энди ирсий иллат бўлиб, авлоддан-авлодга ўтиб келаётган бадмастлик оқибати эди, бундай пайтда киши бир томчи ичкилик ичса, бас, одам ўлдиришдан ҳам тоймайди. Наҳотки у умрини қотиллик билан тугатса? Этьен хавф-хатарсиз жойга, тинчгина чуқур ер остига тушиб олди-ю, зўравонликлар жонига тегиб, кўз очмай икки кун тошқотиб ухлади; лекин у нафратдан қутула олмади, ҳаммаёғи шол-шол бўлиб, оғзи тахир эди, ўлгудай мастбозликдан кейин уйғонган кишидек боши лўқилларди. Шу йўсин бир ҳафта ўтди. Унинг аҳволидан хабардор қилинган Маэлар унга шам топиб жўната олишмади; ҳатто овқат пайтида ҳам чироқ ёқмасликка тўғри келди.

Энди Этьен кун бўйи пичан устида чўзилиб ётарди. Илгарилари ҳаёлига ҳам келтирмаган ноаниқ фикрлар энди Этьенни эзарди. Уни эзаётган нарса ўртоқларидан ўзининг устунлигини англаши, саводлироқ бўлаборган сари ўзидан фахрланиш туйғуси эди. Этьен ҳеч қачон бунчалик кўп фикр-мулоҳаза юритмаганди. У ўзидан: «Нима учун мен шахталарга қилинган шиддатли ҳужумнинг эртасигаёқ ҳамма нарсага бунчалик нафрат билан қарайдиган бўлиб қолдим?» — деб сўрарди-ю, лекин бу саволга жавоб беришга журъат этолмасди: эҳтиросларнинг тубанлиги, инстинктларнинг қўполлиги, текисликда қутурган ялангоёқларнинг сассиқ ҳидлари ҳақидаги хотиралар монелик қиларди. Этьен қоронғиликдан азиат чекаётганига қарамай, посёлкага қайтиш пайти келишини ўйлаб, юраги шувилларди. Шу бадбахт одамларнинг тўп бўлиб, умумий бир тоғора атрофида яшаши нақадар даҳшат! Сиёсат тўғрисида жиддийроқ гаплашишга биттаям одам

бўлмаса, молдек: яшаса, димогни ёрадиган пиёздоғ ҳиди аралашган уша бадбўй хаводан нафас олса! Этьен уларнинг дунёқарашини кенгайтирмоқчи, уларни инсонларча яшаш даражасига кўтармоқчи бўлди: буржуазияникидан афзалроқ тарбия беришга, уларни хўжайини қилиб қўйишга интилди; аммо бу ниятларга етиш нақадар қийин! У бўлса, ана шу очарчиликда галабага эришиш учун мардлик етишмаётганини ҳис этаётганди. Мен уларнинг раҳнамосиман-ку, деган фикрдан кибрланиш, доимо уларни ўйлаш зарурати бир неча муддатдан бери уни қизиқтирмай қўйганди; шу йўсин унинг миясида ҳам ўзи ўлгудек ёмон кўрадиган буржуйининг ўйларига ўхшаган фикрлар ўрнашиб қолди.

Бир куни кечқурун Жанлен унга извош шамдонидан ўғирланган қиттайгина шам олиб келиб берди; бу нарса Этьеннинг кўнглини кўтариб юборди. Қоронғилик унинг жонини ҳиқилдоғига келтириб, миясини ғовлатиб юборганида, у гўё ақлдан озаётгандек бўларди-ю, бир лаҳзага шамни ёқарди; сўнг миясини ғовлатган фикрларни ҳайдаб, шамни ўчиради, чунки у нондек зарур бўлиб қолган бу шамни асрарди. Қулоқларга жимликнинг зинғиллаши ўрнашиб қолганди; у фақат каламушларнинг югур-югурини, эски ходаларнинг қисир-қисирини, оҳиста шитирлашни — ўргимчакнинг ин солишини эшитарди. Этьен кўзларини катта очиб, ана шу зерикарли сукунатга тикиларкан: «Ўртоқларим юқорида нималар қилишяптийки?» деган фикр миясига қайта-қайта келарди. Курашдан чекинишчи унинг назарида бориб турган пасткашлик эди. Гарчи у ҳозир бекиниб юрган бўлса ҳам, озодликда бўлиш, маслаҳатлар бериш ва ҳаракат қилиш учун бекиниб юрибди. Узоқ мушоҳада қилиш унинг шуҳратпарастлигини қитиқлаб қўйгандек бўлди. Энг яхши кунлар умидида у Плюшар ўрнида бўлишни, ишни ташлаб, нуқул сиёсат билан шуғулланишни, аммо ақлий меҳнат кишини бутунлай қамраб олиб, ниҳоятда хотиржам бўлишни талаб этади, деган баҳона билан бир ўзи озода хонада яшашни истар эди.

Иккинчи ҳафтанинг бошида Жанлен Этьенга жан-дармлар сизни Бельгияда бекиниб юрипти, дея гумон қилишяпти, деб қолди; шундан кейин Этьен қоронғи

тушиши билан инидан чиқишга қарор қилди. У аҳволни кўриб-билиб, саркашлик қилишни давом эттириш керакми, йўқми, шуни аниқламоқчи бўлди. У шахсан ўйинни ютқазиб қўйдиқ, деб ҳисобларди; у ҳатто забастовкадан олдин ҳам бирор натижага эришишларига ишонмаганди, у шунчаки бошланган воқеаларга ён берганди, энди бўлса, исёнкорликдан маст бўлиб, аввалги шубҳаларига қайтди, Ширкатнинг ён бериши мумкинлигидан бутунлай умид узди. Бироқ бу умидлари пучга чиққанини ҳатто ўзи ҳам ҳали тан олгиси келмасди, энгилиш оқибатида келиб чиқадиган фалокатлар, барча бахтсизлик учун зиммасига тушадиган оғир масъулиятни ўйлаши билан жигар-бағри хун бўлди. Забастовканинг тугаши — унинг роли тамом бўлишини билдирмасмикин, обрўсига пугтур етказмасмикин, яна ўша шахтанинг нохуш ҳаёти, посёлкадаги жирканч ҳаётга қайтиб бормасмикин? У мутлақо ҳалоллик билан, сохта, қабиҳ ниятларсиз яна йўқотган эътиқодини тиклашга зўр берди, ҳали ҳам қаршилиқ кўрсатиш мумкин, капитал меҳнатнинг қаҳрамонона фидойилигига тоб бера олмайди ва пировардида кулаб тушади, деган фикрни ўзига исботлашга уринди.

Ҳақиқатан ҳам хонавайронлик узоқ гумбурлаб, бутун округда акс садо берди. Эъён кечаси, инидан чиққан қашқирдек зулмат кўйнидаги қишлоқни кезиб юраркан, бутун текислик бўйлаб хонавайрон бўлганларнинг дод-фарёдларини эшитаётгандек эди. У йўлдан бораркан, йўлнинг икки томонида тўхтатиб қўйилган, ёпилган заводларнигина кўрарди; бинолар кулранг осмон остида чирирди. Ҳаммадан ҳам қанд заводлари кўпроқ азият чекканди: Отон заводи билан Фовелль заводи аввалига ишчилар сонини қисқартирди, сўнг бирин-кетин ёпилиб қолди. Тегирмонларнинг охирги тоши шу ойнинг иккинчи шанбасида тўхтаган эди, конлар учун пўлат арқонлар ишлаб чиқарадиган Блез заводи эса ишсизликдан тамомила хонавайрон бўлганди. Маршьенн атрофларидаги аҳвол ҳам кун сайин ёмонлашиб борарди: Гажбуа шиша заводининг ҳамма ўчоқлари ўчирилганди, Сонневилль машинасозлик устахоналарида ишчиларни қисқартириш тўхтовсиз давом этарди, чўян қуйиш заводидеги учта домна

печидан биттасигина ёниб турарди, уфқда кокс печларнинг битта ҳам батареяси йилтилламасди. Икки йилдан буён айниқса кучайиб бораётган саноат танглиги туфайли рўй берган Монсу кўмир қазувчиларининг забастовкаси аҳволни янада ёмонлаштириб, ҳалокатни тезлаштирарди холос. Аввалги танглик — Америкадан бўладиган буюртмаларнинг тўхтатилиши, қайта ишлаб чиқариш оқибатида капиталнинг туриб қолиши устига янги кутилмаган қийинчилик туғилди: ҳамон ишлаб турган бир неча буғ қозонлари учун кўмир етишмай қолганди, ҳақиқий ишканаллик шунда эдики, машиналарга емиш етишмасди, шахталар бошқа емиш етказиб бермасди. Ишларнинг умуман ёмонлигидан кўрқиб кетган Ширкат кўмир қазиб чиқаришни камайтириш ва ўз ишчиларини очликка маҳкум қилиш билан ўз оёғига болта урди, — декабрдан бошлаб бир бўлак кўмирга зор бўлди, омборлари бўшаб қолди. Ҳаммаси тўхтаб қолган, фалокат олис жойларгача бориб етган, бахтсизлик кетидан бахтсизлик келаётган эди: саноат корхоналари бир-бирларини босиб-янчиб қулар, шу қадар тезлик билан кетма-кет фалокат юз берардики, уларнинг оқибати Лилль, Дуэ, Валансьенн каби қўшни шаҳарларга таъсир қилмай қолмади; у ерлардаги банкирларнинг қочиб кетиши жуда кўп хонадонларнинг уйини куйдирди.

Этьен йўл муқолишларида дам-бадам тўхтар ва назаарида муздек тунда қолган-қутган нарсаларнинг қулаб тушишини эшитаётгандай бўларди. У тун ҳавосидан тўйиб-тўйиб нафас олар, вайронгарчиликларни кўриб, қувнар эди; у эски дунё вайроналари устида қуёш нур сочадиган кун келади, деб умид қилар эди; ўшанда бойлар бўлмайди, бўрон қутуриб эсади-ю, ҳамма баробар бўлиб қолади. Лекин ялпи талотўп бўлганда уни асосан Ширкатга қарашли конлар тақдири қизиқтирарди. У яна йўлга тушди, шахтадан-шахтага ўтди, янги вайронгарчиликларни кўрса, қувонди. Шахталар ҳувиллаб қолган сари ўпирилишлар яна ҳам зўр куч билан давом этарди. Миру шахтасининг шимолӣ йўлаги устидаги тупроқ шу қадар чўккандики, Жуазелга олиб борадиган йўл худди зилзила пайтидагидек юз метрча жойи ўпирилиб тушганди. Ана шу воқеалардан саросимага тушган Ширкат савдолашиб

Ўтирмасдан заминдорларга барбод бўлган экинзорлар ҳақини тўлади. Кручина билан Мадленадаги жуда бўш тоғ жинслари кун сайин кўпроқ ўпирилиб тушарди. Ғалаба шахтасида икки штейгер тупроқ тагида қолиб кетипти, Фстри-Кантель шахтасини сув босипти, деган миш-мишлар тарқалди; Сен-Тома йўлагининг бир километрча жойига қайтадан тиргак қўйиш керак эди, чунки чириб қолган устунларнинг ҳаммаси синиб кетаётганди. Шундай қилиб, зиён соат сайин ошиб борарди; бу эса акционерлар оладиган фойдасини очиқ-ойдин совуриш бўлиб конларнинг тезда вайрон бўлишига олиб келарди; пировардида бу ҳол юз йил мобайнида юз марта кўпайган машҳур Монсу акцияларини ўз қомига тортмай қолмасди.

Кетма-кет юз бераётган фалокатлар Этьенда яна умид туғдирди, у уч ойдан бери давом этаётган қаршилиқ ахири бу махлуқни, ўзининг сирли макони қаърида арзанда бўлиб ётган бу ҳайвонни ҳалок этишига ишона бошлади. Этьен Монсудаги тартибсизликлар Париж матбуотида кўп шов-шувларга сабаб бўлганини биларди. Официоз* ва оппозицион газеталар орасида шиддатли мунозара авж олиб, асосан интернационалга қарши қаратилган ваҳимали мақолалар эълон қилинди; гарчи ҳукумат аввалига Интернационални қўллаб-қувватлаган бўлса ҳам, эндиликда бу ташкилот ҳукуматга жиддий ташвишлар туғдираётганди. Ширкат Правлениеси бундан буёғига кар-соқов бўлиб ўтира олмасди; ниҳоят Правление аъзоларидан икки киши тафтиш ўтказиш учун қадам ранжида этдилар. Лекин улар бу ишга аралашганларига пушмондек эдилар, улар гўё забастовка оқибатларидан ҳам емагандай, умуман иш билан заррача қизиқмагандай кўринарди; улар уч кундан кейин, ишлар кўнгилдагидан ҳам яхши боряпти, деб қайтиб кетишди. Шунга қарамай Этьенга чекка-чеккадан бу жаноблар ташриф буюрган чоғларида узлуксиз мажлис ўтказганликларини, ишга кўмилиб, астойдил тафтиш олиб боришганини, аммо уларнинг биттасиям бу ҳақда чурқ этиб огиз очмаганларини етказишганди. Этьен уларни ишончли шунчаки ниқоб қилиб олибди,

* Ҳукумат фикрини баён этувчи газета (тарж. изоҳи).

деб айблади-ю, кетиб қолишлари эса бемаъни қочишдан бошқа нарса эмас, деган хулосага келди; энди, бу қўрқинчли кишилар ҳамма нарсани қўлларидан чиқариб юборганларидан кейин у галабага ишонди.

Бироқ эртасига кечаси Этьен яна умидсизликка тушди. Ширкатнинг умуртқаси ниҳоятда бақувват бўлиб, уни синдириш осон эмасди: Ширкат миллион-миллион франклардан жудо бўлса ҳам кейинчалик ишчилар маошини қисқартириб, улар ҳисобига икки ҳисса қилиб қайтариб олиши мумкин эди. Шу кеча у Жан-Барт шахтасига борди-ю, ҳақиқатни билиб олди: бир назоратчи унга, миш-мишларга кўра Вандам шахтасини Монсуга сотишармиш, деб қолди. Айтишларича, гўё Денелен ниҳоятда қашшоқ бўлиб қолишганмиш, Денелен камбағаллашган бойларнинг аҳволига тушибди-ю, иложсизлигидан куйиб, касал бўлиб қолибди, мол-дунё ташвишида қариб кетипти; қизлари бўлса, ўзларининг охирги кўйлақларидан айрилиб қолмасликлари учун мижозлари билан талашиб-тортишаётганмиш. Фақат сув ичиб, кун кўраётганларини бегона кўздан яширишга зўр бериб уринишадиган бу буржуй хонадондагилар оч яшаётган посёлкаларнинг аҳолисидан кўпроқ азоб чекишарди. Жан-Бартда ишлар қайта бошланмаганди, Гастон-Марида эса янги насос қўйиш керак эди; бунинг устига ҳамма чоралар кўрилганига қарамай, сув тошиб, катта зиён келтираётганди. Денелен ниҳоят Грегуарлардан юз минг франк қарз сўрашга қарор қилди; улар пул беришмади,— очигини айтганда Денелен шундай бўлишини биларди,— бу эса Денелен учун қақшатқич зарба эди. Грегуарлар қарз беришни рад этарканлар, сизга раҳмимиз келаётганидан шундай қиялпмиз, сизни кучингиз етмайдиган курашдан тиймоқчимиз, дейишиб, шахтани сотишни маслаҳат беришди. Денелен ҳамон зўр бериб қаршилик қиларди. У ҳали забастовка етказган зиёнларни тўлаши керак эди, бу эса унинг жонини ҳалқумига келтираётганди, у сакта касалга дучор бўлиб, ажалидан олдин ўлишига ишонарди. Лекин на чора? Конни сотиш ҳақида музокара олиб боришга тўғри келди. Ҳар хил йўллар билан унинг жонига тегиб, бутунлай янгитдан ремонт қилиниб, яхши ускуналанган, пул етишмагани учун ишлатил-

май турган ажойиб шахтанинг баҳосини жуда тушириб юборишди. Қарз берганларни бир амаллаб рози қилса ҳам жон дерди-я. У Монсуга келган Правление аъзолари билан икки кун олишди; Денелен танг аҳволга тушиб қолишидан уларнинг хотиржамлик билан фойдаланаётганини кўриб, фиғони фалакка чиқар ва «Асло бўлмайди!» дея бақирар эди. Ҳозирча иш юришмади: улар Парижга қайтиб кетишди-да, жимгина унинг оёғи куйган товукдай югуриб қолишини кутишди. Этьен ақл югуртириб, бировларнинг бахтсизлиги бировларга фойда келтиришини фаҳмлади-ю, курашда ниҳоят кучли бўлган йирик капиталнинг енгилмас қудратини ўйлаб, наҳотки улар ялпи вайронгарчилик вақтида ҳам ўз оёқлари остида ҳалок бўлган заиф бечораларнинг мурдаларини гажиб, гуркираб кетаверсалар, дея яна ғамга ботди.

Унинг бахтига, эртасига Жанлен қувончли хабар олиб келди. Ворё шахтасининг тиргаклари бутунлай қулаб тушай деб турганмиш; ҳаммаёқдан сув чиқиб кетибди; уни ремонт қилиш учун шошилишчи равишда дурадгорларнинг бутун бир артелини ишга солиш лозим эди.

Ҳозирча Этьен Ворёдан четлаб юрарди; у кўмир уюми ёнида қорайиб турган соқчидан ташвишланарди, уюм устидан эса бутун текисликни кузатса бўларди. Соқчини четлаб ўтиб бўлмасди; у ҳавода ҳилпирётган полк байрогидек ўрта ерда қўққайиб турарди. Эрталаб соат учларда осмон қоронғилашиши билан Этьен шахтага жўнади; у ерда ўртоқлари шахта девори қопламасининг путури кетиб қолганини айтишди: уларнинг фикрича, қопламани бутунлай янгилаш керак, бу эса иш бошлашни камида уч ойга кечиктириб юборарди. Этьен дурадгорлар шахтада болга уриб, тўқиллатишларига қулоқ солиб, анча санқиб юрди. Бу тўқиллаган товушлардан унинг кўнгли яйрарди: жароҳатни даволашга тўғри келган эди.

Этьен саҳарда, тонг ёришар-ёришмас шу томонларга қайтиб келаркан, кўмир уюми ёнидаги соқчини яна кўрди. Бу сафар солдат уни кўриб қолди шекилли. Этьен йўлида давом этаркан, халқдан олиниб, халққа қарши қуроллантирилиб қўйилган солдатларни ўйларди. Армия революция томонига ўтганда, ғалаба қилиш нақадар осон бўларди-я! Бунинг учун казар-

малардаги ишчилар билан деҳқонлар ўзларининг ким эканликларини эслашлари кифоя эди. Бу катта хавф, улкан даҳшат эди: буржуазия қўшинларнинг бузилишини ўйлаганида титраб-қақшаб кетарди. Икки соат ўтар-ўтмас бу ҳаромхўр буржуйлар қувончу маразлари билан бутунлай қирилиб, супуриб ташланарди. Бутун-бутун полклар социализм ғоялари билан заҳарланган, деган гаплар тарқалганди. Шу тўғримикин? Буржуазия ўзи тарқатган ўқларга жавобан адолатли онларга етишадиган кун ҳам ниҳоят келармикин? Йигит қалбида: шахтани қўриқлаб турган полк забастовкачилар томонига ўтиб, бутун Ширкатни битта қўймай отиб ташлайди-ю, конларни кўмир қазувчилар қўлига топширади, деган янги умид туғилди.

Шу чоғ Этьен уюм устига кўтарилиб бораётганини сезиб қолди. Мияси ҳар хил ўйлардан гувилларди. Солдат билан суҳбатлашса, нима қиларкин, а? Унинг фикрларини билиб оларди. Этьен гўё ахлат ичидан ёқиш учун ўтинбоп калта-култа ёғоч-тахта қидириб юрган киши бўлиб бораверди.

Соқчи қимир этмай турарди.

— Салом, огайни! Ҳавонинг авзойи мунча бузуқ-а! — гап қотди Этьен.— Ҳадемай қор ҳам ёгса керак.

Солдат ниҳолдек нозик, сочлари саргиш, мулойим юзини сепкил босиб кетганди. Эгнида шинель бўлиб, янги аскарликка олинган йигитлар сингари шалвиллаб турарди.

— Худди шундай, ҳамма нарса юз бериши мумкин,— гўлдиради у.

Йигитча шундай деди-ю, бошини кўтариб, оқиш осмонга, тутунсимон тонг шафағига, текисликнинг олис этаги тепасида осилиб турган кўлранг булутларга қаради.

— Бу қанақа аҳмоқлик-а! Одамни қаққайиб туришга мажбур қилишади-я, совуқ суяк-суякдан ўтиб кетяпти-ку!— давом этди Этьен.— Худди душманни кутишаётгандек-а!.. Бу ернинг шамоли ҳамини шунақа бўлади!

Солдат бола титраб, лекин шикоят қилмас эди.

Тўғри, сал нарида кечалари ҳаво айниса Ўлмас бобо бориб паноҳ топадиган ертўла бор эди; аммо уюм тепасида туришга буйруқ берилган эди, шу боисдан

солдат қўллари совуқ қотиб, ушлаб турган милтиқни сезмай қолган бўлса ҳам, қимирламай турарди. У Ворёни кўриқлаётган олтмиш соқчининг бири бўлиб, бу ерга қоровулликка тез-тез келиб тургани учун ҳатто бир сафар оёғини совуққа олдириб қўяй деди. Бироқ хизмат бурчи шуни талаб қиларди, шу боисдан у кўркўрона итоат этиш шартига мувофиқ бўйсунишга мажбур эди; у Этьеннинг саволларига худди уйқу элитаётган ёш боладек, бир нималар деб гўлдиарди.

Этьен роса чорак соат у билан сиеват ҳақида гаплашишга беҳуда уринди. Солдат нуқул: «худди шундай», «асло ундай эмас», деб жавоб берарди, лекин ҳеч нимани тушунмаслиги кўриниб турарди, ўртоқлари унга буларнинг капитани республикачи, ўзи эса, ҳеч нимани тушунмайди, унга бари бир, «От!» дейишса, отади, бўлмаса, жазолашади, дейишганди.

Ишчи йигит унинг гапларини тингларкан, ғазаби — халқнинг армияга нисбатан, қизил шим кийдирилиб, юраклари ўзгартирилган ўз биродарларига нисбатан қаҳру ғазаби қайнаб кетди.

— Отингиз нима, йигит?

— Жюль.

— Қаерликсиз?

— Анави ёқдан, Плогофдан.

У қўли билан қаёққадир, узоққа ишора қилди. У юрти Бретанидалигини биларди холос. Унинг қонсиз, сўник чехраси ёришиб, ўзи тетиклашди-да, кула бошлади.

— У ёқда онам, опам бор. Иўлимга кўзлари тўрт бўлса керак. Эҳ, ҳали жуда узоқ-да... Жўнаётганимда, икковлари нақ Пон-л¹ Аббегача кузатиб чиқишганди. Биз Лепальмековларнинг отини олувдик, от боёқиш Одьерна қиялигида оёғини синдириб олай деди. Божамиз Шарль бизни кутиб, иссиққина колбаса пишириб турган экан, лекин хотишлар шундай ҳўнграб йиғлашдики, томоғимдан ҳам ўтмади! Э, худойим-ей, худойим-ей! Юртимиз жудаям узоқда!

Йигитчанинг кўзларида ёш кўринди, лекин у кулишини қўймасди. Плогоф далалари, доимо довул бўлиб турадиган асов Раз буруни унинг кўзларига қуёш нурларига ғарқ бўлган, гуллаган супурги гулидан пушти товланаётган жой бўлиб кўринди.

— Сиз нима дейсиз,— сўради у,— икки йилдан сўнг, жазо олмасам, мени юртимни кўриб келгани бир ойга юборишармикин?

Шундан кейин Этьен болалигида олиб кетилган юрти Прованс ҳақида гапириб берди. Тонг ёришди. Хира, кулранг осмондан паға-паға қор ёға бошлади. Этьен бирдан буталар орасига ўтиб кетган Жанленни кўриб қолди-да, ташвишга тушди; болакай уни уюм тепасида кўриб, ҳайрон бўлди-ю, имлаб Этьенни чақирди. Нима гап ўзи, Этьен солдатлар билан биродарлашиб, оғиз-бурун ўпишмоқчими? Бунга йиллаб вақт керак-ку. Этьен гўё ишлари юришиб кетишидан умидвор бўлгандек, режасини амалга ошира олмаганидан нафаси ичига тушиб кетди. Лекин бирдан у Жанлен нима демоқчи бўлганини фаҳмлади: ҳозир қоровул алмашади. Шунинг учун Этьен жўнаб қолди; у ўзининг Рекийярдаги маконига яшириниб олишга ошиқди. Ҳаммасини бой бердик-а, деган фикр миясига келиши билан унинг юраги қисиларди. Болакай ёнида диканглаб югуриб бораркан, ҳойнаҳой, бизни отиш учун қоровулни чақирган бўлса керак, дея ярамас солдатни сўкар эди.

Жюль бўлса, ёғаётган қорга тикилиб, уюм тепасида ҳамон қаққайиб турар эди. Сержант унинг ўрнига қоровулни бошлаб яқинлашиб келарди. Одатдаги гап эшитилди.

— Ким у келаётган?.. Пароль!

Узоқлашиб кетаётганларнинг қадам товушлари эшитилди, бу товушлар гўё бўйсундирилган мамлакатдан келаётгандек эди. Кун ёйилиб кетган бўлса-да, ишчилар посёлкасидаги ҳаёт бошланмаганди; ҳарбийлар этиги остида эзилиб ётган газабнок кўмир қазувчилар ўжарлик билан сукут сақлашарди.

II

Икки кундан бери ёғаётган қор учинчи кун эрта-лабга бориб тинди. Кўз илғамас текисликда қаттиқ совуқ изилларди; кўмир чангидан йўллари, уйлари ва дарахтлари қоп-қорайиб кетган бу нохуш ўлка оппоқ, ниҳоятда оппоқ бўлиб, бепоёндек кўринарди. Қор босган Икки юз зағизгон посёлкаси гўё ғойиб

бўлган эди. Биронта ҳам мўркондан дуд чиқмасди, уйларнинг томларидаги қалин черепицалар илимай, йўл бўйидаги тошдек совуқ эди. Посёлка оппоқ тош конига ўхшарди; у қор босган текисликда оқ кафанга ўралган кимсасиз қишлоқни эслатарди. Фақат кўчалардан ўтиб бораётган патруллар қорда ифлос из қолдиришарди.

Кеча Маэллар охирги кўмирларини ёқишди; ҳозир ҳатто чумчуқлар ҳам хас-чўп тополмайдиган шундай совуқ ҳавода уюмга бориб, бир бўлак кўмир олиб келиш ҳақида ўйлашнинг ҳам ҳожати йўқ эди. Кўмир қидириб, қорни титкилайверган Альзира касал бўлиб қолиб, ҳозир ўлим тўшагида ётарди. Онаси уни эски адёл парчаларига ўраб-чирмаб қўйиб, доктор Вандерхагенни кутаётганди; боёқиш она докторнинг уйига икки марта бориб келганди-ю, лекин ўзини учрата олмаганди; хизматкор хотин доктор жаноблари қоронғи тушгунча, албатта, посёлкага бирров бориб келадилар, деб ваъда қилганди. Она дераза ёнида докторга кўзи тўрт бўлиб турарди; кичкина бемор ўрнидан турмоқчи бўлди, аммо эти увушиб, титраб-қақшади-да, ҳарқалай, бу ер иссиқроқ бўлса керак деган умидда, ўчиб қолган печка ёнидаги стулга ўтирди. Унинг рўбарўсида оёқлари яна оғриб қолган Улмас бобо мудрарди. На Ленора, на Анри уйга қайтиб келганди; улар Жанлен билан кўчама-кўча санқиб, тиланчилик қилишарди. Шипшийдам хонада ёлғиз Маэгина у ёқдан-бу ёққа юрар ва гангиб, ўз қафасини танимаётган ҳайвондек ҳар сафар деворга урилар эди. Бор керосин тугаганди; бироқ қор шундай оппоқ бўлиб ярақлардики, қоронғи тушганига қарамай, аксидан хона ёришиб турарди.

Егоч пойабзалнинг тўқиллагани эшитилиб, бир минутдан сўнг Левакнинг хотини шиддат билан эшикни очди; у жони ҳиқилдоғига келиб, остонаданоқ Маэнинг хотинига ўшқириб деди:

— Ҳа, билдим, ижарачиси билан ётгани учун кунига йигирма су олади, деб айтган сен экан-да!

Маэ хоним елкасини қисди.

— Э, қўйсанг-чи, ҳеч нима деганим йўқ... Аввало айт-чи, бу гапни сенга ким айтди ўзи?

— Менга сени айтди, дейишди, ким гапиргани би-

лан ишинг бўлмасин... Ахир сен, кўп ярамас ишларини девор орқасидан эшитдим, жуда гуноҳга ботиб кетишди, ўзи эртадан-кечгача наҳс босиб ётади, деб ҳатто қасам ичибсан-ку... Хўш, қани, шу гапларни айтмадим дегин-чи, қани айт!

Хотинларнинг тўхтовсиз лақиллашлари туфайли айниқса ёнма-ён яшовчи қўшни хонадонлар ўртасида тез-тез даҳанаки жанглар бўлиб турарди; деярли ҳар соатда уришиб ярашишарди. Бироқ ҳеч қачон бунчалик катта жанжал чиқмаганди. Забастовка бошланганидан буён очлик одамларнинг дард-аламини бадтар кучайтириб, улар аламларини бир-бирларидан олиш пайига тушиб қолишганди. Икки қўшнининг ади-бадиси эрларининг муштлашуви билан тугарди.

Левак айна вақтида етиб келган экан: у Бутлуни судраб келганди.

— Мана у, янгажон, хотиним билан ётиш учун йигирма су тўлаяптими-йўқми, ўзи айтсин.

Ижарачи хижолат бўлиб мийиғида кулди-ю, тижирлик қилиб турди, сўнг тутилиб деди:

— Йўқ, бунақа бўлгани йўқ... Асло бунақа иш бўлган эмас!

Левак шу заҳоти ўдағайлашга тушиб, муштини Маэнинг тумшўғига олиб келди.

— Биласанми, мен бу ишни шундай қолдирмайман! Уриб хотинингнинг қобирғаларини синдириш керак... Демак, сен унинг гапларига ишонар экансан-да, а?

— Вой, иблис-ей! — қичқирди эзилиб, ғазабига чидай олмаган Маэ.— Бу қанақа игво яна? Бахтсизликларинг етмайдими ўзи? Тур, йўқол, бўлмаса пачағингни чиқараман!.. Аввало, ким тарқатди бу игвони, наҳотки менинг хотиним бўлса?

— Ким?.. Пьеррон хоним, билдингми, ана ўша!

Маэ хоним истехзо билан кулди-да, Левакнинг хотинига қараб деди:

— Э-ҳа, Пьеррон хоним дегин!.. Бўпти! У менга нима деганини сенга айтиб беришим мумкин. Ҳа! У менга айтдики, сен гўё иккалови билан бирга ётаркансан, биттаси остингда ётармиш, биттаси устинга чиқармиш!

Шундан кейин ҳеч кимга гап уқтириб бўлмай қол-

ди. Ҳаммалари қутуриб кетишгандек эди. Леваклар Пьеррон хоним Маэлар ҳақида нима деган бўлса, ҳаммасини оқизмай-томизмай айтиб беришди гўё улар Катринани сотишганмиш, Этьең «Вулқон»дан орттириб келган касал ҳаммаларига, кичинтойларгача юққанмиш.

— Шундоқ дедими, хали шундоқ дедими? — ўшқириб дерди Маэ.— Хўп, майли! Ҳозироқ олдига бораману агар шу гапим рост, айтувдим, деса, дабдала қиламан.

У кўчага отилди: Леваклар унинг кетидан гувоҳ бўлгани югуришди. Бунақа жанжалларни ёқтирмайдиган Бутлу секин жўнаб қолди. Ҳалиги гап-сўзлардан жиғибийрон бўлган Маэ хоним ҳам бормоқчи эди-ю, лекин Альзиранинг инграшини эшитиб тўхтади У титраётган маъсуманинг устига адёл тортиб қўйди-да, яна дераза олдига келиб, узоқларга тикилди.

Доктордан ҳамён дарак йўқ!

Маэ билан Леваклар Пьерронлар эшиги олдида қорда депсинаётган Лидияни кўриб қолишди. Уй қулф эди: дераза қопқоғи тирқишидан узун нур тушиб турарди. Аввалига қизча уларнинг сўраб-суриштиришларига уялинқираб жавоб берди: йўқ, отаси уйда йўқ, Ашаддий кампирнинг кир тугилган бўғчасини кўтаришиб, кирхонага кетган. Шундан кейин у тутулиб, онаси нима иш қилаётганини айтгиси келмади. Ниҳоят у заҳархандалик билан жилмайиб, ҳамма гапни айтди: уйда жаноб Дансарт бор экан, онаси гапимизга халал берасан, деб уни кўчага ҳайдабди. Дансарт каллаи саҳарлаб икки жандарм ҳамроҳлигида посёлкани айланиб юрарди; у ишчиларни ёллади, унчамунча заифларга тазйиқ ўтказди, ҳаммаёқни изғиб, кўмир қазувчилар душанбадан Ворёда ишга чиқишмаса, Ширкат бельгияликларни ёллайди, деб эълон қилди. Қоронғи тушгач, Пьерроннинг хотини ёлғиз қолганини кўрган Дансарт жандармларни жўнатиб юборди-да, ўзи иссиққина камин ёнида бир стакан арча ароғидан ичгани униқига кирди.

— Тс! Скин, уларни кузатиш керак, — шивирлади Левак ҳаваси келиб илжайркан... — Мана энди гап-лашсак бўлади.. Ҳа, ярамас, бор, жўна!

Лидия бир неча қадам нари кетди, Левак эса қоп-

қоқ тирқишига ёпишди. Кулгидан бўғилиб, аъзойи бадани титраб, энгашди. Ўз навбатида Левакнинг хотини ҳам қаради: лекин у худди қорни оғриётгандек букчайиб, бунақа ишларни мен ёмон кўраман, деди: Маэ ҳам қарагиси келиб уни итариб юборди: у бунақа томоша қимматга тушади, деди. Улар худди томоша кўраётгандек яна навбатма-навбат тешикдан қарашди. Ег томса ялагудек озода хонани каминдаги олов ёлкини ёритиб турарди; стол устида печенье, шиша ва стаканлар турарди — хуллас, чинакам базми жамшид эди. Хона ичида кўрганлари эркакларнинг ҳирсини қўзғатиб юборди; бошқа вақт бўлганда бу ишни ярим йилгача гапириб, кулиб юришарди. Жувоннинг юбкасини кўтариб ётишини, эркакнинг эса унашини томоша қилиш мароқли эди. Вой, жин ургурлар-ей! Уртоқлари бир тишлам нон-у, бир бўлак кўмирга зор бўлиб юрганда, булар иссиққина уйда еб-ичиб, манавинақа иш қилиб ўтирса, бу ҳайвонлик эмасми ахир?

— Ана, дадам ҳам келиб қолди! — хитоб қилди Лидия қочиб кетаркан.

Қирлар тугилган бўғчани орқалаб олган Пьеррон бамайлихотир қайтиб келарди. Шу ондаёқ Маэ уни сўроққа тутди:

— Менга қара, одамларнинг гапига қараганда, хотининг Маэлар Катринани сотган, уйидагиларнинг ҳаммаси ярамас касалга чалинган деганмиш... Хўш, қани айт-чи, ҳозир хотинингни мижиғлаб ётган жаноб унга неча пул тўлайди?

Пьеррон ҳеч нимага тушунмай қоққан қозикдек қотиб қолди. Бу орада ташқаридан келаётган шовқинсурондан ўтакаси ёрилган Пьеррон хоним, нима гаплигини билиш учун эшикни очиб қаради. У қип-қизариб кетган, кўкрак тугмалари қадалмаган, юбкаси бўлса ҳамон кўтарилиб, белига қистириб қўйилганди, хона тўридаги Дансарт эса апил-тапил шимини киярди. Бош штейгер бу гап директорнинг қулоғига етишидан хавфсираб, жуфтакни ростлаб қолди. Катта жанжал кўтарилди, хахолаб кулишлар, пиқиллаб масхара қилишлар, сўкиш-қарғашлар эшитилди.

— Сен ҳамиша бошқалар ифлос туришади, деб вайсайсан! — қичқирди Левак хоним Пьерроннинг хотинига қараб. — Сенинг поклигингга ажабланмаса ҳам

бўлади, ахир сен бошлиқлар билан дон олишиб юрасан-да.

— Э, нимасини айтасан!— гапни илиб кетди Левак.— Яна бу манжалақи тортинмай Левакнинг хотини эри билан ҳам, ижарачиси билан ҳам туради, деганини айтмайсанми, гўё хотиним биттамизни тагига босармиш-у, биттамизни устига чиқарармиш... Ҳа, ҳа, менга айтишди, сен шундоқ дегаймишсан.

Бироқ Пьеррон хоним ўзини босиб олиб, ҳақоратларга дадил жавоб қайтараверди; у ўзининг посёлкадагиларнинг ҳаммасидан гўзалроқ ва бойроқ эканлигини яхши билганидан, ҳаммага нафрат билан қарди.

— Нима дегим келса, ўшани айтганман... Мени тинч қўйинглар! Мен билан нима ишларинг бор селларни, ҳасадгўйлар! Омонат кассага пул қўйганимизга жонларинг чиқяпти-да! Йўқолинглар! Йўқол ҳамманг. Огзиларингга келганини айтаверларинг. Жаноб Дансарт нима иш билан келганини эрим жўда яхши билади.

Пьеррон ҳақиқатан ҳам фигони чиқиб, хотинининг ёнини ола бошлади. Жанжал бошқа ёққа айланиб кетди: уни сотқин, жосус, Ширкатнинг занжирбанд ити, дейишди, уйингни ичидан бекитиб олиб, хоинлигинг учун бошлиқлар ташлаб турадиган лаззатли луқмаларни еб, семириб ётибсан, дея айблашди. Пьеррон эътироз билдириб, бир-бирига чалишган иккита суяк устига ханжар сурати солинган хатни остонамга ташлаб кетгансан, деб Маэга ёпишди. Ҳар сафар бўлганидек, хотинлар бошлаган жанжал эркаклар муштлашуви билан тугади, очлик ҳатто энг беозор кишиларни ҳам тажанд қилиб қўйганди. Маэ билан Левак Пьерронни муштлай кетишди; уларни ажратиб қўйишга тўғри келди.

Ашаддий кампир кирхонадан келганда куёвининг бурнидан қон шариллаб оқарди. Нималигини тушунгач:

— Бу ҳайвон мени шарманда қияпти-да,— деб қўйди.

Кўча бўшаб қолди; оплоқ қорда битта ҳам сол кўринмайди; очлик ва совуқдан азоб чекаётган қишлоқ яна жимжит бўлиб қолди.

— Доктор келдими? — сўради Маэ кириб, эшикни ёпаркан.

— Келгани йўқ, — жавоб берди хотини ҳамон де-раза олдида тураркан.

— Болалар қайтишдими?

— Йўқ, қайтишгани йўқ.

Маэ яна худди қўрадаги ҳўкиздек вазмин қадам босиб, у бурчакдан-бу бурчакка юра бошлади. Столда қотиб ўтирган Улмас бобо ҳатто бошини ҳам кўтармади. Альзира ҳам чурқ этмади, фақат ота-онасини ранжитмаслик учун титрамасликка ҳаракат қиларди. Қизалоқ тишини-тишига қўйиб дардга чидаётган бўлса ҳам, ўқтин-ўқтин шу қадар қаттиқ титрардики, боёқишнинг ориқ букри гавдаси кўрпа ичида кўтарилиб-тушарди. Катта-катта очилган кўзлари боғни босган оппоқ қорнинг заиф акси тушиб, худди ой нуридек ёритиб турган хона шифтига тикилганди.

Охират яқинлашиб қолганди, — уй шипшийдам бўлиб, қўлга илинадиган нарса қолмаганди. Тўшакларнинг сурп авраси ҳам жуни кетидан эскичининг қўлига ўтиб кетганди; кейин чойшаб, ички кийимларга гал келди, қисқаси нимани сотиш мумкин бўлса, ҳаммаси сотилди. Бир куни кечқурун бобонинг дастрўмолини икки суга сотишди. Оч хонадонда жудо бўлинган ҳар бир нарса учун юм-юм йиғлашарди; Маэ хоним бир куни эри совға қилган пуштиранг картон қутичани юбкасига ўраб, элтиб бериб келганини эслаб, ҳозир ҳам кўз ёши қиларди. У худди боласидан жудо бўлгандек, ўша қутичага кўп қайгурарди. Маэллар бор нарсаларини сотиб бўлишганди; фақат энди ўзларининг таналари қолганди, лекин бу баданлар сўлиб, қуришиб-буришиб қолганидан унга ҳеч ким қора чақа ҳам бермасди. Улар бу азобдан қутулишнинг бирор йўлини топишга ҳам ҳаракат қилишмасди; улар ҳеч вақо қолмаганини, кунлари битганини билишарди; энди бирон нимадан умид қилишнинг ўрни йўқ эди, энди уйда на шам, на кўмир, на картошка бўлади. Улар ўлимларини кутишарди, фақат болаларига ачинишарди; улар ўринсиз шафқатсизликдан хафа эдилар: ўладиган бўлгандан кейин бола бечорани шу қадар касал қилиб қийнашнинг нима кераги бор эди.

— Э, худога шукур-е, — деб юборди Маэ хоним.

Дераза олдидан биров ўтди. Эшик очилди. Бироқ бу умуман доктор Вандерхаген эмасди; кирган киши янги руҳоний аббат Ранвье экан. У афтидан, чироқсиз, оловсиз, нонсиз, хувиллаб ётган бу уйга кириб қолганига ҳайрон бўлмади шекилли; у бу ерга келгунича қўшни уйларнинг учтасига кириб чиққанди. Аббат ҳам жандармларни олиб, уйма-уй кириб, кўнгиллилар йигаётган Дансарт каби ўзига мурид тўпларди: у уйга кира солиб, жонсараклик билан мутаассибларга хос товуш билан гапира бошлади:

— Ие, умматларим, нега ибодатга бормадиларинг? Бу ишларинг яхши эмас; сизларни фақат черков асраб қолади... Келаси якшанбадан ибодатга борамиз, деб ваъда беринглар, чироқларим.

Маэ унга бир қараб қўйди-да, бир оғиз ҳам гапирмай, яна оғир қадамлар босиб, уйни ўлчашда давом этди. Унинг ўрнига ҳотини жавоб берди:

— Черковга бориб нима қиламиз, жаноб аббат? Худонинг ўзи уриб қўйгани етмайдими? Мана қаранг, шу титраб-қақшаётган кизалогимнинг нима гуноҳи бор? Шундоқ ҳам чекаётган гам-гуссамиз камми? Келиб-келиб боёқишнинг оғриган вақтини қаранг, лоақал ичишига бирон иссиқ нарса топиб беролмайман.

Шунда руҳоний тик турганича ваъз-насихат қила кетди. У нутқида забастовкадан, нажотсиз очарчилик сабаб бўлган даҳшатли офатдан фойдаланди; у ёввойи халқларга ўз динини тарғиб қилаётган миссионерга ўхшаб эҳтирос билан сўзларди. У черков камбағалларни ҳимоя этади, бир кун эмас, бир кун адолат тантана қилади ва бойлар худонинг ғазабига учрайди, деди. Ҳадемай шундай кун келади, чунки бойлар ўзларини худо билиб кеккайиб кетишди; улар фирромлик билан ҳокимиятни қўлларига олиб, энди худонинг амрисиз ўзлари бошқармоқчи бўлишяпти. Борди-ю, ишчилар ер юзидаги неъматларнинг адолатли бўлинишини истасалар, гадолар билан қавмлар Исо алайҳиссалом вафотидан сўнг ҳаворийлар атрофига бирлашганларидек, улар ҳам руҳонийларга эътимод қилишлари лозим. Ҳисобсиз заҳматкашлар оломони бўйсунганида борми, папа билан руҳонийлар қанчалик зўр куч-қудратга эга бўлган бўлур эдилар! Жаҳон бир ҳафтадаёқ золимлардан тозаланарди-ю, нолойиқ

ҳукмдорлар ҳайдалиб, ниҳоят оллоҳнинг амр-фармонлари мустаҷоб бўларди; ҳар ким ўз хизматиға яраша ҳақ оларди, меҳнат қонуни ҳаммани бахтли этарди.

Маэ хоним аббатнинг гапларини тингларкан, унга гўё Этьен сўзлаётгандек бўларди: чунки у ҳам куз кечалари ҳадемай ҳамма бахтсизликларимизга чек қўйилади, деб каромат қиларди. Бироқ Маэ хоним ҳамиша аббатларга ишонмасди.

— Бизга айтган гапларингизнинг ҳаммаси жуда яхши, жаноб аббат,— деди у,— лекин сиз буржуйлар билан чиқишолмаганингизга шундай деяпсиз, бу рост... Аввалги руҳонийларимизнинг ҳаммаси директорларникида овқатланишарди-да, биз нон сўрайдиган бўлсак, дўзахга тушасанлар, деб қўрқитишарди.

Аббат яна гапга тушиб, бу сафар черков билан халқ ўртасидаги келишмовчиликлар тўғрисида гапирди. Энди у мужмал иборалар билан шаҳар руҳонийларига, епископларга, юқори дин пешволарига ёпишди. Булар ҳузур-ҳаловатда яшаб, амал иштиёқида ёнаркану либерал буржуазия билан тил бириктиришаркан, кўзларини шира босгани учун жаҳонга ҳоқимлик қилишдан уларни ана шу буржуазия маҳрум этаётганини кўрмас эканлар. Озодликка қишлоқ руҳонийлари — пастирлар олиб чиқадилар, ҳамма оёққа туради ва камбағаллар ёрдамида Исо алайҳиссалом салтанатини тиклайдилар. Аббат ўзини инжилпараст революционерлар раҳнамоси сифатида қавм бошида тургандек ҳис қиларди: қоқсуяк қоматини кўтарди, кўзлари шундай чақнадик, гўё қоронғи хонани ёритиб юборгандек бўлди. У қизишиб, ваъзга берилиб кетганидан шундай пойинтар-сойинтар гапира бошладики, бечора тингловчилар анчадан бери унинг гапларига тушунмай қолишганди.

— Шунча гапнинг нима ҳожати бор,— тўсатдан тўнғиллади Маэ,— сиз аввал бизга нон олиб келганингизда яхши бўларди.

— Якшанба куни ибодатга боринглар! — хитоб қилди руҳоний,— ҳаммасини худо етказди!

Аббат чиқиб кетди, Левакларни ҳам йўлга солмоқ учун уларникига жўнади. У пировардида черковнинг таңтана қилиши тўғрисидаги юксак фикр миясига қаттиқ ўрнашиб қолганидан воқеликка шунчалик наф-

рат билан қарардики, қавмларникига қуруқ кириб, ўзи гадо бўлса ҳам ҳеч нима тиламасди, бу балолардан қутулишнинг чораси изтироб чекишда, деб биларди.

Маэ нари-бери бориб келарди; унинг қадами ерга ётқизилган ғиштларга тегиб гурсилларди. Занглаган темирнинг ғижирлашига ўхшаш товуш эшитилди: Улмас бобо ўчиб қолган каминга туфлаганди. Кейин Маэ яна юра бошлади. Безгақдан азоб чекаётган, мудраётган Альзира пичирлаб алаҳсирашга тушди; у гўё ҳозир ёз фасли-ю, офтобда ўйнаётгандек қиқирлаб куларди.

— Пешонамиз шунақа шўр экан!— деди Маэ хоним қўлини кизалоқнинг ёноқларига қўйиб.— Энди ўтда ёняпти боёқиш... Энди анави ҳайвондан умидимни ҳам уздим. Қароқчилар, ўшалар докторни бизникига келишга қўйишмаган-да!

У доктор билан Правление ҳақида гапирарди. Шунга қарамай, эшик яна очилганини кўргач, қувониб, қичқириб юборди. Бироқ шу ондаёқ қўллари бўшашиб тушди; у қаддини ростлаб турарди, чехраси қайгули эди.

— Ассалом алайкум,— деди Этьен паст товушда, эшикни зич ёпаркан.

Этьен кўпинча уларникига қоронғи тушгандан кейин келарди. Маэлар эртасигаёқ унинг қаерга яширинганини билишганди-ю, лекин сир сақлашганди; йигитнинг нима бўлганини посёлкадагилардан бирортаси ҳам аниқ билмасди. Этьен ҳақида ҳар хил афсоналар тўқилди. Унга ҳамон ишонишарди, у ҳақда сирли миш-мишлар тарқалиб, яқинда бутун бир армия, олтин тўла сандиқлар билан келади, дейишарди. Бу зориқиб кутишаётган мўъжиза, орзу-умидларнинг рўёбга чиқиши, адолат салтанатининг тўсатдан ҳужуми деган гап эди, Этьен уларга ана шуни ваъда этганди. Бировлар Этьенни уч жаноб билан извошда Маршьенн йўлида кетаётганини кўрдик, дейишарди; бошқалар эса у икки кунга Англияга кетди, дейишарди. Лекин вақт ўтиши билан шубҳалар пайдо бўлди, ҳазилкашлар эса у ертўлада, Мукеттанинг иссиққина қўйнида ётипти, деб ишонтирардилар,— Этьеннинг у билан алоқаси ошкор бўлиб, бу ҳол кўмир қазувчилар назарида

обрўсига путур етказганди. Унинг шухрати кенг ёйилганига қарамай, ишчиларнинг ихлоси ундан қайтган, мағлуб бўлишгач, аламлари ичларида қолганларнинг норозилиги зимдан ошиб бормоқда эди; уларнинг сони тобора ортиб борарди.

— Ҳавоям ўлгудай расво-да,— деб қўшиб қўйди у.— Сизларда ҳеч қандай янгилик йўқми, борган сари ёмонлашяптими?.. Менга айтишларича, Негрель ишчилар ёллаш учун Бельгияга жўнаганмиш. Жин урсин! Агар шу гап рост бўлса, тамом бўлдик!

Этьен бу совуқ, қоронғи уйга кираркан, сесканиб кетди; унинг кўзлари бу бахтсизларни тузукроқ кўриш учун уларнинг борлигини тахмин қилиб, аранг ажратиб бўладиган қоронғиликка кўниқиши лозим эди. У ўз синфидан ажралиб қолган ишчи сифатида, худбинлик ич-эттини кемираётган, маълумотлилиги туфайли унча-мунча нозиклашиб қолган одам сифатида эти жимирлашиб кетди. Қашшоқликни қарангу ҳавосини қаранг! Одамлар ўликдек ухлашяпти! У ачиниб, бўғилиб кетди. Уларнинг шу алпозда ўлиб кетишлари уни шунчалик ҳанг-манг қилиб қўйдики, Этьен бўйсуннишни маслаҳат бермоқчи бўлиб, муносиб гап қидира бошлади. Бироқ Маэ олдига келиб тўхтади-да, ғазаб билан қичқирди:

— Бельгияликлар эмиш! Улар бунақа қилишолмайди, муттахамлар! Қани, бельгияликларни ёллаб кўришсин-чи, нақ шахталарни бузиб ташлармиз!

Этьен ийманиб, ҳатто қўзғалиб ҳам бўлмайди, чунки шахталарни қўриқлаб турган солдатлар бельгиялик ишчиларни ҳимоя қилишади, деб тушунтира бошлади. Маэ муштларини тугди; ҳаммадан ҳам ана шу лаънати найзаларнинг тиккайиб туриши унинг жиғига кўпроқ тегарди. Демак, кўмир қазувчилар энди ўз юртларига хўжайин эмас эканлар-да? Улар худди маҳбусларга муомала қилишгандай муомала қилишиб, ишга милтиқ билан ҳайдашаркан-да! Маэ ўз шахтасини яхши кўрарди, икки ойдан буён унга тушмагани учун эзилиб кетаётганди. Шунинг учун у аллақандай келгиндиларни шахтага туширишиб, буларни хўрлашларини ўйлаганида жони ҳиқилдоғига келарди. Кейин у ҳисоб-китоб дафтарчасини қайтиб беришгани эсига тушиб, юраги баттар қисилди.

— Нега бунчалик жаҳлим чиқаётганини ўзим ҳам билмайман,— деди у ғўлдираб.— Ахир мен энди уларнинг корхонасида ишламайман-ку. Мени бу ердан ҳайдаб чиқаришса, катта йўл ўртасида тиришиб ўлишдан бошқа иложим қолмайди.

— Қўй-е!— деди Этьен.— Агар хоҳласанг, улар эртагаёқ сени ишга олишади. Яхши ишчиларни бўшатишмайди.

У тутилиб қолди-да, Альзиранинг алаҳсираб, оҳистагина кулишига қулоқ солди. У шу чоққача Ўлмас бобонинг қимирламай турган гавдасини пайқаганди холос, шунинг учун бетоб қизалоқнинг қувноқ товушидан чўчиб тушди. Болаларки ўлар ҳолга келибдими, демак, пичоқ бориб устихонига тақалипти-да. У кучини тўплаб, қалтироқ товуш билан деди:

— Менга қара, бундан буён шундай яшаб бўлмайди, қирилиб кетамиз... Таслим бўлиш керак.

Шу чоққача қимирламай, чурқ этмай турган Маэ хоним бирдан лов этиб кетди-ю, шундоқ Этьеннинг бетига қараб, сенсираб, эркакчасига сўкиниб деди:

— Нима деяпсан ўзинг?.. Шу гапларни сен айтяпсанми ҳали, жин ургур!

Этьен эътироз билдирмоқчи бўлди-ю, лекин Маэ хоним уни оғиз очгани қўймади.

— Бу гапингни қайтиб оғзингга олма, жин ургур! Ҳа, бахтингга, эркак эмасман-да, нақ шапалоқ қўйиб юборардим... Икки ойдан бери очдан ўлай деб келяпмиз, бор бисотимни сотдим, болаларим касал бўлди — шулар ҳаммаси яна адолатсизлик бошланиши учун бўлган экан-да, а? Шуларни ўйласам, аъзойи баданим муз-муз бўлиб кетади! Йўқ, йўқ! Энди ҳаммасига ўт қўяман, ҳаммасини йўқ қиламан, лекин таслим бўлмайман!

У дағдаға билан қўлини чўзиб, қоронғида Маэни кўрсатди.

— Ҳой, билиб қўй, борди-ю, эрим шахтага қайтадиган бўлса, уни йўлда кутиб тураману юзига тупуриб, аблаҳсан, дейман!

Этьен уни кўрмаса ҳам, унинг худди ваҳший ҳайвонникидек иссиқ нафасини сезди: шунинг учун Этьен ўзининг таъсирида аёлнинг шу кўйга тушганини сезди-ю, хонимнинг тутақиб кетганига ҳанг-манг бўлиб,

беихтиёр тисарилди. Маэ хоним шу қадар ўзгариб кетгандики, Этьен уни танитай қолди; илгарилари бу хотин шундай андишали эдики, ҳатто Этьенга сизда раҳм деган нарса йўқ, деб таъна қиларди, ҳеч кимга ўлим тиламанг, дерди; ҳозир эса ҳеч нимани эшитишни истамасди, ҳаммани ва ҳамма нарсани кунпаякун қилишга тайёр эди. Энди сиёсат ҳақида Этьен эмас, балки шу хотин гапиряпти, бир ҳамла билан ҳамма буржуйларни йўқ қилмоқчи бўляпти, камбағаллар меҳнати ҳисобига битиб кетган ана шу бадавлат қароқчилардан ерни тозалаш учун Республика билан жоди талаб қияпти.

— Ҳа, мен мана шу қўлларим билан уларнинг жонини олардим! Бизни эзганлари етар! Энди навбат бизники, бу гапни ўзинг айтгансан... Отам, бобом, бобокалонларим ҳам ҳозир биз кўраётган кулфатларга чидаб келишганини, ўғилларимиз, набираларимиз ҳам биздек азоб чекишларини ўйласам, ақлдан озиб, пи-чоққа ёпишаман... Биз ўшанда деярли ҳеч нима қилмадик. Биз Монсуни битта тошини ҳам қолдирмай, кулини кўкка созуришимиз керак эди. Биласанми, мен энди бир нарсага ачинапман: ўша куни чолни пиоленалик қизни бўғиб ўлдиришга қўймабман-а... Ахир болаларимни очдан ўлишга мажбур қилаётган ўшалар-ку.

Унинг сўзлари қоронғида болтанинг зарбига ўхшаб эшитиларди. Уфқ бурканди-ю, қайтиб очилмади; қон кўпириб, говлаб кетган миядаги ушалмас орзумидлар энди захарга айланганди.

— Сиз гапимни яхши тушунмабсиз, — деди ниҳоят Этьен; энди у тақдирга тан бергандай эди. — Ширкат билан мурасага келиш керакмиди; билишимча, шахталар қаттиқ шикастланган, шу боисдан, шубҳасиз, Ширкат ён беради.

— Йўқ, бир қадам ҳам чекиниш йўқ! — чинқириб деди хоним.

Шу пайт Ленора билан Анри келиб қолди; иккови ҳам қўлини бурнига тиқиб келганди. Тўғри, бир жаноб уларга икки су пул берганди; бироқ опаси кела келгунча укасини тепиб-уриб келгани учун пул қорга тушиб кетди; улар пулни Жанлен билан бирга қидиришди-ю, лекин топиша олишмади.

— Хўш, Жанлен қани?

— У қочиб кетди, ойи, ишларим бор, деди.

Этъен бۇ гапларга қулоқ соларкан, юраги қисилди. Бир куни она бечора уларга қараб, агар садақа сўраб қўл чўзадиган бўлсаларинг, ўлдираман, дея дўқ урганди. Энди бўлса, ўзи уларни кўчага юбораётганди; бу ҳам етмагандек, у ҳаммамиз, Монсудаги ўн минг кўмир қазувчининг ҳаммаси бўйнига тўрваю хуржун осиб, гадойлардек бу аянчли ўлкани кезиб чиқади, деди.

Қоронғи хонада юраклар баттар сиқила бошлади. Болалар очқаб қайтишди, улар бирон нарса егилари келарди-ю, лекин нега овқат беришмаётганига ҳайрон эдилар. Улар ҳиқиллашиб, хонада у ёқдан-бу ёққа юришди-юришди-да, охири ўлар ҳолатда ётган опаларининг оёғини босиб олишди, касал чинқириб юборди. Жони ҳалқумига келган она қоронғида қўлига илинган нарса билан уларни савалай кетди. Улар нон сўраб, баттароқ бақириб увиллашгач, бечора она ерга ўтирди-да, уларга қўшиб бемор қизалоқни ҳам қучоқлаб, юм-юм йиғлади. Она узоқ йиглаб, кўнгли бир оз бўшагандан кейин руҳан эзилиб, ўлим тиларкан, бир гапни йигирма мартача такрорлади:

— Э худоё худовандо, нега омонатингни олмайсан? Э худо, бизга раҳминг келсин, жонимизни олақол!

Бобо ёмғир ва шамолда ўсган йўғон қари дарахтдек қимир этмасди, Маэ эса бошини бурмай камин билан буфет орасида бориб-келарди.

Эшик очилди-да, бу сафар уйга доктор Вандерхаген кирди.

— Жин урсин,— деди у,— шам ёқсаларинг, кўр бўлиб қолмассизлар ахир... Тезроқ, шошиляпман.

Иши бошидан ошиб ётган доктор одатига кўра тўнғилларди. Уларнинг бахтига докторнинг гугурти бор экан. Доктор бемор қизни кўриб бўлгунча Маэ бирин-кетин олтига гугуртни ёндириб турди. Қизчанинг устини очишди, адёлсиз қизчанинг аъзойи бадани титрарди; қизча милтиллаб турган гугурт ёруғида қорда совқотган нимжон қушчага ўхшарди; боёқиш шу қадар озиб кетган эдики, букири дўппайиб манаман деб турарди. Бироқ қизалоқ кўзларини катта очиб, ўлим талвасасида жилмаярди, чиллакдек қўл-

лари билан ичига ботиб кетган кўксини таталарди. Она энтикиб, уй-рўзгор ишларимга кўмаклашадиган шу яккаю ягона қизгинам, шу ақлли, қобилгинам, наҳотки мендан олдин ўлиб кетса, шу адолатданми, дея сўраганида, доктор жаҳли чиқиб деди:

— Бас қилинг-е! Тамом бўляпти... Бахти қора қизинг очликдан ўлди. Тўғриси айтганда, у ёлғиз эмас, шу ёнгинада яна битта шунақасини кўрдим... Ҳаммаларинг мени чақирасанлар, мен бўлсам, ҳеч нима қила олмайман. Сизларни оёққа турғизиш учун гўшт керак.

Маэ қўлини куйдириб олиб, гугуртни тушириб юборди. Қоронғилик кичкинагина, ҳали совимаган мурдани чулғаб олди. Доктор шошиб чиқиб кетди. Қоронғи хонада онанинг ҳўнграшигина эшитиларди; у тўхтовсиз ўзига ўлим тиларди. Этьен тўхтовсиз қилинаётган шу аламли ноладан бошқа нарсани эшитмасди:

— Э худойим, э парвардигор, энди навбат меники, мени ҳам ол!.. Худойим эримни ол, ҳаммамизни ол, ўзингнинг раҳминг келсин, ҳаммамизни олақолсангчи!

III

Уша якшанба куни кечқурун, соат саккизларда «Авантаж» қовоқхонаси залида ёлғиз Суварин қолди, — у ўзининг одатдаги жойида бошини деворга суяганча ўтирарди. Кўмир қазувчиларнинг биттасида ҳам бир кружка пиво олиш учун ақалли икки су ҳам пул йўқ эди, ҳеч қачон савдо бунчалик юришмай қолмаганди. Раснёр хоним пештахтанинг нарёғида қовоқ-тумшугини осилтириб, қимирламай жимгина ўтирарди; Раснёр эса чўян камин қаршисида қаққайиб турганича биқсиб ёнаётган кўмирининг қизғиш тутунини кузатарди.

Яхшигина иситилган хона сув қуйгандек жимжит эди; қўққисдан дераза ойнаси қисқа-қисқа уч марта тикиллади. Суварин ўгирилиб қаради-да, ўрнидан турди — бу шартли белги эди: Этьен қуруқ стол ёнида папирос чекиб ўтирган Суваринни деразадан кўриб, бир неча бор шу хилда чақирганди. Лекин машинист

зшикка етиб келмасданоқ Раснёр уни ланг очди; у кўчада, деразадан тушаётган ёруғликда турган кишини таниди-ю, унга мурожаат қилиб деди:

— Мени сотиб қўяди, деб қўрқаяпсанми? Кўчадан кўра бу ерда гаплашганларинг дуруст.

Этъен ичкари кирди. Раснёр хоним мулойимлик билан унга бир кружка пиво тақлиф этди; лекин Этъен қўли билан уни нари суриб қўйди. Қовоқхоначи қўшиб қўйди:

— Сенинг қаерга бекиниб юрганингни аллақачон фаҳмлаганман. Агар дўстларинг айтганларидек, мен жосус бўлганимда, бир ҳафта буруноқ жандармларга шипшитиб қўйган бўлардим.

— Ўзингни оқламасанг ҳам бўлади,— эътироз билдирди йигит.— Унақалардан эмаслигингни биламан... Фикр бир хил бўлмаса ҳам, бир-бирини ҳурмат қилиш мумкин-ку.

Яна орага сукунат чўкди. Суварин стулга ўтириб, деворга суянди-да, папирос тутунини кузата бошлади; лекин унинг бармоқлари қаттиқ қалтирарди, у шу кечкурун кўринмаётган Польшанинг иссиқ жунини излаётгандек, тиззаларини силади; у қандайдир ўн-гайсизланаётганини шуурсизлик билан ҳис этар, нимадир етишмаётгандек бўларди-ю, нималигини ўзи ҳам билмас эди.

Столнинг нариги чёккасида ўтирган Этъен гап қотди:

— Эртага Ворёда ишлар бошланади. Негрель бельгияликларни олиб келипти.

— Ҳа, уларни қош қорайганда бу ёкқа олиб келишганди,— деди Раснёр,— ишқилиб яна жанжал чиқмасин-да.

Кейин овозини баландлатиб, қўшиб қўйди:

— Йўқ, биласанми, мен асло баҳсимизни давом эттирмақчи эмасман, лекин бундан буён ҳам қайсарлик қилаверсаларинг, оқибати ёмон бўлади. Биласанми, сизларнинг бу ишларинг худди сенинг Интернационал тузмоқчи бўлиб юрганингга ўхшайди. Уч кун бурун бир иш билан. Лилла борувдим, у ерда Плюшарни учратиб қолдим. Афтидан, унинг машинаси ботиб қолганга ўхшайди.

У баъзи бир тафсилотларни айтиб берди. Буржуа-

зияни ҳамон ларзага соладиган жўшқин тарғиботлар билан бутун жаҳон ишчиларини ўз атрофига уюштириб олган Ўртоқлик жамоаси инқирозга юз тутибди; шухратпарастлик ва ичқоралик оқибатида юзага келган ички курашлар алангасида емирилаётган бу ташкилот кун сайин бузилиб бораркан. Аввалги эволюционерларни ҳайдаб юборган анархистлар ҳукмрон бўлиб олишгач, ҳаммаси қулаб тушибди. Дастлабки мақсад — ёлланма меҳнат системасини ўзгартириш — партиявий ихтилофлар ичида йўқ бўлиб кетибди; интизом душманлари билимдон раҳбарлар сафига раҳна солди. Мана энди бу оммавий ҳаракатнинг барҳам ейиши аниқ бўлиб қолди, ваҳоланки бу ҳаракат бир вақтлар ўз шиддати билан эски, чириган дунёни ағдариб ташлаш хавфини туғдирган эди.

— Бу ишлардан Плюшар ҳатто касал бўлиб қолибди, — давом этди Раснёр, — бундан ташқари, гарчи у йигинларда нутқ сўзласа ҳам, овози хиппа бўғилиб қолган. У Парижга жўнамоқчи... У менга, забастовкамиз барбод бўлди, деб уч марта айтди.

Этьен кўзларини ерга тикиб, Раснёр дилидагини айтсин, деб унинг гапини бўлмади. Кеча Этьен ўртоқлари билан суҳбатлашганида, уларнинг ишонқирамай, адоватли муносабатда бўлганларини сезганди; бу ҳамманинг ихлоси қайтганини кўрсатувчи дастлабки нишонлар бўлиб, ҳалокатдан дарак берарди. Этьеннинг қовоғидан қор ёғарди; у оломон орзу-умидлари пучга чиққани учун ўч олишга тушган кунни мазах қилиб, шармандангни чиқаради, дея каромат қилган одам олдида мағлубиятга учраганини тан олгиси келмасди.

— Албатта, забастовка барбод бўлди, буни Плюшардан ҳам яхши биламан, — жавоб берди Этьен. — Лекин бу олдиндан ҳам маълум эди. Биз забастовкани иродамизга зид бўлса ҳам қилдик, аммо шу йўл билан Ширкатни яксон этмоқчи эмасдик, асло... Ҳамма фожа шундаки, одамларнинг бошлари айланиб, нимадандир умидвор бўла бошлайди, шундай бўлиши мумкинлигини унутадилар; шунда улар худди бу бахтсизликлар осмондан тушгандек нолиб, дод-фарёд қилдилар.

— Хўп, модомики ўйин бой берилганини билар

экансан, — сўради Раснёр, — нега унда ўртоқларингни тўғри йўлга солмайсан?

Иигит унинг юзига диққат билан разм солди.

— Биласанми, бу гапларни қўй!.. Сенинг ўз фикрларинг бор, менинг ҳам. Мана, ҳеч нимага қарамай олдингга кирдим, бу азбаройи сени ҳурмат қилганимдан. Лекин мен ҳали ҳам борди-ю, курашда ҳалок бўлсак, сенинг оқилона сиёсатингга қараганда бизнинг суякларимиз халқ ишига кўпроқ фойда келтиради, деган фикрдаман... Эҳ, қани энди бирор аблаҳ солдат шартта кўкрагимдан отса эди, — бундай ўлим мен учун нақадар шарафли бўларди!

Унинг кўзларига ёш келди. Ногаҳон унинг оғзидан чиққан бу гапдан мағлуб бўлиб, бирон хилват жой топишга, ўша ерда азоб-уқубатлардан қутулиб, абдий тинчгина ётишга уринган кишининг эзгу орзуси билиниб турарди.

— Яхши айтдингиз! — деди Раснёр хоним эрига бир қараб, унинг бу нигоҳида ҳақиқий радикалга хос бутун нафрати ифода этилганди.

Суварин кўзларини бўшлиққа тикканча, асабийлик билан пайпасланар, гўё ҳеч нимани эшитмас эди. Унинг бурни ингичка, майда тишлари ўткир бўлиб, қизларникига ўхшаган оппоқ юзи борган сари қаҳрли тус оларди: унинг аралаш-қуралаш бўлиб кетган ўй-хаёлидан қонли манзаралар ўтди. У дилидагини очиқ айта бошлади; шунча суҳбатдан унинг миясига Раснёрнинг Интернационал ҳақидаги фикригина ўрнашиб қолганди, энди шунга жавоб берди.

— Уларнинг ҳаммаси қўрқоқ, биттагина одам уларнинг машинасидан даҳшатли вайронгарчилик қуроли ясай оларди. Бироқ бунинг учун ирода керак, лекин ирода ҳеч кимда йўқ, шунинг учун ҳам революция яна бир марта мағлубиятга учрамоқда.

У нафратли овозда кишиларнинг аҳмоқликларидан нолийверди. Иккала суҳбатдош адашиб-улоқиб, йўлини топмай юрган кишининг алаҳсираб алжирашига хижолат тортиб қулоқ солишарди. Россияда ҳеч нарса қовушмасди; у олаётган маълумотлар таъбини хира қиларди. Унинг Европани ларзага солган аввалги ўртоқлари — бу поповичлар, различинецлар, савдогар-

лар — сиёсатдонлар, машҳур йигилистларга айланиб, ўз халқларини озод қилишдан нарига ўтмадилар. Улар битта золимини ўлдирсак, бутун жаҳон озод бўлади, деб билдилар. Лекин уларга худди пишиб етилган ғаллани ўргандек, эски инсониятни қириб ташлаш кераклиги ҳақида гап очсанг, болалар каби «республика» сўзини тилга олсанг, улар дарров хафа бўлишиб, бизни тушунишмади, биздан шубҳаланишяпти, бизни ўз синфидан ажралиб қолган дейишиб, революцион космополитизмнинг омадсиз бошлиқлари сирасига кириштишяпти, деб юришади. Шунга қарамай, унинг қалби, ватанпарварнинг қалби каби гупиллаб тепарди, шу боисдан у аччиқ алам билан севимли сўзини такрорлади:

— Сафсата!.. Буларнинг ҳаммаси қуруқ сафсата, улар ҳеч нима қила олишмайди!

Кейин Суварин овозини пастлатиб, алам билан ўзининг эски орзуси — умумий биродарлик ҳақида гапир бошлади. У мартаба ва бойликдан воз кечди, коллектив меҳнатига асосланган янги дунёни кўрай, деган ягона ният билан ишчилар сафига кирди. Суварин ўзининг майда-чуйда нарсаларини аллақачон посёлка болаларига улашиб берганди; у кўмир қазувчиларга биродарона меҳр билан қарарди, улар гапига ишонишмаганда кулиб қўярди; унинг содда, сипо ишчига хос хотиржам кўриниши, камсуқумлиги ҳаммани ўзига ром қила бошлади. Лекин ҳеч ким унга яқинлашмасди. Ҳар қандай алоқадан нафратланадиган, иродали, на шуҳратпарастликни, на роҳат-фароғатни билладиган Суварин ҳар қалай уларга мутлақо бегона эди. Айниқса, эрталабки газеталарда ўқиган мақола жон-понини чиқариб юборди.

Унинг овози ўзгарди, кўзлари чақнади, у Этьенга тикилди-да, унга тўғри мурожаат этди:

— Сен эшитдингми-йўқми? Марсель шапкадўзлари лотереядан бош совринни ютишипти, юз минг франк; улар дарҳол рента сотиб олишипти-ю, бугундан бошлаб ҳеч қандай иш қилмай яшаймиз, дея эълон қилишипти! Ҳа, сизларнинг, ҳамма француз ишчиларининг орзуларингиз шу — бирон ердан хазина топиб олиб, бирор хилват жойда учига чиққан худбинлардай ишламасдан еб ётишни ўйлайсизлар. Сизлар бой-

ларга қарши беҳуда исён кўтарасизлар, худо ато этган пулларни камбағалларга беришга ўзларингнинг юракларинг дов бермайди-ку... То мол-мулкка ёпишишларингни қўймасанглар, то ўзларинг буржуа бўлиб олиш учунгина буржуазиядан нафратланиб юришларингни ташламагунларингча бахт нима эканлигини билмайсизлар.

Раснёр хахолаб кулди: марселлик икки киши катта ютуқдан воз кечса бўларди, деган фикр унга бемаънилик бўлиб туюлди. Лекин Суварин мурдадек оқариб кетди: башараси қийшайиб, даҳшатли қиёфага кирди. Бу ўз жоҳиллиги билан халқларни қириб юборадиган оташин газаб эди. У қичқириб деди:

— Ҳаммангиз супуриб ташланасиз, ағдариласиз, ахлатхонага улоқтириласиз. Шундай бир кун келадими, сиз қўрқоқлар ва саёқлар зотини қириб ташлайдиган азамат чиқиб қолади. Эшитиб қўйинглар! Мана менинг қўлларим; агар кучим етганда, ерни олардиму уни эзгилаб, кукунга айлантирардим, устларингга тортиб, умрбод кўмиб ташлардим!

— Яхши айтдингиз! — қайтарди бояги гапини Раснёр хоним одатдагидек мулоимлик ва ишонч билан.

Яна жимлик чўкди. Этьен яна Боринаядан келган ишчилар ҳақида гап очди, Сувариндан Ворёда қандай қарор қабул қилингани ҳақида сўради. Бироқ машинист одатдагидек хаёлга чўмиб, зўрға жавоб берарди. У конларни қўриқлаётган солдатларга ҳақиқий ўқлар беришга қарор қилинганини биларди холос. У тоқатсизлик билан тиззаларини уқаларкан, қўққисдан унга нима етишмаётганини билиб қолди, — бу жуилари ипакдек мулоим ўргатилган қуён экан.

— Польша қани? — сўради у.

Қовоқхоначи кулиб, хотинига қаради. У бир оз ийманиб, жавоб берди:

— Польшамми? Печкада:

Жанлен шумлиги туфайли жароҳатланган қуён энди ўлик бола туғадиган бўлиб қолганди. Ортиқча даҳмазадан қутулиш учун ўша куниеқ уни сўйиб, картошка билан қовуриб ейишга қарор қилишганди.

— Ҳа, айтганча, шу бугун кечқурун унинг оёгини единг-ку... Эсингда йўқми? Роса маза қилдим, деддинг-ку!

Суварин аввалига ҳеч нима тушунмади. Кейин ранги қув ўчиб кетиб, жирканганидан ияги титради, зўр бериб ўзини босишига қарамай, кўзларида иккита йирик томчи кўринди.

Бироқ унинг ҳаяжонланганини ҳеч ким сезмади: эшик қаттиқ очилиб, олдидаги Катринани итариб-туртаётган Шаваль кўринди. Монсунинг ҳамма қовоқхонасига кирган, пиво ичаверганидан маст бўлиб, ўз жасоратлари билан мақтанган Шаваль илгариги дўстларимга ҳеч нимадан қўрқмаслигимни бир кўрсатиб қўйай, деб «Авантаж»га ҳам кирган эди. У залга кираркан, маъшуқасига деди:

— Жин ургур! Сен ҳам бир кружка пиво ичсанг-чи. Хотиринг жам бўлсин, менга ола қараганнинг кекирдагини узиб ташлайман!

Катрина Этьенни кўрди-ю, хижолат бўлиб, ранги оқариб кетди. Шавалнинг кўзи Этьенга тушгач, захархандалик билан кулиб деди:

— Қани, Раснёр хоним, икки кружка қуйинг-чи! Ишлар бошланишини ювайлик.

Раснёр хоним индамай пиво қуйди; у пиво деган кишининг раъйини қайтармасди. Сукунат чўкди; қовоқхоначи ҳам, бошқалар ҳам жойларидан жилишмади.

— Баъзи бировлар мени жосус деганини эшитиб қолдим,— деди Шаваль ўчакишиб.— Мен ўшалар шу гапни ўзимга айтишса дегандим, бир гаплашиб олардик.

Ҳеч ким жавоб бермади; эркаклар ўгирилиб, деворга қарашди.

— Бировлар ялла қилиб юришади, бошқалар эса ялла қилиб юришни исташмайди,— давом этди у янада шанғиллаб.— Мен ниманиям яшиардим: Денеленнинг ифлос қавагини тарк этдим, эртагаёқ ўн икки бельгиялик билан бирга Ворёга жўнайман, уларни бошлаб боришни менга топширишди, чунки бошлиқлар мени ҳурмат қилишади-да. Мабодо бу иш бировга ёқмаса, очик айтсин, гаплашиб оламиз.

У чиранишларига яна ҳеч ким чурқ этмай нафратланиб турганини кўргач, захрини Катринага сочди.

— Ичсанг ичақолмайсанми энди, жин ургур!.. Иш-лашдан бош тортаётган мишиқиларнинг ўлиши учун уриштирамиз.

Катрина уриштираркан, қўллари қалтираётгани учун стаканларнинг жаранги эшитилиб турарди. Шаваль чўнтагидан бир қисим кумуш тапга олиб, мастларга хос кибр ва мақтаниш билан стол устига, рўбарўсига териб қўйди-да, бу ўн сони қора терга ботиб топганини, уларни ишёқмасларга кўрсатишдан қўрқмаслигини писанда қилди. Ўртоқларининг муносабати баттар жонини чиқарди, шу боисдан у аламига чиолмай, уларни ҳақоратлашга ўтди.

— Ҳм! Демак, кўрсичқонлар кечаси чиқадиган бўлипти-да? Ҳа, қароқчиларки кўчада пайдо бўптими, демак, жандармлар уйқуга тушибди-да, а?

Этьен ўрнидан турди, у вазмин бўлса ҳам вожоҳатли эди.

— Ҳей, менга қара, жудаям жонимга тегдинг-ку... Ҳа, сен жосуссан, пулларингдан хиёнат ҳиди келади, шу боисдан сен ўлаксага қўл тегизишга ҳам жирканаман. Лекин на чора, сен айтганча бўлақолсин! Сен билан куч синашишга тайёрман. Бу дунёда икковимиздан биттамыз қолишимиз керак, мен анчадан бери шу фикрга келганман.

Шаваль муштини тугди

— Аҳа! Сен пасткашнинг жиғингга тегиб, жонингни чиқараман, деб ўлиб бўлдим-ку... Сен ўзингсан, майли, мени расвойи жаҳон қилишди, ана шу аблаҳликлар учун мана энди ўзинг жавоб берасан!

Катрина ялиниб қўлларини кўтарди-да, уларнинг орасига ташланди; бироқ улар қизни итариб юбормади, уларнинг муштлашиши аниқлигини Катринанинг ўзи тушуниб, секин ўзини бир четга олди. У деворга суялганча қўрқувдан тахта бўлди-ю, ҳатто титрамай ҳам қўйди, фақат ўзи туфайли муштлашмоқчи бўлган иккала йигитга бақрайиб қараб турди.

Раснёр хоним синдириб қўйишларидан қўрқиб, пештахта устидаги кружкаларни хотиржам йиғиштириб олди. Сўнг у скамейкага ўтирди-да, бепарволик билан кузатди. Шундай бўлса ҳам эски ўртоқларнинг ёқалашларига йўл қўймаслик керак эди; Раснёр аралашмоқчи бўлди; Суварин унинг елкасидан ушлади-да, стол ёнига олиб бориб деди:

— Буни сенга алоқаси йўқ... Уларнинг биттаси ортиқча, қайси бири кучли бўлса, ўшаниси тирик қолади.

Шаваль рақибининг ҳужум қилишини кутиб ўтирмай, муштани ишга солди. У новча бўлса ҳам, аммо уқувсиз эди. У гўё икки қилич билан чопаётгандек, Этьеннинг башарасини нишонга олиб, гоҳ у, гоҳ бу қўли билан туширарди. Айни пайтда Шаваль худди томошабинлар олдида ўзини кўрсатмоқчи бўлгандек, тинмай жаврар, сўкинар ва шу йўл билан ўзини тезлар эди.

— Ҳа, лаънати шўртумшуқ, шошмай тур ҳали, бурнингни пачақлаб қўяман! Анчадан бери бурнингни ерга ишқалаб қўймоқчи бўлиб юрувдим ўзим ҳам... Қани, тумшугингни тут-чи — мен ундан чўчқаларга ем қиламан; иннайкейин кўрамиз, бузуқ хотинларимиз яна кетингдан юришадими-йўқми?

Этьен ўзини йиғштириб, тишларини қисди-да, иккала қўли билан кўкраги ва юзини тўсиб, индамай уришиш санъати қоидаларига мувофиқ олишаверди; кейин қулай пайт пойлаб, шартта қўлини чўзарди-да, солиб қоларди.

Аввалига улар бир-бирларига жиддий шикаст етказишмади. Бирининг шангиллаб, қизишиб кетиши, иккинчисининг эса совуққонлиги, вазминлиги туфайли кураш чўзилиб кетди. Стул ағдарилди. Ерга ётқизилган ғишт устига сепилган оқ қум қўпол бошмоқлар тагида ғижирларди. Ниҳоят улар ҳарсиллаб қолишди; оғир-оғир нафас олишларигина эшитиларди; қипқизариб кетган юзлари ичларида ўт ёнаётгандек ловилларди; алангаси эса қисик кўзларида чақнаётганга ўхшарди.

— Бўпти,— бўқирди Шаваль.— Энди эҳтиёт бўл!

Ҳақиқатан ҳам у ғанимининг елкасига худди қамчин билан ургандек қулочкашлаб мушт туширди. Этьен оғриқдан бақириб юборай деди-ю, ўзини тутди; мускулларга тушаётган зарбанинг бўғиқ гурс-гурсигина эшитиларди. Этьен унинг кўкрагини мўлжаллаб бир туширди, агар Шаваль эчкидек сакраб, чап бермаганида ағдарилиб тушиши турган гап эди. Шунга қарамай, мушт Шавалнинг чап биқинига шу қадар қаттиқ тегдики, у нафас ололмай, гандираклаб кетди. Оғриқдан қўллари мадорсизланди; бундан баттар жаҳли чиқди-ю, Этьенга ваҳший қайвондек ташланди, пошнаси билан унинг қорнига тепмоқчи бўлди.

— Шошмай тур,— ғўлдиради у энтикиб,— ичакларингни бошингга салла қилиб қўяман!

Этъен унинг зарбасини қайтарди, лекин ҳалол жанг қондаси бузилганидан шунчалик дарғазаб бўлдики, ниҳоят гап қотди:

— Учир овозингни, ҳайвон! Оёғингни ишга сола кўрма, жин ургур! Йўқса стулни оламану бошингга тушираман!

Муштлашув кучайди. Ғазабланган Раснёр яна аралашмоқчи бўлувди, лекин хотини ўкрайганини кўриб, шаштидан қайтди: нима, икки мижоз қовоқхонамизда бир-биридан аламини олишга ҳақлари йўқми? Шундан кейин Раснёр улардан бири оловга йиқилиб тушмасин, деб камин олдига келиб тураверди. Одатдагидек хотиржам ўтирган Суварин папирос ўради-ю, аммо чекишни унутиб қўйди. Катрина деворга суялиб, қимир этмай турарди; у қўлларини беихтиёр кўтариб-туширар, бир маромда титраб, кўйлагини йиртар эди. У зўр бериб, қичқириб юбормасликка ҳаракат қиларди; у улардан бирининг, ортиқ кўрилиб, оти тилга олинган кишининг ўлишидан кўрқарди, шу боисдан шунчалик гангиб қолдики, қай бири қадрлироқ эканини ўзи ҳам билмасди.

Кўп ўтмай Шаваль чарчаб қолди, қора терга ботиб, таваккалига ура бошлади. Этъен бўлса жаҳли чиқиб кетганига қарамасдан, ҳамма зарбаларни қайтариб, ҳимояланди; лекин баъзи зарбалар анча сезиларли эди. Қулоғи юлинганди, кўкариб кетган бўйнида тирноқ излари кўринарди, териси шилинганди; буларнинг ҳаммаси шунчалик ачишиб оғрирдики, Этъен ҳам ўз навбатида сўкиниб, дуч келган жойга қаттиқ-қаттиқ тушира бошлади. Шаваль яна чап бериб, кўкрагига мушт тушишидан ўзини сақлади. Лекин у энгашган эди, шу заҳоти бир мушт юзига тегди-да, бурнини пачақлаб, бир кўзини чиқарди. Шу ондаёқ бурнидан қон тирқираб чиқди, кўзи шишиб, кўкариб кетди. Қон оқишидан кўролмаб қолган, зарбдан ҳушини йўқота-ёзган аблаҳ қўлларини ҳавода тартибсиз силкитарди; шу чоғ нақ кўкрагига тушган мушт уни ағдариб юборди. Суяклари қирсиллаб кетди, Шаваль аравадан тушиб кетган бир қоп гипсдек гурс этиб, ерга юзтубан йиқилди.

Этъен уришдан тўхтаб, кутиб турди.

— Қани тур! Яна хоҳласанг, жангни давом эттирамиз.

Гангиб қолган Шаваль бир неча лаҳзагача жавоб бермади; у қимирлаб, керишди, бир азобда туриб чўккалади-да, шу алпозда, бирпас улкан тошдек ўтирди; у билдирмасдан тимирскилаб, шими чўнтагидан ниманидир излади. У оёққа тургач, яна олға ташланди; жон ҳолатдаги чинқириш уни бўғзидан олгандек бўлди. Лекин Катрина унинг қўлидаги нарсани кўриб қолиб, беихтиёр даҳшатли қичқириб юборганди, бундай қилганига ўзи ҳам ҳайрон эди,— бу билан Катрина икковидан қай бирини афзал кўришини очиқ-ойдин тан олгандек эди:

— Эҳтиёт бўл! Қўлида пичоқ бор!

Этъен биринчи зарбни қўли билан қайтаришга улгурди. Шамшод дастага мис ҳалқалар билан маҳкамланган пичоқнинг кенг тиғи Этъеннинг мовут куртқасини тилиб юборди. У Шавалнинг қўлини ушлаб олгач, иккови жон-жаҳди билан олишиб кетди. Этъен борди-ю, Шавалнинг қўлини қўйиб юборса, ўлиши аниқ эканлигини биларди, Шаваль бўлса, қўлини бўшатиб, пичоқ уришга ҳаракат қиларди. Қурол секин-аста пастлаб борарди, мухолифлар кучанаверганларидан чарчагандилар. Этъен баданига совуқ пўлат икки марта текканини сизди; ниҳоят у бор кучини тўплаб, Шавалнинг қўлини шундай қаттиқ сикдики, унинг бармоқлари ёзилиб, пичоқ тушиб кетди. Иккови ерда юмалашиб кетишди; Этъен бир амаллаб пичоқни олди, энди у пичоқни ўқтала бошлади. Этъен Шавални тиззаси билан босиб олиб, унга бўғизлаб ташлайман, дея таҳдид қиларди.

— Аҳ, лаънати сотқин, энди жонингни оламан!

Аллақандай жирканч ички овоз гангитиб қўйганди, чеккалари болға билан ураётгандек лўқилларди, бирдан унинг одам ўлдиргиси, қон тўккиси келиб қолди. Лекин у маст эмасди. У ана шу ирсий иллат билан олишарди; иштиёқи шу қадар жўш урган эдики, бир фалокатни бошлашига оз қолди. Этъен ўзини босиб, пичоқни отиб юборди-да, овози хириллаб, деди:

— Тур ўрнингдан, йўқол!

Бу сафар Раснёр улар томон отилди-ю, лекин бит-

таси бехосдан пичоқ уриб юбормасин, деб унча яқин келмади. Раснёр уйида қотиллик рўй беришига йўл қўймади; унинг шунчалик жаҳли чиқиб кетдики, хотини пештахта олдида туриб, нега элдан бурун қичқирасан, дея дакки берди. Оёғига пичоқ тегиб кетай деган Суварин, ниҳоят папиросни ёндиришга жазм қилди.

Демак, ҳаммаси тугадими, а? Катрина ҳанг-манг бўлиб, эркакларга қараб турарди; ҳайрият, икковиям омон қолди.

— Йўқол,— такрорлади Этьен,— йўқол, ўлдириб қўяқоламан!

Жағи қонга беланиб, кўзи чиққан Шаваль ўрнидан турди, бурнидан оқаётган қонни қўли билан артиди-да, иши ўнгидан келмаганига жони чиқиб, оёғини судраганича нари кетди. Катрина беихтиёр унга эргашди. Шунда Шаваль қаддини ростлаб, аламини бўралаб сўкишдан олди.

— Э йўқ! Йўқ-йўқ! Модомики ўшани хоҳласанг, ўша билан яшайвер, ифлос! Агар жонинг керак бўлса, меникига қадам қўйма.

У зарда билан эшикни қарсиллатиб ёпди. Энди фақат каминдаги кўмирнинг енгил чирсиллаши эшитилаётган иссиқ хонага чуқур жимлик чўкди. Ерда аганаб ётган стул билан ҳалқоб бўлиб қолган қон кўринарди; гишт устига сепилган қум қонни томчима-томчи шимарди.

IV

Этьен билан Катрина Раснёрларникидан чиқиб, ёнма-ён боришарди: улар анчагача жим кетишди. Эрувгарчилик, совуқ, изиллатувчи эрувгарчилик бошланганди; қор қорайганди, лекин эримаганди. Кучли шамол қутуриб ҳайдаб ёрган қора булут парчалари орқасига яширинган тўлин ой хира осмонда зўрға кўриниб қоларди. Ерда эса ҳамма нарса сукутда эди, фақат томдан тушаётган томчиларнинг бир маромда чиқиллаши-ю, эриган қор думалоқларининг шўлп этиб тушишигина эшитиларди.

Узини бағишлаган хотин билан ёнма-ён бораётган Этьен уялиб, ҳеч нима дея олмасди; у ғалати аҳволга тушиб қолганди. Унинг хаёлига Катринани олсаму, Ре-

кийярга яширинсаммикин, деган фикр келди-ю, лекин бу иши ўзига бемаъниликдай туюлди. У қизни посёлкага, ота-онаси олдига олиб бормоқчи бўлудди, Катрина капалаги учиб, бу таклифни рад этди: йўқ, йўқ, нима бўлса бўлсину, лекин уларни шарманда қилиб, ташлаб кетганидан кейин яна бориб, дардисар бўлмайди! Шундан сўнг икковиям жим кетди; пилч-пилч лойга айланган йўлдан бошлари оққан томонга кетаверишди. Аввалига Ворёга қараб кетган пастликка тушишди, кейин ўнгга бурилиб, канал бўйлаб юришди.

— Ҳар қалай бирор жойда тунашинг керак-ку,— деди ниҳоят Этьен.— Хонам бўлганида, сени жон деб бирга олиб кетган бўлардим...

Лекин аллақандай ғалати бир тортинчоқлик дилидагини айтишига монелик қилди. У ўтмишни эслади, эҳтирос билан бир-бирларига интилишганини, уят ва андишагина қовушишларига тўсқинлик қилганини эслади. Наҳотки у ҳамон Этьеннинг қалбини жизиллатаётган бўлса? Нима учун юраги така-пука бўлиб боряпти, у билан бирга бўлиш истаги қалбида яна жўш ураётгани учун эмасмикан? Гастон-Марида Катринадан еган тарсакиси эсига тушди-ю, жаҳлини чиқариш ўрнига ҳирсини қўзитиб юборди. Нима бўлаётганини Этьеннинг ўзи ҳам билмасди; уни Рекийярга бирга олиб кетиш тамомила табиий ва осонгина амалга оширса бўладигандек туюлди унга.

— Менга қара, бирор қарорга келишимиз керак-ку, ахир. Сени қаёққа олиб бориб қўйсам экан?.. Наҳотки мен шунчалик ёмонки, мең билан кетишни истамасанг?

Катрина ундан кейинда қолмасликка тиришиб, секин юрарди, чунки оёгидаги ёғоч бошмоғи қўпол бўлиб, йўлнинг чўнқир жойлари келганда тойиб кетаверарди; у бошини кўтармай деди:

— Вой худойим-ей, ўз гамим ўзимга етадиям-ортадиям, баттар қийнаб нима қиласан мени. Сен айтган гапнинг энди бизга нима кераги бор? Ахир мени хушторим бор, қолаверса, ўзинг ҳам бошқа хотин билан ўйнашиб юрибсан-ку.

Катрина Мукетта ҳақида гапираётган эди. Катрина Этьен ҳамон Мукетта билан алоқа қилади, деб ўйларди, бу ҳақда уч ҳафтадан бери миш-миш гап юрарди.

Этъен қасам ичиб, бу гапларнинг ёлгонлигига уни ишонтирмоқчи бўлди, лекин Катрина бошини чайқаб қўя қолди: ҳув ўша оқшом, икковларингни учратиб, ўпишиб турганларингни кўрган-чи?

— Э, шуям иш бўпти-ю, гапиришгаям арзимади! — Этъен тўхтаб овозини пастлатиб, эътироз билдирди. — Икковимиз жуда тил топишиб кетардик-да!

Катрина хиёл титраб, жавоб берди:

— Афсусланмасанг ҳам бўлади, мени хотин қилиб барака топмайсан. Адою тамом бўлганимни билсанг эди! Баданим икки сулик мойдан ҳам баттар, бунинг устига қоматим ҳам қинғир-қийшиқ, эҳтимол, ҳеч қачон рисоладаги хотин бўлолмасам керак.

Шундан кейин Катрина шу вақтгача ҳам балоғатга етмагани учун ўзини айблаб, очиқ-ойдин тапираверди. Эркак билан бирга турганига қарамай, бу ҳол уни камситиб, қиз болалар қаторига киритиб қўярди. Жилла қурса битта бола тукқанида ҳам майли эди, юзи ёруг бўларди.

— Ҳа, шўрликкинам-а! — дея пичирлади қаттиқ ачинган Этъен. Улар уюлган бир талай кўмир олдига келиб, унинг соясида туришарди. Ой қора булутлар орқасига бекингач, улар ҳатто бир-бирининг юзини ажратолмай қолишди; нафаслари қўшилиб, шунча ойлардан бери қийналиб, қўмсаб қолган лаблари бўса олиш учун бир-бирини қидирди. Лекин бирдан ой мўралади-ю, улар юқорида сутдек ёришган уюм тепасида Ворёни кузатиш учун қўйилган соқчининг қаққайиб турганини кўриб қолишди. Шу боисдан улар ўпиша олишмади: уларга уятчанлик, қаҳру ғазаб, иложи йўқлигини сал-пал англаш, қалин дўстлик туйғулари аралаш-қуралаш бўлиб кетган эски уятчанлик халақит берди. Улар тўпиқларигача лойга ботиб, бир азобда нари кетишди.

— Хўш, демак, бормайдиган бўлдингми? — сўради Этъен.

— Йўқ, — жавоб берди Катрина. — Аввал Шаваль, кейин сен, кейин сендан сўнг яна биттаси биланми?.. Керак эмас, ёмон кўраман, буни ҳеч ҳузур-қаловати йўқ, бу ишни нима кераги бор?

Улар жим бўлишди, бир оғиз ҳам гапирмай юз қадамча юришди.

— Лоақал қаерга боришингни ўзинг биласанми ё билмайсанми?— сўради Этьен.— Шундай қоронғида бир ўзингни йўлда қолдириб кетолмайман-ку.

Катрина бамайлихотир жавоб берди:

— Уйга бораман. Шаваль бари бир менга эрдек одам, уникидан бошқа қаёққа ҳам борардим.

— Ахир у сени уриб ўлдириб кўяди-ку!

Яна сукунат чўкди. Катрина тақдирга тан бергандек елкасини қисди. Ҳа, албатта, аввалига роса дўп-послайди, чарчагандан кейин ўз ҳолига кўяди, фоҳишалардек кўчаларда санқиб юргандан кўра шу ҳам яхши-да, ҳар қалай. Сирасини айтганда, у калтакка ўрганиб қолганди; Катрина ўнта қиздан саккизтасининг қисмати бундан ҳам баттар-ку, дея ўзини-ўзи овутарди, жазмани бир кун эмас, бир кун унга уйланса, унга қилган муруввати шу-да.

Этьен билан Катрина беихтиёр Монсуга олиб борадиган йўлдан кетаверишди; улар мўлжалга яқинлашганлари сари кам гапиришарди. Улар гўё бир-биридан ажраб кетгандек эди. Катринанинг яна Шавалникига кетаётганига юраги туздай ачишаётган Этьен қандай қилиб уни бу йўлдан қайтаришини билмас эди. Юраги торс ёрилай дерди: аммо унинг эвазига нимани ҳам таклиф қила оларди? Узи оч-наҳор, доимо яшириниб юрган бўлса, бунинг устига битта-яримта солдат қоронғи кечада пақиллатиб бошидан отиб кўйса, нима бўлади? Ҳақиқатан ҳам, балки сғир қисматига тан бериб, бечора қизни янги-янги изтиробларга дучор қилмагани маъқулдир? Шундан кейин Этьен бошини қуйи солиб, қизни жазманиникига бошлаб кетди, қиз тош устида «Пикетт» қаҳвахонасидан йигирма метрча беригаги омборлар муюлиши ёнида тўхтаб:

— Буёғига борма. Мабодо у сени кўриб қолгудек бўлса, менга ёмон бўлади,— деганида ҳам бирон нима деб эътироз билдирмади.

Қўнғироқхонадаги соат ўн бирга занг урди; қаҳвахона ёпиқ эди, лекин дераза қопқоқлари тирқишидан ёруғлик тушиб турарди.

Хайр,— пичирлаб деди Этьен.

Катрина унга қўл узатди; Этьен унги қўйвормай турди, киз ундан ажраб кетиш учун сал тортиб, қўлини бўшатиб олди. У орқасига қарамасдан эшик ёни-

га келиб, зулфинни сурди-да, ичкари кирди. Бироқ Этьен кетмади; у ўша жойида уйдан кўз узмай тураверди ва ташвишланиб, ичкарида нималар содир бўлишини кўз олдига келтирди. У диққат билан қулоқ солди ва мана ҳозир калтакланаётган хотиннинг қичқириғи эшитилиб қолади, деган фикр хаёлига келиши билан аъзойи бадани титраб кетди. Лекин уй жимжит, қоронғи эди; у иккинчи қаватдаги бир дераза ёришганини кўрди; кейин шу дераза очилди-да, кимдир бошини чиқариб, кўчага қарай бошлади. Этьен қизнинг нозик вужудини таниди-да, яқинлашди.

Катрина секингина шивирлади:

— У ҳали қайтиб келмапти, мен ётяпман... Утиниб сўрайман сендан, кет!

Этьен кетди. Эрувгарчилик тобора кучайиб борарди, томлардан жала қуйгандек сув оқарди, деворлар ивиб кетди, фабрика биноларининг хира тарҳи қоронғиликда кўринмасди. Аввалига Этьен Рекийярга жўнади. У чарчоқ ва ҳаяжондан ўзини шол-шол ҳис этарди; ҳозир ер остига тушиб, ўзини ўлдиришдан бошқа нарсани истамасди. Бироқ кейин у Ворёни эслади, эртага шахтага тушишлари керак бўлган бельгияликларни, посёлкадаги солдатлар қўйилганидан газабланиб, ажнабийларни ўз шахталарига қўймасликка қатъий жазм этган ўртоқларини ўйлади. У дамбадам эриган қор кўлмакларига тушиб, канал бўйлаб кетди.

Этьен кўмир уюми олдига келганида ой кўриниб, ёп-ёруғ бўлиб кетди. Этьен бошини кўтариб, осмонга қаради. Юқорида, осмонда қутуриб эсаётган шамол ҳайдаётган булутлар тез сузарди; улар оқ тусга кирди, юшқалашди, парчаланиб, ой юзидан билинар-билинемас ҳовурдек сузиб ўтарди; улар шу қадар тез сузишардики, ой ҳар лаҳзада бекиниб, яна чарақлаб кўринарди.

Этьен сутдек ойдинга мириқиб боқди-да, бошини туширди; лекин шу ондаёқ уюм устида содир бўлаётган бир ҳодиса эътиборини тортди. Совуқдан музлаган соқчи у ёқдан-бу ёққа бориб-келарди — Маршённ томонга йигирма беш қадам борар, кейин Монсу томонга қайтарди. Ойдинда солдатнинг қора гавдаси аниқ кўринарди; елкасидаги милтиқ найзаси ой ну-

анда ўтирарди. Лекин Этьеннинг эътиборини тортган нарса бу эмасди: туилар тўс-тўполон бўлганда Ўлмас бобо яшириниб юрган кулба орқасида худди ўлжаси томон эмаклаб бораётган ваҳший ҳайвондек аллакимнинг қораси кўрингандек бўлди. Этьен шу заҳотиёқ Жанленни таниб қолди; унинг узун, чайир гавдаси сувсарга ўхшарди. Соқчи уни кўра олмасди; каллакесар боланинг нияти бузуклиги аниқ эди: у солдатларни ўлгудек ёмон кўрар, уззукун одамларни отиш учун қуроли билан олиб келинган бу қотиллардан кўмир қазувчилар қачон қутуларкин, дея сўрар эди.

Этьен бирор ножўя иш қилиб қўймасин, деб болани чақирмоқчи ҳам бўлди-ю, лекин иккиланди. Ой яширинди; Этьен Жанленнинг худди сакрамоқчи бўлгандек чўнқайганини кўрди; бироқ ой яна кўринди, бола эса ҳамон чўнқайиб ўтирарди. Соқчи ҳар сафар кулбага жуда яқин келар, кейин бурилиб, яна орқасига юрарди. Яна булут ой юзини тўсди, ерни қоронғилик босди; шу он Жанлен қўққисдан худди ёввойи мушукдек солдатнинг елкасига сапчиди-ю, тирноқлари билан маҳкам ёпишиб, бўғзига пичоқ санчди. Жунли ёқа дарров кесилмади, шу боисдан бола иккала қўли билан пичоқ дастасидан босиб, бутун оғирлигини солдат устига ташлади. У фермалардан олиб кетган жўжаларни бир неча марта сўйганди. Бу иш шу қадар тез бўлдики, тун сукунатида бўғиқ қичқириқ билан ерга тушган милтиқнинг тўқиллагани эшитилди холос. Яна ой чарақлади.

Этьен турган ерида қотиб қолди; у даҳшатли бу томошадан кўзини узмасди. У қичқирмоқчи бўлар, лекин кўкрагини бир нарса босиб тургандек овози чиқмасди. Уюм усти бўшаб қолди; тез сузаётган булутлар орасидан мўралаётган ой ёруғида ҳеч қандай қора кўринмасди. Ниҳоят, Этьен ўзига келди-ю, тезлик билан юқорига югурди; Жанлен қулочини ёзиб чалқанча ётган мурда ёнида эмаклаб турарди. Сутдек ойдинда қор устидаги қизил шим билан кулранг шинель кўзга яққол ташланарди. Бир томчи ҳам қон кўринмасди: дастасигача солдат бўғзига санчилган пичоқ ҳамон қимирлаб турарди.

Ғазабига чидолмаган Этьен бир мушт солиб, болани мурданинг ёнига сўра олдирди.

— Нега бунақа қилдинг? — пичирлаб сўради Этьен ўзини зўр-базўр босиб.

Жанлен сал кўтарилди-да, ориқ белини мушукдек букчайтириб эмаклади; унинг шалпанг қулоқлари, ваҳшиёна жағлари титрарди, кўк кўзлари ялтирар эди — ўзи қилиб қўйган ёвузликдан шунчалик ларзага келган эди.

— Жин ургур, нега бундай қилдинг?

— Билмадим, шунақа қилгим келди-да.

Унинг қилган жавоби шу бўлди. Солдатни ўлдириш фикри уч кундан бери Жанленнинг бошини қотирарди. Бу фикр унга тинчлик бермасди; бу фикрга шунчалик берилиб кетдики, мияси ғовлаб, боши лўқиллаб оғрий бошлади. Кўмир қазувчиларни ўз юртларида таъқиб қилувчи бу чўчқаларга раҳм қилиб ўтирадими! Урмондаги эхтиросли баҳслардан, шахталарда янграган вайрон қилиш, ўлдириш ҳақидаги қичқириклардан Жанленнинг миясига беш-олтита сўз ўрнашиб қолганди; у мана шу сўзларни худди революция ўйини ўйнаётган боладек такрорларди. Ҳақиқатан ҳам бундан ортиқ нәрса билмасди; уни ҳеч ким шундай ишга гижгижламаганди, бу истак худди жўяклардан пиёз ўғирлаш орзусидек ўз-ўзидан туғилди.

Этьен жиноят қилиш бу нодон боланинг миясида қанчалик чуқур ўрнашиб қолганини ўйлаб, даҳшатга тушди; у беақл ҳайвонни тепгандек Жанленни яна бир туртди. Этьен Ворёдаги соқчи солдатнинг бўғиқ қичқиригини эшитиб қолган бўлса-я, деган фикр хаёлига келиши билан титраб кетар ва ҳар сафар ой булутлар орасидан кўриниши билан Ворё томонга қарар эди. Лекин ҳаммаёқ жимжит эди; шундан кейин Этьен энгашиб, совиб бораётган қўлларни ушлаб кўрди, уришдан тўхтаган юракка қулоқ солди. Пичоқнинг суяк дастасигина чиқиб турарди; дастага қора ҳарфлар билан эзгу сўз — бор-йўғи битта сўз: «Муҳаббат» ўйиб ёзилганди.

Сўнг Этьен ўлдирилган йигитнинг юзига қаради. У бирдан солдатни таниб қолди: бу Этьен бир кун эрталаб гаплашган ўша ёш Жюль, солдатликка янги олинган йигит эди. Этьен унинг малла сочлари ўраб турган сепкилдор маъсум чехрасига тикиларкан, ичидан ачинди. Катта очилган кўм-кўк кўзлари ос-

монга тикилаётгандек эди. Унинг қимирламаётган кўзлари уфқ ортидан ўз юртини, Эъён суҳбатлашган вақтда айтган юртини излаётгандек эди. Унинг хотираси қуёш нурларига чўмган Плогоф деган жой қаердайкин? Узоқда, олисда. Шу нотинч тунда у ерларда денгиз ҳайқираётган бўлса ажаб эмас. Осмонда булутларни ҳайдаётган шамол балки унинг жонажон далалари устидан ҳам ғувиллаб эсаётгандир. У ерда икки хотин — онаси билан опаси турибди; улар шамол юлқиб кетмасин, деб чепчикларини қўллари билан ушлаб олишган, улар ҳам ораларида бир неча миля масофа бўлишига қарамай, жигарбандимиз нималар қилаётганини кўрармиканмиз, дея узоқларга тикилишган. Вугундан бошлаб улар йигитни абадий кутишади. Жуда расво иш-да! Бойларнинг марҳамати туфайли камбагаллар бир-бирларини ўлдиришса-я!

Бироқ мурдани йўқотиш керак эди; аввалига Эъён уни каналга ташлаб юбормоқчи бўлди, лекин у ердан топиб олишлари мумкин, деган хаёлга бориб, бу фикридан қайтди. Эъён қаттиқ ташвишга тушди: минутлар ўтиб борарди, нима қилиш керак, нима қилиш лозим? Бирдан миясига: мурдани Рекийяргача олиб боролганимда, ўша ерда умрбод кўмилган бўларди-я, деган фикр келди.

— Бу ёққа кел,— деди у Жанленга мурожаат қилиб.

Бола унга ишонқирамай қаради.

— Бормайман, мени ўлгудек калтакламоқчисан-да. Бунинг устига ишим бор. Хайр.

Ҳақиқатан ҳам у Ворё омборидаги хода, тахталар орасидаги бир хилват жойда Лидия ва Бебер билан учрашишга ваъдалашиб қўйганди. Улар шахтага тушишаётган бельгияликларни одамлар қандай тошбўрон қилишларини кўриш учун уйда ётмасликка аҳд этишганди.

— Менга қара,— такрорлади Эъён,— ҳозироқ олдимга кел, бўлмаса солдатларни чақираман, нақ каллангни узиб ташлашади.

Ниҳоят Жанлен юрак бетлаб келганида Эъён дастрўмолини чийратиб, у билан солдатнинг бўйнини танғиб боғлади, жароҳатдан қон чиқмасин, деб пичоқни суғуриб олмади. Қор эриб борарди; ерда бирортаям қизил доғ, умуман бу ерда қотиллик юз берганидан далолат берувчи ҳеч қандай из йўқ эди.

— Оёғидан кўтар!

Жанлен ўликни оёғидан кўтарди, ҳар эҳтимолга қарши милтиқни елкасига ташлаб олган Этьен эса мурданинг елкасидан олди; улар шу алпозда уюм тепасидан секин тушишди, пастга думалаб кетмасин, дея тошларга тегиб кетмасликка ҳаракат қилишди. Уларнинг бахтига ой юзини яна булутлар қоплаб олди. Бироқ улар канал бўйлаб юришаётганларида ой яна чарақлаб чиқди; нариги соқчи уларни сезиб қолмагани бир мўъжиза эди. Этьен билан Жанлен чурқ этмай, жуда шошилиб боришарди, бироқ қўлларидаги мурда тебраниб, юришга халақит берарди; деярли ҳар юз метрда мурдани ерга қўйиб, нафасларини ростлашга тўғри келарди. Рекийярга буриладиган жойда шовқинсуронни эшитишиб, қўрқувдан аъзойи баданлари музлаб кетди: улар тўсиқ орқасига ўтиб яширинишга улгуришмасидан патруль ўтиб қолди. Салгина нарида улар бир маст кишига дуч келишди, лекин у кайфи тарақ бўлганидан ёнларидан сўкиниб ўтиб кетди. Ниҳоят улар эски шахтага етиб келишди; иккаласи шунчалик ҳаяжонланган эдики, тишлари тишларига тегмасди.

Этьен солдатни шахта чоҳига тушириш осон эмаслигини биларди. Бу тинкани қуритадиган иш эди. Жанлен тепада қолиб, мурдани тушира бошлади; Этьен илдизларга осилиб-осилиб, уни пастга тушираверди; улар поялари синиб кетган дастлабки икки нарвондан тушишгунча шундай қилишди. Кейин ҳар бир нарвондан тушишда шундай қилишга тўғри келди: Этьен олдинда мурдани ушлаб тушарди. Этьен шу алпозда мурда устимга қулаб тушмаса гўрга эди, дея хавотирланиб, ўттиз нарвондан ўтди, яъни икки юз ўн метр пастга олиб тушди. Милтиқ елкасини шилиб юборди. Этьен Жанленнинг олдинга ўтиб, шамни олишини хоҳламасди, у бу шамни жуда эҳтиёт қиларди. Нега шундай? Шам бу тор йўлакда уларнинг юрагини сиқади холос. Бироқ улар юк ортадиган жойга етишганда, Этьен болани шамни олиб келишга юборди. Ўзи бўлса қоронғида мурданинг олдида қолиб, кута бошлади; юраги қинидан чиқиб кетай дерди.

Жанлен шамни олиб қайтганда Этьен у билан маслаҳатлашишга қарор қилди: бола бу эски штоль-

няларнинг кириб-чиқиладиган ҳамма йўлларини биларди, унга шундай тешиклар маълум эдики, бундай тешиклардан катта кишиларнинг ўтиши гумон эди. Улар яна ўликни судраб йўлга тушишди, ярим хароба йўлаклардаги қинғир-қийшиқ йўллардан бир километрча юришди. Ниҳоят улар йўлакнинг жинслар оғирлигидан тиргакларининг ярми ағанаб тушган ва шифти қийшайиб қолган жойига етишди; бундан буёғига фақат эмаклаб бориш мумкин эди: бу ер узун яшикка ўхшарди. Улар солдатни худди тобутга солишгандек шу ерга жойлашди, ёнига милтиғини қўйишди-да, кейин ўзлари ҳам кўмилиб қолишлари мумкинлигига қарамай, қолган тиргакларни ҳам тешиб қулатишди. Шу ондаёқ тепадан улкан бир бўлак қатлам қулаб тушди, иккови тирсак ва тиззаларини ишга солиб, аранг чиқиб олишди. Эъён кейин нима бўларкин, дея қизиқиб орқасига қараган эди, шифт бутун оғирлиги билан мурда устига секин босиб тушди. Кўп ўтмай ҳаммаёқни босган тупроқдан бошқа нарса кўринмай қолди.

Жанлен қароқчиларникига ўхшаган ғорига қайтиб келгач, ўзини пичан устига отди-да, қаттиқ чарчагани учун зўрға ғўлдираб деди:

— Уф! Бир соатгина мизғиб олай! Кичкинтойлар кутиб туришар.

Эъён шамни пуфлади, — шундоқ ҳам ёниб бўлай деганди. У ҳам ўлгудек чарчаганди, лекин ухлай олмади: хаёлидан изтиробли, даҳшатли фикрлар ўтарди; чаккалари болга билан ураётгандек лўқилларди. Кўп ўтмай бу фикрлар ўрнига бошқа бир фикр келди. Бу фикр уни эзиб, тинчлик бермас эди, нимага пичоқ дамига келиб қолган Шавални бўғизлаб ташламадинг, деган бир савол олдида кўндаланг туриб, уни қийнардиган, у эса бу саволга жавоб топа олмасди. Нима учун манави тирмизак номини ҳам билмаган бир солдатни сўйиб ташлади? Буларнинг ҳаммаси Эъёнинг инқилобий эътиқодини, унинг ўлдириш иштиёқини, ўлдиришга ҳақи борлиги тўғрисидаги тушунчасини остин-устин қилиб юборганди. Наҳотки у қўрқоқ бўлса? Бола пичан устида ухлаб, хуррак ота бошлаганди; бу маст кишининг хурраги бўлиб, афтидан, Жанлен қотиллик кайфини сураётган эди. Хуноби

ошган Этьен нафратланиб, Жанленнинг қандай ёвузлик қилганини билгани учун унинг ёнида бўлиш малол кела бошлади. Бирдан аъзойи бадани жимирлаб кетди: уни ваҳм босди. Ер қаъридан енгил шитирлаш, аллакимнинг инграгани эшитилгандек бўлди. Этьеннинг вужуди музлаб бошидаги сочлари тиккайиб кетди: кўз олдига анави ерда, пастда, қулаган қатлам остида милтиғи билан қолиб кетган ёш солдатнинг қиёфаси келди. Бу бемаънилик эди. Бутун шахтани шовқин босиб кетганга ўхшайди. Яна шамни ёқишга тўғри келди: Этьен шамнинг хира ёруғида қараб, йўлакнинг бўм- бўшлигига ишонч ҳосил қилгач, тинчланди.

У ички курашдан азоб чекиб, пилигининг ўзигина қолган шамга тикилганча яна чорак соатча хаёл суриб ўтирди. Ногаҳон енгилгина «чирс» этган товуш эшитилиб, пилик ўчди-ю, ҳаммаёқни қоронғилик босди. Этьен яна мудрай бошлади, бунчалик қаттиқ хуррак отма, деб Жанленни урмоқчи ҳам бўлди. Боланинг шу ердалигидан тоқати тоқ бўлиб, тоза ҳавога чиқишга юраги тўкилиб турарди; шундан кейин у худди кетидан арвоҳ қувлаётгандек йўлаклардан югуриб, шахта чоҳидан юқорига кўтарилди.

Юқорига чиқиб олган Этьен Рекийяр харобалари орасида ниҳоят кўкрагини тўлдириб нафас олди. Модомики ўлдира олмас экан, ўзи ўлиши керак; илгари ҳам хаёлига бир келган ўлим ҳақидаги бу фикр яна пайдо бўлди-ю, сўнгги умид каби миясига қаттиқ ўрнашиб қолди. Мардларча ўлиш, революция учун ўлиш қандай яхши, шу билан ҳаммаси тугарди, — бу яхши-ми-ёмонми умрга якун бўларди; бошқа нарсани ўйлашнинг ҳам ҳожати йўқ эди. Борди-ю, ўртоқлари бельгияликларга ҳужум қилгудек бўлишса, Этьен улар билан бирга бўлади, биринчи сафларда боради, ана ўшанда дайди ўққа учади-ю, муродига етади. Шуларни ўйлаган Этьен шахдам қадамлар ташлаб, орқасига қайтди-да, Ворё атрофида айланиб юрди. Соат иккига занг урди: шахтани қўриқлаётган солдатлар учун қорувулхонага айлантирилган штейгерлар бўлмасидан қаттиқ-қаттиқ гаплашаётган кишилар товуши эшитиларди. Соқчининг ғойиб бўлиши бутун отрядни саросимага солиб қўйганди; капитанни уйғотиб келишга одам юборишди, у қўриқлаётган жойни синчиклаб тек-

ширишди-да, ниҳоят соқчи қочган, деган хулосага келишди. Хилват жойга биқиниб олган Этьен ёш солдат гапириб берган капитаннинг республикачиларга тарафдорлиги ҳақида ўйлади. Ким билсин, балки уни халқ томонга ўтишга кўндириш мумкин бўлар? Борди-ю, кўшинлар отишдан бош тортсалар, бу — буржуазияни калтаклашга сигнал бўлур эди. Янги орзу Этьенни қизиқтириб қолди; у энди ўлиш ҳақида ўйламай, лойга ботганча елкаларини ивитиб юборган майда ёмғирда бир печа соат туриб қолди; у назарида амалга ошириш мумкин бўлган ғалабага йшонч алангасида ёнарди.

Этьен соат бешгача бельгияликлар келишини кутди. Кейин у Ширкатнинг маккорона режасини пайқаб қолди: бельгияликларга ухлаш учун шу ернинг ўзида, Ворёда жой қилиб берилганди. Шахтага тушиш бошланганди; Икки юз зағизгон посёлкаси забастовкачиларидан бир неча киши пойлаб туришган бўлиб, бу хабарни ўртоқларга етказиш керакми-йўқми, билишмасди. Шунда Этьеннинг ўзи Ширкатнинг қандай устомонлик қилганини тушунтириб берганди, улар чопиб кетишди. Этьен уюм орқасида, канал бўйидаги ёлғизоёқ йўлда қолиб, кута бошлади. Соат олтига занг урди, қорайиб турган осмон оқариб, қизғиш шафақ пайдо бўлди. Шу пайт Этьен йўл муюлишида ридосини тиззасигача кўтариб олган аббат Ранвье келаётганини кўриб қолди. Ранвье ҳар душанба куни шахтанинг нарёгидаги монастырь бутхонасида эрта-лабки ибодатни ўтказиш учун борарди.

— Ассалому алайкум, бўтам!— деди у кўзлари ёниб, йигитга разм соларкан шанғиллаб.

Этьен жавоб бермади. Узоқда, Ворё кўприкчаси остидаги йўлда аёл кўринди, шу боисдан Этьен ташвишланиб, ўша томонга югуриб кетди: унинг Катрина эканлигига ишончи комил эди.

Катрина ярим кечадан бери қорлар эриб, пилчпилч лой бўлган йўлларда санқиб юрарди. Уйига қайтиб, Катринани ўрнида учратган Шаваль бир шапаалоқ уриб, уни оёққа турғизди. Шаваль, ҳозироқ туёғингни шиқиллат, деб бақирди, агар деразадан улоқтириб юборишимни истамасанг, эшикка қараб юр, дея тепкилай бошлади; боёқиш кийиниб олишга ҳам ул-

гурмай чиқиб кетишга мажбур бўлди, бунинг устига хайр-маъзур ўрнига яхшигина калтак ҳам еб олди. Бундай қўпол муомаладан унинг хўрлиги келди. Катрина йўл четидаги супачага ўтирди ва Шаваль, чақриб олар, деган умидда уй томонга қарай бошлади; эҳтимол Шаваль уни кузатиб тургандир, ҳозир юқорига чиқ, деб қолар, совуқ еяётганини, ғариблигини кўриб турибди-ку, ахир унинг бошпана берадиган бирор кишиси йўқ-ку, уни шу аҳволда ташлаб қўйиши мумкин эмас-ку.

Икки соат ўтди; Катрина ҳамон уйдан ҳайдалган итдек қимир этмай ўтирарди. Катрина совуқ еяётганини сезиб, кетишга қарор қилди. У Монсудан чиқди, кейин қайтиб келди, кўчадан Шавални чақирришга ҳам, эшикни тақиллатишга ҳам журъат этмади. Ниҳоят у катта тош йўлдан, мана шу кенг, тўғри йўлдан кетаверди: хаёлига посёлкага, ота-онасиникига қайтиш фикри келди. Лекин уйига етганида шундай ҳаё босдики, ҳамма эшик-деразаларни тақа-тақ қилиб, маст уйқуда ётган бўлса ҳам, биров таниб қолмишдан қўрқиб, ура орқасига қочди. Туннинг қолган қисмини Катрина атрофни кезиб ўтказди, тик ётган товушдан юраги шувилларди, мени фоҳиша деб тутишиб, Маршьеннга, исловатхонага юборишмаса гўрга эди, деган фикр хаёлига келиши билан титраб кетарди, ахир бу фикр даҳшатли тушга ўхшаб, бир неча ойдан бери миясидан чиқмасди. У икки марта Ворёга қайтиб келди, лекин ҳар гал соқчининг қўпол ўшқирришидан қўрқиб, кетимдан қувиб келишмаяптими, дея нафаси тикилиб, орқасига қарай-қарай қочиб кетди. Рекийяр йўлида ҳаминша маст кишиларни учратиш мумкин эди, лекин шундай бўлса ҳам Катрина бир неча соат бурун рад ётган кишисини учратиш умидида ўша томонга борди.

Уша куни эрталаб Шаваль ишга чиқиши керак эди. Катрина буни биларди, шу боисдан, гарчи учрашувдан фойда чиқмаслигига ақли етса ҳам шахта томон юрди; ораларидаги ҳамма нарса барбод бўлганди. Жан-Барт шахтасида энди ҳеч ким ишламасди, борди-ю, Катрина Ворёда ёлланиб ишлайдиган бўлса, Шаваль уни бўғиб ўлдираман, деб қасам ичганди; у қизнинг бирга бўлиши ишимга халал беради, дея қўр-

қарди. Энди у нима қилса экан? Бошқа жойга бориб, ҳар учраган эркакнинг қўполлигига, очликка чидаб юрсинми? Шу боисдан у арава изларига қоқилиб-суқулиб, йўлда тентираб юрди; дармони қуриганидан оёқлари чалишиб кетарди, белигача лой сачраганди. Эрувгарчилик йўлни пилчиллатиб, суюқ лойга айлан-тириб юборганди, оёқлар ботиб қоларди, лекин Катрина йўл четидаги тошга ўтиришга юраги бетламай кетаверди.

Тонг ота бошлади. Катрина узоқдан Шавални орқасидан кўриб қолди. Шаваль хода ва тахталар орасидаги инларига писиб олиб, ўткинчиларни кузатиб туришган Лидия ва Беберни пайқаб, уюм ёнидан оҳиста борарди. Улар шу ерда кечаси билан қоровуллик қилиб чиқишганди, Жанлен мени кутинглар, деб буйруқ бергани учун уйга кетишга журъат қилишмаганди. Жанлен қотиллик кайфини суриб, Рекийярда ухлаб ётганида, боёқиш болалар иссиқроқ бўлсин, дея қучоқлашиб ўтиришарди. Шамол каштан ва эман ходалари орасида ҳуштак чалиб изғирди; болакай билан қизалоқ ўтинчининг ташландиқ кулбасидагидек совуқ еб, жунжикиб қолишди. Лидия худди ўз хотинидек тарсаки тортиб юборадиган Жанлендан нолишга чўчирди, Бебер ҳам атаманнинг дўппослашларидан шикоят қилишга ботинмасди. Бироқ, афтидан, Жанлен ҳаддан ташқари зугумини ўтказар ва улар ҳаётини хавф остида қолдириб, энг қалтис ишларга боришга мажбур этар, не ҳасратда топиб келган ўлжаларини тортиб олар эди; шу боисдан унга тобелар ичларида нафратланишиб, Жанлен тақиқлаганига қарамай, бир пайтлари муштини дўлайтириб, пўписа қилган, аммо ҳозир ўзи йўқ кишидан шапалоқ ейишларидан кўрқмай, ўпиша бошлашди. Вақт ўтар, ҳеч ким уларга тегмас эди, шунинг учун ҳам улар бошқа ҳеч нимани ўйламай, чурқ этмасдан ўпишавердилар, уларнинг бу эркалашларида узоқ вақтлардан бери босишга ҳаракат қилиб келган эҳтирослари, чеккан азоб-уқубатлари, назокатлари намоён бўлаётганди. Улар кечаси бир-бирларини шу алпозда иситишди, улар бекинган жойларида шунчалик мириқиб ҳузур қилишдики, умрларида бундай яхши кунни эслай олмасдилар, — ҳатто кулча ейишиб, вино ичадиган авлиё Варвара байрами ҳам бу кунга ўхшамасди.

Қўққисдан сигнал карнайининг садолари янграб қолди. Катрина титраб кетди. У қаддини ростлаб, Ворёни қўриқлаб турган солдатлар милтиқларига ёпишганликларини кўрди. Этьен шахта эшигига қараб чопиб кетди. Бебер билан Лидия бир сакраб, бекиниб турган жойларидан чиқди. Кун ёришиб кетганди, узоқда, посёлка томондан бир тўп эркагу хотин жон ҳолатда қўлларини силкитиб, югуриб келарди.

V

Ворёга кирадиган ҳамма йўллар берк эди. Олтмиш солдат милтигини оёғи ёнига қўйиб, очиқ турган ягона эшик олдини тўсиб турарди, — эшикдан тор зинага ўтиб, қабулхонага кириларди, у ердан эса штейгерлар хонаси билан баракка ўтиш мумкин эди. Капитан орқа томондан бўладиган ҳужумдан эҳтиёт қилиб, солдатларни гишт девор тагида икки қатор саф тортганди.

Посёлқадан йиғилган кўмир қазувчилар аввалига анча нарида туришди. Улар кўпи билан ўттиз киши бўлиб, ўқтин-ўқтин ғазаб билан гап отишарди.

Маэ хоним биринчи бўлиб келди. Унинг сочлари тўзиган бўлиб, рўмолини бошига ўрашга зўрға улгурганди; қўлидаги Эстелла ухлаётганди.

— У ёққа кирманглар, ҳеч кимни чиқарманглар ҳам! — такрорларди у титраб-қақшаб. — Уларнинг ҳаммасини ўша ерда, шахтанинг ичида тутиб олиш керак!

Маэ хотинининг маслаҳатини маъқуллади. Шу пайт Рекийярдан Мук бобо келиб қолди. Уни ўтказмасликка уринишди, аммо бобо оломон орасини ёриб ўтиб, отлар емсиз қолишмасин, уларнинг революциянг билан нима иши бор, деди. Бундан ташқари шахтада битта от ҳаром ўлипти, уни олиб чиқишга ёрдам бериши керак экан. Этьен кекса отбоқарни қўйиб юборди, солдатлар эса уни шахтага ўтказишди. Чорак соат ўтгач, секин-аста забастовкачилар кўпайишиб, авзойилари бузилиб турганда, пастдаги катта дарвоза очилиб, ишчилар аравада ўлган отни олиб чиқишди. Бу аянчли манзара эди: арқонлар билан чандилган отни эриган қордан ҳосил бўлган кўлмакка шалоп этиб ташлашди. Бу шу қадар қаттиқ таассурот қолдирдики, ҳеч

ким жойидан жилмади; ишчилар қайтиб кириб, дар-возани ичидан бекитиб олишга улгуришди. Ўлган отни қайилиб қолган бошидан танишди. Шивир-шивир бошланди:

— Ие, бу Карнай-ку, тўғрими? Бу ўша, Карнай.

Ҳақиқатан ҳам бу ўша Карнай эди. Бия шахтага туширилган кунидан бошлаб унга кўника олмади. Бия зерикарди, истар-истамас ишларди, доимо кундузги ёруғликни қўмсарди. Шахтадаги отларнинг энг кексаси — Ўктам ўн йил мобайнида ўзи кўникиб кетган шу ҳаётга чидамай иложимиз қанча, дегандек уни овутмоқчи бўлиб, ёнига келиб ишқаланишлари ҳам, бўйнилари ялашлари ҳам фойда бермади. Бу ялаб-юлқашлар Карнайнинг ғам-ғуссасини оширарди холос, шунинг учун ҳам қоронғида қариган биянинг бадани тегиши биланоқ бутун вужуди титраб кетарди. Ҳар сафар отлар учрашиб, бир-бирларини ҳидлашганда, гўё қариси ҳеч нарсани эслай олмайман, деса, ёшроғи ҳеч нарсани унута олмайман, дея ҳасратлашаётгандек бўлишарди. Улар отхонада бир охурдан ем ейишарди. Иккови бошини эгиб турар, нафаслари қўшилиб кетар эди; гўё улар ёруғ жаҳон, ям-яшил майсалар, оппоқ йўллар, бепоён далалар ва қуёшнинг заррин нурлари ҳақидаги мангу орзуларини айтиб дардлашардилар. Карнай пичан устида жон талвасасида ётаркан, Ўктам қайғуриб, уни ҳидлар, худди ҳиқиллаб йиғлаётгандек билинар-билимас пишқирав эди. Ўктам Карнайнинг бадани совуётганини сезди; шахта унинг сўнгги шодлигидан, у ёқдан, муаттар ҳидларга тўлган, очиқ ҳавода ўтказган ёшлигини эслатувчи жойдан келган дўстидан жудо этганди. Карнайнинг қимирламай қолганини сезган Ўктам жон ҳолатда кишнади-да, боғлаб қўйилган жиловни узди.

Мук бобо бир ҳафта олдин бош штейгерга отнинг касаллигини айтган эди; лекин ҳеч ким бияга ғамхўрлик қилмади,— қўллари тегмасди! Бу жаноблар отларни алмаштиришни унча хуш кўришмасди. Энди бўлса чор-ночор уни юқорига жўнатишга тўғри келди. Кеча отбоқар икки ишчи ёрдамида роса икки соат уриниб, Карнайни арқонлар билан боғлади. Кейин Ўктамни қўшиб, унинг жасадини кўтарма машина олдига судратиб келишди. Кекса от ўртоғининг ўли-

гини секин судраб келди; йўлак ниҳоятда тор бўлиб, баъзи жойларидан ўтаётганида терисини шилиб кетиши ҳеч гап эмасди. От жасадини тери шилинадиган хонага олиб кетишаётганларида Карнайнинг жасади деворга тегиб сидирилаётганини эшитиб қийналаётган Уктам бошини силкитиб-силкитиб кўярди. Уни юк ортиш хонасида абзалидан бўшатишгач, жонивор юкни жўнатишга қандай тайёргарлик кўраётганларига маъюс қараб турди: жасадни шахта чоқи оғзига терилган ходалар устидан олиб ўтишиб, кўтарма машина тагидаги арқон тўрға яхшилаб жойлашди. Ниҳоят юкчилар «пўшт, гўшт кетяпти», деб огоҳлантириб қўнғироқ чалишди. Уктам бошини кўтариб, Карнайнинг юқорига чиқиб кетаётганини кўрди: у аввалига жойидан секин қўзғалди, кейин бирдан қоронгиликда ғойиб бўлиб, бу зулмат зиндонни мангу тарк этди. Уктам аввалгидек бўйини чўзиб тураверди; эҳтимол, шу он жониворнинг хаёлида ер юзида бўлиб ўтган воқеалар сал-пал жонланиб кетгандир. Лекин унинг ўртоғи учун ҳамма нарса тамом, у бечора юқорида ҳеч нимани кўра олмайди; ҳа, уни ҳам мана шундай арқонлар билан чандиб боғлаб, арзимас нарсадек юқорига тортиб оладиган кун келади. Уктамнинг оёқлари титрарди, у узоқ далалардан келаётган ҳавони сезди, сўнг мастдек оғир-оғир қадам ташлаб, отхонага қайтиб кетди.

Ховлидаги кўмир қазувчилар маъюс хаёлга чўмиб, Карнайнинг ўлигига қараб туришарди. Қўққисдан бир хотин паст овоз билан деди:

— Яна биттасини шахтага туширишди! Худди жаннатга тушаётгандек-а!

Шу он посёлка томондан яна бир гуруҳ оломон югуриб келаётганди: олдинда Левак, кетидан хотини билан Бутлу.

— Бельгияликларга ўлим! — қичқирарди Левак. — Бегоналар йўқолсин! Улим! Улим!

Ҳамма олға ташланди. Этьен уларни тўхтатишга мажбур бўлди. У капитан олдига келди; бу баланд бўйли, қотмадан келган, йигирма саккиз ёшлардаги йигит бўлиб, башарасидан чўрткесарлиги сезилиб турарди. Этьен ишчилар манфаатини кўзлаб, унга аҳволини ётиғи билан тушунтирди, сўнг сўзларим қан-

дай таъсир этдийкин, деган маънода кутиб турди. Ишни бемаъни хунрезликкача олиб боришнинг нима кераги бор? Ахир ҳақиқат шахтёрлар томонида-ку, шундай эмасми? Одамларнинг ҳаммаси бир-бирига ака-ука. Капитан «Республика» сўзини эшитиб, бир ижирганиб қўйди. Лекин у ўзини ҳарбийларга хос тутиб турди-ю, бирдан қичқириб қолди:

— Орқага! Куч ишлатишга мени мажбур қилманглар!

Этъен у билан тил топишга уч марта уриниб кўрди. Орқа томонда, ўртоқлари орасида шивир-шивир бошланди. Жаноб Энбо шахтада эмиш, деган гап оғиздан-оғизга ўта бошлади. Унинг ўзини бошини пастга қилиб туширайлик-чи, кўрамиз, кўмирини ўзи қандай қазиб оларкин, деб ҳам гапиришди. Бироқ бу мишмиш ёлгон бўлиб чиқди: у ерда Негрель билан Дансарт бор эди холос; иккови қабулхона деразасидан бирров кўринганди. Бош штейгер ўзини орқароқда тутишга уринарди,— у Пьерроннинг хотини билан донлашиб юргани ошкор бўлганидан юзи анча шувут бўлиб қолганди; инженер бўлса, ишшайиб, ўйноқи кўзлари билан оломонга дадил боқарди; унинг бу тиржайиши одамларга ва бўлаётган воқеаларга нафрат билан қарашидан далолат берарди, Қий-чув кўтарилди, икқаласи ғойиб бўлди. Энди деразадан Сувариннинг малла сочигина кўриниб турарди. Бугун у навбатчилик қилаётганди. Забастовка бошлангандан бери у бир кун ҳам машинасини тарк этмади; у бирон нима ҳақида чурқ этолмасди, афтидан, у миясига маҳкам ўрнашиб қолган бир фикрга бутунлай берилиб кетгандай, бу фикр кўм-кўк кўзлари қаърида пўлатдек ялтираб тургандай эди.

— Орқага!— баланд товуш билан такрорлади капитан.— Ҳеч нарсани эшитмайман. Менга шахтани қўриқлаш топширилган, шуни қўриқлайман, вассалом... Одамларимнинг жиғига тегаверманглар, бўлма-са, сизларни чекинишга мажбур этиш қўлимдан келади.

Капитан овози кескин янграшига қарамай, қаттиқ ташвишга тушиб қолганди; у шахтёрлар тобора кўпайиб бораётганини кўриб, ранги оқариб кетди. Тушда ўрнига бошқа киши келиши керак эди, лекин у ўшан-

гача дош бера олмаслигидан қўрқарди, шунинг учун ҳам дарров шахтадаги ёрдамчи ишчилардан бирини мадад кучлар юборилишини сўраб, Монсуга жўнатди.

Унинг сўзларига жавобан қаттиқ хитоблар янгради:

— Бегоналарга ўлим! Бельгияликларга ўлим!.. Биз ўз юртимизга ўзимиз хўжайин бўлмоқчимиз!

Этьен ҳафсаласи пир бўлиб, чеккага чиқди. Ҳаммаси тамом бўлганди, — курашиш ва ўлишдан бошқа чора қолмади. У энди ўртоқларини қайтариб ўтирмади: оломон солдатларнинг кичик отрядига тақалиб келди. Шахтёрлар тўрт юзтача эди; қўшни посёлкалар бўшаб қолди, ҳаммаёқдан ишчилар югуриб келишарди. Ҳамма бир гапни айтиб қичқирибди. Маэ билан Левак солдатларга қараб, ғазаб билан қичқиришарди:

— Кетинглар! Биз сизларга ҳеч қандай ёмонлик қилмоқчи эмасмиз! Кетақолинглар!

— Бу ишнинг сизларга заррача алоқаси йўқ! — гапни илиб кетди Маэ хоним. — Бизга халақит берманглар, ўз ишимизни ўзимиз тўғрилаймиз.

Ундан сўнг Левакнинг хотини янада кескинроқ қилиб қўшиб қўйди:

— Нима, сизлар билан уришамизми энди, бизни ўтказмадиларинг деб? Сизларни ҳурмат қилиб, яхшиликча бу ердан жўнаб қолинглар, деяпмиз!

Ҳатто Бебер билан оломон орасига суқулиб кириб олган Лидиянинг чинқироқ товуши ҳам эшитилди:

— Гарнизон чўчқалари!

Салгина нарида турган Катрина ҳеч нимага тушунмай, гапларга қулоқ соларкан, одамлар қаҳру ғазаби бошқатдан алангаданганини кўриб, гангиб қолган эди, у пешонаси шўрлиги туфайли шу ишларнинг гувоҳи бўлиб қолганди. Ахир у шусиз ҳам озмунча азоб чекаптими? У қайси гуноҳи учун шундай маломатларга қоляпти-ю, тиниб-тинчиб кетолмаяпти? Кечагина у нима сабабдан забастовкачиларнинг бунчалик ғазабланишаётганини билолмасди. У калтакланган одам яна калтак ейиш учун баҳона қидириб юрмаса ҳам бўлади, деб ўйларди; лекин Катрина ҳозир ич-ичидан нафрати қўзиб бораётганини сизди-ю, Этьен бир вақтлари кечқурунлари айтган гапларнинг ҳаммасини эслади ва шу топда солдатларга айтаётган гапларига

қулоқ солди. Эъён солдатларни ўртоқлар, деб атар, уларга ўзлари ҳам халқдан чиққанликларини эсла-тиб, камбағалларни эзувчиларга қарши халқ билан бирга боришлари зарурлигини уқтирарди.

Оломон ичида говур-говур кўтарилди; бир кампир олдинга ташланди. Бу қўллари қуруқ, бўйни яланғоч, ўлгудек ориқ Ашаддий кампир эди; у уйдан шундай шошилиб югуриб келган эдики, тўзиган опноқ сочлари кўзларига тушиб, кўришга халал берарди.

— Ҳа, жин ургур, мана, бир амаллаб келдим!— дерди у энтикиб.— Бу сотқин Пьеррон мени ертўлага қамаб қўйди.

Кампир оғзидан боди кириб, шоди чиқиб, шу он-даёқ солдатларга ташланди:

— Аблаҳлар! Ишёқмаслар! Бошлиқларинг этигини ялашдан бошқа нарсани билмайсанлар. Иш бориб камбағалларга тақалса, жуда ботир бўлиб кетасанлар!

Ҳамма унга қўшилди-да, ҳақоратлар ёғилиб кетди. Баъзилар ҳамон: «Яшасин солдатлар! Офицерларни шахтага ташлаш керак!» деб бақаришарди. Лекин кўп ўтмай, бу бақариқлар бошқаларига қўшилиб кетди-ю, ҳаммалари: «Эй, қизил иштонлар! Бу ердан жўнанглар!»— деб қичқира бошлашди. Солдатлар биродарлик ва дўстликка даъват этган гапларни, дўстона насихатларни юзлари тошдек қотиб, индамай, қанчалик лоқайдлик билан тинглаган бўлсалар, энди бу ҳақоратларга ҳам қулоқларини кар қилиб, бепарво тураверишди. Орқароқда турган капитан қиличини яланғочлади. Халойиқ тобора ёпирилиб, солдатларни деворга баттар қисиб келаверди; шунда капитан милтиқларни қўлга олиш ҳақида команда берди. Солдатлар буйруққа бўйсундилар, ишчилар икки қатор ялтираётган пўлат тигларнинг ўзларига қарши ўқталиб турганини кўришди.

— Ҳа, муттаҳамлар,— қичқирди Ашаддий кампир чекиниб.

Бироқ шу он ҳамма ўлимни ҳам писанд қилмай олға ташланди.

Биринчи бўлиб хотинлар олға ташланишди, Маэнинг хотини, Левакнинг хотини қичқаришди:

— Ўлдилинглар бизни! Ўлдилинглар! Биз ўз ҳақ-ҳуқуқимизни талаб қиляпмиз!

Левак найзага дучор бўлишидан қўрқмай, икки қўллаб бирданига учта милтиқни ушлади, уларни солдатлардан тортиб олиш учун силтай бошлади; азбаройи газабланганидан бир кучига ўн куч қўшилиб, найзаларни букди. Ўртоқларга эргшиб чакки қилдим-да, дея пушаймон саятган Бутлу бир чеккада хотиржамлик билан Левакка қараб турарди.

— Хўш, қани, отиб кўринглар-чи,— такрорларди Маэ,— чинакам одам бўлсаларинг, қани отинглар!

Маэ блузасининг тугмаларини ечиб, кўйлагини йиртиди-да, моматалоқ бўлиб кетган жундор кўкрагини очди. Чол кўкрагини найзага тутиб борарди, унинг довжураклиги, мислсиз жасорати солдатларни бир неча қадам чекинишга мажбур қилди. Кимнингдир найзаси унинг кўксига тиралди. Маэ худди майли, найза баданимга санчилиб, қобиргаларимни қисирлатиб юборсин, дегандек қутуриб, олдинга юраверди.

— Қўрқоқлар, ҳаддиларинг йўқ!.. Бизнинг орқамизда ўн минглаб одам бор! Ҳа, ҳа, бизни ўлдиришларинг мумкин, бироқ яна ўн минг кишини ҳам ўлдиришга тўғри келади!

Солдатларнинг аҳволи танг бўлиб қолди: уларга ниҳоятда ноилож бўлгандагина қурол ишлатиш ҳақида буйруқ берилганди. Бироқ ўзларини найзага ураётган бу қутурган одамларни қандай қилиб тўхтатиб бўлади? Бунинг устига халойиқ билан солдатлар орасидаги масофа тобора камайиб борарди, солдатлар деворга қисиб қўйилди, энди чекинишнинг иложи қолмади. Ҳар қалай кичкинагина отряд, бир гуруҳ киши тобора кўпайиб бораётган шахтёрлар тазйиқига сабот билан бардош бериб, капитаннинг узук-юлуқ командаларига совуққонлик билан қулоқ солди. Капитан лабларини тишлаганча ўткир кўзлари билан бўлаётган ҳодисаларни кузатиб турар ва фақат улар ҳадеб сўкиб-қарғаб, солдатларнинг жиғига тегаверсалар, солдатларнинг сабри тугаб, бир нарса қилиб қўйишадими, деб хавотирланарди. У баланд бўйли, озгин, мўйловлари буралган ёш бир сержантнинг бесаранжом бўлиб, кўзларини пириллатаётганини пайқаган эди. Унинг ёнида нашивкали, бир неча походда қатнашгани кўриниб турган солдат турарди; у милтигининг найзасини худди хасдек эгишаётганларини кўргач, ран-

ги оқариб кетди. Бошқаси,— афтидан, яқиндагина омончини ташлаб, аскарликка келган йигит ҳар фармуттаҳам, ишқмаслар, деб сўкишганда қизариб кетарди. Ҳақоратларнинг кети узилмасди; дўлайган муштлар кўриниб қоларди; кўмир қазувчилар бўралаб сўкишарди; дўлдек ёгилаётган таъна ва дўқлар худди юзга тушаётган тарсакидек эди. Солдатларни ҳарбий интизом доирасида тутиб туриш ва уларни кеккайиб, хўмрайиб, қимир этмай туришга мажбур этиш учун бошлиқнинг иродаси ниҳоятда метин бўлиши керак эди.

Тўқнашув муқаррар бўлиб қолди: лекин шу чоғ солдатлар орқасидан сочлари оппоқ, қари жандармларга ўхшаган штейгер Ришоммнинг нуроний чеҳраси кўринди: у афтидан қаттиқ ҳаяжонланган эди.

— Жин урсин! — деди у овозининг борича. — Ахир у бориб турган аҳмоқлик-ку! Бунақа бемаъни ишларни қилманглар-да.

Мўйсафид шундай деди-ю, ўзини ишчилар билан найзалар орасига отди.

— Ўртоқлар, менга қулоқ солинглар... Кекса ишчи эканлигимниям, ҳамиша сизлардан айилмай келаётганимниям ўзларинг биласизлар. Шундоқ экан, кўйинглар, жин урсин! Сизларга ваъда бериб айтаманки, мабодо сизларга адолатсизлик қилгудек бўлишса, биринчи бўлиб ўзим бошлиқларнинг башараларига бор гапни айтаман... Аммо ҳозир шу ҳам етар! Сизлар бу азаматларни бошлаб сўқяпсизлар, қоринларингни ёриб ташлашларини хоҳлаяпсизлар; бундан ҳеч қанақа наф йўқ.

Унинг гапларига қулоқ сола бошлашди; одамлар ичида саросималик рўй берди. Бахтга қарши тепада яна ёш Негрелнинг чўзинчоқ юзи кўриниб қолди. Афтидан, у ўзи келолмай, штейгерни воситачи қилиб юборипти, дея таъна қилишларидан чўчиган бўлса керак; ниҳоят унинг ўзи ишчилар билан гаплашиб кўрмоқчи бўлди. Лекин унинг сўзларини шовқин-сурон босиб кетиб, у елкаларини қисиб, яна дераза олдидан узоқлашишдан бошқа илож топмади. Ришомм ишчиларни ўз номидан кўндиришга чандон урнимасин, бу ишни тинчлик йўли билан, ўртоқларча ҳал қилиш керак, деб қайта-қайта такрорламасин, бари бир энди

унга ортиқ қулоқ солишни истамасдилар, чунки у ишончини йўқотиб қўйганди.

— Жин урсин! Майли, сизлар билан менинг ҳам бошимни олишсин, лекин то сизлар бемаъниликларингни қўймас экансизлар, ёнларингдан кетмайман!

Кўмир қазувчиларни инсофга келтиришимда менга ёрдам бергин, деб Этьенга ялинди, лекин у мен ҳам ҳеч нима қила олмайман, дегандек, қўл силтаб қўя-қолди. Энди фурсат ўтган эди ҳисоби, кўмир қазувчилардан камида беш юзга яқин киши йиғилганди. Ҳаммасиям қутурган, ҳаммасиям бельгияликларни қувиб юборамиз, деб келишганди; шунчаки томоша қилиш учун келганлар ҳам, шу уришдан завқланиш учун келган масхарабозлар ҳам бор эди. Анчагина нарида бир гуруҳ кишилар турган бўлиб, улар ичида Захария билан Филомена ҳам бор эди; улар гўё томошага келишгандек, шундай хотиржам эдиларки, ҳатто болалари — Ахилла билан Дезирани олиб келишган эди. Рекийяр томондан эса яна бир тўп одам келди; улар орасида Муке билан Мукетта ҳам бор эди. Муке шу заҳотиёқ ошнаси Захария олдига борди-да, илжайиб елкасига қоқди, ниҳоятда ҳаяжонланиб кетган Мукетта эса энг довурақлар турган олдинги қаторга отилди.

Бу орада капитан дам-бадам Монсу йўлига қарарди. У сўраган мадад кучлар ҳадеганда етиб келавермасди, у бўлса олтмиш кишилик отряди билан ортиқ бардош бера олмасди. Ниҳоят, капитан халойиқни чўчитиш учун ҳамманинг кўзи олдида милтиқларни ўқлашга буюрди. Солдатлар дарҳол буйруқни бажаришди, бироқ гала-говур босилмади; мақтов, мазах гаплар эшитилди:

— Мановларни қаранглар! Қаранглар-а! Вой бекорчилар-ей! Улар нақ нишонга отишмоқчи шекилли! — Ашаддий кампир, Левак хоним ва бошқа хотинлар мазах қилишарди.

Маэ хонимнинг қўлидаги Эстелла уйғониб, йиғлай бошлади. Она солдатлар ёнига шундай яқин келдики, сержант, чақалогинг билан қаёққа борасан, деб сўрашга мажбур бўлди.

— Сенинг нима ишинг бор? — жавоб берди хотин. — Манг мард бўлсанг, отақол шу болани.

Эркаклар нафратланиб, бошларини сарак-сарак қилишди. Ишчиларни отиш мумкинлигига ҳеч ким ишонмасди.

— Уларнинг ўқдонларида ўқ нима қилсин,— деди Левак.

— Нима, биз душманмидик?— қичқирди Маэ.— Французларни отиш мумкин эмас-ку, жин ургурлар!

Бошқалар бўлса, Қрим урушида қатнашганлар ўқдан қўрқишмайди, деб такрорлашарди. Ҳамма солдатларни қисиб келаверди. Агар шу чоғ милтиқлар бирданига отилганида халойиқ тутдек тўкиларди.

Биринчи қаторларда бораётган Мукетта жазавага тушиб бақирарди: унинг назарида солдатлар хотинларга найза санчаётгандек бўлаётганди. У ўзи билган ҳамма қарғишларни айтиб бақирарди; лекин бу ҳам камдек туюларди; у яна солдатларни қанақасига камситишни ўйларди; унда ҳали яна бир ҳақорат усули — уларга орқасини кўрсатиш қолувди. Шу боисдан Мукетта иккала қўли билан юбкасини кўтариб, энгашди-да, семиз отнинг сағиридек дўшпайиб турган кетини очди.

— Мана, қараларинг, мана сизларга! Сен гўрсўхта ифлосларга нисбатан бу жуда тоза!

Мукетта уларнинг ҳар бирига тегишли улушини инъом қилаётгандек, бирортасига тегмай қолмасин дегандек, тобора энгашиб, орқасини ҳамма томонга кўрсатарди ва ҳар сафар хитоб қиларди:

— Манави офицерга! Манави сержантга! Манави солдатларга!

Кучли қаҳқаҳа кўтарилди; Лидия билан Бебер қоринларини ушлаб кулишарди; ҳатто қовоғи солиқ Этьен ҳам бундай ҳақоратни кўриб, завқланди. Ҳамма — ҳангоматалабларгина эмас, балки дарғазаблар ҳам гўё кўзлари олдида солдатлар устига ифлос нарса сепиб юборилгандек, масхара қила бошладилар. Анча нарида, эски ходалар уюлиб ётган жойда турган ёлғиз Катрина чурқ этмасди, у бутунлай гангиб қолганга ўхшарди; халойиқ нафратини кўрганида унинг ҳам ичи тошиб кетди, бу нафратнинг иссиқ нафаси унга ҳам урилаётган эди.

Лекин шу он яна ғавго кўтарилди. Ўз одамларини тинчитиш учун капитан кўмир қазувчилардан бир неча кишини қамоққа олмоқчи бўлди. Мукетта бир

сақраб, улар қўлидан чиқди-да, ўртоқларининг оёқлари орасидан лип этиб ўтиб кетди. Энг ашаддий исёнчилардан уч киши—Левак билан яна икки ишчи ушланди: соқчилар уларни штейгерлар хонасига олиб киришди. Негрель билан Дансарт тепадан туриб, капитанга бу ёққа чиқ, бу ер тинчроқ, дея бақаришарди. Капитан бу таклифни рад этди, чунки у эшиги ёпилмайдиган бинони ишчилар дарров ишғол қилиб олишларини биларди; унда уни шармандасини чиқариб, қуролсизлантиришади; шундоқ кичкинагина отрядининг ҳам тоқати тоқ бўла бошлаганди, ёғоч бошмоқ кийган бир тўда аянчли кишилардан қўрқиб чекиниб бўлмайдик-ку. Шу боисдан милтиқларини ўқлаган олтиш солдат девор ёнида халойиқ билан юзма-юз турарверди.

Аввалига кўмир қазувчилар тисланишди. Орага чуқур сукунат чўкди. Қамоққа олиш забастовкачиларни анча ўйлантириб қўйганди. Бироқ шу заҳоти яна қичқира бошлашди: қамоққа олинганларни дарҳол бўшатишни талаб қилишарди. Кимдир уларни ўша жойда ўлдиришмоқчи, дея бақариб қолди. Кейин ҳаммалари маслаҳатлашмасдан ҳам бирдай жўшиб, интиқом ўтида ёнишди-ю, нарироқда уюлиб ётган ғишга қараб югуришди; бу ғишлар кон территориясида кўп бўлган мергелей лойидан қўйилиб, шу ернинг ўзида пишириларди. Болалар биттадан ташиб туришди, хотинлар эса этакларига сиққанча олиб келишди. Тез орада кўмир қазувчиларнинг ҳар бири олдида уюм-уюм ғишт йигилиб қолди, сўнг жанг бошланди.

Жапғни Ашаддий кампир бошлаб берди. У ғиштни қоқсуяк тиззасига уриб синдирадиди-да, иккала яримтани иргитарди: бирини ўнг қўли билан, иккинчисини чап қўли билан отарди. Левакнинг хотини оз бўлмаса елкасини маийб қилиб олай деди; у шундай семиз, пўк эдики, жуда яқин келиб отишга мажбур эди, бўлмаса нишонга уролмасди. Бутлу унга сен қўй, дея беҳуда ялинар ва уни орқага тортишга уринар эди: у аёлни олиб кетишга ишонарди, чунки унинг эрини ишончли жойга тиқиб қўйишганди. Хотинларнинг жазаваси тутди. Ғиштни семиз тиззасига уриб синдириб, қўлларини қоватиш жонига теккан Мукетта ғиштни бутун-бутун ота бошлади. Ҳатто болалар ҳам жанг қилаётганларга

қўшилиб кетишди. Бебер Лидияга ғишт яхши учиши учун қандай отишни ўргатди. Бу чинакам жала эди, катта-катта ғиштлар гурсиллаб тушарди. Бирдан ана шу баджаҳл аёллар орасида Катрина пайдо бўлиб қолди; у икки қўлига бир парчадан ғиштни олиб, уларни балан кўтарди-да, кичик қўлларининг кучи етганича итқитди. У нима учун бундай қилганини ўзи ҳам билмасди; лекин у бўғилиб, одам ўлдириш иштиёқида ёнарди. Наҳотки шу лангати, аянчли ҳаётнинг ниҳояси бўлмаса? Жонидан тўйиб кетди-ку, хуштори дўппослаб, уйдан ҳайдаб юборди; дайди ит каби лойларга ботиб, йўлларда санқиб юрди, ҳатто отасидан ҳам бир ликопча шўрва сўраб ололмади, чунки отасининг ҳам ейишга ҳеч вақоси йўқ. Ҳеч қачон яхши бўлмайди; аксинча, эсини танибдики, кундан-кун баттар бўлиб боряпти; шу боисдан Катрина ғиштларни синдириб, ҳаммаси яксон бўлсин, деган ягона ният билан отаверди. Унинг кўзи шунчалик қонга тўлдики, ҳатто ғишт кимга тегаётганини ҳам кўрмасди.

Этъен ҳамон солдатлар олдида турарди; бир ғишт тушиб, бошини ёришига оз қолди. Қулоғи шишиб кетди, ўгирилиб қаради-ю, бу ғиштни Катрина отганини тушуниб, титраб кетди: Катрина алаҳсираётгандек эди. Этъенни ўлдириб қўйишлари мумкин эди, лекин у шундай бўлса ҳам жойидан жилмай, Катринага қараб тураверди. Бошқалар ҳам муштларини тугиб, қимир этмай диққат билан курашнинг боришини кузатишарди. Муке гўё свайка* ўйинидагидек, ҳар бир отилган ғишт, тошни қиёслар ва э-ҳе, буниси нақ мўлжалга урди-да, ановиники хато кетди, деб баҳо берар эди! У шўхлиги тутиб, Захарияни туртар, у эса Филомена билан тортишиб, Ахилла билан Дезиранинг орқасига урарди, уларни кўтариб, ҳангомани кўрсатишни истамасди. Анча нарида, йўлда ҳам бир тўда томошабин кўринарди; тепаликнинг энг юқорисида, қишлоқ бошланадиган жойда эса Ўлмас бобо кўринди. У таёғига тираниб, қимир этмай роз турарди; қизғиш осмон фонида унинг қомати кўзга яққол ташланиб турарди.

* Катта миҳни отиб, ўртадаги ҳалқага санчиш

Ғиштлар отила бошлаган заҳоти штейгер Ришомм яна солдатлар билан шахтёрлар орасига туриб олди. У бировларга ялинар, бошқаларни лаънатлар, фиғони шу қадар ошгандики, кўзларидан йирик ёш томчилари чиқиб кетди. У, афтидан хавф-хатарни ҳам унутганди. Бироқ унинг сўзлари шовқин-суронда эшитилмай, фақат узун, оппоқ мўйлаблари титраётганигина кўри-нарди.

Эркаклар хотинлардан ибрат олишди-ю, ғиштлар янада кўпроқ ёғила бошлади.

Маэ ўгирилиб қараса, эри орқасида қовогидан қор ёғиб, қаққайиб турарди.

— Ҳой, нима бўлди сенга? — кичқирди хотини. — Нима, қўрқаяпсанми? Наҳотки ўртоқларингни турмага қамасалару сен индамай тураверсанг?.. Агар қўлимда болам бўлмаганида-ку, ўзинг кўрардинг-а!

Эстелла чинқириб йиғлар, онасининг бўйнига тармашиб, унинг Ашаддий кампир ва бошқа хотинларга қўшилишига халақит берар эди. Маэ хотинининг гапини эшитмади шекилли, хотини бир неча ғиштни оёғи билан у томон сурди.

— Жин ургур! Манови ғиштларни оласанми-йўқми? Е ҳамманинг кўзи олдида афтингга тупурайми? Балки ўшанда дадилроқ бўларсан?

Маэ қип-қизариб кетди, ғиштларни олиб, синдириб ота бошлади. Хотини орқасига ўтиб олиб, кулоқни қоматга келтириб қарғар, эрини гижгижлар, иккала кўли билан Эстеллани бағрига маҳкам босиб, бўғиб кўяй дерди. Маэ тобора солдатларга яқинлашиб, ниҳоят милтиқларнинг олдига бориб қолди.

Тошбўронда солдатларнинг кичкина отряди деярли кўринмасди. Тўғри, ғиштлар анча баландга бориб тегарди; деворнинг ҳаммаси ўйдим-чуқур бўлиб кетганди. Нима қилиш керак? Капитан балки чеккиниб, ўзимизни орқага олсакмикин, деган фикр хаёлига келди-ю, оппоқ юзи бир лаҳзада қип-қизариб кетди; лекин у эс-ҳушини йигиштириб олди, — бундай қилишнинг бари бир иложи йўқ, хиёлгина ножоиз ҳаракат қилишса бас, оломон шу заҳоти янчиб ташлайди. Ҳозиргина бир ғишт капитан шапкасининг айвончасини қийшайтириб юборди, пешонаси қонади. Отряднинг бир неча кишиси яраланди: капитан солдатларнинг

жаҳли чиққанини, одамларда бошлиққа бўйсунмай, беихтиёр ўзларини муҳофаза қилиш туйғуси уйгонганлигини сизди. Сержант сўқинди: бир гишт чап елкасига худди киртаёқдек гурсиқлаб тегиб, суягини чиқариб юборишига оз қолди. Ёш солдатга иккала гишт тегиб; биттаси бошмалдоғини пачақлади, иккинчиси ўнг тиззасини яралади, шу боисдан тиззаси худди ўтда ёнаётгандек ловилларди. Нима гап ўзи, бу таҳқирларга қачонгача чидаш мумкин? Бир тош деворга тегиб қайтиб, кекса солдатнинг қорнига текканида, у кўқариб кетди, қоқсуяк қўллари билан маҳкам ушлаб турган милтиғи эса худди ўзи олдинга интилгандек титраб кетди. Капитан уч марта ўт очишга буйруқ бермоқчи ҳам бўлди, лекин ҳар сафар ҳаяжонланиб, нафаси бўғзига тиқилиб қоларди; қаттиқ ички кураш унинг фикрлари, бурчини, инсон ва солдат сифатидаги эътиқодини аралаш-қуралаш қилиб юборди. Бу орада тошбўрон янада кучайди. Капитан оғиз очиб, бақариб: «От!» дея команда беришга улгурмасиданоқ милтиқлар ўз-ўзидан отилаверди: аввалига уч ўқ отилди, кейин бешта, сўнг ҳамма милтиқ бир йўла отилди, анчадан кейин эса, орага тушган чуқур сукунатни бузиб бир ўқ отилди.

Ҳамма тахта бўлиб қолди. Солдатлар отишяпти! Ҳайратдан лол қолган халойиқ бўлаётган воқеага ишонмагандек, қимир этмай турарди. Лекин шу пайт кулоқни қоматга келтирувчи қичқириқлар эшитилди, горнчи эса отишни тўхтатиш сигналинини чалди. Шунда одамларни даҳшатли ваҳима босди-ю, ҳамма бошини эгиб, худди ўқ ёмғирига дуч келиб қолган подадек, лойга ботиб қочаверди.

Дастлабки уч ўқ отилганда Бебер билан Лидия бир-бирининг устига йиқилиб тушди; ўқ қизалоқнинг юзига, боланинг эса чап қўлтиғига текканди. Қиз тил тортмай ўлган бўлиб, қимир этмай ётарди. Лекин Бебер бор кучини йиғиб, жон талвасасида худди ўша ерда, ходалар орасидаги қоронғи жойларида ўтказган сўнгги кечадагидек икки қўли билан қучоқлаб олмақчи бўларди. Шу чоқ ниҳоят Жанлен пайдо бўлди; ҳали уйқуси ўчмаган Жанлен Рекийярдан югуриб келди, порох тутуни орасидан оқсоқланиб ўтди. Бебер унинг кичкина дугонасини қучоқлаганча, кўзи олдида жон берди.

Ундан кейин отилган беш ўқ Ашаддий кампир билан Ришоммни қулатди; Ришомм ўртоқларига эс-ҳушларингни йиғиб олинглар, дея ялиниб турган пайтида ўқ орқасига текканди. У тиз чўкиб қолди, кейин бир ёнбошига йиқилди, хириллаб, гужанак бўлиб ерга ётиб қолди; кўзлари ёшга тўлди. Кампирнинг бўғзига ўқ текканди; у қуриган дарахтдек ерга гурс этиб тушди; сўнгги марта гўлдираб қарғанди: бўғзига қон тўлиб кетганди.

Лекин шу чоғ бутун отряд бараварига ўт очди-да, шахта олдини бутунлай очиб қўйди; ўқлар юз қадамча нарида тиржайиб, жангни кузатаётган ҳангоматалаларни ҳам қулатди. Битта ўқ Мукенинг оғзига тегди-да, у Захария билан Филоменанинг оёқлари остига чалқанча тушди. У шу заҳоти жон берди, қонлари болаларга сачраб кетди. Шу онда Мукеттанинг қорнига ҳам иккита ўқ тегди. У солдатлар нишонга олаётганларини кўриб, ҳой, эҳтиёт бўл, дегандек қичқириб, жонҳолатда олға — Катрина томон югурди, бироқ қаттиқ инграб, гандираклади-да, кучли зарбадан чалқанча ағдарилди. Югуриб келган Этьен уни кўтариб олиб кетмоқчи бўлди, лекин Мукетта фойдаси йўқ, тамом бўлдим, дегандек ишора қилди. Жон таслим қилаётган Мукеттани ҳиқичоқ тутаётган бўлса ҳам ниҳоят бу жуфт эди, мен оламдан ўтганимдан кейин бирга бўлишди, дея гўё қувонаётгандек Этьен билан Катринага қараб жилмайиб ётарди.

Ҳамма нарса тамом бўлгандек эди; ўқларнинг вараңглаши узоқ-узоқларга, ҳатто посёлкадаги уйларгача бориб етди; бироқ қўққисдан яна кечикиб отилган бир ўқ овози янгради: нақ юрагидан ўқ еган Маэ турган жойида ўгирилди-ю, кўмирдан қорайиб кетган кўлмакка чалқанча шалоп этиб тушди.

Хотини теңасига келди-да, ҳеч нимага тушунмагандек:

— Эй чол, тур! Жароҳатланмадингми ишқилиб, ўқ тегмадимми? — деди.

Қўллари Эстелла билан банд бўлганидан эрининг бошини кўтариш учун қизалоқни қўлтиғига тикди.

— Қани, айт-чи, қаеринг оғрияпти?

Эрининг кўзларида нур сўнганди, лабларида қон кўпиги кўринди. Хотин эрининг ўлганини англади.

У боласини худди бўжчадек қўлтиғига қисиб, шуур-сизлик билан эрига тикилганча лойда ўтириб қолди.

Шахта тозаланди. Капитан боя тош тегиб, айвони қийшайиб қолган шапкасини шартта бошидан олди-ю, яна кийди; ранги қув ўчиб кетган капитан энди тамом бўлдим, дегандек қимир этмай турарди. Унинг солдатлари эса ғуж бўлишиб, чурқ этмай милтиқларини қайтадан ўқлашарди. Қабулхона деразасидан қўрқиб кетган Негрель билан Дансартнинг афтлари кўринди. Уларнинг орқасида Суварин турарди; унинг пешонасини чуқур ажин кесиб ўтган бўлиб, гўё ана шу ажинлар миясига ўрнашиб қолган фикрларини акс эттирарди. Уфқнинг қарама-қарши томонида, тепа четида бир қўли билан таёғига суянган, иккинчи қўлини эса пастда яқин кишиларни қандай ўлдирishaётганликларини яхшироқ кўриш учун пешонасига қўйган Ўлмас бобо қоққан қозиқдек турарди. Жароҳатланганлар инграр, ўликларнинг баданлари совий бошлаганди, улар суyoқ лойда ёки кўмир билан тўла қопқора чуқурларда ётишарди. Шу ерда, умр бўйи муҳтожликдан бошлари чиқмаган, ниҳоятда ориқ бўлиб кўринган бу одамларнинг муштдекгина мурдалари ичида Карнай деган отнинг жунук ва аянчли улкан гавдаси ҳам ётарди.

Этьен ўлмай қолди. У дармонсизлик ва қўрқувдан йиқилиб қолган Катрина ёнида ҳамон ниманидир кутиб турарди; бироқ шу он аллакимнинг баланд овози эшитилиб, Этьенни титратиб юборди. Бу аббат Ранвье-нинг овози эди. У ибодатдан қайтиб келаётганди. Аббат қўлларини силкитиб, пайғамбарона важоҳат билан қотиллар худонинг ғазабига дучор бўлишсин, дея қарғаб келарди. У адолат салтанати ҳукмрон бўлади, буржуазия ёвузликларини ҳаддан ошириб, бу оламдаги бева-бечора меҳнаткашларни ўлдиргани учун жаҳаннам оташида куйиб кул бўлади, дея каромат қиларди.

ЕТТИНЧИ ҚИСМ

I

Монсудаги момақалдироқларнинг даҳшатли акс са-долари Парижгача етиб борди. Оппозициячи газета-лар тўрт кун мобайнида биринчи саҳифаларини даҳ-шатли хабарлар билан тўлдириб, газаб билан ёзиб туришди: йигирма беш киши ярадор бўлган, ўн тўрт киши ўлган, шулардан иккитаси бола, учтаси хотин. Бундан ташқари қамоққа олинганлар ҳам бор. Левак чинакам қаҳрамонга айланиб кетди: терговчисига айт-ган гапларидан улугвор антик давр нафаси эсармиш. Бу зарбалар қоқ пешонасига теккан империя ўз қуд-ратини писанда қилгандек, воқеаларга ниҳоятда со-вуққонлик билан муносабатда бўлди; лекин империя-нинг ўзи олган жароҳатининг қанчалик оғирлигини ҳали тушуниб етмаганди. Буларнинг ҳаммаси гўё шун-чаки оддий, аянчли ҳодиса, бир қора мамлакатда юз берган воқеадек туюларди; гарчи бу маълум дара-жада зарар етказса-да, жамоатчилик фикрини шакл-лантирадиган Париж кўчаларидан жуда узоқда эди. Бу ҳодиса тезда унутилади: Ширкат бу ишни бости-бости қилиб юбориш ва чўзилиб, ижтимоий хавфга айланаётган забастовкани тезроқ бартараф этиш ҳа-қида расмий фармойиш олганди.

Чоршанба куни эрталаб Монсуга уч амалдор етиб келди. Шу чоққача юз берган қиргин туфайли шодли-гини изҳор этишга ботина олмаган, нохуш воқеалар-дан кўнгли ғаш бўлиб турган шаҳарча енгил нафас олиб, ўзини балодан қутулгандек сизди. Ҳаво ҳам жў-нашиб кетди; ҳамиша февраль бошида бўладигандек,

кунлар очик, илиқ эди; қуёш тафтидан сирень буталаридаги куртаклар бўртиб қолганди. Ширкат уйидаги дераза қопқоқлари очилди, кенг бино қайтадан жонланди. Уша ёқдан энди анча ёқимли миш-мишлар кела бошлади: гўё ҳалокатли воқеалардан ниҳоятда қўрқиб кетган Правление аъзолари бу ерга оталарча қучоқ очгани ва посёлкадаги ишчилар орасидаги адашган кўмир қазувчиларни бағриларига босгани келганмишлар. Энди, зарба берилиб, бу зарба улар кутгандан ҳам кучлироқ бўлиб чиққандан кейин улар ўзларини халоскорлар қилиб кўрсатишга уриниб қолишди. Улар жуда ажойиб, лекин кечиккан фармойишлар чиқаришди. Ҳаммадан аввал бельгияликларнинг жавобини беришди, буни ҳам ишчиларга жуда ён босгандек, ҳар томонлама писанда қилишди. Кейин шахталардан ҳарбий соқчиларни олишди, чунки бостирилган забастовкачилар энди уларга ҳеч қандай хавф соломасдилар. Ворёда йўқолган соқчи масаласини ҳам қўшиб, ишни бости-бости қилишди: ҳаммаёқни қидиришиб, ҳеч қардан на милтиқни, на жасадни топа олишди; гарчи бунинг замирида бир жиноят яшириниб ётибди, деб шубҳаланган бўлсалар-да, солдат қочган бўлса керак, деган хулосага келишди. Улар эртанги кундан қўрқиб, титраб, шалағи чиққан эски дунё биносига ёпирилган дарғазаб халойиқнинг енгилмаслигини тан олиш хавfli, деб ўйлаб, иложи бор ҳамма нарсани хаспўшлашга уринардилар. Аслини олганда, яраштирув тадбирлари уларнинг нуқул маъмурий ишлар билан шуғулланишларига халақит бермасди. Шаҳардагилар Денеленнинг яна Правлениега қатнаётганини, у ерда жаноб Энбо билан учрашаётганини билишарди. Вандам шахтасини сотиб олиш тўғрисидаги музокаралар давом этарди; миш-мишларга қараганда, Денелен парижлик жанобларнинг шартларини қабул қилишга рози бўлган.

Бироқ маъмурлар деворларга ёпиштириб ташлаган катта-катта сариқ хитобномалар бутун атрофда ҳаммани ҳаяжонлантириб қўйганди. Уларда йирик ҳарфлар билан ёзилган қуйидаги сатрларни ўқиш мумкин эди:

«Монсу ишчилари! Биз, кейинги кунларда ўзларингиз кўрган қайғули воқеаларга сабаб бўлган ада-

шувлар софдил ва яхши ниятли ишчиларни тиргикчилик воситаларидан маҳрум қилишини истамаймиз. Душанба куни эрталаб биз ҳамма шахталарни очиб қўямиз, ишлар яна бошланиб кетгач, сизларнинг аҳволларингизга оид масалаларни синчиклаб, диққат билан қараб чиқамиз, мушкулларингизнинг баъзиларини ҳал қилиш мумкин бўлар. Биз адолатли ва амалга ошириш мумкин бўлган ҳамма талабларингизни бажариш учун қўлимиздан келганини қиламиз».

Шу куни эрталабнинг ўзидаёқ ўн минг кўмир қазувчининг ҳаммаси хитобномалар ёнидан ўтди. Ҳеч ким бир оғиз ҳам гапирмади, кўплар бошларини сарак-сарак қилишарди, бошқалари бўшашиб қадам ташлаб нари кетарди, лекин уларнинг эҳтироссиз чеҳралари қимир этмасди.

Шу чоққача Икки юз зағизгон посёлкаси саркашлик билан қаттиқ турганди. Шахталар лойини бўяган ўртоқлар қони у ёққа бошқаларнинг йўлини тўсиб қўйгандек эди. Пьеррон ва унга ўхшаган мунофиқлардан ўнга яқин одам ишга тушди. Уларнинг боришлари ва қайтишларига кўмир қазувчилар хўмрайиб қараб туришди-ю, лекин ҳеч қандай таҳдид қилишмади. Черков деворига ёпиштирилган хитобномага ҳеч ким ишонмади. Унда ҳисоб-китоб дафтарчаси ҳақида ҳеч нима дейилмаган: нима, Ширкат уларни қайтиб олишга йўқ деяптими? Таъқиблардан қўрқиб, обрўси аниқ-мунича тўкилган кишиларни ишдан ҳайдашга қарши биродарона ҳамкорлик гоёси барча кўмир қазувчиларни аввалгидек маҳкам туришга мажбур этарди. Буларнинг ҳаммаси шубҳали эди, сабр қилиб туриш керак, Правденидан келган жаноблар ниятларини **рўйирост** айтганларидан кейин ҳам шахтага қайтиш мумкин-ку. Посёлканинг настик биноларидан садо чиқмас, ҳатто очлиқ ҳам қўрқинчли бўлмай қолганди. Монсу томлари устидан ўлим қанот қоқиб ўтдимиз, демак, омон қолганлар ҳам қурбон бўлишлари мумкин-да.

Бироқ Маэларнинг азали уйи бутун посёлкадаги уйлар ичидаги энг қайғули, энг жимжит эди. Эрини қабристонга қўйиб келган Маэ хоним қайтиб тишининг оқини кўрсатмади. У қирғиндан сўнг чалажон, лойга беланган Катринани уйига кўтариб олиб келган

Этьендан хафа бўлмади. Она қизини ўринга ётқизиш учун йигитнинг кўзи олдида ечинтираркан, аввалига Катринанинг қорнига ўқ тегипти-да, деб ўйлади, чунки унинг кўйлаги қон эди. Лекин у гап нимадалигини кейин тушунди; бу шу даҳшатли кундан эси чиқиб кетиши натижасида кечикиб келган ҳайз эди. Ҳа, нима ҳам дерди, бу жароҳат айна муддао, чинакам мукофот — бола кўриши мумкин, кейин жандармлар унинг фарзандларини ўлдиришади! У Катринага ҳам, Этьенга ҳам бир оғиз гапирмади. Этьен қамоққа олинishi мумкинлигини билса ҳам, таваккал қилиб, Жанлен билан бирга ухлади. Рекийяр зиндонига қайтиш ҳақидаги фикр миясига келиши биланоқ юраги безиллаб, турмани афзал кўрди. Унинг аъзойи бадани жимирлашиб, бу қотилликларни чулғаб олган қоронғилиқдан юраги орқасига тортиб кетарди. У ерда, пастда, тошлар тагида босилиб ётган солдатдан негадир кўрқарди. Бунинг устига Этьен турмани бошпанадек орзу қиларди,— мағлубият алами уни шу қадар эзиб қўйганди. Бироқ уни ҳеч ким ҳатто безовта ҳам қилмади, шу боисдан Этьен лоақал жисман чарчаш учун нима билан шуғулланишини билмай, кунларни бир азобда ўтказарди. Маэ хоним, ҳар қалай, вақт-вақти билан менинг уйимда нима бор сенларга деб сўраётгандек, унга ҳам, Катринага ҳам ўқрайиб қарарди.

Яна ҳаммалари гуж бўлиб ётишарди. Улмас бобо шу чоққача икки гўдакка қарашли ўринни эгаллаганди; энди улар Катрина билан бирга ётишарди, чунки бахтсиз Альзира энди букриси билан опасининг биқинига туртиб, халақит бермасди. Она айниқса ётганида ўрин бўшлигини ҳаммадан кўра кўпроқ ҳис этарди: энди ўрин ниҳоятда совуқ ва кенг бўлиб қолгандек туюларди. У ана шу бўшлиқни тўлдириш учун Эстеллани олиб ётиб, чакки қилипти, қизалоқ эрининг ўрнини боса олмасди. Шунда бева соатлаб овозини чиқармай йиғларди. Кейин кунлар аввалгисидек ўтаверди: яна аввалгидек нон ҳам, умид ҳам, ўлишнинг ҳам иложи йўқ эди. Қаерлардандир нималарнидир топиб келишарди, бироқ бу нарсалар шўрпешоналарга кулфат келтириб, уларнинг азоб-уқубат чекиб юришларини чўзарди холос. Уларнинг ҳаётида ҳеч нима ўзгармади; Маэ етишмасди холос.

Бева Маэнинг индамай юришини кўриб тўйиб кетган Этьен бешинчи куни тушдан сўнг уйдан чиқди-да, посёлканинг тош ётқизилган кўчасидан секин одимлаб кетди. Бекорчиликдан юраги сиқилиб кетган Этьен кўлларини шалвиратиб, бошини қуйи солганича, фақат бир нарсани ўйлаб, эзилиб, шу хилда айланиб юрарди. Ярим соатдан бери санқиб юрган Этьен бирдан алланечук бўлиб кетаётганини сизди: ўртоқлари уйларида чикишиб, уни кузатиб туришарди. Этьеннинг қолган-қутган обрўси ҳам солдатларнинг отишлари билан бирга кетиб бўлганди; энди у ҳар қадамда ёниб турган кўзларни учратмай иложи йўқ эди. У бошини кўтариб, эрақларнинг важоҳатли юзларини, дераза пардаларини кўтариб қараётган хотинларни кўрди. У мана шу озгина айбдан, ўқрайиб қарашлардан, очлик ва ёш тўкишдан кенгайиб кетган кўзлардан ўзини ноқулай сизди-ю, оёқлари каловланиб, юролмай қолди. Унинг орқасидан одамлар ичларида борган сари кўпроқ таъна, маломат қиларди. Этьеннинг назарида бутун посёлка кўчага чиқиб, ўзларининг бахтсизликларини унинг юзига солиб қичқирадигандек эди; у ана шундан қўрқди-да, бадани жимирлаб, орқасига қайтди.

Лекин у Маэлар уйига келиб кўрган воқеа таъбини жуда хира қилиб юборди. Улмас бобо қиргин куни икки қўшниси уни боши эгри ҳассаси майда-майда бўлиб ётган жойдан топиб олиб, уйига келтириб қўйганидан бери худди стулга сирачлаб қўйгандек, совуқ печь олдида ўтирарди: у яшин урган қари дарахтдек ётарди. Ленора билан Анри очликни сал босиш учун кеча карам қайнатилган эски кастрюлкани тарақлатиб қиртишлашарди, бева Маэ эса Эстеллани столга ўтқазиб қўйиб, Катринага мушт ўқталиб дўқ урарди:

— Қани, ўша гапингни яна бир қайтар, адо бўлгур! Ҳозир нима дединг, қайтар!

Катрина яна Ворёга бормоқчи эканлигини айтди. Ойлик олмай, онамга ортиқча юк бўлиб, бекорга жойни банд қилиб, кўзли кесакдек ўтираманми, деган фикр кундан-кунга ич-этини баттарроқ кемирарди. Агар Шавалнинг калтаклашидан қўрқмаганида-ку душанба кунинёқ кетиб қоларди-я. Катрина гўлдираб жавоб берди:

— Нима дейсиз? Ҳеч иш қилмасдан ўтириб бўлмайди-ку, ахир. Жилла қурса нон бўлади-ку.

Она унинг гапини бўлди:

— Менга қара, ҳой! Қайси биттанг биринчи бўлиб ишга борсанг, ўшани бўғиб ўлдираман... Йўқ, бу бориб турган гўсхўрлик-ку!.. Отасини ўлдирсин-да, болаларини ишлатсин! Йўқ, шу ҳам етар! Бундан кўра ҳаммангни ўша марҳумларга ўхшаб нариги дунёга жўнатишгаңи яхши-да.

Узоқ вақт чурқ этмай келган хотиннинг дард-алами бугун шиддат билан отилиб чиқа бошлаганди. Катрина унга яхши маош олиб келармиш-а, гапини қаранглар-а! Ўттиз суга етар-етмас, агар бошлиқлар манави бандит Жанленга ҳам бирор иш топиб беришса, яна йигирма су. Эллик су, ахир етти жонни боқиш керак! Болалар фақат ейишни билишади. Бобо бўлса, боёқиш йиқилганида боши лат еганми,— худди меровларга ўхшайди; балки солдатлар ўртоқларини отаётганини кўриб, бутунлай жинни бўлиб қолгандир.

— Сизнинг ҳам тагингизга етишдимидейман, ота? Қўлларингиз бақувват бўлгани билан нима фойдаси бор; энди тамом бўлдим деяверинг.

Улмас бобо сўниқ кўзларини пирпиратиб, келинига қараб турарди. У соатлаб бир нуқтага тикилганча ўтираверарди, фақат полни ифлос қилмаслиги учун олдига қўйилган кулли тоғорага тупуришга ярарди холос.

— Ҳалигача унинг пенсиясини тасдиқлашмади,— давом этди Маэ хоним,— мен ишонаманки, улар рад этишади, ҳаммаси ўз билармонлигимиздан... Бас, тўйиб кетдим, бу одамлар бошимизга кўп кулфат солишди!

— Ахир улар эълонларида ваъда қилишяпти-ку... — эътироз билдирмоқчи бўлди Катрина.

— Уларнинг эълонларини мунча кўп пеш қиласан менга?.. Бу бир тузоқ — бизни илинтириб, тириклай ейишмоқчи улар. Бизни илма-тешик қилгандан кейин, албатта жилпанглашади-да...

— Хўш, унда қайга борамиз, ойи? Ахир улар бизни посёлкада қолдиришмайди-ку.

Маэнинг беваси ночор қўлларини ёзди. Қаерга ҳам боришарди? Унинг ўзи ҳам билмасди, ўйлашга ҳаракат ҳам қилмасди — бу фикрлар уни жинни қилиб қўяй дерди. Бирор бошқа жойга боришади-да. Каст-

рюлканинг тарақ-туруқи баттар жонини чиқарарди. Маэ аламини Ленора билан Анридан олди — уларга ташланиб, савалай кетди. Сирғалиб тушиб эмаклаган Эстелла ариллашни бошлади,— бу шовқинни янада кучайтирди. Она бир тарсаки уриб, уни тинчитди; уларнинг бахтига шу ҳам ўла қолса бўларди! У Альзиранни эслади-ю, бошқа болаларига ҳам унинг қисматини тилади. Кейин деворга суяниб, кутилмаганда ҳўнграб юборди.

Этьен овутишга журъат этмади. Бу хонадонда унинг бир пуллик ҳам қадри йўқ эди: ҳатто болалар ҳам ундан шубҳаланиб, ўзларини олиб қочишарди. Лекин бахти қора беванинг кўз ёшлари унинг дилини вайрон қилиб юборгач, гўлдираб деди:

— Келинг, қўйинг, қўйинг, руҳингизни туширманг! Бир иложини топармиз!

Бева Этьеннинг гапини эшитмади шекилли, саннайверди:

— Қашшоқлик! Ҳеч ақл бовар қилмайди! Манави даҳшатли қирғин юз бергунича бир амаллаб кунимизни кўриб юрувдиқ-ку. Қотган нон есак ҳам, ҳар қалай бирга эдик-да... Нима бўлди ўзи, худойим? Қайси гуноҳимиз учун бошимизга бунчалик кулфат солдинг? Бировимиз нариги дунёда, қолганларимиз у ёққа жўнашни орзу қиламиз... Албатта, отни аравага қўшгандек, бизни ҳам ишга боғлаб қўйишганди, нафсиламрини айтганда, бошимиз таёқдан чиқмади, бойлар уззукун сармояларини кўпайтириш билан овора дейиш ҳам инсофдан эмас, биз бўлсак, энди турмушимизнинг яхшиланишидан умидимизни ҳам узиб қўйдик. Умид бўлмаса, яшагинг ҳам келмас экан. Ҳа, ҳа, албатта, шундай давом этавермаслиги, бир оз нафасни ростлаб олиш ҳам керак эди-да... Нима бўлишимизни олдиндан билганимиздами! Фақат адолат талаб қилганинг учун шундай даҳшатли ғам-гуссага дучор бўлсанг, сира ақлга сиғмайди!

Ийги бўғзига тиқилиб, қаттиқ ғам-гуссадан овози бўлиниб-бўлиниб чиқа бошлади.

— Қаёқдаги қаланғи-қасанғилар гирдиқаналак бўлиб, бир оз сабр қилсанглар, ҳаммаси яхши бўлиб кетади, деб ваъда беришади... Лекин бошимизни айлантириб юборишди: кўрган-боққанимиз азоб-уқубат,

беихтиёр йўқ нарсаларни кўнглимиз тусайди. Мен бўлсам орзуга айб йўқ, замона тинчлик бўлади, турмушимиз яхшиланади, деб ўйлаб юрибман; тўғри, бу сўзлар, худо билсин, осмонга учиб кетдим! Мана энди, белимиз сингани қолди, яна ўша қашшоқликка тушдик... Ҳаммаси ёлгон экан, ҳаммаси хаёлий нарсалар экан. Лекин кўрган-боққанамиз — қашшоқлик бўлди! Хоҳласанг мана шу, шу қашшоқликдан тил тортмай ўлавер, бунинг устига яна сийловиям бор: милтиқлардан варанглатиб отишади!

Этьен унинг ноласини тингларкан, ҳар бир томчи ёши юрагига таъна тошидек ботарди. Этьен орзу-умидлари чилпарчин бўлгач, ҳаддан ташқари ҳафсаласи пир бўлган бевани қандай овутишни билмасди. Она яна хона ўртасига чиқиб, Этьенга тикилди-да, ғазаби қайнаб кетганидан «сен»лаб гапира бошлади:

— Хўш, сен, сен ҳам ҳаммамизни лақиллатиб, энди шахтага тушмоқчимисан?.. Мен сенга ҳеч қандай таъна қилаётганим йўқ. Лекин сенинг ўрнингда мен бўлганимда, ўртоқларим бошига шунча кулфат солганим учун ҳафаликдан тарс ёрилиб ўлган бўлардим.

Этьен жавоб бермоқчи бўлди-ю, лекин диққати ошганидан елкасини қисиб қўя қолди: юрагинг туздай ачишаётганини ҳеч ким тўшунмагандан кейин, баҳслашиб ўтиришнинг нима ҳожати бор? Этьен қаттиқ изтироб чекиб, яна айлангани чиқиб кетди.

Назарида унинг келишини посёлка аввалгидек кутаётгандай эди; эркаклар остонада, хотинлар — дераза олдида туришарди. Этьен кўчага чиқиши билан шовуршувур эшитилиб, халойиқ тўплана бошлади. Тўрт кундан бери ҳамманинг юрагида йигилиб қолган фисқу фасод гаплар энди юзага отилиб чиқай деб турганди. Этьенга мушт ўқталиб дўқ қилишарди, оналар жаҳл билан болаларига уни кўрсатишарди, чоллар дуч келиб қолишса, тупуришарди. Унга бўлган муносабат кескин ўзгарди, — Этьен мағлубиятнинг эртасигаёқ халқ орасида топган обрўси бутунлай кетганини, бемақсад узоқ чекилган азоб-уқубатлар туфайли туғилган қахру ғазабни кўрди. Очлик учун, ўртоқларининг ўлими учун Этьен жавобгардек эди.

Филомена билан бирга қайтаётган Захария остонада Этьенни туртиб, заҳархандалик билан деди:

— Э-хе, семириб кетибсан-ку! Бировларнинг ризқи ҳисобига семириш яхши бўларкан шекилли!

Левакнинг хотини останага Бутлу билан бирга чиқиб турганди. У ўққа учиб ўлган ўгли Бебер ҳақида гап очиб, қичқиради:

— Ҳа, ҳатто болаларни ҳам ўлдирадиган аблаҳлар бор экан. Ернинг тагидан бўлса ҳам топиб берсин боламни!

У турмада ўтирган эри ҳақида гапирмади: оилада унинг ўрнини Бутлу олганди. Айтгандай, у Левакни ҳам эслаб, қичқирди:

— Ҳа, ҳа! Бемалол сайр қилиб юрган разиллар ҳам бор, тўғри одамлар бўлса, ким билсин, қаерларда ўтирибди!

Ундан қутулмоқчи бўлган Этьен боғнинг нариги бошидан чопиб келаётган Пьерронга дуч келди. Бу жувон учун онанинг ўлими чинакам озодликка чиқиш бўлди, чунки эр-хотин бу баджаҳл кампирдан қандай қутулишларини билишмасди; қизлари, шу суяқ оёқ Лидияга ҳам аза тутиб ўтиришмади, қайта ундан қутулишгани ҳам соз бўлди. Аммо Пьеррон хоним қўшнилари билан ярашмоқчи бўлиб, улар билан бирга ҳаракат қилишга жазм этди:

— Менинг ойим-чи? Қизим-чи? Уларнинг орқасига биқиниб олганингни кўришибди, сенинг ўрнингга улар ўқ ебди!

Нима қилиш керак? Пьеррон хонимни ва бошқаларни бўғиб ўлдирсинми, бутун посёлка билан уришиб чиқсинми? Этьеннинг кўнглига бирров шундай гап келди. Унинг боши лўқилларди, энди у ўртоқларини ҳайвонга ўхшатди; улар шунчалик тўнка, гўл эканки, воқеаларнинг маантиқий ривожланишига ҳам уни айбдор қилиб кўрсатишлари мумкин эди, бу эса Этьенни хит қиларди. Қандай бемаънилик! Бу одамларни инсофга келтириш иложи йўқлигидан қийналиб кетган Этьен ҳақоратларга қулоқ солмасликка ҳаракат қилиб, қадамини тезлатди. Кўп ўтмай у қочишга тушди. У қайси уйнинг рўпарасига келса, одамлар қийқириб, мазах қилишар, уни қувлашар, овозларининг борича бақириб лаънатлашарди, чунки халқнинг нафрати шу қадар қайнаб тошганди. Уни эксплуататор, қотил, ҳамма бахтсизликларнинг ягона айбдори деб қоралашди.

Ранги бўздек оқарган, таъби хира бўлиб кетган Эъен оёғини қўлига олиб, посёлкадан қочди, орқасидан бир тўп одам келарди. Ниҳоят тош кўчага чиқишганида кўплари қолиб кетди. Бироқ баъзи бировлар зўр бериб уни таъқиб этарди, пастда, тепа тагида, «Авантаж»нинг рўпарасида эса уларга Ворёдан чиққан яна бир гуруҳ қўшилди.

Булар орасида Мук бобо билан Шаваль ҳам бор эди. Чол қизи Мукетта билан ўгли Мук вафотидан кейин ҳам отбоқарлигини қилаверди, чурқ этиб нолимади ҳам, бир оғиз шикоят ҳам қилмади. Эъенни кўргандан кейин эса тўсатдан ғазаби қайнаб, кўзларига ёш келди. Доимо тамаки чайнагани учун қорайиб кетган оғзини тўлдириб бўралаб сўка бошлади:

— Ярамас! Чўчқа! Шўр тумшуқ!.. Бахти қора болаларим хуини тўлайсан энди. Йўқ, башарангни дабдала қилишим керак!

Чол ердан битта гиштни олди-да, иккига бўлиб, кетма-кет отди.

— Ҳа, ҳа! Ана унинг холини кўринглар!— деб қичқирди Шаваль ҳовлиқиб тиржайаркан, бу интиқомдан хурсанд бўлиб.— Ҳар кимнинг ҳам навбати келади... Ҳа, ярамас, сичқоннинг ини минг танга бўлиб қолдим!

У ҳам гишт-тош отиб, Эъенга ташланди. Атрофда ақл бовар қилмайдиган тўполон кўтарилди, ҳамма гиштга ёпишди, уларни синдириб, худди солдатларни ўлдириш учун қандай тошбўрон қилган бўлсалар, Эъенни ҳам шундай майиб қилиш ниятида эдилар. Гангиб қолган Эъен энди қочиб кетишга уринмай, уларни гап билан тинчитиш мақсадида рўпараларида тураверди. Аввалги нутқлари, илгари ҳаммани ҳайратга солган гаплари ёдига келди. У илгари измидан чиқмаган итоаткор одамларни маст этган гапларни такрорлади. Бироқ Эъен обрўсининг таъсири кетиб қолгани учун ҳозир унга жавобан гишт физиллаб келарди. Гишлардан биттаси унинг чап қўлини яралади; у ўзини катта хавф остида қолдириб, тисарила бошлади-да, «Авантаж» олдида келиб қолди. Раснёр анчадан бери остонада турарди.

— Кир,— деди у оддийгина қилиб.

Эъен тараддудланди: бу ерга бекинишнинг иложи йўқдек эди.

— Кира қолсанг-чи, улар билан ўзим гаплишаман!
Этъен маслаҳатга кўниб, хонага кириб яшириди,
қовоқхоначи эса йўғон гавдаси билан бутун эшикни
тўсиб олди.

— Тўхтанглар, дўстларим, эс-хушларингни йигиб
олинглар... Ўзларингиз жуда яхши биласизларки, мен
ҳеч қачон сизларни алдаган эмасман. Мен ҳамиша
тинчлик бўлсин дейман, агар гапимга кирганларингда,
албатта, ҳозирги аҳволга тушмасдиларинг.

Раснёр бир маромда тебраниб, узундан-узоқ нутқини
бошлади; чучмал илиқ сувга ўхшаган, одамлар
онгига етиб борадиган гапларни қалаштириб ташлади.
Унинг аввалги омади яна жуда юришиб кетди; у зар-
рача ҳам қийналмай, мутлақо табиий ҳолда яна шуҳ-
ратини тиклаб олди, гўё бир ой илгари ҳеч ким унга
бақирмаган, аблаҳ дея ҳақорат қилмагандай эди.
«Тўғри! Қўшиламиз! Мана шундай гапириш керак!» —
деган маъқулловчи овозлар эшитилди. Гулдурос қар-
сақлар янгради.

Этъен эшик орқасидан қулоқ солиб турарди; сўнг-
ги умидлари ҳам чил-чил бўлиб, хўрлиги келди. У
Раснёрнинг ўша ўрмонда бу халойиқ асло миннатдор
бўлмайди, деб айтган дўқларини эслади. Бу қанақа
ҳайвонлик? Бу қандай кўрнамаклик, — наҳотки у халқ-
қа сира хизмат қилмаган бўлса! Одамларнинг ич-
этини кемираётган аллақандай бир бемаъни куч улар-
ни гижгижлаётганди. Қутурган ва ўзларига ҳам зар-
рарли ишлар қилаётган кишидан ғазабланиш ёнига
ўзининг шармандаи шармисор бўлганини, шуҳратпа-
растлик оруларининг фожиали бир ҳолга олиб кел-
ганини англаб, умидсизликка тушиш ҳам кўшилди.
Нима қилиш керак? Наҳотки ҳаммаси тамом бўлган
бўлса? Этъен ўша ерда, шамшодлар тагида ўз қалби
билан уч минг кишининг қалби ҳамоҳанг тепганини
эшитганини эслади. Ўша куни обрўси баланд, халойиқ
измида эди, халойиқ уни ўз йўлбошчиси деб биларди.
Ушанда Этъен орзулардан маст эди: Монсеу оёқлари
остида эди, эрта-индин Париж ҳам тиз чўқади, ўшан-
да у депутат бўлиб, нутқлари билан буржуйларнинг
расвосини чиқаради. У ишчининг парламент минба-
ридан сўзлаган дастлабки нутқини орзу қилади. Энди
ҳаммаси барҳам топди! У ўзини бахти қора ҳис қил-

ди, ҳамманинг нафратига учради; ўша одамлар энди қўлларига тош олиб, уни қувлаб юришарди!

Шу пайт Раснёрнинг товуши янада баландроқ эшитилди:

— Зўрлик ҳеч қачон яхши натижа бермаган, дунёни бир кунда ўзгартира олмайсан. Сизларга ҳамма нарсани бирданига ўзгартириб бераман, деб ваъда қилганлар, — ё бачкана, ё бўлмаса муттаҳам одамлардир!

— Қойил! Яшанг! — кичқирарди халойиқ.

Хўш, айб кимда ўзи? Этьен ҳамон қийнаётган ўша саволни ўзига берарди. Ҳақиқатан ҳам ҳамма нарсага — ўзи ҳам қон ютаётган мана шу бахтсизликка, бировларнинг қашшоқлигига, бошқаларнинг ўлимига — нонсиз, қуруқ суяги қолган хотин-халаж ва болаларнинг оғир қисматига Этьен айбдорми? Бу даҳшатли манзара билан куни кечқурун, қиргиндан аввал бутун даҳшати билан кўз олдида намоён бўлганди. Лекин ўшанда ўртоқлари билан бирга уни ҳам аллақандай куч қўзғатиб қўйганди! Бунинг устига у ҳеч қачон уларга раҳбарлик қилмаганди, уларнинг ўзлари унинг кетидан эргашгандилар, — агар тугёнга келган халойиқ уни қисиб келмаганида, ўзи ҳеч қачон бундай ишни қилмаган бўларди. Ҳар бир зўравонлик ҳодисаси уни эзар, чунки уларнинг биронтасини ҳам у тасаввур эта олмасди, уларни хоҳламасди ҳам. Ахир, масалан, бир кун келиб, посёлкадаги мухлислари тош олиб, уни қувиб юришини ўйлабди дейсизми? Бу қутурганлар сен бизга тўқлик ва бекорчилик ваъда қилгансан, дея айблашиб, ёлгон гапиришарди. Виждон азобини босиш учун ўйлаб топган бу баҳона ва далиллар билан дилидаги ташвиш — шундай вазиятда ўзимни кўрсата олмадим-да, деган фикр ҳам қўшилиб кетди-ю, ҳар қандай типирчилаб қолган чаласавод каби Этьен ҳам шубҳага тушиб қолди. Ахир у сўнгги чорагача борди-ку, у ҳатто ўртоқларининг фикрига қўшилмади, улардан кўрқди, ҳар қандай қоида ва назарияни писанд қилмай, йўлидаги барча нарсани супуриб, яксон қилиб бораётган ана шу улкан оммадан, кўр ва енгиб бўлмас халқ оммасидан кўрқиб кетди. Бу нафрат секин-аста уни ўртоқларидан узоқлаштирди; уларни хушламай қўйди, унинг дидлари нозиклашиб, бутун вужуди билан юқорироқ турган синфга интилди.

Шу он Раснёрнинг товушини ҳаяжонли қичқириқлар босиб кетди:

— Яшасин Раснёр! Ҳақиқат бу ёқда экан, фақат унга қулоқ солиш керак! Яша! Қойил!

Қовоқхоначи эшикни ёпди, оломон тарқалди. Раснёр билан Этьен индамай бир-бирига қаради. Иккови ҳам елкасини қисиб қўйди-да, охири бир кружкадан пиво ичди.

Худди шу куни Пиоленада Негрель билан Сесилнинг унаштирилиши шарафига тантанали зиёфат берилётганди. Бир кун аввал Грегуарлар ошхонанинг полини артиб, меҳмонхонадаги мебелларни тартибга келтириб қўйишни буюришганди. Мелани ошхонасида куйманар, иссиқ овқатлардан кўз-қулоқ бўлиб, хушбўй ҳидлари чордоққача чиқаётган қайлалар тайёрлар эди. Извошчи Франсис дастурхон тузашда Опоринага кўмаклашади, богбоннинг хотини идиш-товоқ ювади, богбоннинг ўзи эса кичик эшикни очиб туради. Эски урф-одатлар билан яшайдиган бу бадавлат хонадон ҳеч қачон бунчалик дабдабани кўрмаганди.

Ҳаммаси кутилганидан ҳам яхши бўлди. Энбо хоним Сесилга жуда ийиб кетиб, монсулик нотариус бўлажак келин-куёвнинг бахти учун ичишни таклиф қилганида, хоним Негрелга қараб жилмайиб қўйди. Жаноб Энбо ҳам ниҳоятда сертакаллуф эди. Унинг қувноқ чехраси меҳмонларни ҳайратда қолдирди. мишмишларга қараганда, у забастовкани бостиришдаги ғайрати туфайли яна Правлениенинг ишончини қозониб, яқин орада Фахрий легион орденига тақдим этилармиш. Кейинги воқеалар ҳақида гапирмасликка ҳаракат қилишса ҳам, ҳамманинг қувончи бу кишиларнинг тантана қилаётганини. фoш этар, зиёфат эса расмий ғалаба шодиёнасига айланганди. Ниҳоят улар қутулишди, яна бемалол еб-ичишлари, бежавотир ухлашлари мумкин! Кимдир қонлари ҳали Ворё лойига сингиб кетмаган мурдаларга шама қилиб қўйди; бу сабоқ қайгули зарурат эди; Грегуарлар, энди ҳар бир кишининг бурчи посёлкаларга етказилган шикастларни даволашдан иборат, деб қўшиб қўйишлари биланoқ ҳамма тўлқинланиб кетди. Грегуарларнинг ўзлари эса яна аввалгидек хотиржам, саховатли кўринишарди; улар шахталарнинг тубида ювошликнинг асрий наму-

наларини кўрсатаётган софдил шахтёрларнинг гуноҳларидан ўтишди. Энди ҳеч нарсадан қўрқмайдиган Монсунинг номдор граждани ёлланма меҳнат муаммосини ниҳоятда эҳтиёткорлик билан ўрганиш керак, деган фикрга келишди. Иссиқ овқат тортилиши билан ғалаба нашидаси авжга чиқди: жаноб Энбо епископнинг аббат Ранвье ишдан олингани ҳақидаги мактубини ўқиди. Маҳаллий буржуйлар солдатларни қотиллар, деб атаган руҳонийнинг кирдикорларини эҳтирос билан муҳокама қилишга тушди. Ширинлик тортилганда, нотариус ғоят кескин равишда мен ҳур фикрли кишиман, деб қолди.

Денелен иккала қизи билан келганди. У бу шоду хуррамликда хонавайрон бўлгани учун қайғураётганини яширишга тиришарди. Денелен бугун эрталаб Вандам концессиясини Монсу Ширкатига сотгани ҳақидаги ҳужжатга имзо чеккан эди. Ноилож қолган Денелен маъмурларнинг талабларига бўйсунушга мажбур бўлди; анчадан бери эҳтиёт қилиб келаётган бу ўлжани топшириб, қарзларини тўлашга етадиган пулни аранг топди. У пировардида ўзи учун манфаатли таклифни қабул қилди: бутун бойлигини сарфлаган ўша шахтанинг ўзида оддий хизматчи бўлиб, кузатиб юриш учун округ инженери бўлиб қолишга розилик берди. Майда корхоналар синадиган пайт келди, тўймас капитал бирин-кетин ямлаб-ютаётган айрим хўжайинлар йирик акционерлик жамиятларининг қудратли оқими остида қолиб, яқин ўртада саҳнадан тушиб кетишлари керак эди. Забастовка келтирган зарарларни Денеленнинг ёлғиз ўзи тўлаётганди, шунинг учун ҳам у жаноб Энбонинг ордени шарафига қадаҳ кўтараётганларни менинг инқирозим учун ҳам ичиш-япти, деб ўйларди. Люси билан Жаннанинг ниҳоятда назокат билан муомала қилишлари унинг кўнглини бир оз кўтарарди; қайта тикилган кўйлақлар уларга жуда ярашиб турарди; пулни ёмон кўрадиган кўҳлик ва шўх қизлар дадалари хонавайрон бўлишига қарамай, хушчақчақлик билан кулишарди.

Меҳмонхонага қаҳва ичгани чиқишганда жаноб Грегуар холаваччасини четга тортиб, дадил иш тутгани билан уни табриклади.

— Нима ҳам қилардинг? Сенинг хатонг Монсу-

даги акцияларинг учун олган бир миллион франки-нингни таваккал қилиб Вандамга сарфлаганинда. Сен ўзингга-ўзинг бениҳоя катта зарар етказдинг, бу бе-маъни иш сени бутунлай хонавайрон қилди. Менинг акцияларим бўлса, қимирламай сандиқда ётди, ҳеч нима қилмасам ҳам, мени боқди, қолаверса, болаларим, набираларимни ҳам боқади.

II

Якшанба куни қоронғи тушиши билан Этьен ҳеч кимга сездирмай посёлкадан чиқиб кетди. Юлдузлар чарақлаган мусаффо осмон ерни кўкиш ёритарди. Этьен канал томон юрди-да, канал бўйлаб Маршьеннга қараб секин жўнади. Ўт босган сўқмоқдан юришни Этьен жуда севарди, бу йўл икки лье масофагача ўқдай тўғри кетган канал ёқалаб ўтарди, каналдаги сув эса эритилган кумуш лентадек олисларга чўзилиб кетарди.

У бу ерда ҳеч қачон жон зотини учратмаганди. Лекин бу сафар нафаси ичига тушиб кетди: рўбарўдан бир одам келарди. Юлдузларнинг хира ёғдусида иккала йўловчи юзма-юз бўлгандагина бир-бирини таниди.

— Э, сенмидинг!— гўлдиради Этьен.

Суварин ҳеч нима демасдан бошини силкиб қўйди. Улар бир неча минут қимир этмай туришди-да, сўнг Маршьенн томон ёнма-ён кетишди. Ҳар бири ўз фикрлари билан банддек кўринар, гўё иккала йўловчи бир-биридан жудаям узоқда эди.

— Сен газеталарни ўқидингми, Плюшар Парижда ишларни дўндириятимикан?— сўради ниҳоят Этьен.— Бельвил йигилишдан чиққанида, уни кўчада гулдурос қарсақлар билан кутиб олишибди. О, тумов бўлишига қарамасдан яна юқори кўтарилади-да энди! Энди у хоҳлаган нарсасига эришади!

Машинист елкасини қисиб қўйди. У вайсақиларни, хусусан сиёсат йўлига гўё адвокатлик соҳасида киргандек кириб, иш бошловчиларни ўлгудек ёмон кўрарди,— гап сотишдан уларнинг ягона мақсади — мўмайгина даромадли бўлиб олиш эди.

Этьен энди Дарвин таълимотини ўргана бошлаганди, у олимнинг беш сулик китобчасига йиғилган ва

оммабоп қилиб баён этилган асарларидан парчалар ўқиганди. У ўқиб, яхши тушунмаган бу асарлардан яшаш учун курашнинг революцион ғояларини билиб олишга ҳаракат қилди; бу курашда ориқлар семизларни комига тортиб, қудратли халқ оммаси нимжон буржуазияни эзиб ташларди. Лекин Суварин жаҳли чиқиб, тенгсизлик илмий назариясининг алломаси Дарвин таълимотини, унинг аристократ-файласуфларгагина қўл келадиган машъум танланиш қонунини дастур қилиб олган ақли калта социалистларга ёпишиб кетди. Уртоғи ўз фикрида қаттиқ турди-да, баҳслашиб, қуйидагича гипотезадан шубҳаланишини билдирди: айтайлик, эски жамият энди йўқ, унинг заррасини ҳам қолдирмай ювиб ташлашди дейлик; ахир ўшанда янги жамият куртак ёзиб, шу адолатсизликлар туфайли секин-аста чирий бошламасмикин? Бировлар хаста, бошқалар соғлом бўлади, эпчилроқ, ақлликлар эса ҳамма нарсадан фойда чиқариб, бойиб кетаверади, бошқалар тўмтоқ ва ишёқмаслар эса яна қул бўлиб қолаверишади-да. Шундан кейин машинист абадий қашшоқлик манзарасини кўз олдига келтирди-да, жонжаҳди билан қичқариб, агар инсон адолатли кунга ета олмаса, унда бутун инсоният чириб йўқ бўлиб кетсин, деди. Модомики, у ёки бу ижтимоий тузум ўзини оқламас экан, демак, бундай тузумни тугатиб, биронта ҳам тирик жонни қолдирмаслик керак. Шу гаплардан кейин улар яна жим бўлиб қолишди.

Суварин бошини эгиб, ўт устида узоқ юрди, у ўз хаёлларига шу қадар берилиб кетдики, у худди сомнамбулизмга* йўлиққан кишидек шундоққина қирғоқ лабидан жуда хотиржам юрарди. Кейин у худди арвоҳни кўргандек кўққисдан титраб кетди. У бошини кўтарди, ранги оппоқ эди, шундан кейин у ўртоғига қараб, секингина деди:

— Унинг қандай ўлганини сенга айтганмидим-айтмаганмидим?

— Кимни?

— Хотинимни, у ёқда, Россияда.

Сувариннинг овози титрашдан, бундай эҳтироссиз жоҳилнинг бирдан шу қадар ғайритабiiй ҳолга

* Уйқусираш касали.

тушиб, очиқ-ойдин гапирмоқчи бўлаётганидан тааж-жубланган Этген мужмал ишора қилди. У Суварин маъшуқасини хотиним, деб юришини, унинг Москвада дорга осилганини биларди холос.

— Ишимиз барбод бўлди,— ҳикоясини бошлади Суварин кўкиш кўринаётган қатор дарахтлар орасида кумушдек товланаётган канал сувига бесаранжом кўзларини тикиб...— Биз ер тагида икки ҳафта ўтириб, темир йўл кўтармасини миналаштирдик, лекин подшоҳ тушган поезд эмас, пассажирлар поезда портлабди... Ушанда Аннушкани қамоққа олишди. У ҳар оқшом деҳқон аёл кийимини кийиб, бизга овқат олиб келарди. Мина пилигини ҳам Анна ёққанди, чунки эркакни дарров пайқашлари мумкин эди... Мен одамлар орасига яшириниб, судда бошдан-охиригача қатнашдим; суд роса олти кун давом этди...

Унинг гапи бўлинди, йўтали тутиб, энтика бошлади.

— Икки марта қичқириб, одамлар устидан унга ўзимни отай дедим... Бироқ нима фойдаси бор? Бир одам камаярди, демак, бир курашчи йўқ бўларди холос. Ўзим ҳам унинг «йўқ» деяётганини шаҳло кўзларини менга тикканидаёқ сезгандим.

У яна йўталди.

— Энг сўнгги кунни ҳам майдонда эдим... Шариллаб ёмғир ёққани учун одамлар ўнгайсизланишиб, эс-ҳушларини йўқотиб қўйишгандек эди... Аннушкага навбат келгунча тўрт кишини осиш учун роса йигирма минут овора бўлишди; улар тўртинчи кишини сира осишолмади, арқон узилиб кетаверди... Аннушка шундоқ ёнларида навбат кутиб турарди. У кўролмагани учун кўзларини жавдиратиб, одамлар ичидан мени изларди. Супачага чиққанимдан кейин у мени пайқади, шу лаҳзадан бошлаб бир-биримиздан кўз узмадик. Боёқиш ўлганидан кейин ҳам менга тикилишини қўймади... Мен шляпамни силкитиб қўйдим-да, кетдим.

Яна жимлик чўкди. Каналнинг оппоқ лентаси олисларга чўзилиб кетганди, икковиям секин одимлаб борарди; улар яна ўз ўйларига ғарқ бўлгандек эди. Оқариб кўринаётган сув нақ уфқда осмонни ёриб кирган нур чизигига ўхшарди.

— Бу бизга жазо,— давом этди кескин, шиддатли товуш билан Суварин.— Биз бир-биримизни севмас-

лигимиз керак эди... Ҳа, бир ҳисобда унинг ўлгани ҳам яхши бўлди; унинг қонидан қаҳрамонлар бунёдга келади, менда эса қўрқувдан асар ҳам бўлмайди... Ҳеч кимимиз бўлмайди — на қариндошлар, на хотин, на дўст! Бир кун келиб, бировнинг жонини олиш ёки ўзингни қурбон қилиш керак бўлиб қолса, ҳеч нарсадан сесканмай, дадил ҳаракат қиласан!

Эъён тун салқинлигидан титраб, тўхтади. У баҳшлашиб ўтирмай, шунчаки деди:

— Биз жуда узоқлашиб кетдик; қайта қолайликмикин-а?

У аввалгидек орқага, Ворё томонга секин юрди ва бир неча қадам босгач, қўшиб қўйди:

— Сен янги хитобномани кўрдингми?

У ўша куни эрталаб Ширкат томонидан ёпиштирилган катта сариқ плакатларни назарда тутган эди. Бу хитобномаларда мурасасизлик яққолроқ сезиларди: эртагаёқ ишга тушган ҳамма шахтёрларга ҳисобкитоб дафтарчаси қайтиб берилиши ваъда қилинганди. Ҳаммаси унутилади, ҳатто бошлиқлар ҳам афв этадилар.

— Ҳа, кўрдим, — жавоб берди машинист.

— Хўш, сен нима дейсан бунга?

— Менимча, ҳаммаси тамом... Пода яна шахтага тушаверади-да. Ҳаммаларинг кўрқоқсанлар.

Эъён жўшиб ўртоқларини оқлашга тушди: битта одам жасур бўлиши мумкин, аммо очликдан ўлай деяётган оломонда куч қаёқда. Улар битта-битта қадам босиб, Ворёга етиб келишди, қорайиб турган шахта олдида Эъён ҳамон ўзим конга асло тушмайман, аммо ишга борган ўртоқларимни кечирिशга тайёрман, дея қасам ичарди. Кейин одамларнинг дурадгорлар шахта қопламасини тузатиб улгуришмади, деганларини эшитди-да, пастки қатламлардаги тупроқнинг тахталарни босиб тушиши ниҳоятда кучайиб, ишчиларни кон тубига олиб тушадиган кажава қопламага беш метрдан кўпроқ жойда тегиб ўтаётганлиги ростми-йўқми, шунинг билгиси келди. Яна қовоғини солиб олган Суварин қисқа-қисқа жавоб қайтарарди. У кеча ишлаганида ҳақиқатан ҳам кажава тегиб ўтаётганди, ўша жойдан ўтиш учун машинистлар тезликни оширишлари керак эди. Бироқ бошлиқларнинг ҳаммаси жаҳл билан бит-

тагина гапни такрорлашарди: кўмир қазиб чиқариш керак, кейин тузатишади.

— Ўзинг ўйла ахир, зўрға турипти-ку! — пичирлаб деди Этьен. — Бир фалокат бўлмаса гўрға эди!

Суварин қоронгиликда хира кўринаётган шахтага тикилиб, хотиржамлик билан гапининг охирида деди:

— Тиргаклар бардош беролмаса, буни ўртоқларинг билиб олишади, ахир ўзинг ишга тушинглар, деб маслаҳат беряпсан-ку.

Монсу кўнгироқхонасида соат тўққизга занг урилди. Этьен бориб ухлайман, дегани учун Суварин ҳатто қўлини ҳам узатмай қўшиб қўйди:

— Хўп, хайр! Мен кетаман.

— Нега кетасан?

— Ҳа, кетяпман, ҳисоб-китоб дафтаримни олдим. Бошқа ёққа кетаман.

Этьен ҳайрон бўлиб, ҳаяжонланиб, унга қаради. Икки соат айланиб юрганларидан кейин Суварин бу гапни шунчалик хотиржамлик билан айтдики, Этьен тўсатдан жудо бўлиб қолиш хабаридан юраги қисилиб кетди. Улар иноқлашиб қолишиб, биргаликда озмунча изтироб чекишмаганди; қайта учрашмайдиган бўлиб жудо бўлсанг, ҳамиша оғир бўлади.

— Кетаман дегин... Қаёққа?

— Уша ёққа. Ўзим ҳам билмайман.

— Ҳали кўришсак керак?

— Йўқ, кўришмасмиз!

Улар жимиб, бир-бирига нима дейишини билмай, бир неча дақиқа юзма-юз туриб қолишди.

— Ундоқ бўлса хайр!

— Хайр!

Этьен қишлоққа кўтарилла бошлади, Суварин эса тескари бурилди-да, яна канал бўйлаб кета бошлади. Бир ўзи қолган Суварин бошини қуйи солганича тобора зулмат қўйнига кириб борарди; у тебранувчи тунги сояларнинг бирига ўхшарди. Вақт-вақти билан тўхтаб, узоқда чалинган соат зангини ҳисобларди. Ун икки марта занг урилгач, Суварин канал бўйидан тушиб, Ворёга жўнади.

Бу вақтда шахта бўм-бўш бўлиб, Суварин уйқусираган ёлғиз штейгерни учратди. Иш бошланиши олдидан, соат иккида ўт ёқиларди. У аввал курткамни шкафта қолдириб кетибман, деган баҳона билан юқо-

рига кўтарилди. Курткага асбоблардан қўлпарма, калта бўлсаям жуда бақувват арра, болга ва қайчи ўралганди. Сўнг у яна йўлга тушди. Бироқ у барак орқали юриш ўрнига зинага олиб чиқадиган тор йўлакка бурилди. У куртқасини қўлтиғига қисгинача лампасини ҳам олмай, секин пастга тушаркан, зинапояларни санаб, шахтанинг чуқурлигини ўлчаб борарди. У кажавача уч юз етмиш тўрт метр чуқурликдаги қора тирсақка тегиб ўтаётганини биларди. У эллик тўрт нарвонни санаб, деворни пайпаслай бошлади, чиқиб турган ёғоч парчаларни сзди. Кажавача тегадиган жой шу ер.

Сўнг Суварин ўз касбини яхши билган тадбиркор ишчидек чаққонлик ва уддабуронлик билан ишга киришди. У дарҳол қўшни бинога йўл очиш учун йўлакни тўсиб турган тахтани арралай бошлади. У тез ёниб ўчаётган гугурт ёругида қопламанинг аҳволини, қанчалик тузатишга эришганини билиб оларди.

Кале билан Велансьен оралиғида шахта қазилаётганида мислсиз қийинчиликларга дуч келинганди, айниқса водийнинг энг паст жойи билан баробар бўлган жуда кенг ерга ёйилиб кетган сизот сув чиқавериб роса қийнаган эди. Фақат тахта қопламанинг ўзи — худди бочка тахталарига ўхшатиб жипс қоқилган қоплама сув оқимини тўхтатиб, шахтани катта, қора тўлқинлари тўсиққа урилаётган шу кўллардан ажратиб турарди. Ворё шахтасини кавлаганларида иккита қоплама қилишга тўғри келганди; биринчи қоплама юқорига — худди булутдек сувни тортиб, шишиб, ёрилиб кетган бўр қатламлари атрофини ўраб олган майда қум билан оқ тупроққа қоқилган эди, иккинчиси эса, унинг пастига тўғридан-тўғри суюқлик сингари тўхтовсиз тўкилиб турган ундек майин сариқ қумга, тошкўмир қатлами устига қилинганди. Шимолий шахталарнинг офати «Оқим» ҳам — ер ости денгизи, ер сатҳидан уч юз метр чуқурликда қора тўлқинлари жавлон уриб, қутуриб ётган бўронли ва довулли, асов, беандоза денгиз шу жойда эди. Одатда босим ниҳоятда зўр бўлса ҳам қоплама дош бериб маҳкам турарди. Бу қопламаларга фақат яқин атрофдаги тоғ жинсларининг тўпланиб қолиши хавф соларди; улар эски йўлакларни узоқ вақт эксплуатация қилавериш натижасида қулаб тушиб, уюлиб кетарди. Бу кўчкилар

баъзан ҳатто ёриқлар ҳосил қилиб, секин-аста тиргаклар тагига етиб борарди-да, уларни оз-оздан қўзғатиб, шахта ичига суриб қўярди. Ҳамма хавф шундан эди — жинслар ўпирилиб тушиб, сув босиб кетиши, бутун шахта тупроқ ва сув остида қолиши мумкин эди.

Суварин ўзи тешиб ўтказган тахтага ўтириб олиб, қопламанинг тўртинчи тўсини жиддий шикастланганини аниқлади. Тахталар ромдан чиқиб кетган, баъзилари ҳатто жудаям лиқиллаб қолганди. Шахтёрлар паз деб атайдиган жуда кўп ёриқлар қоплама ёғочлари орасига тикилган қорамойли латталар орқасидан кўриниб турарди. Дурадгорлар ишни тезроқ тугатишга ошиқиб, темир мустаҳкамлагичларни фақат бурчакларга қўйишганди, аммо бу ишни шунчалик эътиборсизлик билан қилишгандики, ҳатто айрим винтларни бурамагандилар ҳам. Орқада, ер ости денгизи билан туташган қумда бир кор-қол бўлаётгани аниқ эди.

Шунда Суварин қўлпарма билан темир маҳкамлагичларни сув шалоплаб урилиши билан чиқиб кетадиган қилиб бўшатиб қўйди. Бу ўтакетган ақлсизлик бўлиб, у иш пайтида бир неча марта тойиб, турган жойидан чоқ тубига, бир юз саксон метр пастга учиб кетай деди. Кажава сирғалиб ўтадиган эман тахтасини ушлаб туришга тўғри келди. Суварин чоҳда осилиб, маълум масофада бирлаштирилган тўсинлардан сирпаниб борарди. У ўлимни ҳам писанд қилмай ўтирар, сирғанар, гоҳ тирсаги, гоҳ тиззасини тираб, энгашар эди. Хиёл ноҳўя ҳаракат қилса, учиб кетиши турган гап эди. У учиб кетмаслик учун уч марта тўсинни ушлаб қолди-ю, лекин заррача ҳам қўрқмади. У аввал қўли билан ёғочни пайпаслаб кўрар, ёпишқоқ ходалар орасида йўналишни йўқотиб қўядиган бўлса, гугурт ёқиб, иш бошларди. Суварин винтларни бўшатиб бўлиб, тахталарга ўтди, янада хавфлироқ бўлиб қолди. У бошқа тўсинлар маҳкамлаб қўйилган жойни изларди, ниҳоят уни топгач, жон-жаҳди билан унга ёпишди-да, қаршилиқни камайтириш учун уни ёришга, арралашга, қиришга тушди. Тешик ва тирқишлардан сув ингичка бўлиб тизилиб отилиб, кўзини очирмай, ҳаммаёғини музлатиб юборганди. Икки гугурт донаси ўчиб қолди, бошқалари нам тортиб кетди; ҳаммаёқ қоп-қоронғи бўлиб қолди.

Энди у бениҳоя тутақиб кетганди. Жала уриб турган мана шу қавакдаги кўринмас, қора даҳшат нафаси уни сармаст этганди; гўё ичига кириб олган иблис васваса қилиб, уни бузишга ундаётгандек эди. У қўлига илинган нарсага ташланарди-да, гўё уни бузиб, бошига ағдариш учун парма ва арра билан урарди. Суварин ўз ишини шунчалик жон-жаҳди билан қилардики, у жирканч махлуқ баданига пичоқ санчиб ўйнаётганга ўхшарди. Унинг нияти битта — жағини катта очиб, қанчадан-қанча одамнинг ёстиғини қуритган Ворёдаги ёвуз махлуқни ўлдириш эди. Суварин қўнғироқхона стропиллари орасида учиб юрувчи тунги қушдек чўзилар, эмаклар, пастга тушар, юқорига чиқар эди; фақат асбобларининг шарақ-шуруғи эшитиларди холос.

Суварин ишни тугатди-ю, аммо ичи чиқмади. Шунча ишни хотиржамлик билан қилса бўлмасмиди? У шошмасдан нарвонга қайтди, тахталари арраланган қопқоқни яна жойига қўйиб, тешикни беркитди. Шунинг ўзи кифоя эди: катта жой бузилса, ҳамманинг эътиборини жалб этади-ю, дарров уни тузатишга киришишади, у буни истамасди. Ёвуз махлуқ қорнидан яраланди, эрталабгача яшай оладими-йўқми, худо биларди! Суварин ўз белгисини қўйди; даҳшатга тушган дунё бу шахта ўз ажали билан ўлмаганини билиб олади. У асбобларини хотиржамлик билан курткасига ўради-да, секин нарвондан кўтарила бошлади. У шахтадан киши билмас чиққандан кейин ҳатто киймини ўзгартириши зарурлигиниям ўйламади. Соат учга занг урди. Суварин ниманидир кутиб, йўл ўртасида тўхтаб қолди.

Худди шу топда Этьен — у ҳали ухламаганди — хонанинг қуюқ қоронғилигида хиёл шитирлаган товушдан ташвишга тушди. У болаларнинг секин нафас олишларини, Улмас бобо билан бева Маэнинг хуррагини ажратди; ёнида ётган Жанлен чўзиб, найдек ҳуштак чаларди. Назарида шундай бўлди шекилли, у яна ётди. Лекин шитир-шитир яна бошланди. Тураётган киши ҳар қанча эҳтиёткорлик қилмасин, бари бир ичига похол солинган тўшак шитир-шитир қилди. Шундагина Этьеннинг миясига Катринанинг тоби йўқ шекилли, деган фикр келди.

— Сенмисан? Нима бўлди сенга? — шивирлаб сўради у.

Ҳеч ким жавоб бермади, ҳамма хуррак отарди. Беш минутча ҳеч ким қимир этмади. Кейин яна шитирлади. Бу сафар Этьен янглишмади; у рўбарўсидаги каравотни топиш учун қоронғида пайпасланиб, хонанинг у бошидан-бу бошига келди. У қизнинг уйғониб, ўрнида тин олмай ўтирганини пайқади-ю, ҳанг-манг бўлиб қолди.

— Хўш, нега жавоб бермаяпсан? Нима қиляпсан? Ниҳоят қиз жавоб берди:

— Туряпман.

— Шу пайтда турасанми?

— Ҳа, ишлагани шахтага бораман.

Ҳаяжонланган Этьен матрацнинг четига ўтирди, Катрина эса унга ўз мулоҳазаларини айта бошлади. Мана шундай ишсиз, доим таънали боқишларга чидаб, бекор юравериш жонига тегиб кетибди; яхшиси ўша ёққа бориб, Шавалнинг тепкиларини егани маъқул. Олиб келган пулини онаси олмайдиган бўлса, нима ҳам қиларди, ўз кунини ўзи кўрадиган бўлиб қолди.

— Бор энди, мен кийинаман. Менга яхшилиқ қиламан десанг, ҳеч кимга айтма.

Бироқ у кетмади, белидан қучиб, шу билан ўз қайғуси ва раҳм-шафқатини изҳор қилди. Улар ичкўйлақда бир-бирининг пинжига кириб, ҳали тунги уйқу тафти кетмаган тўшак четида ўтиришаркан, яланғоч баданларнинг ҳароратини ҳис қилдилар. Ниҳоят қиз биринчи бўлиб, ўзини бўшатишга ҳаракат қилди ва Этьенни бўйнидан қучоқлаб олди-да, уни қўйиб юбормай, жон-жаҳди билан бағрига босиб, оҳиста йиғлай бошлади. Улар ўзларининг бахтсиз, қониқмаган севгиларини ўйлаб, бошқа ҳеч нимани истамай шу алпозда ўтиришарди. Наҳотки ҳамма нарса умрбод тугаган бўлса? Наҳотки бошлари очиқ бўлишига қарамай, улар ҳеч қачон бир-бирларини сева олишмаса? Уларга ҳали ўзлари ҳам тушуниб етмаган ҳар хил фикрлар туфайли қовушишга ҳалақит бериб келаётган шарм-ҳаёни йиғиштириб қўйиш учун жондаккина бахт кифоя эди.

— Бор, жойингга бориб ёт, — шивирлади Катри-

на.— Мен чироқ ёқмоқчи эмасман, бўлмаса ойимни уйғотиб юборамиз... Вақт бўлди, мени қўйвор.

Этъен қулоқ солмай, эсини йўқотиб қўйган кишидек қизни қучоқлаб ўтираверди. Юраги гам-гуссага тўлганди. Тинчгина яшаш, енгиб бўлмайдиган бахт истаги бутун вужудини қамраб олганди. У ўзини уйланган, кичкина, озода уйда яшаётгандек тасаввур этди; унинг ягона орзуси ўша уйда Катрина билан бирга яшаш, бирга ўлиш эди. Улар ёлғиз нонга қаноат қилиб яшашади, борди-ю, ўша нон ҳам фақат бир кишига етарли бўлса, унда ўз тегишини унга беради. Бундан ортиқ нима ҳам керак уларга? Бундан ҳам катта бахт борми?

Шундай бўлса ҳам Катрина яланғоч қўлларини бўшатиб олишга уринарди.

— Сендан илтимос, мени қўйиб юбор!

Шунда қалб амрига қулоқ солган Этъен унинг қулогига деди:

— Тўхтаб тур, мен ҳам сен билан бораман!

Этъен айтган гапига ўзи ҳайрон қолди. У шахтага тушмасликка қасам ичганди-ку. Тўсатдан оғзидан чиқиб кетган бу гап миясига қаёқдан келиб қолди? Ахир бу гапни сира ҳам ўйламаганди-ку. Энди у ўзини тамомила хотиржам, барча шубҳалардан бутунлай қутулгандай ҳис этиб, ниҳоят уқубатли аҳволдан қутулиш йўлини топиб, тасодифан омон қолган кишидек ўжарлиги тутиб кетди. Шунинг учун ҳам Катрина бу ишни фақат мен учун қияпти, деб ўйлаб, борди-ю, Этъен шахтага борса, оқибати яхши бўлмаслигидан қўрқиб, хавотирланиб гапираётганида, унинг гапига қулоқ солмади. Бўлганча бўлар энди: хитобномаларда ахир ҳаммани афв этамиз дейилган-ку — шунинг ўзи кифоя-да.

— Мен ишлашни хоҳлайман, шунга қарор қилдим... Кел, кийинайлик, фақат товуш чиқарма.

Улар апил-тапил, ниҳоятда эҳтиёткорлик билан кийинишди. Катрина кечаёқ коржомаларини тайёрлаб қўйганди. Этъен ҳам шкафдан курткаси билан шимини олди. Тоғорани тарақлатиб юбормаслик учун ювиниб ўтиришмади. Ҳамма уйқуда, лекин она ётган торгина жойдан ўтишлари керак эди. Улар юриниганда ишлари ўнгидан келмади — стулга қоқилиб кетишди. Она уйғониб кетиб, уйқу аралаш сўради:

— Э, ким у?

Катрина титраб, Этьеннинг қўлини маҳкам қисиб тўхтади.

— Бу мен, хавотирланманг, — жавоб берди Этьен. — Димиқиб кетяпман, очик ҳавога чиқиб келай.

— Майли.

Бева Маэ яна уйқуга кетди. Қўрқиб кетган Катрина қимир этмасди. Ниҳоят у пастдаги хонага тушди-да, Монсудаги бир хонимдан олиб, асраб қўйган бир бурда нонни иккига бўлди. Сўнг улар эшикни оҳиста ёпиб, чиқиб кетишди.

Суварин ҳамон йўл муюлишидаги «Авантаж» олдида турарди. У ярим соатдан бери кўмир қазувчиларнинг ишга кетаётганликларини кузатарди. Қоронғида уларнинг юзларини кўра олмаса ҳам, худди пода келаётгандек, бўғиқ тап-туп қилиб кетаётганларини эшитарди. Кушхона олдида туриб ҳўкизларни санаган қассобдек Суварин ҳам ишчиларни ҳисобларди. Уларнинг сони Суваринни ҳайратга солди; у кайфияти тушкунлигига қарамасдан, қўрқоқлар шунчалик кўп эканлигини ўйламаганди. Одамлар турнақатор бўлиб келишарди, Суварин эса қоққан қозикдек ғоз туриб, тишларини қисиб, уларга тиниқ кўзларини тикарди.

Бироқ қўққисдан у титраб кетди. Юзларини яхши ажратолмай турган кишилар орасида биттасини юришидан таниб қолди. У олдинга юриди-да, уни тўхтатди:

— Қаёққа кетяпсан?

Этьен ўзини йўқотиб қўйиб, жавоб бериш ўрнига ғўлдиради:

— Ие, ҳалиям шу ерда экансан-да!

Бироқ шунга қарамай Этьен шахтага кетаётганига иқроп бўлди. Албатта, Этьен шахтага қайтмайман, деб қасам ичган, лекин шу аҳволда, юз йилдаям келмайдиган яхши кунларни кутиб, қўл қовуштириб ўтиравериш мумкин эмас-ку. Бундан ташқари бошқа сабаблари ҳам бор-да.

Суварин унинг гапларини тингларкан, дағ-дағ титрарди. У Этьенни елкасидан олди-да, посёлка томон итариб:

— Уйингга қайт, мен шуни хоҳлайман, эшитдингми?!— деди.

Лекин шу пайт Катрина келиб қолди; Суварин уни

ҳам таниди. Эъён менинг ишимга бировнинг аралашишига йўл қўймайман, дея унга эътироз билдирди. Машинист кўзларини ўйнатиб дам қизга, дам ўртоғига қаради, кейин қўлини силтаб тисарилди. Эркак киши аёлга кўнгил бердими, бўлди, уни тамом бўлди деявер, у жон фидо қилишга ҳам тайёр бўлади. Шу чоғ унинг кўзи олдидан Москвада осиб ўлдирилган маъшуқасининг сиймоси ўтмадимикин! Бу нарса унинг маъшуқаси билан кечган сўнгги лаззатли онлар хотирасини ҳам суриб чиқариб, ўзиникидек бўлиб қолган бировнинг ҳаёти учун жавобгарликдан озод қилди. Шу боисдан Суварин қисқа қилиб:

— Кетавер, — деди.

Эъён ўзини ноқулай ҳис этиб, хайрлашув чоғида бирор илиқ сўз айтишга ҳаракат қилди.

— Демак, кетасанми?

— Ҳа.

— Ундай бўлса, қўлингни бер, қария! Яхши бор, хафа бўлма!

Суварин совуқ қўлини узатди. Дўст ҳам, хотин ҳам керак эмас.

— Хайр, энди умрбод хайр.

— Хўп, хайр.

Суварин қоронғиликда қимир этмай, Ворёга тушиб кетаётган Эъён билан Катринани кузатиб қолди.

III

Соат тўртда конга тушиш бошланди. Дансарт энди лампахонада табелчи столида ўтириб, ишга келган ҳар бир шахтёрни дафтарга ёзиб, биттадан лампочка берарди. У ишга келганларнинг ҳаммасини қабул қилар, хитобномада ваъда қилинганича ҳеч кимга дашном бермасди. Шунга қарамай деразачадан Эъён билан Катринага кўзи тушган заҳоти титраб кетди ва рўйхатга олмайман демоқчи бўлиб оғзини очди-ю, лекин заҳархандалик билан чекланиб қўя қолди: э-ҳа, энг зўрлари ҳам бош эгиб келибди-да, а? Демак, Монсунинг энг зўр курашчиси нон сўраб ишга қайтган бўлса, Ширкатимиз бақувват экан-да? Эъён чурқ этмай лампочкани олди-да, Катрина билан бирга шахтага кетди.

Катрина қабулхонада ўртоқлари ёмон кутиб олишдан қўрққан эди. Аксига олиб у кираверишда кажава бўшагини кутаётган бошқа шахтёрлар орасида турган Шавални кўриб қолди. Одамлар йигирма чоқли эди. Шаваль хўмрайиб, унга томон юрди, лекин Этьенни кўриб тўхтади. Кейин у елкаларини қисиб, писанда билан кулиб қўйди. Майли! Ҳали совимаган ўрнини биров эгаллаган бўлса, унга нима! Садқани сар, жуда соз! Бировларнинг сарқитидан ор қилмасангиз, бу сизнинг ишингиз, жаноб. Бироқ Шавалнинг заҳархандаси замирида рашк яширинганидан кўзлари чақнаб турарди. Бунинг устига ўртоқларидан ҳеч ким қимир этмади. Улар индамай ерга қараб, янги келганларга кўз қирларини ташлардилар, сўнг қўлларидаги лампочкаларни қисиб, катта бино ичида жавлон ураётган елвизакдан қалтираб, шахта чоҳига лоқайд қарашарди; эгниларида юпқа полотно курткаларидан совуқ ўтиб кетаётганди.

Нихоят кажава темир тормозларда тўхтади. Шундан кейин ишчиларга, кажавага чиқишларинг мумкин деб бақаришди. Катрина билан Этьен Пьеррон ва икки кончи чиқиб олган вагонеткага тушишди. Қўшни вагонеткадаги Шаваль шанғиллаб, Мук бобога Правление шахтани аблаҳлардан тозалаш учун қулай фурсатдан фойдаланади, деб гапирар эди. Бироқ кекса отбоқар ит кунини кўришга кўникиб қолганидан икки боласи ўлдирилганига ортиқ куймас эди. у фақат тақдирига тан бериб, қўл силтаб қўя қоларди.

Кажава кўзгалиб, қоронгиликка кириб кетди. Ҳеч ким чурқ этмасди. Қўққисдан, масофанинг учдан икки қисми ўтилгач, даҳшатли ғижирлаган овоз эшитилди. Темир ғажур-ғужур қилиб, қаттиқ силкинишдан одамлар бир-бирларига урилди.

— Жин урсин, — гўлдираб деди Этьен, — нима бало, бизни гўшт қилишмоқчимиз улар? Мана шу касофат қопламани деб ҳаммамизни зиндон тубида чиритишмоқчи шекилли. Яна уни тузатиб қўйганмиз дейишади!

Кажава ҳар қалай тўсиқдан эсон-омон ўтиб олди. Кажава энди шариллаб турган сувга тушиб борарди; жала шу қадар кучли эдики, ишчилар сув шовқинига хавотирланиб қулоқ сола бошладилар. Демак, қопламанинг кўпгина жойи тешилган экан-да.

Нима гап, дея Пьеррондан сўрашди. Лекин бир неча кундан бери ишлаётган Пьеррон мени яна Ширкатга ёпишяпти, деб ўйлашмасин, дея чўчиб, ташвишини очик айтмай, шунчаки жавоб берди:

— Йўқ, ҳеч қанақа хавф йўқ. Ҳамиша шунақа ўзи. Албатта, ҳамма тешикларини бекитишга улгуришганича йўқ ҳали.

Сув шундоққина тепаларида билқилларди, ниҳоят улар шалаббо бўлиб, чоҳ тубига етишди. Штейгерларнинг биттаси ҳам нарвондан чиқиб, нима гаплигини билишни хаёлига ҳам келтирмади. Насос билан бир амаллашар, эртага кечаси мустаҳкамловчилар ҳамма қисқичларни қараб чиқишар, дейишди. Йўлаклардаги қайта тиклашга оид ишлар ҳеч қандай фойда бермади. Инженер кончиларни янги йўлларга жўнатишдан олдин уларни беш кунгача мустаҳкамлашга доир зарур ишларга қўйишга қарор қилганди. Ҳамма жой босиб тушаётгандек эди; штольнялар шу қадар ишдан чиққандики, бир неча юз метр жойдаги тиргакларни тузатиш зарур эди. Шунинг учун ҳам пастда ўн кишилик командалар тузилди, уларнинг ҳар бирига биттадан штейгерни бошлиқ қилиб тайинлашиб, командаларни энг хавfli жойларга юборишди. Пастга тушиш тугагандан кейин ҳисоблаб кўришса, ҳаммаси бўлиб уч юз йигирма икки шахтёр, яъни шахта тўла эксплуатация қилинаётган пайтда ишлайдиган кишиларнинг тахминан ярми ишга келибди.

Шаваль энг охирида Катрина билан Этьен тушган командага кирди. Бу тасодиф эмасди; у ўртоқлари орасига яшириниб турди-да, кейин штейгерга атайлаб қорасини кўрсатди. Бу командани тахминан уч километр наридаги шимолий йўлакнинг охирини тозалашга юборишди; у ерда, юз берган ўпирилиш штольняларнинг биридаги ўн саккиз футли тармоқ йўлини тўсиб қўйганди. Қулаб тушган тоғ жинсларини чўкичлар билан майдалаб, белкураклар билан сидириб олишарди. Этьен ва Шаваль бошқа беш шахтёр билан йўл очишар, Катрина билан икки ёрдамчи ишчи эса тош, кесакларни қия штрекка қараб курашарди. Штейгер доимо ёнларида бўлганидан ишчилар деярли гаплашишмасди. Шунга қарамасдан Катринага ўралишиб юрган иккала йигит исталган лаҳзада бир-бирининг ба-

шарасига тушириб қолиши мумкин эди. Эски жазман менга бунақа фоҳиша керак эмас, дея Катринага тинчлик бермай, хўмрайиб турар эди. шу боисдан Этьен ниҳоят, жим бўлмасанг, жиғингни эзиб қўяман, деб Шавалга дўқ уришга мажбур бўлди. Улар бир-бирига қараганида ғазабдан кўзлари чақнарди; уларни ажратиб қўйишга тўғри келарди.

Соат саккизларга яқин Дансарт ишдан хабар олиш учун шахтани айлана бошлади. Афтидан, кайфияти жудаям ёмон бўлса керак, штейгерга захрини сочди: ҳеч нима қовушмаяпти, ёғоч қисмларнинг ҳаммасини тузатиш керак, бунақа иш ҳеч нимага ярамайди! У инженер билан бирга қайтиб келаман, деганча кетди. Дансарт Негрелни эрталабдан бери кутар, инженер нима учун келмаётганлигига тушунмас эди.

Яна бир соат ўтди. Штейгер тозалашни тўхтатиб, равоқни тузатишга буюрди. Ҳатто юккаш аёллар билан ёрдамчи ишчилар ҳам тахта тайёрлаб бериб туришлари керак эди. Команда бу ерда, йўлак тагида шахтанинг энг чеккасидаги, бошқа йўллар билан ҳеч қандай алоқага эга бўлмаган илғор бир отрядга ўхшаб қолганди. Узоқдан икки ёки уч марта шитоб билан ташланиб келаётган қадамни эслатувчи ғалати шовқин эшитилди; бу шовқин ишчиларни ҳушёр тортишга мажбур этди; нима гап экан ўзи? Гўё штольня бўшаб қолгану ўртоқлар тепага чиқиб олиш учун чопиб кетишяпти. деб ўйлаш мумкин эди. Бироқ шовқин жимжитликда тиниб қолди, шу боисдан ишчилар яна қулоқларини қоматга келтириб, болга билан дўқ-дўқ уриб, тахта қоқишга киришиб кетишди. Ниҳоят яна йўлни тозалашга тушишди; юккаш аёллар вагонеткаларни яна гилдиратиб кетишди.

Бу сафар Катрина капалаги учиб қайтиб келди, қия штрекда жон зоти йўқлигини хабар қилди.

— Мен чақирсам, ҳеч ким жавоб бермади. Ҳамма қочиб кетипти.

Бу хабар уларни шундай типирчилатиб қўйдики, ўн кишининг ҳаммаси асбобларини ташлаб қочишга тушди. Улар қўтарма машинадан жуда олисда, шахта тубида ташлаб қўйилганликларини ўйлаб, жинни бўлаёздилар. Улар: эркаклар, ўсмирлар, Катрина ва доим бақириб-чақириб юрган, энди эса узундан-узоқ

йўлаклар жимжитлигидан ўлгудек қўрқиб, эси чиқиб кетган штейгер қўлларида лампочкалари билан турнақатор бўлиб чопишарди. Нима бўлди ўзи, нега ҳеч ким кўринмайди? Ҳамма ўртоқларни қочиб кетишга мажбур қилган нарса нима экан? Улар гарчи хавф таҳдид қилаётганини сезиб туришса-да, аниқ билмаганликлари учун баттар ваҳимага тушишарди.

Ниҳоят улар кўтарма машинага яқинлашганларида оёқлари остида сув шариллаб оқа бошлади. Энди улар чопишолмай, оёқларини зўрға-зўрға босишарди; бой берилган ҳар бир минут ўлим билан баробар, деган фикр ҳаммани эзарди.

— Э, жин ургур! Қоплама қулаб тушибди-ку! — кичқирди Этьен. — Шу ерда ҳалок бўламиз, дегандим-а, сизларга.

Чоҳга тушаётган вақтидан бери ташвишлана бошлаган Пьеррон сув тобора кўпайиб бораётганини кўрди. Бошқа икки шахтёр билан вагонеткаларга кўмир ортаётган Пьеррон бошини кўтарди: юзига катта-катта томчилар тушди, қулоғи қаттиқ шанғилларди; бироқ у оёқлари остидаги чуқурлиги ўн метр келадиган ўра секин-аста сувга тўлиб бораётганини кўрганида титроғи янада кучайди. Сув чўян зиналарни кўмиб, пол тахталари орасидан чиқа бошлади. Бу нарса шундай оқим пайтида насос керагидан камроқ сувни тортаётганидан далолат берарди. Пьеррон машинанинг ҳақсирётганини, ҳорғинликдан инқилаётганини эшитгандек бўлди. Шундан кейин у Дансартни огоҳлантирди, Дансарт эса, жаҳл билан сўкиниб, инженерни кутиш керак, деди. Пьеррон гапиришга икки марта оғиз жуфтлади-ю, лекин шу Дансартдан маънили бир гап чиқармиди, деган андиша билан елкасини учуриб қўйди холос. Хўп, нима бўпти! Сув кўтарилаётган бўлса, у нима қилсин ахир?

Мук бобо пайдо бўлиб қолди, у Уктамни ишга етаклаб кетаётганди; у иккала қўли билан отнинг юганидан маҳкам ушлаб олганди, чунки қари уйқучи от бирдан икки олдинги оёғини осмонга кўтарди-да, бошини чоҳдан чиқиш томонга буриб, жонҳолатда кишнаб юборди.

— Сенга нима бўлди, доно жонивор? Нимадан бунча ташвишланасан?.. Э, сув оқаётганига дегин! Юр, юр, жонивор, буни сенга алоқаси йўқ.

Бироқ от титраб, безовталанаверди, чол уни зўр-лаб чиғир ёнига олиб боришга мажбур бўлди.

Мук бобо билан от йўлак ичида кўздан ғойиб бўлган ҳамон ҳавода тарс этиб кетган товуш янграб, ўпирилишнинг чўзиқ шовқини эшитилди. Қопламанинг бир қисми қулаб тушганди; у бир юз саксон метр баландликдан ағанаб тушаётиб, ёнлама деворга илиниб қолганди. Пьеррон билан бошқа юкловчилар қочиб қолишди, эман тахта бўш вагонеткага гурсиллаб тушди. Шу ондаёқ бузилган тўғондан ошиб ўтаётгандек сув шариллаб оқа бошлади. Дансарт кўтарилиб, қарамоқчи эди, лекин гапини тугатмаёқ иккинчи тахта ағанаб тушди. Ҳалоқат муқаррарлигини кўрган Дансарт кўтарилишга буйруқ берди, кўмир қазувчиларни огоҳлантириш учун штейгерларни ўнгирларга жўнатди.

Шундан кейин мисли кўрилмаган тўс-тўполон бошланди. Ҳамма йўлаклардан ишчилар турнақатор бўлиб югуриб келишарди, ҳамма имилламасдан кажавага чиқиб олиш учун бир-бирини босиб-янчиб, ўлар-тириларига қарамай чопарди. Баъзиларнинг хаёлига ўзларини нарвонга уриш фикри келди, бироқ йўлак кўмилиб қолибди, дея бақириб қайтиб келишди. Кажава ҳар сафар юқорига кўтарилганда ҳамма юрагини ҳовучлаб турарди. Бу-ку ўтди-я, лекин кейингиси ўта олармикин, йўлни бекитиб турган тўсиқлар орасида қолиб кетмасмикин? Тепада бўлса, вайронгарчилик давом этар, бўғиқ гумбур-гумбур, ёғочларнинг қарсқурси, жаланинг тобора кучайиб бораётган шовқини эшитилиб турарди. Кўп ўтмай кажаваларнинг бири ишдан чиқди, чунки кўтарманинг ён ёғочлари синган бўлса керак, кажава сиргала олмай қолди. Иккинчиси шундай ишқаланиб кўтарилардики, пўлат арқонларнинг узилиб кетиши ҳеч гап эмасди. Пастда эса яна юзга яқин одам қолган бўлиб, ҳаммаси огир нафас олар, сув ичида қолиб, қонли қўллари билан кажавага ёпишишар эди. Икки киши ағдарилиб тушган тахта остида қолиб ҳалок бўлди. Кажавага ёпишган учинчиси эса эллик метрча баландликдан йиқилиб, чоҳ ичида ғойиб бўлди.

Дансарт бир амаллаб тартиб ўрнатишга уринарди. У чўкични қўлига олиб, кимки гапимга кирмаса, шу

билан бошига тушираман, дея дўқ урарди. У ҳаммани бир қатор қилмоқчи бўлди-да, юкчилар ҳамма ўртоқларни кажавага чиқаргандан кейин ўзлари кетишади, деб бақирди. Унга ҳеч ким қулоқ солмади, шунинг учун у биринчи бўлиб қочиб қолишга уринган, қўрқиб, ранги қув учиб кетган Пьерронни итариб юборди. Ҳар сафар кажава жўнатилганда Дансарт Пьерронга яхшигина мушт тушириб турди. Лекин катта штейгернинг тиши такирларди; бир минут ортиқча ҳаялласа — ўзи ҳам ҳалок бўлиши аниқ: тепадаги бор нарса ўпирилиб, тахталар ёппасига ажал ёмгиридек тўп-тўп тушаётганди. Ҳали бир неча ишчи кўтарма машина томон югуриб келаётган бўлса ҳам, Дансарт қўрқувдан эси оғиб, вагонеткага сакради, орқасидан Пьеррон чиққанида унга ҳам индамади. Кажава кўтарилди.

Шу лаҳза кўтарма машина томон Этьен билан Шавалнинг командаси чошиб етиб келди. Улар кажаванинг ғойиб бўлаётганини кўришди-да, олдинга ташланишди, бироқ орқага қайтишга тўғри келди, чунки қоплама тамоман қулаб тушди: шахта босиб тушганди, кажава энди қайтиб келолмасди. Катрина дод солиб йиғлади, Шаваль газабдан бўғилди. Улар йигирма чоқли эди. Наҳотки бу ҳайвонлар уларни шу ерда қолдириб кетаверсалар? Уктамни секин етаклаб келган Мук бобо отни юганидан ушлаб турарди. Иккови — чол ҳам, от ҳам — тиззадан юқорига чиқиб қолган сувнинг ниҳоятда тез кўтарилаётганидан ҳайрон эди. Этьен миқ этмай, тишини қисиб, Катринанинг қўлидан тутди. Йигирма чоқли кўмир қазувчининг ҳаммаси бошларини кўтариб, додлашарди, сув қуйилаётган, ҳеч қандай ёрдам кутиш мумкин бўлмаган шахта чоҳига, бекилиб қолган тешикка зўр бериб тикилишарди.

Дансарт тепага чиқиши билан югуриб келаётган Негрелни кўриб қолди. Аксига олиб Энбо хоним уни эрталаб ушлаб қолганди; тўй сарполари олмоқчи бўлган хоним сарпо баҳолари рўйхатини қараб чиқишга уни мажбур этганди. Соат ўн бўлиб қолувди.

— Хўш? Нима бўлди? — бақирди у узоқдан.

— Шахта тамом бўлди, — жавоб берди бош штейгер.

У тутилиб-тутилиб, ҳалокат ҳақида сўзлай кетди;

инженер унинг гапларига ишонмай елкасини учирди: э, қўйсангиз-чи, қоплама бир лаҳзада вайрон бўлиб кетарканми? У муболаға қиляпти; ўзим бориб кўришим керак.

— Пастда, албатта, ҳеч ким қолмаган бўлса керак, а?

Дансарт хижолат бўлди. Йўқ, ҳеч ким! Ҳар қалай ҳеч ким қолмаган бўлса керак; баъзилар кечикиб қолишган бўлишса ҳам эҳтимол.

— Хўп, ундай бўлса, ўзингиз нега кўтарилдингиз, жин ургур! — бақириб берди Негрель. — Одамларни ташлаб келиш мумкинми, ахир?

У ҳозироқ лампочкаларни санаб чиқишни буюрди. Эрталаб уч юз йигирма иккита лампочка тарқатилганди, ҳозир эса нақди — икки юз эллик бешта. Тўғри, баъзи ишчилар тўс-тўполон ва ваҳима пайтида лампочкаларимиз қўлимиздан тушиб кетди, дейишди. Йўқ-лама қилиб ҳам кўришди, бари бир одамларнинг сонини аниқлаш мумкин бўлмади; шахтёрларнинг баъзилари қочиб қолишган, айримлари эшитишмаганди. Ҳар ким йўқ ўртоқлар сони ҳақида ўз тахминини айтди. Йигирматами, балки — қирқтами одам етишмасди. Инженер фақат битта нарсага амин; шахтада, шубҳасиз, одамлар қолган; сувнинг шариллаши ва тахталарнинг тақ-туқиға қарамай у одамлар фарёдини эшитди, — бунинг учун шахта чоҳи оғзига қулоқ солиш кифоя эди.

Негрелнинг биринчи қилган иши — жаноб Энбога одам юбориш ва шахтани ёпиш бўлди, лекин кечикканди; кўмир қазувчилар гўё ўпирилиш гулдуриси таъқиб этганда Икки юз зағизгон посёлкасига югуриб бориб, у ердаги барча хонадонларни тўс-тўполонга солдилар. Хотин-халаж, қари-ю ёш осмонни доду фарёдга тўлдириб, турнақатор бўлиб югуриб келди. Уларни тўхтатиш, шахтани назоратчилар билан қуриш олиш керак эди, акс ҳолда оломон зарур чоралар кўришга тўсқинлик қиларди. Шахтадан чиққан ишчиларнинг кўпчилиги ҳатто кийимларини ўзгартиришни ҳам ўйламай шу ерда қаққайиб туришарди. Энди, улар ўзлари ҳам сал бўлмаса қолиб кетай деган даҳшатли чоҳни кўришгач, юраклари орқасига тортиб кетди. Уларнинг атрофида уймалашаётган хотинлар

ялиниб-ёлворишар, қолганларнинг исмларини билмоқчи бўлиб сўраб-суриштиришар эди. У-чи? Анавичи? Бу-чи? Ҳеч ким ҳеч нимани билмасди, ҳамма бир нималар деб гўлдирадди, кўмир қазувчилар титраб-қақшар, бемаъни хатти-ҳаракатлари билан хира, даҳшатли арвоҳни ҳайдагандек бўлардилар. Бирпасда ҳаммаёқни одам босиб, йўлларни доду фарёд тутиб кетди. Тепада, уюм устида, Улмас бобонинг қоровулхонасида бир киши ерда ўтирадди. Бу Суварин эди; у кетмаганди, бўлаётган воқеаларни томоша қилиб ўтирадди.

— Отларини айтинглар! Отларини!— дея бақирисарди хотинлар кўз ёшларидан бўғилиб.

Негрель бирров кўриниб, қичқирди:

— Исмларини билишимиз биланоқ эълон қиламиз. Ҳали ҳеч нима бўлгани йўқ, ҳаммаси қутқазилади... Мана, ўзим тушаман.

Одамлар ҳаяжондан қотиб, жим бўлиб қолди. Ҳақиқатан ҳам, инженер дадиллик, хотиржамлик билан пастга тушишга тайёрланди. У кажавани ажратиб олишни, унинг ўрнига пўлат арқоннинг учига кўтарма бадъени бойлашни буюрди; сув лампочкани ҳўл қилиб юборишидан қўрқиб, бадъенинг тагига иккинчи лампочка илдирди.

Қўрқувдан ранглари ўчиб, дағ-дағ титраётган штейгерлар тайёргарлик ишларига кўмаклашардилар.

— Сиз мен билан бирга тушасиз, Дансарт,— деди шартта Негрель.

Сўнг у ҳаммаси қўрқаётганини, катта штейгернинг қўрқувдан маст кишидек қалт-қалт титраётганини кўриб, нафрат билан уни йтариб юборди.

— Йўқ, сиз менга халақит берасиз... Яхшиси бир ўзим тушганим маъқул!

У арқон учига бойланиб, тебраниб турган тўргина бадъега чиқиб олди ва бир қўлига лампочка олиб, иккинчи қўли билан сигнал чизимчасини қисиб, машинистга қичқирди:

— Секинроқ тушир!

Машина ҳаракатга келди, ғалтаклар айланди, шундан кейин Негрель ҳамон бахтсизлар фарёди келиб турган чоҳ ичига тушиб ғойиб бўлди.

Шахтанинг юқори қисмида ҳеч нима шикастлан-

маганди. Негрель бу ернинг қопламаси яхши турган-лигига ишонч ҳосил қилди. У кажавада тебрана-тебрана тирсақларни ёритиб кўрди; бу ердаги маҳкамлагичлар орасидан сизиб чиқаётган сув шунчалик кам эдики, унинг лампочкаси бемалол ёниб турарди. Бироқ у уч юз метр пастга тушиб, қуйн қопламага етганида, тахмин қилганидек лампочкаси ўчиб қолди. Энди у олдига осилиб, қоп-қоронғи шахтага тушиб бораётган лампочкадангина фойдаланиши мумкин эди. У дов-юраклигига қарамай, даҳшатли халскагга рўбарў келгач, титраб, ранглари оқариб кетди. Бор-йўғи бир неча тахта жойида қолган, бошқалари эса ромлари билан ағанаб тушганди; катта-катта тешиклар пайдо бўлиб, улардан майда сариқ кум шувиллаб тўкиларди. Ер ости денгизининг суви эса бениҳоя ҳайқириб, тўлқинланиб, очиқ шлюз ёндорига интилгандек келиб уриларди. У тобора улканлашиб бораётган бўшлиқда йўқ бўлиб, гирдобсимон оқимлар ичида айланиб, яна ҳам пастроққа тушиб борарди. Остида ликиллаб бораётган қизил лампочка йўлни шунчалик ёмон ёритардики, Негрелнинг назарида пастда, лип-лип этиб ўтаётган соялар ичида кўрганлари кўча-ю, чорраҳалари билан бузилиб кетган шаҳарга ўхшарди. Бу ерда инсон зоти бирор иш қилиши мумкин эмасди. Унинг бирдан-бир умиди ҳалок бўлаётганларни қутқариш эди. У пастга тушган сари одамларнинг доду фарёди баландроқ эшитилаверди, бироқ шу пайт ўтиб бўлмайдиган тўсиқларга дуч келиб, тўхтаб қолди: парча-парча бўлиб кетган йўлак тўсиқлари, тахта, тўсинлар дабдала бўлган насос қолдиқларига қўшилиб, йўлни тўсиб қўйганди. У пастга қаради-ю, юраги қисилиб кетди; қўққисдан доду фарёд тўхтади,— афтидан бечоралар агар сув остида қолиб кетмаган бўлсалар, йўлакда тез кўтарилаётган сувдан жон сақлаган бўлсалар керак.

Негрель мени тортиб олинглар, деб сигнал арқонини тортишга мажбур бўлди. Кейин у тортиб олишни тўхтатиб туринглар, деб буюрди. Негрель сабабини била олмаган бу ҳалокат оқибатида пайдо бўлган ваҳимадан қутула олмасди. У ҳодисанинг сабабини аниқлаш мақсадида қопламанинг ҳамон маҳкам турган қисмларини кўздан кечира бошлади. Ёғочларнинг

бир-биридан маълум масофада арралангани, эговлангани уни ҳайратга солди. Ивиб кетган лампочка деярли ёритмасди, аммо Негрель тахталарни пайпаслаб кўриб, бу даҳшатли вайронгарчиликка қўлпарма билан арра ёрдам берганига аниқ ишонч ҳосил қилди. Кимдир шундай бўлишини хоҳлаб қолибди-да. Лол бўлиб қолган инженер жойидан қўзғалмади, лекин шу он яна тахталар қирсиллаб, ромлар пастга қулаб тушди, Негрелни ҳам илаштириб кетишига оз қолди. Негрелнинг ботирлигидан асар ҳам қолмади; бу қабоҳатни қилган одамни ўйлаши билан тепа сочи тикка бўлиб кетди. У бу ёвузликни кўрди-ю, шундай ақл бовар қилмайдиган ишнинг гуноҳкори гўё ҳозир ҳам қоронгиликда яшириниб, шу ерда юрибди, деб ўйлади-да, юраги орқасига тортиб, аъзойи бадани музлаб кетди. У қичқириб, жонҳолатда сигнал арқонини тортди; дарҳақиқат шошилиш керак эди, чунки юқорида, юз метрча баландда боши тепасида қоплама ёрилаётганини кўриб қолди: маҳкамлагичлар айланиб, ёриқлардан сув оқа бошлади. Энди бу ёғи бир неча соатда ҳал бўлади, — тиргаксиз қолган бутун шахта албатта босиб тушади.

Тепада Энбо сабрсизлик билан Негрелни кутарди.

— Хўш, нима гап? — сўради у.

Бироқ инженер гапира олмади, гандираклаб кетди.

— Бу бўлиши мумкин эмас, бунақа иш ҳеч қачон бўлмагани... Узинг кўрдингми?

Негрель шубҳаланиб, атрофга алангларкан, ҳа, дегандай бошини ирғади. У сўзларига қулоқ солиб турган штейгерлар олдида гапиришни истамай, жаноб Энбони ўн қадамча нарига олиб борди. Бироқ бу ҳам унга камлик қилди шекилли, уни янада узоқроққа бошлаб борди-да, ниҳоят унинг қулоғига суиқасд қилинганини, тахталарнинг тешилгани, арраланганини, оқибатда шахта бўғизланиб, хириллаб ётганини гапириб берди. Директор ҳам ранги қув ўчиб, бундай жиноят ҳақида индамаслик лозимлигини сезиб овозини пасайтирди. Лекин Монсунинг ўн минг ишчиси олдида кўрқоқлигини ошкор қилмаслиги ҳам керак эди: унисини унда кўришади; шунинг учун ҳам иккови чоҳ ичида осилиб, ўз ҳаётини хавф остида қолдирган, шундай даҳшатли ишни қилишга юраги бетлаган аза-

мат топилганидан ҳайратланиб, шивирлашишга тушди. Улар кимдир шахтани бузишга шунчалик қизиқиб қолганига сира тушуна олмасдилар; улар қилинган иш шундоқ кўриниб турган бўлса-да, ер юзидан ўттиз метр баландликдаги деразадан чиқиб, ғойиб бўлган жиноятчиларнинг жасоратига ишонишмагандек, бу ишга ҳам сира ишонгилари келмасди.

Жаноб Энбо штейгерлар ёнига келганида асаби қўзиганидан юзлари учиб турарди. Энбо жаҳл билан ишора қилиб, бинони дарров бўшатиб қўйишларини буюрди. Шахтадан одамларнинг чиқиб кетиши қайғули кўмиш маросимини эслатарди; ҳамма бўшаб, ҳамон қўққайиб турган, лекин ҳалокатга маҳкум бўлган улкан корпусларга қайрилиб қараб, индамай қадам босарди.

Директор билан инженер ҳаммадан сўнг қабулхонадан чиқишганда, халойиқ уларни яккаш ҳайқириб кутиб олди:

— Номлари! Номларини айтинглар! Отларини айтинглар!

Энди бу ердаги хотин-халаж орасида Маэнинг беваси ҳам бор эди. У кечаси шитирлаган овозни эшитганини эслаб, қизим билан хонанишин бирга кетишган, ҳозир албатта, шахтада бўлишса керак, деб ўйлади. Маэ хоним бу ерга югуриб келди-ю, ажаб бўлибди, қилмишларига яраша-да; тошбағир, қўрқоқларнинг жазоси шу, деди; шундай деса ҳам Маэ хоним титраб-қақшаб, биринчи қаторда турарди. Сирасини айтганда, энди шубҳаланмаса ҳам бўлади, атрофда бўлаётган гаплардан нима гаплигини билди. Ҳа, ҳа, Катрина ўша ерда қолган, Этьен ҳам,— ўртоқлардан биттаси уларнинг иккаловини кўрибди. Бироқ бошқалар тўғрисидаги фикрлар ҳар хил эди: йўқ, у эмас, аксинча, анави, балки Шавалдир? Ушдоқ деса, ёрдамчи ишчилардан бири мен билан бирга кўтарилди, дея қасам ичди-ку. Левак билан Пьерроннинг хотинлари ҳам гарчи уларнинг яқинларидан ҳеч ким хавфли жойда бўлмаса-да, бошқалардан қолишмай додвой қилишарди. Биринчилар қаторида чиқиб олган Захария, гарчи кўриниши кулгили бўлса ҳам, кўз ёши қилиб, хотини билан онасини қучоқларди. Маэ хонимнинг ёнида турган Захария онаси каби қалти-

рарди. У ҳам онаси сингари сингисига бехосдан меҳри товланиб, то бошлиқлар бу нарсани тасдиқламагунларича Катринанинг ер тубида қолиб кетганига ишонишни истамас эди.

— Номлари! Отлари! Худо ҳаққи, отларини айтинглар!

Хуноб бўлиб кетган Негрель назоратчиларга ўшқирди:

— Уларни жим қилсаларинг-чи! Шу ҳам иш бўлди. Ҳали ўзимиз ҳам билмаймиз-ку.

Икки соат ўтди. Аввалига бу тўс-тўполонда ҳеч ким бошқа шахталар, Рекийярдаги эски шахта ҳақида ўйламаганди. Жаноб Энбо одамларни Рекийяр шахтаси томонидан қутқаришга ҳаракат қилиб кўрамиз, деганди, шу ондаёқ шовқин кўтарилди: сув тошқинидан эски, ташландиқ қудуқдаги чириб кетган, нарвонлардан бир амаллаб чиқиб, қутулиб қолган беш ишчи пайдо бўлди. Қутулиб қолганлар орасида Мук бобо ҳам бор, дейишганда, ҳамма: вожаб, деб ёқасини ушлади, чунки унинг шахтадалигини ҳеч ким хаёлига ҳам келтирмаганди. Қутулиб чиққан беш кишининг гаплари йиғи-сигини кучайтирди холос. Ун беш ўртоғимиз ўпирилишлар орасида адашиб қолишиб, кетимиздан кела олишмади, энди уларни қутқаришнинг иложи йўқ, чунки Рекийярни босган сув ўн метрдан юқори чиқди, дейишди. Энди ҳамманинг исми маълум бўлганди, куйиб-пишаётганларнинг дод-фарёди осмонни тутиб кетди.

— Уларга жим бўлинглар, десаларинг-чи! — деб такрорлади Негрель жаҳл билан. — Нарироққа боришин! Ҳа, ҳа, юз қадамча нарига! Бу ер хавфли. Уларни ҳайданг, ҳайдаб юборинг бу ердан!

Бахти қоралар билан муштлашишга тўғри келди. Улар эса ҳалок бўлганларнинг исмларини яшириш учун бизни ҳайдашяпти, деб тушунишди. Штейгерлар ҳамма шахтёрлар хавф остида туришибди, деб эълон қилишгандан кейин одамлар ҳайратга тушиб, жим бўлишди-да, ниҳоят бир-бир босиб, узоқлаша бошладилар. Лекин уларни тутиб турувчи соқчиларни икки ҳисса кўпайтиришга мажбур бўлишди, чунки ҳамма ўйламай-нетмай, шахта томон ёпирилиб келарди. Йўлда мингга яқин киши тўпланди, одамлар ҳамма по-

сёлкалардан, ҳатто Монсудан югуриб келишаётганди. Уюм тепасидаги киши, оқ-сарикдан келган, юзи қизларникига ўхшаган киши эса вақтни тез ўтказиш мақсадида кетма-кет папирос чекар, тийрак кўзларини шахтадан узмас эди.

Энди кута бошлашди. Пешин бўлиб қолганига қарамай ҳеч ким туз тотмаганди, ҳеч ким уйга кетишни ўйламасди. Қорамтир-кулранг осмонда қизғиш булутлар секин-аста сузарди. Раснёрнинг ҳовлиси тўснги ортидаги каттакон ит одамларнинг пишиллашидан безовталаниб, тинмай вовилларди. Одамлар эса секин-аста шахтани ҳалкадек қуршаб, қўшни участкаларни ҳам эгаллади. Доира марказида радиуси юз метр келадиган Ворё юксалиб турарди. Бу ерда гўё ҳамма нарса ўлиб битгандек эди,— жон зоти йўқ, тиқ этган товуш эшитилмасди. Эшик ва деразаларнинг очиқлиги Ворёни янада ҳувиллатиб юборганди. Елғиз қолиб, зериккан тарғил мушук лип этиб нарвонга чиқди-да, ғойиб бўлди. Генераторларнинг ўчоқлари афтидан ўчган бўлса керак, чунки қора булутлар остидаги баланд ғиштин мўркондан аҳён-аҳёнда ҳалқа-ҳалқа тун чиқарди, минора тепасидаги флюгер эса шамолда хиёл ғижирлаб, ғуссали товуши билан улкан биноларнинг ҳалокатга маҳкум этилганидан дарак берарди.

Соат иккиларгачаям ҳеч нарса ўзгармади. Жаноб Энбо, Негрель ва бу ерга югуриб келган бошқа инженерлар оломон олдида сюртук ва қора шляпа кийган бир гуруҳни ташкил этгандилар. Гарчи мадорлари қуриганидан оёқлари чалишиб кетаётган бўлса-да, улар ҳам ҳеч қаёққа кетишмасди. Шундай ҳалокат олдида ожизликларини сезиб, аъзойи баданлари жимирлашиб кетарди. Улар ўсал ётган бемор тепасидаги одамлар каби кам гапиришарди. Чамаси юқори қоплама ҳам бутунлай ағдарилиб тушди, чунки узоқ жимлик орасида ўқтин-ўқтин жуда баланддан тушаётган нарсанинг бўғиқ гумбурлаши эшитилиб қоларди. Шахтага етказилган шикаст тобора катталашиб борарди; пастда бошланган вайронгарчиликлар энди ер бетига етиб келаётганди. Негрель тоқати тоқ бўлиб, нима бўлаётганини кўриш учун ўзи даҳшатли чоҳ тубига тушмоқчи бўлди; лекин шу он унинг елкасидан тутишиб: буни нима кераги бор, дейишди. У энди ҳеч ни-

мага ёрдам бера олмасди. Ҳар қалай, шахтёрлардан бири соқчиларнинг кўзини шамғалаг қилиб, баракка югуриб кетди; бироқ шу заҳоти қайтиб бамайлихотир чиқди: у ёғоч бошмоғини олиб келиш учун борганди.

Соат учга занг урди. Ҳамма нарса аввалгидек эди. Жала ёға бошлади, лекин оломон жойидан жилмади. Раснёрнинг ити яна вовиллай бошлади. Соат учдан йигирма минут ўтгандагина ер биринчи турткидан силкиниб кетди. Ворё титради-ю, лекин мустаҳкам бинолар қуламади. Шу ондаёқ ер иккинчи марта силкинди, шу боисдан ҳамма бирдан бақириб юборди. Қорайиб турган саралаш корпуси икки марта тебранди-ю, даҳшатли гумбурлаб ағанаб тушди. Оғир юк остида қолган тахталар синиб, кучли зарбадан парча-парча бўлиб учиб кетди. Шу лаҳзадан бошлаб ер тўхтовсиз титраб, кетма-кет силкиनावерди; худди вулқон отилаётгандагидек, ер остидан гулдуреган товушлар эшитиларди. Узоқдаги ит энди хурмас, балки худди силзиладан дарак бераётгандек, аянчли гингширди. Хотинлар, болалар — йигилганларнинг ҳаммаси юз бераётган ҳодисага қарар ва ҳар сафар кесак-ёғочлар тепага отилганида ўзларини тутолмай, қичқириб юборишарди. Ун минутга ҳам қолмай миноранинг шифер томи қулаб тушди, қабулхона билан машина корпуси катта-катта дарз кетди. Кейин шовқин тинди, вайронгарчиликлар тўхтади-да, яна сукунат чўкди.

Бир соат ичида Ворё худди ваҳшийлар армияси томонидан яксон қилингандек, ярим вайрона ҳолга келди. Энди ҳеч ким қичқирмасди, нари бориб, давра олиб турган томошабинлар анграйиб қараб туришарди холос. Саралаш хонаси вайронаси остида синган дастакларни, қайилиб, ёрилиб кетган тарновларни кўриш мумкин эди. Қабулхона тепаликка айланганди: ҳаммаёқда гиштлар қалашиб ётарди, деворлар бўлак-бўлак бўлиб қулаб тушганди. Темир стропиллар эгилиб, тарнсмиссия ўқи ярмисигача шахтага кириб кетганди; кажаваларнинг бири осилиб қолганди, унинг ёнида узилган пўлат арқоннинг учи ликиллаб турарди; вагонеткалар, чўян плита ва нарвонлар айқаш-уйқаш бўлиб ётарди. Фақат лампахонагина тасолифан омон қолипти: чап томонга териб қўйилган лампочкалар ялтирарди. Вино ичкарисининг бўлинган

жойида тош пойдеворга маҳкам ўрнатилган машина кўринарди: унинг мисдан ишланган қисмлари ярақларди, энли пўлат қисмлари бақувват мушакларга ўхшарди, осмонга кўтарилиб қолган каттакон дастак ўз кучини намоёни қилиб ётган баҳайбат махлуқнинг кучли тиззасини эслатарди.

Яна бир соат ўтди. Жаноб Энбо яна умид пайдо бўлаётганини сизди. Ер силкиниши тўхтаган бўлиши керак, машина билан қолган биноларни қутқариб қолишга уринса бўлади. Шунга қарамай яна ярим соат кутиш мақсадида шахтага яқинлашишни ман этди. Кута-кута тоқати тоқ бўлди, умидлари ташвишларини баттар кучайтирди, юраги дукиллаб ураверди. Уфқдан кўтарилган қора булутлар қоронғи тушишини тезлаштирди; қайғули кун, ер ости бўрони туфайли юз берган вайронгарчилик куни тугади. Одамлар бу ерда овқат емай, қимир этмай етти соат туришди.

Инженерлар эҳтиёткорлик билан олдинга юрган ҳам эдиларки, қўққисдан яна ер силкиниб, уларни тумтарақай қочишга мажбур этди. Ер ости гумбурлашлари нопокларни ўққа тутаётган даҳшатли замбарак наърасидек эшитиларди. Ер юзидаги сўнгги иморатлар бир-бирларини қулатиб ағанайверди. Силкиниш аввал саралаш хонаси билан қабулхона қолдиқларини улоқтириб юборди. Кейин қозонхона учиб кетди. Сўнг насос ҳарсиллаб турган тўртбурчакли минорага навбат келди,— минора ўққа учган кишидек гумбурлаб қулади. Шунда йиғилганларнинг кўзлари даҳшатли манзарага тушди: гўё мустаҳкам пойдевор устида узала тушиб ётган машина ажал билан олишиб, мушакларни таранг қилди; машина ўрнидан қўзғалди, қаддини кўтараётган улкан махлуқ тиззасига ўхшаган дастагини ростлади; лекин бу жон талвасаси эди. Машина дабдала бўлиб, чоқ тубига тушиб кетди. Фақат ўттиз метрлик труба бўрон вақтидаги мачтадек чайқалиб турарди. У ҳам майда-майда бўлиб учиб кетади, деб кутиб туришди; бироқ у қўққисдан эриб битган улкан шамдек бутунлай ер қаърига кириб гойиб бўлди, ўрнида ҳеч нима қолмади; ҳатто яшин қайтаргичи ҳам кўринмасди. Бу жойга бекиниб олган, шунча одамларнинг ёстигини қуритган ваҳший ҳайвоннинг ҳам куни битди; унинг чуқур, оғир нафас

олиши тўхтади. Ворё бутунлай чоҳда ғойиб бўлди.

Оломон дод-фарёд қилиб тарқалди. Хотинлар кўзларини юмиб қочишарди. Ваҳима худди хазонни тўзитган қуюндек одамларни ҳар томонга тарқатиб юборганди. Ҳеч ким қичқиришни истамаса ҳам, ҳар қалай ҳамма оғзи кенг очилиб турган ўрани кўриб, даҳшатга тушиб, қўлларини силкитар, кекирдаklarини йиртиб бақиришар эди. Сўнган вулқон кратерининг чуқурлиги ўн беш метр бўлиб, диаметри қирқ метрга бориб қолган канал ўзанига етган эди. Бинолардан сўнг бутун тўртбурчакли шахта — улкан кўприклар, тўла вагонеткалар поезди, вагон, ғамлаб қўйилган ўтин — ҳаммаси ўпирилиб тушганди; ер қари дарахтларнинг узун таналарини ҳам худди хасдек ютганди. Ҳалокатдан кейин бу чуқур тубида айқаш-уйқаш бўлиб ётган хода, ғишт, темир, оҳак, қўрқинчли, қийшайиб-буралиб, булғаниб кетган парча-пурча нарсалардан бошқа ҳеч нимани ажратиб бўлмасди. Ўра оғзи думалоқ бўлиб, ундан ҳар томонга дарз кетиб, далаларгача бориб етганди. Кичкина дарзларнинг бири Раснёр уйигача бориб етди, уйнинг олд томони ёрилиб кетди. Посёлканинг ўзини ҳам ер ютмасмикин? Кулранг булутлар ўз оғирлиги билан бутун оламини босиб эзмоқчи бўлиб турган шу даҳшатли кун охирида хавотирсиз бўлиш учун қаергача қочиб бориш керак?

Бироқ тўсатдан эси чиқиб кетган Негрель бақириб юборди. Ҳамма қатори чекинган жаноб Энбо ҳўнграб йиғлади. Ҳалокат ҳали тугамаганди; канал қирғоғи дарз кетиб, сув шовиллаганича шахта тармоқларидан бирига югурди: бутун канал суви жарга тушган шалладек ўша ёққа кетадигандек эди. Шахта канал сувини ичмоқчи эди; шу боисдан унинг йўлакларини узоқ йиллар сув босиб ётади. Кўп ўтмай бутун кратер сув билан тўлди, бир вақтлар Ворё қад кўтариб турган ер тубида бадбахт шаҳарлар ётган кўлларга ўхшаган ифлос кўл пайдо бўлди. Даҳшатли сукунат чўкди, ер қаърида сувнинг билқиллаши эшитиларди холос.

Шунда Суварин сирғанчиқ уюм тепасидан турди. У бева Маэ билан Захарияни таниб қолди. Улар пастда қийналиб ўлишга маҳкум этилган бечоралар бошига бутун оғирлиги билан тушган фалокат туфайли

ҳўнграб йиғлашарди. Суварин сўнги папиросини ташлади-да, орқасига қарамай, бошланган тун қоронгисиди одим отиб кетди. Унинг қора гавдаси секин-аста кичрайиб, охири қоронгиликда кўринмай қолди. Унинг қаерга бориши номаълум эди, одатдагидек хотиржам борарди, у ҳали динамити бор жойга — шаҳарларни портлатиб, одамларини қирса бўладиган жойга қараб кетаётганди. Жон талвасасида тўлғонаётган буржуазия Сувариннинг ҳар қадамида кўча тошлари осмонга учганини эшитганида, бу вайронгарчиликлар унинг иши эканини билиб олади.

IV

Жаноб Энбо Ворёда ўпирилиш рўй берган куннинг эртасига тундаёқ ҳалокат ҳақидаги хабарлар газеталарда пайдо бўлмасидан олдин маъмурларни шахсан огоҳлантириш ниятида Парижга жўнади. Бир кун ўтгач, мутлақо хотиржам қайтиб келди-да, яна одатдаги совуқ, амалдорларга хос муомаласини қилаверди. Ҳақиқатан ҳам у бир амаллаб гарданидан масъулиятни соқит қилди, афтидан, Правлениенинг ҳам ихлоси заррача қайтмаганга ўхшайди. Аксинча, эртасигаёқ уни Фахрий легион ордени билан мукофотлаш ҳақидаги қарорга имзо чекилди.

Гарчи директор осонгина қутулган бўлса-да, Ширкатнинг ўзи бу даҳшатли зарбадан қаттиқ довдираб қолди. Гап бир неча миллион франкка борадиган заррада эмасди,— йўқ, бу яллиғланиб турган жароҳат бўлиб, эртанги кундан қўрқиш, келажакка ишонмаслик эди, ахир бутун бошли бир шахта ер юзидан ғойиб бўлди-да. Ширкат ларзага келганди, аммо у бу воқеа атрофида шов-шув бўлмаслиги зарурлигини янада қаттиқроқ ҳис қилди. Бундай даҳшатли воқеаларни кавлаштиришдан не фойда? Борди-ю, ана, бадкирдорни топишганда ҳам, уни жафокаш фидойига айлантиришнинг нима ҳожати бор? Бунақаларнинг қаҳрамонлиги бошқаларнинг бошини айлантириб, ўт кўювчи каззоблар билан қотиллар тўдасини пайдо қилади, бунинг устига Ширкат ҳақиқий айбдор бир киши эканлигини хаёлига ҳам келтирмаганди, балки бу қабоҳатни жуда кўп одам тил бириктириб қилган, деб

тахмин қиларди: битта одамнинг юрак бетлаб, шу ишни қилишга кучи етишига ақл бовар этмасди. Ширкат асосан шундай тахмин қилиб, шахта атрофида катта хавф тугилиб боряпти, деган фикрга ёпишиб олди. Директор жосусларни кўпайтириш, сўнг жиноятга дахлдор барча хавфли унсурларни зимдан, битта-битталаб йўқ қилиш ҳақида буйруқ олди. Юқори даражадаги сиёсий эҳтиёткорлик нуқтаи назаридан шундай тозалаш ўтказиш билан кифояланишга тўғри келди.

Фақат бир киши — катта штейгер Дансарт ишдан дарҳол бўшатилади. Пьерроннинг хотини билан бўлган жанжалдан бери Дансарт шахтада ёмон кўриниб қолганди. Шунинг учун ҳам уни ҳалокат пайтида ўзини жуда ёмон тутди, энг разил қўрқоқлардек ўртоқларини ташлаб қочди, дея айблашди. Иккинчи томондан, бу — уни ёмон кўрувчи шахтёрларга пинҳона ён босиш ҳам эди.

Бироқ халқ орасида нохуш миш-мишлар тарқалди, шунинг учун ҳам Правление гўё забастовкачилар бир бочкача порох билан шахтани портлатишти, деган хабарга раддия ёзиб, матбуотга юборишга мажбур бўлди. Давлат инженери юзаки сўроқ ўтказиб, ёзган докладида — қоплама табиий равишда чириб, тупроқ босими натижасида қулаб тушди, деган хулосага келди. Ширкат эса яхши қаралмаган, деган айбни бўйнига олиб, индамасликни маъқул кўрди. Ҳалокатнинг учинчи куни Париж газеталарининг ҳодисалар ҳақидаги устунлари анча кўпайганди; ҳамма гап шахта тубида қолиб ўлган ишчилар ҳақида борарди, ҳар куни эрталаб телеграммаларни ташналик билан ўқишарди. Ворё номини эшитишлари билан монсуликлар ҳам даҳшатга тушиб, тилдан қолишарди. Бу ҳодиса ҳақида афсоналар тўқилди, ҳатто энг дадил кишилар ҳам уни овозлари титраб, бир-бирларининг қулоқларига айтишарди. Бутун округ ҳалокат қурбонларига буюк ҳамдardлик изҳор қилиб, вайрон бўлган шахта ёнига зиёратга келишарди; оила-оила бўлиб, тирик кўмилганлар устидан вазмин қадам ташлаб айланиб юришарди.

Эндигина округ инженери қилиб тайинланган Денелен худди ҳалокат юз берган вақтда ўз вазифасини

бажаришга киришганди. Унинг биринчи ташвиши канални аввалги ўзанидан оқизиш бўлди, чунки сув оқими соат сайин кўпайиб, хавф-хатарни кучайтирарди. Катта иш қилиш лозим эди, шу боисдан шу заҳоти Денелен тўғон қуриш учун юз ишчини юборди. Сув дастлабки тўсиқларни икки марта бузиб кетди. Насослар қўйинди; бу шиддатли жанг бўлиб, сув остида қолиб кетган ер қадам-бақадам қайтадан қўлга киритилаётган эди.

Бироқ кўмилиб қолган шахтёрларни қутқариш ишлари янада кўпроқ ташвишлантирарди. Негрелга бу иш учун ҳамма куч-ғайратни сарфлаш вазифаси топширилганди; бу ишга ишчи кучи етишмайди, деб бўлмасди; биродарлик туйғулари жўш уриб турган кўмир қазувчилар унинг олдига бориб хизматга шайлигини билдирдилар. Улар забастовкани унутишди, ҳатто машинали ҳам суриштиришмади; уларга ҳақ тўлашмаса ҳам бўларди, улар ўртоқлари ўлим хавфи остида қолганлари учун ихтиёрий равишда жонларидан кечаётгандилар. Ҳамма қўлига асбоб-ускунасини олиб, қазийдиган жойни кўрсатишларини ҳаяжонланиб кутиб турарди. Ҳалокатдан сўнг қўрқиб касалга чалинган, узлуксиз даҳшатлардан асаблари бузилиб, тутқаноқ бўлиб қолган кўп кишилар совуқ терга ботиб, ер билан жанг қилгани, гўё ундан нима учундир ўч олгани шахтага оқиб борарди. Лекин бахтга қарши уларнинг ҳаммаси: «Нима қилган фойдалироқ?» деган саволга жавоб тополмай гангиб қолдилар. Нима қилиш керак? Пастга қандай тушиш мумкин? Улкан тошларни қай томондан тешиш керак?

Негрель ҳам бу бечораларнинг биттаси ҳам тирик қолмайди, деган фикрда эди; шубҳасиз, ўн бешови ҳам ё чўкиб ўлган, ё бўгилиб ҳалок бўлган. Бироқ шахталарда ҳалокат рўй берса, ичида кўмилиб қолганларни тирик, дея гумон қилиш одати бор. Шунинг учун Негрель ҳам шу тахминга кўра ҳаракат қилди. У ўз олдига аввало улар яширинишлари мумкин бўлган жойни аниқлаш вазифасини қўйди. У маслаҳатлашган штейгерлар билан кекса шахтёрларнинг фикри бир жойдан чиқди: ер силкиниши бошлангунча кўмир қазувчилар, албатта, мумкин қадар юқорироққа, энг тепароқдаги қатламларга чиқиб олишга ури-

ниб, йўлакдан-йўлакка кўтарилишган, шунинг учун ҳам улар ер юзасига яқинроқ штольнялардан бирининг охирига келиб қолишган. Бу тахмин Мук бобонинг узук-юлуқ гапларига мос келарди, яъни жон аччигида қочиб оқибатида бошқа ишчилар майда-майда гуруҳларга бўлиниб, йўл-йўлакай ҳамма қабатларга тарқалиб кетишган. Лекин бундан кейинги тахминларга келганда штейгерларнинг фикри айри чиқди: улар қутқариш имкониятлари ҳақида турлича ўйлашарди. Чунки энг юқоридаги штольня бир юз эллик метр чуқурликда бўлгани учун қудуқ ковлаб тушиш тўғрисида ўйлашнинг ҳам ҳождати йўқ эди. Тушиш мумкин бўлган ягона жой Рекийяр эди, — фақат ўша ердангина ўпирилиш юз берган ерга яқинлашиш мумкин эди. Ҳаммадан ёмони — эски конни ҳам сув босган бўлиб, Ворё билан боғланадиган йўллари қолмаганди. У ерда биринчи кўтармалардан бошланган йўлакнинг бир қисмигина сув сатҳидан баландда эди. Сувни чиқариб ташлаш учун бир неча йил керак бўлгани учун энг тўғри йўл жафокашлар охирида жон сақлаб тургани эҳтимол тутилган шу йўлакларни яхшилаб қараб, улар сув босган штольняларга туташми-йўқми, шуни аниқлаш эди; мантиққа мувофиқ шу фикрга келингунча жуда кўп баҳслашишга, бажарилиши мумкин бўлмаган кўплаб лойиҳаларни рад этишга тўғри келди.

Шундан кейин Негрель архив чангларини ютиб, иккала шахтанинг эски планини топди, уни ўрганган ва қидирув ишлари олиб бориш лозим бўлган нуқталарни белгилади. Секин-аста у ишга бутунлай берилиб кетди, гарчи у одатда одамларга, шарт-шароитларга лоқайд қараб, заҳархандалик билан муносабатда бўлиб келишига қарамасдан ишга ниҳоятда сидқидилдан киришиб кетди. Рекийярга тушаверишдаёқ дастлабки қийинчиликларга дуч келинди: шахтага кирадиган жойни буталар ва дўланалардан тозалашга тўғри келди; бундан ташқари нарвонларни тузатиш керак эди. Кейин тусмоллаб излашлар бошланди. Ун ишчи билан шахтага тушган инженер уларга ўзи кўрсатган тармоқларни темир чивиклар билан уриб-уриб кўришни буюрди. Сўнг ҳаммалари нафасларини ичларига ютишиб, зора узоқдан жавоб товуши эшитилиб

қолса, деган умидда қулоқларини тошқўмир қатламига тутишди. Бироқ уларнинг тушиш мумкин бўлган ҳамма йўлакларни айланиб чиқишлари зое кетди, — тиқ этган жавоб бўлмади. Янада катта қийинчиликлар туғилди: қатламнинг қаеридан ковлаш керак? У ерда, эҳтимол, ҳеч ким бўлмаса, кимнинг ҳам олдига боришади? Бироқ ташвишлари ортиб бораётганига қарамай ҳамма зўр бериб излайверди.

Бева Маэ ҳар куни эрталаб Рекийярга келарди. У шахта олдидаги кундага ўтирарди-да, қоронги тушгунча кетмасди. Ичкаридан биров чиқиб қолгудек бўлса, у ўрнидан туриб, кўзларини жавдиратарди-да: «Нима гап? Ҳеч нима йўқми?» — дея сўрарди. У яна жойига ўтирарди-да, юзлари тошдек қотиб, индамай кутаверарди. Инига бостириб киришаётганини кўрган Жанлен ҳам ўғирлик нарсаларини ов ити билан топиб олишларидан ҳадиксираб, бўридек шу ўртада айланиб юрарди. У бу қидиришлар оромини бузишидан қўрқиб, кўмилган солдатни ўйларди; лекин шахтанинг бу қисмини сув босгани учун улар чап томонни, ғарбий йўлак томонни қидириб кетишди. Аввалига Филомена ҳам кўмир қазувчилар командасида ишлаётган Захария билан келиб юрди. Бироқ кейин келишга ҳожат йўқлигини, бирор манфаат чиқмаслигини кўриб, бекорга шамоллаб нима қиламан, деб қатнамай қўйди. Бу касалманд аёл посёлкада қолиб, кунларини бекорчилик билан ўтказар, эртадан-кечгача йўталар эди. Аксинча, Захария бўлса, синглисини қидириб топишдан бошқа нарсани ўйламасди; у ерни ғажиб, ютиб юборишга ҳам тайёр эди. Кечалари алаҳсираб, бақириб чиқар, синглисининг овозини эшитгандек, очликдан силласи қуриган, бефойда ёрдам сўрайвериб, томоқлари қирилиб кетган бечора қизни кўраётгандек бўлар эди. Захария кўрсатмага риоя қилмай, улар худди шу ерда, юрагим сезиб турипти, дея икки марта ўзи мўлжаллаган ерни қазиди. Инженер гарчи пастга тушишни тақиқлаган бўлса-да, Захария ҳайдаб юборишларига қарамай, шахтадан кетмади. У қатто онасининг олдида ҳам ўтира олмасди, доимо гимирлагиси келиб, саланглаб у ёқдан бу ёққа бориб келарди.

Учинчи куни ҳафсаласи пир бўлган Негрель кечқурун қидирув ишларининг барини тўхтатишга қарор

қилди. Туш пайтида, у кўмир қазувчилар билан овқатланиб, ишга қайтиб келганида шахтадан қип-қизариб, қўлларини силкитиб чиқаётган Захарияни кўрди-ю, ёқасини ушлаб қолди:

— У шу ерда! У менга жавоб берди! Юринглар, юрсанглар-чи!

Захария нарвонга отилди, қоровул олдидан лип этиб ўтди-да, Гийом тармоғидаги биринчи штольнядан тақиллаган товушни эшитдим деб қасам ичди.

— Лекин у ердан, сиз айтаётган жойдан икки марта ўтдик-ку,— ишонқирамай деди Негрель.— Хўп, майли, бориб кўрайлик-чи!

Бева Маэ ҳам ўрнидан турди; уни шахтага тушишга қўйишмади, лекин у чексиз қоронғиликка тикилиб, шундоқина чоҳ лабида турарди.

Негрель пастга тушгач, ўзи уч марта уриб кўрди, ҳар урганида орадан анча вақт ўтарди. сўнг у ишчиларга нафасларини ҳам чиқармасликни буюриб, қатламга қулогини тутди. Ҳеч қандай товуш эшитилмагач, у бошини сарак-сарак қилди; бола бечорага шундай туюлган, албатта. Захария ҳовлиқиб яна ўзи тақиллатди; у яна тўқиллаган овозни эшитгандек бўлди, кўзлари чақнаб, суюнганидан аъзойи бадани дағдағ титрарди. Шундан кейин ишчиларнинг ҳаммаси навбатма-навбат тақиллатиб, қулоқ сола бошлашди: ҳамма жонланиб қолди, чунки узоқдан жавоб товушлари келаётгандек эди. Инженер гоят ҳайрон бўлиб, яна қулогини тутди-да, ниҳоят тошнинг бир маромда тўқиллашига ўхшаган заиф товуш аранг келаётганини пайқади, бу — кўмир қазувчиларнинг ташвишли сигнали эди. Кўмир конида тиқ этган товуш жуда узоқ масофада ҳам аниқ эшитилади. Яқинроқ турган штейгерлардан бири, биз билан ўртоқлар орасидаги масофа камида эллик метр келади, деди. Лекин назарларида уларга қўл узатсанг, етадигандек эди. Ҳамма хурсанд бўлиб кетди. Негрель ҳозирнинг ўзидаёқ йўлак қазиб тушишга буйруқ бериши лозим эди.

Захария тепага чиқиб, онасини кўриши билан улар бир-бирини қаттиқ қучоқлаб олишди.

— Кўп ўзларингдан кетаверманглар,— деди жеркиб айлангани келган Пьеррон хоним.— Борди-ю, Катрина у ерда бўлмаса, бундан баттар бўласизлар.

Дарҳақиқат, Катрина бошқа жойда бўлиши ҳам мумкин эди.

— Йўқол бу ердан, алвасти!— гижиниб қичқирди Захария.— Мен биламан, Катрина шу ерда.

Бсва Маэ яна ерга ўтирди-да, миқ этмай, қимирламай, кута бошлади.

Бу хушxabар Монсу посёлкасига тарқалиши билан яна бир талай одам югуриб келди. Ҳеч нарсани кўриб бўлмаса ҳам, ҳеч ким кетмасди, ҳангоматалабларни нарироқда тутиб туришга тўғри келди. Пастдагилар кундузи ҳам, кечаси ҳам ишлашди. Олдинда бирор тўсиқ чиқиб қолишидан қўрққан инженер бир йўла учта йўлакни қазишни буюрди, бу уч йўлак ўпирилган шахта остида қолган шахтёрлар бор, деб гумон қилинган нуқтада учрашиши керак эди. Йўлак тор бўлгани учун қатламни битта кончи қазирди, ишчилар ҳар икки соатда алмашинарди, саватларга солинган кўмирни эса қўлма-қўл узатишарди, қатлам қазилган сари одамлар қатори ҳам узайиб борарди. Аввалига иш жуда тез кетди, биринчи кун олти метр қазилди.

Захария бир амаллаб бу иш учун саралаб олинган кончиларга қўшилиб олди. Бу шарафли иш бўлиб, буни ҳамма талашарди. Белгиланган икки соатдан сўнг уни алмаштиришмоқчи бўлишганда Захария халфа бўлди. У навбати келмаса ҳам қазимоқчи бўлиб, қўлидан чўкични қўймасди. Тезда унинг йўлаги бошқаларникидан ўзиб кетди, у жон-жаҳди билан йўл очарди, шу боисдан гўё у ерда бутун бир темирчилик устахонаси ишлаётгандек, йўлакдан унинг ҳарсиллаши эшитилиб турарди. У чангдан қорайиб чарчаганидан гандираклаб ўнгирдан чиқди-ю, гурс этиб ўзини ерга ташлади, шу сабабдан устига адел ёпиб қўйишга тўғри келди. Кейин, у ҳамон гандираклаб яна ўнгирга кириб кетди, яна кураш бошланди, яна бўғиқ гурс-гурслар, вазмин ихрашлар, жон-жаҳди билан бузиш товушлари эшитилди. Ҳаммадан ёмони шу эдики, кўмир тобора қаттиқлашиб бораётганиди. Захария икки марта чўкичини синдириб қўйди, тезроқ силжишнинг иложи йўқлигидан хунсби ошди. У қадам-бақадам чидаб бўлмаётган иссиқдан ҳам қийналаётганиди, чунки бундай тор тешикка сира ҳаво кирмасди. Вентилятор ишлаб турганига қарамасдан кўнгли озиб, бўғи-

либ ўлиб қолай деган кончиларни уч марта ташқарига олиб чиқишди...

Негрель шахтадан чиқмай, ўша ерда ишчилар билан ётиб қоларди. Овқатини ўша ерга олиб бориб беришарди, баъзан ўша ернинг ўзида похол устида плашига ўралиб, икки соатгина мизғиб оларди. Бечора кўмир қазувчиларнинг жавобан тўқиллатишлари ҳаммани тетиклаштирарди; бу товушлар аниқроқ эшитилиб, ишловчиларни шоширарди. Энди овоз жуда тиниқ, гўё биров гармошканинг металл пластинкаларини чалаётгандек деярли мусиқий эшитила бошлади. Шу овоз туфайли кавлаш ишларини адашмай олиб бориш мумкин эди. Бу тиниқ овоз кончиларни лашкарлар ҳужумини йўналтириб турган тўплар садосидек йўналтириб турарди. Ҳар сафар, кончилар алмашишганларида Негрелнинг ўзи йўлакка тушиб, тақиллатиб, қулоқ соларди. Тўғри боришаётганларига ҳеч қандай шубҳа йўқ эди,— ҳар гал жавоб тезроқ келарди. Лекин иш жуда секин борарди! Дастлабки икки кун ичида ўн метр йўлак қазинди, учинчи кун — беш метр, тўртинчи кун — уч метр. Бу ердаги тошкўмир шу қадар қаттиқ эдики, кунига икки метрдан зиёд кавлаб бўлмасди. Тўққизинчи кунга келиб қазилган чоҳнинг умумий чуқурлиги ўттиз икки метрга борди. Ҳали бундан ташқари яна йигирма метрга яқин кавлаш керак эди. Тутқинлар учун ўн иккинчи кун бошланди, ўн икки кундан бери туз тотмай муздек қоронғи зиндонда яшаш осонми! Ана шу фикр хаёлга келиши билан кўзлардан тирқираб ёш чиқиб кетар, қўллар янги куч-ғайрат билан ишга тутинарди. Одамлар шу аҳволда тирик юрганга ақл бовар қилмасди; кейинги икки кун ичида узоқдан келаётган садолар заифлашиб қолди, бу садолар бутунлай узилиб қолса-я, деб одамларни титроқ босарди.

Бева Маэ ҳар кун эрталаб албатта келарди-да, шахтага кириладиган жойга ўтирарди. У кун бўйи уйда ёлғиз қолдириш мумкин бўлмагани учун Эстеллани олиб келарди. У соат сайин ишни кузатарди, кўмир қазувчиларнинг қувонч-шодликларига, ғаму андуҳларига шерик эди. Рекийяр атрофида, ундан ҳам узоқларда, то Монсугача бўлган жойларда турганлар нима бўларкин, дея сабрсизлик билам кутишаркан,

чакаклари тинмай гапиришарди. Гўё округдаги барча одамларнинг юраги у ерда, пастда тепаётгандек эди.

Тўққизинчи куни, нонуштага яқинлашиб қолганда, Захарияни алмаштириш учун чақиринган эди, у ҳеч қандай жавоб бермади. Кейинги вақтларда у ниҳоятда қўрс бўлиб, салга ҳам сўкинаверарди. Негрель уни гапга киргиза олмагани учун вақтинча нарироққа кетди. Шахтада фақат битта штейгер билан учта ишчи қолганди. Захариянинг кўзи ҳеч нимани кўрмай қолди шекилли; шу сабабли иш судралаётганидан фигони ошган Захария эҳтимол, эҳтиёткорликни ҳам йиғиштириб қўйиб, гарчи жиддий огоҳлантирилганига қарамай, лампочкани очиб юборган бўлса керак. Тор йўлакда ҳеч қандай вентиляция бўлмаганидан кон гази жуда кўп тўпланиб қолганди. Қўққисдан қаттиқ гумбурлаган овоз эшитилди-ю, штольня тешигидан йирик питра билан ўқланган замбарак оғзидан чиққандек аланга отилиб чиқди. Ҳаммаёқ ловиллаб ёнарди, чунки бутун йўлакдаги ҳаво порохга ўхшарди. Аланга штейгер билан учала ишчини итқитиб юборди-да, шахта қудуғидан кўтарилиб, қоя парчалари, ходаларни ҳар томонга сочиб юборган вулқондай ташқарига отилиб чиқди. Ҳангоматалаблар тумтарақай қочиб қолишди, бева Маэ бўлса, қўрқиб кетган Эстеллани бағрига босиб, ўрнидан турди.

Негрель билан ишчилар қайтиб, аҳволни кўришди-ю, жонлари ҳиқилдоқларига келди. Улар жазавасти тутиб, болаларни ураётган бераҳм ўғай онага ўхшаб, ерни тепкилай бошлашди. Улар ўртоқларига ёрдам бериш учун жонларини жабборга бериб ишласа-ю, бу камлик қилгандай жонларидан жудо бўлишса-я! Уч соат овора бўлиб, хаётларини хатарга қўйиб, ниҳоят йўлакка киришди. Қурбонларни тупроқ орасидан тортиб олиш ҳаммаларининг юракларини эзиб юборди. Штейгер ҳам, ишчилар ҳам ҳали тирик бўлишса-да, лекин ҳаммаёқлари куйиб, улардан жизғанак бўлган гўшт ҳиди келарди. Улар ўт ютганлари учун бўғизлари куйиб кетганди, улар тинимсиз инграб, бизни ўлдириб қўя қолинглар, дея илтижо қилишарди. Уч шахтёрнинг бири забастовка пайтида Гастон-Маридаги насосни чўкич билан охирги марта уриб дабдала қилган одам эди. Бошқа икки ишчининг солдатларга гишт

отавериб шилиниб кетган қўллари ҳали тузалмаганди. Уларни кўтариб келишаётганда ранги қув ўчган халойиқ титраб-қақшаб, йўл берди.

Бева Маэ кутиб турганди. Ниҳоят Захариянинг жасади кўринди. Унинг кийимлари куйган, аъзойи бадани қоп-қора кўмирга айланганди; бу куюк нарса одамга ўхшамасди. Боши йўқ, портлаш чоғида узилиб кетганди. Бу даҳшатли мурдаларни замбилларда кўтариб келишаркан, бева Маэ беихтиёр улар кетидан юрди: унинг қовоқлари шишиб кетганди, бироқ кўзларидан бир томчи ҳам ёш чиқмасди. Қўлида овуниб қолган Эстелла бўлиб, сочлари шамолда тўзғиб борарди. Бошига тушган кулфатлар акси юзига урганди. Посёлкада қолган Филомена ақлу ҳушини йўқотиб, кўз ёши тўкди-ю, лекин яна шу заҳоти босилиб қолди. Она эса яна ўша алпозда Рекийярга қайтиб кетаётганди; у ўглини кузатиб қўйиб, энди қизини қутқариб олишларини кутиш учун қайтиб бораётганди.

Яна уч кун ўтди. Қутқариш ишлари кулоқ эшитмайдиган қийинчиликлар билан давом этди. Уларнинг бахтига, портлаш пайтида йўл-йўлкалар кўмилиб қолмаганди. Лекин ҳавоси жуда иссиқ ва огир бўлгани учун янги вентиляторлар ўрнатишга тўғри келди. Энди кончилар ҳар йигирма минутда алмаштирилиб турди. Тобора олға силжишарди. Энди уларни ўртоқларидан ажратиб турган масофа икки метрдан ошмасди. Бироқ улар қандайдир ўч олиш туйғуси туфайли жуда ҳафсаласизлик билан ишлашарди. Жавобан тақиллатишлар тўхтаганди, бир маромда жангиллатишлар ҳам йўқ эди, чақирӣқ сигнали сираям эшитилмасди. Иш бошланганига ўн икки кун, ҳалокатга — ўн беш кун бўлганди. Шу куни қатламнинг нариги томонидан тиқ этган товуш эшитилмай қолди.

Янги бахтсиз ҳодиса монсуликларнинг қизиқишини кучайтирди. Буржуйлар қизиқиб, экскурсияга келиб туришди, шунинг учун Грегуарлар ҳам бошқалардан қолмасликка аҳд қилишди. Сайр куни белгиланди, Ворёга ўз извошларида боришга келишиб қўйишди, Энбо хоним эса ўз аравасида Люси билан Жаннани олиб борадиган бўлди. Денелен уларга ўз шахтасини кўрсатди-да, кейин улар Рекийярга ўтишиб, шахсан Негрелнинг ўзидан қутқариш ишлари қай даражада

бораётганини, уларни қутқаришга умид қилса бўлади-ми-йўқми, суриштириб билишади. Ниҳоят кечқурун ҳаммалари бирга овқатланишади.

Соат учларга яқин Грегуарлар билан уларнинг қизлари Сесиль вайрон бўлган шахта ёнига келиб, извошларидан тушганларида, у ерда турган Энбо хонимни кўришди. Энбо хоним эғнида очиқ зангори кўйлак бўлиб, февраль қуёшининг заиф нурларидан сақланиш учун соябонини очди. Тиниқ ҳаво баҳорга ўхшарди. Жаноб Энбо билан Денелен ҳам ўша ерда эдилар. Энбо хоним Денеленнинг канални тўсиш нақадар қийин бўлгани ҳақидаги гапларини паришонхотирлик билан тингларди. Альбомини қўлидан қўймайдиган Жанна даҳшатли манзарадан илҳомланиб, сурат чизишга тушиб кетди, Люси бўлса, унинг ёнига, вагонетка парчасига ўтириб олиб, «вой, жуда зўр-ку», дея ҳайратланиб қичқирарди. Тўғон ҳали битмаган бўлиб, кўпикланаётган сув ундан ошиб, қулаган коннинг катта ўпқонига тушиб турарди; шунга қарамай кратер секин-аста тозалана борди, сув ерга шимилиб, даҳшатли туби кўриниб қолди: бу жой шундай мовий, майин ҳавода лойга кўмилиб кетган шаҳарнинг ифлос харобасига ўхшарди.

— Шуни кўриш учун ташвиш тортиб юрганимизни-я! — ҳафсаласи пир бўлиб хитоб қилди жаноб Грегуар.

Соғлом, гулдай яшнаб турган Сесиль шундай тоза ҳаводан нафас олиш имконияти туғилганидан қувониб, очилиб кетди-да, ҳазиллаша бошлади. Энбо хоним эса, башарасини бужмайтириб гўлдиради:

— Буни нимаси чиройли экан!

Иккала инженер хахолаб юборишди. Улар сайрчиларни қизиктириш учун насос билан поя қоқадиган механик асбобнинг қандай ишлашини ҳикоя қилишга тушиб кетишди. Бироқ хонимларнинг кўнглига чироқ ёқса ёримасди. Шахта тикланиб, ундаги сув тамоман чиқариб ташлангунча насослар йиллаб, — олти, балки, етти йил, — ишлаши кераклигини билиб, титраб кетишди. Йўқ, яхшиси бошқа нарсалар ҳақида ўйлаш керак, бўлмаса бу даҳшатлар тушингга ҳам киради.

— Қани, кетдик, — деди Энбо хоним извош томон юраркан.

Жанна билан Люси қаршилиқ қилишди. Дарров-а? Хали сурат битмади-ку! Улар кечқурун оталари билан овқатга етиб боришни ваъда қилиб, қолишмоқчи бўлишди. Жаноб Энбо аравага хотини билан ўтирди, у Негрелдан ишларнинг боришини сўраб билмоқчи эди.

— Майли, сизлар бора қолинглар,— деди жаноб Грегуар.— Биз ҳам кетларингдан етиб борамиз, фақат беш минутгина посёлкага кириб чиқишимиз керак... Бора қолинглар, бора қолинглар, биз Рекийярга сизлардан олдиноқ етиб борамиз.

У Грегуар хоним билан Сесилнинг орқасига ўтирди. Биринчи извош канал қирғоғидан кетди, иккинчиси эса секин тепаликка кўтарила бошлади.

Экскурсия хайру саховат билан тугаши керак эди. Захариянинг ўлиmidан сўнг Грегуарлар бутун округ гапираётган Маэлар хонадонининг фожиали тақдирига ачина бошлагандилар. Улар отага, бу қароқчига, солдатларнинг қотилига ачинмасдилар; уни қашқирни отгандек отишга тўғри келди. Уларнинг раҳмларини келтираётган она эди — бечора аёл эрининг ўлиmidан кейин ўғлидан ажралди, энди ер тагидан қизининг ўлигини топсам ажаб эмас, бу кулфатлар,— қайнотасининг чўлоқлиги, ўғлининг кўчкида қолиб, оқсаб юриши, шунингдек забастовка пайтида қизалогининг очдан ўлганлигини ҳисобга олмаганда ҳам,— унинг бошига тушди: Албатта, бу хонадон ниятлари бузуқлиги учун ҳам шу фалокатларга учради, бироқ Грегуарлар даргоҳлари кенглигини, ҳамма нарсани унутишга, ҳаммани кечирмоқчи бўлганликларини кўрсатишга қарор қилдилар, агар хайр-садақани ўзлари элтиб берсалар, бу сахийликнинг энг яхши ифодаси бўлади. Извош ўриндиқларидан бирининг тагида ҳафсала билан ўралган иккита тугун бор эди.

Бир кампир кучерга иккинчи маҳалладаги ўн олтинчи ҳовлини, Маэлар уйини кўрсатиб қўйди. Пакетларни кўтариб олишган Грегуарлар извошдан тушишди; лекин улар эшикни беҳуда тақиллатишди; кейин тоқатлари тоқ бўлиб, муштлари билан дўкиллатишди, бари бир ҳеч ким жавоб бермади. Гўё ўлим бу уйни шипшийдам қилиб кетгандай, анчадан бери унда ҳеч ким турмайдигандек бефайз, хунук эди.

— Ҳеч ким йўқ,— деди ҳафсаласи пир бўлган Сесиль.— Жуда хунук бўлди-да! Энди нима қиламиз бу дардисарларни?

Қўққисдан қўшни уйнинг эшиги очилди-да, Левакнинг хотини кўринди.

— Э, келинлар, яхшилар, мени кечиринг, ойим-қиз!.. Қўшнимни кўрмоқчимидингиз? У йўқ, Рекийярда.

Хотин тинмай шақиллаб, бўлган воқеаларни қайта-қайта гапирар, бир-бирига ёрдам бериш керак, дер эди; оналари бориб, шахта тагида қолганлар ёнига йўл очишларини кутиб ўтириши учун унинг болалари — Ленора билан Анрини олиб қолибди. Унинг кўзи пакетларга тушди-ю, бева қолган бахтсиз қизи, ўзининг қашшоқлиги ҳақида гапирар кетди; ҳасаддан кўзлари ёна бошлади. Сўнг у истар-истамас гўлдиради:

— Калит менда. Балки жаноблар кириб ўтамиз, дейишса... Уйда ёлғиз бобо қолган.

Грегуарлар ҳайратланиб, бир-бирларига қараб олишди. Бобо бор, қандай қилиб? Ахир ҳеч ким жавоб бермаганди-ку. Демак, у ухлаётган бўлса керак-да? Левакнинг хотини эшикни очганда уларнинг кўзларига ташланган манзара лол қолдириб, остонада тўхташга мажбур қилди.

Ўлмас бобо бақрайганча бир нуқтага тикилиб, совуқ камин олдидаги стулда қимир этмай ўтирарди. Яланғоч деворлар хонани катта кўрсатарди; хонада каккули соат ҳам, илгарилари хонага файз бериб турган, локланган қарагай мебеллар ҳам йўқ эди. Намдан кўкариб кетган деворларда ақиқдай лаблари сиполик билан жилмайиб турган император ва маликанинг суратлари қолган эди холос. Ақли заифлашган чол қимир этмади, ҳатто эшик очилиб, хонага ёруғлик тушганида ҳам кипригини қоқмади, афтидан, кирганларни сезмади шекилли. Оёғи остида мушукларга қўйиладиган тоғорага ўхшаш бир тоғора кул турарди.

— Эътибор қилмай қўя қолинглар, иззат-ҳурматни билмайди,— эҳтиром билан деди Левакнинг хотини.— Миясига бир бало бўлган. Икки ҳафтадан бери аҳволи шу.

Лекин шу пайт Ўлмас бобонинг аъзойи бадани титраб, худди қорнидан чиқаётгандек, хириллагани эши-

тилди. Чол кулга қора балғам туфлади: бу унинг шахтада ютган кўмир тарди эди. Кейин у яна қимир этмай ўтираверди, вақти-вақти билан туфлаш учун қимирлаб қўярди холос.

Таъблари хира бўлган Грегуарлар ўз нафратларини босиб, жилла курса бир неча оғиз дўстона ва кўнгилни кўтарадиган сўз айтишга ҳаракат қилишди.

— Нима бўлди, бобо,— деди жаноб Грегуар,— бу дейман, шамоллаб қолипсиз-да?

Деворга тикилиб ўтирган чол қайрилиб ҳам қарамади. Яна оғир жимлик чўкди.

— Унга сутчой берилса бўлармиди,— деб қўшиб қўйди Грегуар хоним.

Чол индамай ўтираверди.

— Дада, биласизми,— бидирлаб деди Сесиль, — ахир бу майиб одам ҳақида гапиришганди-ку бизга, кейин эсимиздан мутлақо чиқиб кетибди-да...

Сесиль хижолат бўлиб, жимиб қолди. У стол устига шўрва билан икки шиша винони қўйди-да, бошқа тугунни оча бошлади, ундан бир жуфт катта бошмоқни олди. Бу совға бобога аталганди. Қиз ҳар қўлига биттадан бошмоқни олиб, бечора чолнинг шишиб кетган катта оёқларига разм солди, чолнинг бу оёқлари энди ҳеч қачон боса олмасди.

— Ҳа! Бу бошмоқ бир оз кечикиб келди-да, а ота-хон?— деб гап бошлади яна Грегуар нохуш вазиятни юмшатиш учун.— Ҳечқиси йўқ, керак бўлиб қолади.

Ўлмас бобо ҳеч нимани эшитмай, жавоб ҳам бермай, совуқ, бездек башарасини бужмайтириб ўтираверди.

Шунда Сесиль секингина бошмоқни девор ёнига қўйди; лекин эҳтиёт қилганига қарамай, бари бир унинг миҳлари тақиллаб кетди; бошмоқлар бу хонада тамоман ортиқчадай эди.

— Мана, ҳали кўрарсиз, у раҳмат ҳам демайди!— хитоб қилди Левакнинг хотини бошмоққа ҳасад билан тикиларкан,— у ёгини сўрасангиз, маймунга кўзойнак совға қилгандай гап бу.

Левак хоним зора уйимга олиб кириб ийдирсам, деган умидда зўр бериб Грегуарларни уйига таклиф қилаверди. Ниҳоят у баҳона топди: у Анри билан Ленорани мақтаб, жуда ширин, ақлли бола бўлишган-

да, бирор савол бериб қолгудек бўлсангиз, худди катталардек жавоб беришади, улуглар нимани исташса, ҳаммасини айтиб беришади, деди.

— Бир минутгагина кириб чиқамизми, қизим?— сўради ота бу ердан кетиш имкони топилганидан қувониб.

— Яхши, мен ҳозир кетларингдан чиқаман.

Сесиль Улмас бобо билан қолди. У титрарди, лекин нимадир унинг қўл-оёғини боглаб қўйганди, шу боисдан Сесиль жойидан жиллолмай қолди! Назарида чолни таниётгандек эди; лекин катта, қорайиброқ қолган бу оқиш юзни қаерда кўрган экан? Бирдан у ҳаммасини эслади: шовқин солаётган оломон ўртасида биров совуқ қўллари билан бўйнидан бўғгани кўз олдига келди. Бу ўша эди, Сесиль бу одамни таниди-ю, унинг тиззасига ташланган қўлларига қаради,— бу ишчи ёши анчага бориб қолган бўлса ҳам, қўллари қаттиқ сиққан эди. Энди Улмас бобо уйғониб, Сесилни кўргандек бўлди. У хира кўзлари билан Сесилга разм солди; чолнинг ёноқлари қизарди, лаблари асабий учиб, оғзидан қоп-қора сўлак оқди. Улар бир-бирига тикиларди: қиз гул-гул очилганди, у бутун авлодлари сингари узоқ вақт ишга қўл урмагани ва давлатидан тўлишиб, тирсиллаб турарди, чол эса истиқсо касалидан шишиб, асрий меҳнат ва очликдан азоб чеккан аждодлар насли.

Ун минутлардан кейин Сесиль мунча ҳаяллашиб қолдийкин, дея ажабланиб, Маэникига қайтиб келган Грегуарлар чинқириб юборишди: уларнинг бўғиб ўлдирилган, юзи кўкариб кетган қизлари ерда чўзилиб ётарди; унинг бўйнида улкан бармоқларнинг қип-қизил излари кўриниб турарди. Шол оёқларида ўзини тутиб туролмаган Улмас бобо қизнинг ёнига ағдарилиб тушиб, қайтиб ўрнидан туролмаганди. Панжалари ҳамон ёзилмаган қария кўзларини бақрайтириб, ҳаммага шуурсизлик билан қарарди. У йиқилаётганида тоғорани синдириб, кулни тўккан, ҳаммаёқни ифлос қилган эди. Бошмоқлар эса қандай қўйилган бўлса, девор тагида шундай турарди.

Бу воқеа қандай содир бўлганини аниқ билиб бўлмасди. Нима учун Сесиль чолга бунчалик яқин келдийкин? Ўз стулидан қимирлай олмайдиган Улмас

бобо қандай қилиб қизнинг томоғидан тутдийкин? Афтидан, чол уни бўғаётганида шунчалик қутуриб, қизни шунчалик қаттиқ бўғганки, овози ҳам чиқмай қолган, қиз сўнгги бор хириллаётганида у билан бирга ағдарилиб тушган. Ўрта девор юпқа бўлса ҳам қўшни уйга тиқ этган товуш ҳам, фарёд ҳам эшитилмаганди. Чол қизнинг оппоқ бўйинини кўргану телбалиги кўзиб, одам ўлдиргиси келиб қолгандир, деб тахмин қилишга тўғри келарди. Улай-ўлай деб турган чолнинг шу қадар ваҳшиёна иш қилиши ҳаммани ҳайратга солди: ахир у софдиллик билан ҳаёт кечириб келди, молдек қобил эди, янги ғояларга қаршилик қиларди холос. Унинг бутун вужудини секин-аста заҳарлаб келиб, бирдан ғазабини бундай ловиллатиб юборган нарса нима экан? Қўрқув бу жиноятни онъсиз равишда қилинган деб ҳисоблашга мажбур этарди. Бу, телбанинг жинояти эди.

Грегуарлар тиз чўкиб, ғам ўтида куйиб-ёниб, доду фарёд қилишарди. Кута-кута не ҳасратда кўришган, ҳаддан ташқари талтайиб ўсган, ухлаб ётганида тепасига келишиб, нафасларини ичларига ютганларича томоша қилишадиган сеvimли қизлари ўлиб ётса-я! Уларнинг фикрича, бўёқиш тузукроқ еб-ичмадиям, ҳаммиша озиб-тўзиб юрарди! Уларнинг ҳаётида маза-матра қолмади; қизлари бирга бўлмагандан кейин яшашнинг нима кераги бор энди?

Левакнинг хотини бўлса, эс-ҳушини йўқотиб қичқирарди:

— Аҳ, ярамас чол! Қилган ишини-я! Бу ярамас шундай қилади, деб ким ўйлабди... Маэ бўлса кечқурун келади! Югуриб бориб чақириб келсаммикин?

Ота бидан она ҳеч қандай жавоб бермади.

— Хўш, қалай? Чақириб келсам, чакки бўлмайди... Кетдим!

Лекин кампир чиқиб кета туриб, бошмоқни олмоқчи бўлди; бутун посёлка ғулғулага тушганди, анча-мунча одам тўпланганди,— бари бир бошмоқни ўғирлаб кетишади. Бунинг устига Маэлар хонадонида бу бошмоқни киядиган эркак ҳам қолмади-ку, шу боисдан у бошмоқни олиб кетди. Бошмоқ Бутлуга лойиқ келиши керак.

Эр-хотин Энболар Рекийярга етиб келишиб, у ерда

Негрель билан учрашишди-да, Грегуарларни узоқ кутишди.

Шахтадан чиқиб келган инженер уларга қидирув ишларининг боришини муфассал гапириб берди, тахминича, кечкурунга бориб, тутқинлар турган жойга етишса керак, фақат мурдаларнигина олиб чиқишар, чунки шахта аввалгидек жимжит экан. Негрелнинг орқасида ўтирган Маэ хоним бу гапларни эшитиб, оппоқ оқариб кетди; бирдан Левакнинг хотини югуриб келди-ю, унга бўлган воқеани гапириб берди.

Маэ жаҳл билан қўлини силтаб қўйди-ю, лекин қар қалай унинг кетидан кетди.

Энбо хоним ҳушидан кетди. Қандай даҳшат-а! Бечора Сесиль! Эрталаб ҳам шундай хушчақчақ эди, бир соат бурун ҳам ўйнаб-кулиб юрувди! Жаноб Энбо хотинини Мук бобонинг ярим хароба уйига олиб борди. У қовушмаган қўллари билан хотинининг кўйлаги тугмаларни ечаркан, корсажидан анқиб турган мушканбардан кўнгли кетарди. Кўзлари жиққа ёшга тўлган Энбо хоним тўйни пучга чиқарган ногаҳоний ўлимни эшитиб, хангу манг бўлиб қолган Негрелни маҳкам кучоқлаб олганди; эр бўлса безовта қилаётган азобдан қутулганини сезиб, икковига тикилиб турарди; бу бахтсиз ҳодиса айни муддао бўлганди. У жияни ўрнига кучернинг айланиб қолишидан қўрқиб, ёнида Негрелни олиб қолишга жазм этди.

V

Шахта тагида қолдириб кетилган шўрпешоналар қўрқувдан дод-фарёд қилардилар. Энди сув уларнинг белига чиққанди. Сув шовқини уларнинг қулоқларини битириб, қолган-қутган қопламанинг ағдарилиб тушиши эса қиёмат қойимга ўхшарди. Булар етмагандек, отхонага қамаб қўйилган отларнинг худди бўғизланган жоңиворнинг даҳшатли жон талвасасида хириллашига ўхшаш бетоқат кишнашлари уларни ақлдан оздирарди.

Мук Ўктамни қўйиб юборди. Қари от титрар, кўзлари қинидан чиқиб, сувга қарар эди; сув тобора кўтарилиб борарди. Ана-мана дегунча юк ортиш хонаси сувга тўлганидан кўкимтир сувда ҳамон шифтда ёниб турган учта қизил фонарнинг акси кўринди. Қўққис-

дан баданига муздек совуқ тегиб сесканиб кетган от тўрт оёқлаб депсинди-да, жонҳолатда чопиб кетди ва қоронғи йўллардан бирига кириб, кўздан ғойиб бўлди.

Шундан кейин одамлар нима қилиб бўлса ҳам қочиб қутулиш фикрига келиб, от кетидан югура бош-лашди.

— Бу ерда нима ҳам қилардик!— деб қичқирди Мук.— Рекийяр орқали чиқиб олишга уриниш керак.

Энди уларга агар ўпирилиш бўлиб, йўлларни тўсиб қўймаган бўлса, эски кон орқали чиқиб олармиз, деган фикр қанот бағишлади. Йигирма кишининг ҳаммаси турнақатор бўлиб, сув ўчириб қўймаслиги учун лампочкаларини баланд кўтарганларича югуришди. Уларнинг бахтига йўлак нишаб экан; одамлар икки юз метрча оқимга қарши юришди, энди сув кўтарилмади. Уларнинг жонсарақ дилларида кўмилиб ётган хурофий фикрлар уйғонди; улар ерга сигина бош-лашди, чунки ер шубҳасиз, қон томирларини кесганлари учун шу жойларидан қон сачратиб, қасос олаётган эди. Бир чол шахтадаги инсу жинсларнинг раҳм қилиши учун бармоқларини букиб, пичирлаб унутилган дуоларни ўқирди.

Биринчи чорраҳадаёқ уларнинг фикрлари айри чиқди. Отбоқар сўл томонга юрмоқчи бўлди, бошқалар эса ўнг томондан яқин, деб ишонтиришарди. Тортишиб, бир минут вақтни бой беришди.

— Э, менга деса ўлиб кетмайсанларми! Менга нима!— тўнғиллаб хитоб қилди Шаваль.— Мен бу ёқдан кетаман!

У ўнгга бурилди; ўртоқлардан икки киши унга эргашди. Бошқалар эса бутун умрини Рекийяр қаърида ўтказган Мук бобо кетидан югуриб кетаверишди. Шунга қарамай Мукнинг ўзи ҳам қаёққа бурилишни билмай иккиланиб қолганди. Ҳамма эс-ҳушини йўқотиб қўйганди, ҳатто кекса шахтёрлар ҳам штольняларни танимамай қолишганди. Улар ҳар бир йўл айланишида тўхташиб, қаердан юрган маъқул, дея ўйланишарди.

Этъен ҳаммадан кейинда югурарди, — уни Катрина алаҳситарди, — қиз қўрқув, ҳорғинликдан оёқларини боса олмасди. Этъен ҳам Шаваль тўғри йўлни танлади, деб ўнгга бурилмоқчи бўлди-ю, бироқ ғанимнинг ор-

қасидан югургандан кўра, шахта тагида қолиб кетишни афзал кўрди. Бунинг устига одамлар тобора камайиб борарди, ўртоқлардан бир нечаси яна қаёққадир бурилди, энди Мук кетидан борувчилар еттитагина қолди.

— Бўйнимга ёпишиб ол, сени кўтариб кетаман,— деди Этьен бутунлай юролмай қолган Катринага.

— Йўқ, мени ўз ҳолимга қўй,— мингиллаб деди қиз,— ортиқ юролмайман, бундан кўра ўлиб қўя қолган яхши.

Улар бошқалардан эллик метрча қолиб кетишди; Этьен уни қаршилиқ қилишига қарамай қўлига кўтариб олган ҳам эдики, бирдан йўлак ғосиб тушди-ю, улкан тупроқ уюми уларни ўртоқларидан ажратиб қўйди. Тошқин жинсларни ялаб, ҳаммаёқ ўпирилиб тушаётганди. Орқага қайтишга тўғри келди. Энди улар томонларни бутунлай аниқлай олмай қолишди. Ҳаммаси тамом: Рекийяр томондан чиқиб олиш фикридан қайтишди. Энди уларнинг ягона умидлари штольняларнинг юқори қаватига чиқиб олиш эди, сувжамайса, эҳтимол, уларни қутқариб олишар.

Ниҳоят Этьен Гийом тармоғини таниди.

— Шунисига ҳам шукур! Жин урсин, энди лоқал қаердалигимизни биламан-ку! Биз тўғри йўлдан юрган эканмиз, лекин энди тамом бўлдик!.. Менга қара, тўғрига юрамиз-да, шахтанинг асосий йўлидан юқорига чиқиб оламиз.

Сув уларнинг кўкрақларигача чиқди, Катрина билан Этьен жуда секин юришарди. Чироқлари борида унчалик диққат бўлишмаганди. Этьен мойни тежаб, кейин уни бошқасига қуйиш мақсадида чироқларнинг бирини ўчирди. Улар асосий йўлга етишганда, шовқинни эшитиб, орқаларига қайрилиб қарашди. Нима бу? Наҳотки ташқарига чиқишга муваффақ бўла олмаган ўртоқлари қайтиб келишган бўлишса? Узоқдан хириллаган товуш эшитиларди, лекин улар ифлос кўпикларни ўз томонларига ҳайдаётган бу қандай бўрон эканлигига тушуна олмасдилар. Катрина қоронғиликдан улар томон учиб келиб, тахталар орасида илиниб қолган қандайдир улкан оқиш нарсани кўриб, қичқириб юборди.

Бу Уктам эди. От кўтарма машина олдидан чопиб

келиб ҳамма йўлакларда елиб юрарди. От худди ўзи ўн бир йил яшаган бу ерости шахрида йўлни яхши биладигандай эди, унинг кўзлари бу абадий зулматда ҳам яхши кўрарди. От бошини чўзиб, оёқларини узоққа ташлаб, тор йўлаклардан чопар эди, баъзи жойларга улкан гавдеси базўр сигарди... Йўлак кетидан йўлак келар, чорраҳалар, шох йўллар учрар, лекин от иккиланмасдан чопар эди. От қаёққа чопяпти ўзи? Балки ўша ёшлигида кўрган жойларига, ўзи туғилиб ўсган Скарп дарёси бўйидаги тегирмон олдига, осмонда улкан ёритқичдек ёниб турган, сал-пал эсида қолган қуёвга интилаётгандир. Жонивор яшашни истарди, ёнликда кўрганлари эсига тушиб, яна ўша текислик ҳавосидан нафас олгиси келарди, бу эса отни бирон ердан бирон тирқиш топиб, иссиқ ҳавога, ёруғликка чиқиш учун олға бошларди. От аввалгидек тақдирига тан бериб қараб турмай, типирчилаб қолганди: уни кўр қилиб қўйган шахта энди ҳалок қилмоқчи эди. Изма-из қувиб келаётган сув сағрисиға томчилар сачратиб, биқинларига урилаётганди. Бироқ от ичкари кириб борган сари йўлаклар торайиб, шифтлари пастлашиб, деворлари силжирди. Шунга қарамай от чопарди, терисини шилдириб, қопламада парча-парча этларини қолдирарди. Назарида шахта ҳаммаёғидан қисиб келаётгандек эди.

Ўктам Этъен билан Катрина ёнигача чошиб келди; улар жониворнинг улкан тошлар орасида қисилиб, ҳансираётганини кўришди. От қоқилиб, олдинги оёқларини синдириб олди. От бор кучини тўплаб, яна бир неча метр судралиб борди, лекин танаси тор жойдан ўтмади. Ўктам қонга беланган бошини кўтариб, чиқиб кетиш йўлини изларди. Сув тез кўтарилаётганди, шу боисдан жонивор отхонада ўлган отларга ўхшаб, хириллаб кишнади. У жон талвасасида уринарди. Қари, мажруҳ жонивор ўрнидан қўзғалолмай, ер қаърида, чуқур жойда ўзини у ёқдан-бу ёққа уради. Азобланаётган отнинг жонҳолатда кишнаши тинмасди, сув энди ёлини ҳам кўмганди, от эса оғзини ёпмай кишнади. Худди тўлдирилган бочка товушига ўхшаш хириллаш эшитилди-ю, кейин ҳаммаёқ жимжит бўлиб қолди.

— Э, худойим-ей! Мени олиб кет! — деди Катрина

хўнграб.— Э, худо! Мен кўрқаман! Ўлишни хохла-майман!.. Мени олиб кет! Олиб кет!

Катрина ўлимни кўрганди. Қопламанинг вайрон бўлиши, шахтани сув босиши — ҳеч нарса Ўктамнинг ўлими олдидан кишнашидек ўтакасини ёрмаган эди. Қиз бу товушни ҳамон эшитар, қулоқлари шанғиллар, аъзойи бадани қалтирар эди.

— Олиб кет мени! Олиб кет!

Этъен уни қўлига кўтариб олди-да, олиб кетди. Бу ишни жудаям вақтида қилган экан. Улар елкаларигача ҳўл бўлиб, қувурга кириб олишди. Этъен доимо қизни ушлаб бориши керак эди, чунки тўсинларни ушлашга Катринанинг кучи етмасди. Катрина уч марта Этъеннинг қўлидан чиқиб, пастга, денгиз тубига, оёқлари остида қутуриб чайқалаётган сувга тушиб кетай деди. Биринчи йўлакка етганларйда бир неча минут дам олишди: йўлакни ҳали сув босмаганди. Лекин сув яқинлашаётгани учун яна баландроққа чиқишга тўғри келди. Улар бир неча соат йўлакдан йўлакка ўтиб, юқорига кўтарилишди. Улар олтинчи йўлакка етганларида қандайдир умид туғилди: назарларида сув маълум даражада юқори кўтарилиб, тўхтаб қолгандек эди; бироқ кўп ўтмай сув янада тез кўтарилди бошлади. Улар еттинчи йўлакка, кейин саккизинчи йўлакка кўтарилишди. Яна биттагина йўлак қолди, унга етишганларидан сўнг хавотирланиб, сувнинг сантиметрма-сантиметр кўтарилишини кузата бошлашди: борди-ю, сув тинмай кўтарилверса, улар ҳам тепадан тошу тупроқ босиб, сув ичида қолиб ўлган от каби ўлишлари керак эди.

Ҳар минутда бирон ердан ўпирилиш шовқини эшитиларди. Бутун шахта дабдала бўлиб, унинг заиф ички тиргаклари бемисл оқим босимига дош беролмай қулаб тушаётганди. Йўлак охирида тўпланиб қолган сиқиқ ҳаво жинсларни парчалаб, тош-тупроқларни ағдар-тўнтар қилиб, даҳшатли портларди. Ерости ҳалокати қадим замонларда тоғ ва водийлар қиёфасини ўзгартириб юборган асов тошқинлар каби даҳшатли гулдурарди.

Катрина бу тўхтовсиз вайронгарчиликларни кўриши билан эс-ҳушидан айрилиб, илтижо билан қўлларини кўксига қўйди-да, шу сўзларни такрорлай-верди:

— Мен ўлишни истамайман!.. Мен ўлишни истамайман!

Этьен уни юпатиш учун, сув камая бошлади, деб ишонтиришга ҳаракат қилди. Улар камида шахтада олти соат адашиб юришди, албатта, уларга ёрдам бериш учун одамлар ошиқишаётгандилар. Этьен тахминан олти соат дерди, чунки улар вақт тўғрисида аниқ тасаввурга эга эмасдилар. Ҳақиқатда эса улар Гийом тармоғида кун бўйи бўлишганди.

Улар шалаббо бўлиб, совуқдан дағ-дағ титраб, ерга ўтиришди. Катрина уялмай кўйлагини ечиб, сиқди; кейин устимда қурисин, деб яна кийиб олди. У оёқ-яланг бўлгани учун Этьен бошмоғини ечиб унга кийгизди. Энди улар кутишлари мумкин эди, шунинг учун лампа пилигини пасайтириб, милтиллашиб кўйишди. Шундагина иккови ҳам очлик ичларини таталаётганини сезишди,— бунгача улар ўзларини ҳам унутиб қўйгандилар. Ҳалокат пайтида улар нонушта қилиб ололмагандилар, фақат ҳозиргина сувда бўкиб, деярли бўтқа бўлиб қолган бир бурда нонлари борлигини эсладилар. Катрина Этьенга ўз улушини зўрлаб едирди. Катрина нонни еб бўлгач, шундоқ совуқ ернинг ўзига чўзилиб, уйқуга кетди. Этьен эса, уйқусизликдан қийналиб, унинг ёнида қўллари билан бошини қисиб, бир нуқтага тикилганча ўтирарди.

Этьен шу кўйи қанча вақт ўтирганини айта олмасди. Мана, у рўбарўсидаги чоҳда қорамтир оқим бил қиллаб чиқаётганини яна пайқаб қолди. Аввалига сув йўлак бўйлаб ингичка камардек бўлиб, илондек ўрмалаб келди, кейин қайнаётган кўпик кўринди, кўп ўтмай сув улар ўтирган жойга кўтарилди: ухлаб ётган қизнинг оёқлари сув ичида қолди. Лекин Этьен уни уйғотишга журъат этмади, тошдек қотиб ухлаб, дам олаётган кишини уйғотиш шафқатсизлик бўлади: балки Катрина шу топда қуёшни туш кўраётгандир. Қаёққа ҳам қочишарди? Этьен ўйлаб-ўйлаб, охири тармоқнинг шу қисмидаги қия штрек юқори юк ортиш хонасига туташини эслади. Бу қутулиш йўли эди. Этьен Катрина кўпроқ ухлаб олиши керак, деган қарорга келиб, уларни бу ердан ҳам ҳайдайдиган сувнинг кўтарилишини кузатди. Ниҳоят у Катринани оҳистагина кўтариб олди, қиз чўчиб тушди:

— Э, худойим-ей! Ростми!.. Яна бошланяпти!

Қиз қаердалигини пайқади-да, ажали яқинлашиб қолганидан кўрқиб қичқириб юборди.

— Узингни бос,— пичирлаб деди Этьен.— Мен чиқиб олишимизга ишонаман.

Қия штретка етиб олиш учун энгашиб, елкагача сувга ботиб боришга тўғри келди. Яна кўтарилиш бошланди, янада хавфлироқ, ҳаммаёғига тахта қопланган узунлиги юз метр келадиган торгина йўлакдан бориш керак эди. Аввалига улар пастдаги аравани маҳкам боғлаб қўйиш учун арқон тортмоқчи бўлишди: чунки кўтарилаётганларида бошқа арава тушиб келса, мажақлаб юбориши мумкин эди. Лекин қандайдир тўсиқ механизмни ҳаракатга келтиришларига халақит берарди. Улар халақит бераётган арқондан фойдаланишга журъат этолмай, тирноқлари кўчиб кетса ҳам таваккал қилиб силлиқ тахталарга тармашишди. Этьен Катринанинг кетидан, унинг қонаб кетган қўллари сирганганда боши билан маҳкам тутиб қолиб, олға силжиди. Бирдан улар тушиладиган йўлни тўсиб қўйган синган ходаларга дуч келиб қолишди. Бу ерга тупроқ сурилиб тушиб, ундан у ёғига боришга қўймасди. Хайриятки бу ерда эшик бор экан: улар шу эшикдан қўшни штоल्याга ўтишди.

Тўсатдан қаршиларида лампочка нури ялт этиб кетди: улар ҳанг-манг бўлиб қолишди. Аллаким жон-қолатда уларга бақирарди:

— Демак, менга ўхшаган аҳмоқлар ҳам бор экан-да!

Улар Шавални танишди. У қия штретк ўпирилганда бу ёққа қочиб келганди. Унинг кетидан югурган икки ўртоғи бошларини мажақлаб олиб йўлда ўлишганди. Тирсагигина лат еган Шаваль эса юрак бетлаб мурдалар ёнига эмаклаб борган, уларни тимирскилаб лампочкалари билан нонларини олган эди. Шаваль қайтиб қочиб келаётганида орқасида йўлак ўпирилиб, босиб тушди. У шу ондаёқ ер остидан чиқиб қолган бу одамларни нонимга шерик қилмайман, деб жиддий аҳд қилди. Яхшиси уларни ўлдиради. Буларнинг кимликларини билган Шаваль ғазабидан тушди-ю, заҳархандалик билан кула бошлади:

— Э, бу сенмидинг, Катрина! Яна нима бўлди? Яна олдимга келдингми? Майли! Майли! Начора, бирга ўладиган бўлибмиз-да!

Шаваль ўзини Этьенни сезмаганликка солди. Этьен эса, учрашувдан таъби хира бўлиб, пинжига тиқилиб турган қизни ҳимоя қилиш мақсадида қимирлаб қўйди. Бироқ тақдирга тан беришга тўғри келди. Шу боисдан Этьен бир соат бурун яхшилик билан ажралишиб кетган, энди учрашган кишидек шунчаки сўради:

— Чоҳ тубини яхшилаб кўрдингми? Штольнялар орқали ўтсак бўлармикин?

Шаваль мазах қилишда давом этди:

— Э, бўлмасам-чи! Штольнялар эмиш! Уларнинг ҳаммаси ўпирилган, биз энди қопқонга тушганмиз... Лекин сен шўнгишга уста бўлсанг, қия йўлакдан чиқиб олишинг мумкин.

Ҳақиқатан ҳам сув кўтарилиб борарди. Орқага қайтишга йўл йўқ эди. Шаваль қопқонга тушганмиз, деб тўғри айтган экан: йўлакнинг охири икки томонидан босиб тушганди. Чиқиб оладиган битта ҳам йўл қолмаганди; учалови тирик кўмилганди.

— Демак, қоласанми?— мазах қилиб сўради Шаваль.— Билсанг, шундай қилганинг дуруст. Менга тирғилмасанг, ҳатто сен билан гаплашмайман ҳам. Бу ердаги жой иккимизга ҳам етади, агар келиб қутқариб олишмаса, бунга ақл бовар қилмайди, қай биримиз аввал ўлишимизни ўшанда кўрамиз.

— Лекин, борди-ю, тақиллатсак, балки эшитишар?— эътироз билдирди Этьен.

— Э, тақиллатавериб чарчадим... Энди сен уриниб кўр, манави тош билан тақиллат!

Этьен Шаваль тақиллатаверганидан ейилиб кетган бир бўлак қумтошни олди-да, тармоқ деворига уриб, шахтёрларнинг қақирув сигнаolini бера бошлади. Кейин у қулоғини тутиб, эшита бошлади. У ўжарлиги тутиб, бу ишни йигирма мартача такрорлади. Жавоб бўлмади.

Шу чоҳ Шаваль сохта совуққонлик билан борини кўз-кўз қила бошлади. У учала лампочкасини девор тагига қўйди — биттаси ёниб турар, бошқалари эҳтиёти шарт, деб ўчириб қўйилганди. Кейин у бир парча тахта устига икки бурда нон қўйди: бу унинг бор егулиги эди; агар у ақл билан иш тутса, икки кунга етади. У ўгирилиб сўз қотди:

— Менга қара, Катрина, жуда оч қоладиган бўлсанг, сенга ярмисини беришим мумкин.

Қиз индамади. Бошига тушган бу кўргиликлар етмаганидек, яна шу икки одам орасига тушиб қолди.

Вақт бир азобда ўтарди. Бир-бирларидан бир неча қадам нарида ўтирган Шаваль билан Этьен чурқ этиб оғиз очмасди. Шавалнинг гапига мувофиқ Этьен лампочкасини ўчириб қўйди; бу ортиқча дабдаба эди. Сўнг улар яна жим бўлишди. Катрина Этьеннинг ёнига чўзилди; аввалги жазманининг ҳадеб қарайвериши қизни ташвишлантирарди. Шу алпозда бир неча соат ўтди; сув оҳиста билқиллаб, тўхтовсиз кўтариларди; вақт-вақти билан бўлиб турган силкинишлардан йўлакларзага келарди; шахтанинг батамом вайрон бўлганлигидан далолат бериб, олисдан гумбурлаган овозлар эшитиларди. Лампочка ёниб бўлиб, иккинчисини ёқиш лозим бўлганда, улар аввалига бу ерда кон гази бўлиши мумкин-ку, деб қўрқиб кетишди. Бироқ улар қоронғиликда ўтиргандан кўра, портлаб ўлишни афзал билишди. Газ йўқ экан; улар яна ётишди, вақт аввалгидек ўтаверди.

Этьен билан Катрина аллақандай шовқинни эшитиб, бошларини кўтаришди. Шаваль тамадди қилишга тушди: у ярим бурда нон кесиб олди-да, қизиқиб кетиб, ҳаммасини бирдан ютиб юбормаслик учун секин чайнай бошлади. Улар очликдан қийналиб, мўлтиллаб кузатишарди.

— Шундай қилиб, емайман, дегин? — деди Шаваль Катринага ўчакишгандек. — Чакки қиялпсан!

Катрина, қани бер, деб юбормаслик учун ерга қаради: ичи таталаб кетаётганидан кўзларига ёш келди. Бироқ у Шавалнинг мақсади нималигини биларди; эрталабоқ унинг иссиқ нафаси бўйнига урилганини сезган эди: Катринани бошқа билан кўрган Шавалнинг юраги яна аввалгидек гумуриб кетганди. Шавалнинг қизга боққан кўзлари чакнаб турарди: Шаваль рашк ўтида ёниб, онангнинг хонанишини билан ўйнашиб юрибсан, дея айблаб, мушт туширганида унинг кўзлари ана шундай чакнаган эди. Катрина ташвишланиб, мени деб бу икки йигит ҳаммамиз ажалимизни кутиб ётган шу тор қавакда бир-бирига ташланиб қолмасайди, деб ўйларди. Э, худойим! Наҳотки

бу оламни уриш-жанжалсиз тарк этиш мумкин бўл-
маса!

Этъен Шавалдан бир бурда нон сўрагандан кўра очликдан силласи қуриб ўлишни афзал кўрарди. Ора-га оғир сукунат чўкди; лаҳзалар шу қадар секин ўтар-дики, ҳар сония йилдай туюларди. Бир хилда ўтаётган минутлар уларга ҳеч қандай умид бахш этмасди. Улар кун бўйи бирга ўтиришди. Иккинчи лампочка ўчди, учинчисини ёқишга тўғри келди.

Шаваль ноннинг иккинчи бурдасини олди-да, тўн-ғиллаб деди:

— Кел, деяпман, тентак!

Катрина титраб кетди. Этъен уни ўз эркига қўйиб, тескари қаради. Катрина қимир этмагани учун Этъен унинг қулогига шивирлаб деди:

— Бора қол, оппоқ қиз!

Шундан кейин қизнинг зўр-базўр тутиб турган кўз ёшлари дув-дув оқа бошлади. Катрина туришга мажол-ли келмай, ҳатто оч-тўқлигини ҳам билмай, узоқ йиғ-лади. Унинг аъзойи бадани зирқирарди. Этъен эса ўр-нидан туриб, у ёқдан, бу ёққа бориб келар, фойдаси бўлмаса ҳам шахтёрлар сигналини тақиллатар, қолган умрини ўлгудек ёмон кўрган рақиб билан ўтказаёт-ганидан фиғони фалакка чиқарди. Жон таслим қилиш-дан олдин сал нари бориш учун бу ерда жой ҳам йўқ эди! Ун қадам босар-босмас яна қайтиб келиши ёки анави одамга қоқилиб кетиши турган гап эди. Улар ер юзида талашиб юришган анави ғамгин қиз эса кўп-роқ яшаганники бўлади, борди-ю, Этъен олдин ўлиб қолса, қизни ундан анави одам тортиб олади. Вақт ўтиб борарди, унинг чеки йўқдек туюларди. Мажбуран бирга туришлари тобора чидаб бўлмас даражага ета-ётганди. Ҳожатларини шу ернинг ўзида чиқараётган-ларидан ҳаммаёқ сасиб, нафас олиш оғирлашаётганди. Этъен мушти билан қатламни кўпормоқчи бўлиб, тош-кўмир жинслари устига ўзини икки марта отди.

Яна бутун бир кун ўтди. Шаваль ниҳоят Катрина ёнига келиб ўтирди-да, сўнгги ярим бурда нонини у билан баҳам кўрди. Қиз зўр-базўр нонни чайнар ва ҳар тишлам нон учун уни эркалаши керак эди. Шавал-нинг рашки қўзиб кетди: манави бегона йигит олдида қизни бағрига тортиб, муродини ҳосил қилмагунча ўлишни хоҳламай қолди. Ҳолдан тойган қиз қаршилиқ

кўрсатмади. Шаваль ниятини амалга оширмақчи бўлганида қиз инграб:

— Қўйвор, суякларимни синдириб юборасан, — деди.

Этьен титраб, ҳеч нимани кўрмаслик учун пешонасини тахтага тиради. Лекин шу ондаёқ у бир сакраб икковининг ёнига бориб қолди.

— Қўйвор уни, даюс!

— Сенинг ишинг нима? — деди Шаваль. — Ҳар қалай у менинг хотиним-ку!

У яна қизни ушлаб, маҳкам кучоқлади, лабларига сариқ мўйловини босаркан, деди:

— Бизни тинч қўй. Икковимиз бир роҳат қилайлик!

Бироқ Этьеннинг лаблари гезариб, қичқирди:

— Агар уни қўйвормасанг, бўғиб ўлдираман!

Шаваль дик этиб ўрнидан турди: у Этьеннинг овози хириллашидан ҳақиқатан ҳам бўғиб ўлдиришини тушунди. Ажал ҳам жуда имиллаяпти-да, шунинг учун улар биттамыз қолишимиз керак, деган қарорга келишди. Бу ерда, ёнма-ён абадий уйқуга кетиш насиб этган шу чоҳ тубида эски адоватлари кўзиб қолди. Жой ниҳоятда тор бўлганидан улар бир-бирларига хезланиб муштлари шилиниб кетди.

— Эҳтиёт бўл, — ўшқирди Шаваль, — энди мендан қутулиб бўпсан!

Этьен қутуриб кетди. Кўзлари қонга тўлди, жони ҳалқумига келди. У энди одам ўлдирмаса, тинчимас эди. Бу истак Этьенда беихтиёр пайдо бўлди: йигитнинг наслий иллоти кўзиган эди. У девордан оғир, катта бир бўлак шиферни кўчириб олди-да, иккала қўли билан ушлаб, жон-жаҳди билан Шавалнинг калласига солди.

Шаваль орқасига қочолмай қолди. У йиқилиб тушди: юзи дабдала бўлиб, боши пачақланган эди. Миясининг қатиғи йўлак шифтига сачради, жароҳатидан қип-қизил қон сизиб чиқа бошлади. Шу заҳоти ҳалқоб ҳосил бўлиб, унда тутаб ёнаётган лампочка чўғи акс этди. Сағанани қоронғилик босди. Ерда ётган жасад уюлиб турган қоп-қора кўмир чиқиндисига ўхшарди.

Этьен энгашиб, кўзларини катта очиб унга тикилди. Ниҳоят, муроди ҳосил бўлди, у одам ўлдирди! Хаёлидан аввалги кураш — мушакларида мудраётган заҳарга, бутун аждоди секин-аста йиғиб келган ичкилик

балосига қарши беҳуда кураш лавҳалари бирров лип этиб ўтди. Бироқ унинг ҳозирги мастлиги ичкиликдан бўлмай, очликдан эди,—демак, узоқ ўтмишдаги бувабувакалонларининг кайфу сафоси етарли экан. Эъён даҳшатли қотилликни қилиб қўйди-ю, тепа сочи тикка бўлиб кетди, ўз кирдикоридан виждони азоб чека бошлади; шундай бўлса ҳам ниҳоят муродига етганидан шодланган Эъённинг ҳайвоний қалби бир маромда ура бошлади. Кейин ўзидан янада кўпроқ фаҳрланди. Унинг кўзи олдига бўғзига пичоқ санчилган ўспирин солдат қиёфаси келди. Уни ёш бола ўлдирганди, мана энди у, Эъён ҳам одам ўлдирди.

Лекин Катрина қичқириб, ўрnidан туриб кетди:

— Э, худо! У ўлиб қолди!

— Ҳа, раҳминг келяптими? — гижиниб сўради Эъён.

Қаддини зўрга кўтариб турган Катрина бир нима деб гўлдиради: кейин каловлаб бориб, Эъённинг кўксига ўзини ташлади.

— Аҳ, мени ҳам ўлдир, иккаламиз ҳам ўлайлик!

Катрина унинг бўйнига осилди, иккови бир-бирини қаттиқ қучоқлаб, ажаллари етаётганини ўйлашди. Бироқ ажалдан дарак йўқ эди, шу боисдан қўлларини туширишди. Кейин Катрина орқасини ўгириб олди, Эъён эса ўзи билан Катринанинг яшаши учун жой бўшатиш мақсадида мурдани судраб, сувга итариб юборди. Ўлик шундоқ ёнларида, оёқлари тагида ётганида сира чидаб бўлмасди-да! Улар сувнинг шалоплашини эшитиб, юзларига кўпик сачраганда титраб кетишди: демак, кавак сувга тўлипти; сувнинг йўлакдан кўтарилаётгани кўриниб турарди.

Улар яна жонларини қутқаришга тушишди. Эъён сўнгги лампочкани ёқди: унинг нури энди бир маромда тўхтовсиз кўтарилаётган сувни ёритиб турарди; мана, сув тўпиққа чиқиб, тиззага кўтариляпти. Сув кўтарилаверди, улар штольнянинг энг охирига, тепасига чиқиб олишди; бу ҳол яна бир неча соат жон сақлашларига имкон берди. Бироқ сув бу ерга ҳам етиб бориб, белларига чиқди. Улар тошкўмир қатламига суяниб ёнма-ён туришаркан, сувнинг кўпайиб боришини кузатишарди; сув оғизларига етганда масалалари ҳал бўлади. Осиб қўйилган лампочка нури жимирлаб, сув-

ни сарғиш ёритарди. Лекин лампочка ёруғи тобора хиралашиб, сув кўпайган сари торая бошлаган кичик ярим доиранигина ажратиш мумкин эди холос. Бирдан ҳаммаёқ қоп-қоронғи бўлиб кетди: сўнгги томчи мойи тугаган лампочка ўчди. Зиёсиз тун — зиндон тун бошланди; улар қайтиб ёруғ жаҳонни кўрмаслик учун шу ерда мангу уйқуга кетишлари керак эди.

— Иблис! — бўғилиб сўкинди Этьен.

Қоронғилик ютиб юбораётгандек, Катрина Этьенга маҳкам ёпишиб олди. У пичирлаб шахтёрларнинг афсусини такрорлади:

— Ажал пуфлаб лампочкани ўчиряпти!

Шунга қарамай, жон ширинлик қилиб уларни яқинлашиб келаётган хавфга қарши курашишга мажбур этди. Этьен зўр бериб лампочка дастаси билан шиферни ўя бошлади. Катрина унга тирноқлари билан кўмаклашди. Улар баланд супага ўхшаш жой қилишиб, устига чиқишди-да, шифт паст бўлганидан энгашиб, оёқларини осилтириб, ёнма-ён ўтиришди. Муздек сув энди товонларига тегарди холос, бироқ кўп ўтмай, сув тўпиқларидан ошиб, болдирларига, кейин тиззаларига етди, — сув тўхтовсиз кўтарилиб, нафас ростлагани қўймасди. Ноқулай супа ўбдан ивиди, улар сирганиб пастга тушиб кетмаслик учун ўзларини аранг тутиб ўтирардилар. Умрлари тугаб борарди, — лекин улар қимир этсалар, жонларидан айрилишлари мумкин бўлган, аъзойи баданлари қақшаётган, оч-наҳор, нонсиз, чироқсиз ўтирган бу токчада яна қанча яшашлари мумкин? Айниқса қоронғилик қийнаб юбораётганди: қоронғилик ажалнинг яқинлашаётганини кўришга халақит берарди. Ҳаммаёқ жимжит эди, сув билан тўлган шахтада тиқ этган товуш эшитилмасди. Улар энди тағларидаги денгизнигина ҳис қилишарди; денгиз эса тўхтовсиз кўтарилиб, оҳиста уларга уриларди.

Яна бир хилдаги қайғули дамлар ўтаверди. Бутунлай ҳисобдан янглишган Этьен билан Катрина вақт ҳақида ҳеч қандай тасаввурга эга эмасди. Улар азоб чекиб, вақтнинг қанчалик тез ўтаётганини ҳам сезишмасди. Этьен билан Катрина назарида ер остига тушганларидан буён икки куну бир кеча ўтгандек эди, ҳақиқатда эса учинчи кун ҳам тамом бўлай деб қолаётганди.

Қутулишга бўлган ҳар қандай умид сўнди, уларнинг бу ердалиқларини ҳеч ким билмас, ҳеч ким улар ёнига туша олмас эди; тошқин уларга шафқат қилганида ҳам, бари бир очдан ўлишади. Сўнгги бор уларнинг миясига яна тақиллатиб, сигнал берсакмикин, деган фикр келди, лекин тош сув остида қолиб кетганди, бари бир уларнинг сигналларини ким ҳам эшитарди!

Тақдирига тан берган Катрина хум бўлиб кетган бошини қатламга қўйди-ю, бирдан сесканиб, қоматини ростлади-да:

— Қулоқ сөл! — деди.

Этъен аввалига Катрина кўтарилаётган сувнинг оҳиста шилпиллашини эшитган бўлса керак, деб ўйлади-ю, уни юпатиш учун ёлғон гапирди:

— Йўқ, мен оёғимни қимирлатдим.

— Йўқ, йўқ, унақа эмас... Бу у ёқдан келяпти, эшит!

Катрина яна қатламга қулоғини тутди. Этъен буни тушуниб, у ҳам қулоғини тутди. Бир неча минутлик кутиш уларни ҳолдан тойдирди. Кейин жуда олисдан уч марта тўқиллаган заиф товуш эшитилди, бу тўқиллатишлар орасида анча вақт ўтди. Лекин улар ҳамон шубҳаланишарди: балки қулоқларига шунақа эшитилгандир? Балки қатлам дарз кетаётгандир? Улар нима билан тўқиллатиб жавоб беришни билишмасди.

Ниҳоят Этъеннинг ақлига келди:

— Оёгингда ёғоч бошмоқ бор-а. Ечгин-да, пошнасж билан тўқиллат.

Катрина тўқиллатиб, шахтёрлар сигналинини бера бошлади; улар яна қулоқ тутишди, яна узоқдан ке-

марта тақиллатишди, йигирма марта жавоб товуши эшитишди. Улар йиғлаб, мувозанатни йўқотиб, йиқилиб тушишларидан ҳам қўрқмай қучоқлашиб олишди. Ниҳоят ўртоқлари яқинда, улар биз томон келишяпти, деб хурсанд бўлишди. Уларнинг шодлик ва севгилари ошиб-тошиб кетди, узоқ, бефойда сигнал беравериб, хит бўлганлари, жавоб кута-кута чеккан изтироблари ҳам унутилди. Уларнинг назарида халоскорлар бармоқларини шундоққина қояга суқсалар бас, улар озод бўладигандек эдилар.

— Хўш, қалай! — қувониб қичқирди қиз. — Яхшиямки қулоғимни тутган эканман!

— Ҳа!.. Жуда сезгир экансан! — жавоб берди йигит. — Мен бўлганимда ҳеч нимани эшитмасдим.

Шу ондан бошлаб улар навбатма-навбат қулоқ сола бошлашди. Уларнинг бири доим қулоқ тутиб, заррача товушга ҳам жавоб қайтаришга шай бўлиб турди. Кўп ўтмай улар чўкичларнинг гупиллашини эшита бошлашди: янги йўлакни қазишга киришишганди. Улар ҳар қандай товушга қулоқ солишарди. Бироқ уларнинг қувончи узоққа чўзилмади. Улар қанча кулишмасин, қанчалик ўзларини алдашга уринишмасин, бари бир, секин-аста умидсизликка туша бошлашди. Аввалига улар бу товуш Рекийяр томондан келяпти, йўлак қатлам ичига чуқур тушган бўлса керак, балки бир йўла бир неча йўлакни қазиб келишаётгандир, чунки уч кончининг ишлаётгани аниқ-ку, деб ўйлашди. Кейин улар кам гапиришадиган бўлиб қолишди, охири бизни ўртоқлардан ажратиб турган қатлам чуқурлиги анча бўлса керак деган мулоҳазага бориб, бутунлай гаплашмай қўйишди. Лекин Катрина билан Этьен гаплашишмаса ҳам, хаёл сурганлари-сурган эди. Улар бундай қалинликдаги жойни неча кунда қазиб тушиш мумкинлигини ҳисоблаб чиқишди. Иккови ҳали кунлари битмай туриб, уларнинг бу ергача қазиб келишларига ақли бовар қилмасди. Унгача иккови ўлиб бўлади-ку. Шу боисдан улар ғам-ғуссага ботиб, индамай, чақириқ сигналларига ёғоч бошмоқ билан дўқиллатиб жавоб қайтаришарди. Улар энди ҳеч нимадан умид қилмай қўйишганди, фақат беихтиёр тўқиллатиб, тирикликларини бошқаларга маълум қилишарди.

Шу алпозда бир кун, икки кун ўтди. Катрина билан Этьен олти кундан бери ер остида эди. Сув уларнинг тиззасигача чиқди-ю, ундан юқорига кўтарилмади, пастга ҳам тушмади. Муздек сувда оёқлари аввалгидек қотиб қолганди. Улар бирор соатча оёқларини сувдан чиқариб туришарди-ю, аммо шундай ноқулай аҳволга тушишардики, қаттиқ оғриққа чидолмай, яна сувга тикишга мажбур бўлишарди. Улар силлиқ тошдан сирғалиб пастга тушиб кетаётганлари учун ҳар ўн минутда тирмашиб юқорига чиқишларига тўғри

келарди. Ғадир-будир қатлам гарданларига ботиб қаттиқ оғритарди. Бунинг устига тобора дим бўлиб кетаётганди; сув босими ҳайдаб келган ҳаво ҳеч қаёқдан чиқиб кетолмасди, чунки улар қамалиб қолган жой енгчага ўхшаб қолганди. Уларнинг овози бўғиқ эшитилиб, худди узоқдан келаётгандек эди. Худди зўр бериб бонг урилгандек, жала билан дўлдан қочиб кетаётган поданинг тўпир-тўпири эшитилаётгандек қулоқлари шангилларди.

Катрина аввалига очликдан жуда қаттиқ қийналди. У худди қорни буришиб-тортишаётгандек энтикиб, чўзиб аянчли инграркан, хунук, қоқсуяк қўлларини оғзига олиб борди. Худди шундай азоб тортаётган Этьен қоронғиликда жонсараклик билан тимирскиланган эди, бармоқлари чирий бошлаган бир парча қопламага тегиб кетди. Этьен тирноқлари билан тахтани майдалай бошлади. Унинг бир бўлагини Катринага тутган эди, у дарҳол ютиб юборди. Икки кунгача улар қурт еб, илма-тешик қилиб ташлаган чирик ёғоч билан тирикчилик қилишди. Улар чирик тахтани еб тугатишди, бу ҳам тамом бўлгач, улар умидсизликка тушиб, ҳали қаттиқ, ушалмайдиган бошқа калта-култа ёғочларни ғажий бошлашди. Азобга тоқат қилиб бўлмай қолди: уларга ўз кийимларини чайнаб ютолмасликлари алам қиларди. Чарм камаргина уларнинг жонлариға бир оз ора кирди. Этьен тишлари билан узиб, уни майда-майда қилди-да, Катринага тутди, у эса, чайнаб наридан-бери ютди. Жағлари қимирлаб тургани учун назарларида қоринлари тўйгандек эди. Камарни еб бўлишгач, улар яна кийимларига ёпишиб, бир соатча сўриб ўтиришди.

Бироқ кўп ўтмай очликдан ичларининг қаттиқ таталаши тўхтади-ю, симиллаб, секин-аста кучайиб бо-раётган оғриқ бошланди, бу оғриқ уларнинг тинкасини бутунлай қуритди. Улар, албатта, сув бунчалик мўл бўлмаганда шу қадар узоқ чидаб тура олишмасди: ҳовучларини тўлдириб олиш учун энгашсалар кифоя эди. Улар ичларига ўт тушгандек шунчалик кўп энгашардиларки, гўё бутун шахтани босган сув ҳам уларнинг ташналигини босишга озлик қиларди.

Еттинчи кун сув олиш учун энгашган Катрина-

нинг қўли сув юзида сузиб юрган аллақандай юмшоқ нарсага тегиб кетди.

— Бу ёққа қарагин-чи... Бу нима экан?

Этъен қоронгиликда тимирскилана бошлади.

— Билолмадим. Вентиляциянинг қопламасига ўхшайди.

Катрина сув ича бошлади, лекин қўлини иккинчи марта узатганида жасадга тегиб кетди. У юраги ёрилиб, қичқириб юборди:

— Вой худо, бу ўша!

— Ким?

— Ўша, ўзинг биласан-ку!.. Мўйловига қўлим тегиб кетди.

Бу Шавалнинг жасади бўлиб, сув уни оқизиб келганди. Этъен қўлини узатиб, у ҳам Шавалнинг мўйлови билан пачақланган бурнини пайпаслаб кўрди. Юраги орқасига тортган Этъен жирканиб, аъзойи бада-ни титраб кетди. Кўнгли қаттиқ айнаётган Катрина оғзига олган сувни туфлади. Назарида қон ичаётгандек, ўлдирилган кимсанинг қони сувга сингиб кетгандек эди.

— Тўхтаб тур,— деди Этъен,— уни итариб юбораман.

У оёғи билан мурдани итарди, ўлик узоқлашди. Лекин кўп ўтмай улар жасад яна оёқлари тагига келиб қолганини сезишди.

— Ҳе, жин ургур! Йўқолсанг-чи бу ердан!

Учинчи сафар Этъен мурдани ўз ҳолига қўйди. Афтидан, аллақандай оқим уни яна ҳайдаб келаверарди. Шаваль кетишни хоҳламасди, улар билан бирга бўлишни, улар орасида туришни истарди! Бу ваҳимали ҳамроҳ ҳавони бутунлай заҳарлади. Улар ташналикдан ўлишни афзал билиб, бир кунгача сув ичишмади, фақат эртасига чанқоқлик азоби уларни бўйсунушга мажбур этди: улар ҳар сафар сув олаётганларида ўликни итариб юбориб, ҳар қалай сув ичардилар. Рашк яна ҳайдаб келгандан кейин уни ўлдирмаса ҳам бўларкан. Икковининг қовушишига йўл қўймаслик учун Шавалнинг ўлиги ҳам охиригача улар билан бирга бўлади чоғи.

Яна бир кун, икки кун ўтди. Сув ҳар чўлпиллаганида Этъен ўзи ўлдирган киши гўё мен ҳам борман,

дея тирсаги билан туртаётган қўшнидек оҳиста урилаётганини сезарди. Шу боисдан ҳар сафар у сесканиб кетарди. Шишиб кетган, кўкарган, сариқ мўйловли, башараси дабдала бўлган мурда доимо унинг кўзи олдида турарди. Эъён шундан бошқа нарсани эслай олмасди,— у Эъёни ўлдиргани йўқ, мурда сузиб келиб, уни тишлаб олмоқчи. Узоқ, кўп титраб-қақшаб йиғлаган Катрина эса меовланиб қолди. Пировардида бошини уйқудан кўтаролмай қолди. Эъён уни уйготар, қиз бўлса бир нималар дея гўлдирарди-да, ҳатто кўзини ҳам очмай, шу заҳоти уйқуга кетарди. У йиқилиб тушмасин, дея хавотирланган Эъён қизнинг белидан қучиб олди. Энди тақиллашга Эъён жавоб берарди. Чўкичларнинг тарақ-туруқи тобора яқинлашарди, энди бу товушларни у жуда яқиндан, деярли орқасидан эшитаётган эди. Энди унинг ҳам мадори тугаб, тақиллатишгаям ҳоли келмай қолди. Ахир у ёқдагилар буларнинг бу ердалигини билишади-ку, беҳуда уриниб нима қилади? Одамлар келиб олиб кетишлари энди уни қизиқтирмай қўйди. Кута-кута кўзлари тешилган Эъён соатлаб кимни кутаётганини ҳам унутиб қўярди.

Бироқ кўп ўтмай уларнинг аҳволи анча енгиллашди. Сув пасайиб, Шавалнинг жасади оқиб кетди. Уларни озод қилиш учун тўққиз кундан бери меҳнат қилишарди. Улар биринчи марта штольняда бир неча қадам босишган ҳам эдиларки, кучли силкиниш юз бериб, икковини ерга улоқтирди. Улар бир-бирини пайпаслаб, ҳеч нимага тушунмай, қушлари учиб, қучоқлашиб ётишар ва яна ҳалокат юз берди шекилли, деб ўйлашарди. Яна ҳаммаёқ жим бўлиб, чўкичларнинг гурсиллашлари ҳам тинди.

Улар бурчакда бир-бирининг пинжига тиқилиб ўтиришарди, бирдан Катрина кулиб юборди:

— Тепа жуда яхши-да!.. Юр, бу ердан чиқамиз.

Аввалига Эъён қизнинг қушини жойига келтиришга ҳаракат қилди. Бироқ ўзи ҳам эс-қуши қали жойида бўлса ҳам, ақлдан оза бошлаганини сезиб қолди. У юз бераётган воқеаларни сезмаётганди. Бу ҳол Катринада айниқса яққол кўриниб турарди; у безгак тутгандек қалтирар, энди тинмай гапиргиси, ҳаракат қилгиси келар эди. Қулоғи шу қадар шангиллардики, бу шовқин унга гоҳ сувнинг шалдирашидай, гоҳ қушлар

навосидай туюларди. Катрина босилган ўт-ўланлар ҳидини сезиб, кўзлари олдида сариқ доғлар пайдо бўлаётганини равшан кўриб турарди; назарида у эркинликка чиққандек, бугдойзор бошоқлари орасида, канал бўйларида юргандек, атрофида кун чарақлаб тургандек эди.

— Мунча иссиқ!.. Мени қўйнингга олсанг-чи, доимо бирга бўламиз, ҳамиша!

Эъён уни қучоқлаб олди, у йигитга эркаланаркан, очилиб-сочилиб гапираверди:

— Шунча узоқ кутиб, аҳмоқ эканмиз-да ўзимиз ҳам! Мен-ку дарровгина сеники бўлишга рози эдим-а, аммо ўзинг димоғ-фироқ қилиб, тушунмадинг-да... Кейин уйда кечалари ухламай, бир-биримизнинг нафас олишимизни эшитиб ётардик, эсингдами, бир-биримизга юрагимиз тўкилиб турарди ўшанда?..

Катринанинг қувноқлиги Эъёнга ҳам юкди: у ҳам ҳазил-ҳузул қилди, ўша индамай қилинган назокатларни эслади.

— Ахир сен мени урувдинг-да. Ҳа, ҳа, иккала юзимга тарсаки урувдинг!

— Сени севганимдан шундоқ қилувдим-да,— пичирлаб деди Катрина.— Биласанми, сени ўйламасликка ҳаракат қилардим, ҳаммаси тамом бўлди, дердим... Лекин ичимда бир кун эмас, бир кун топишиб олишимизга кўзим етарди... Фақат бир баҳона-ю, сабаб керак эди, тўғрими?

Эъённинг аъзойи бадани жимирлаб жунжикиб кетди, у бир силкиниб, бу тушдан қутулмоқчи бўлди-да, салмоқлаб деди:

— Ҳеч нима бутунлай йўқ бўлиб кетмайди. Ҳаммасини қайтадан бошлаш учун бахт сал кулиб боқса бас.

— Демак, бундан буён мен сен билан умрбод бирга бўламан-да, а?

Катрина дармони қуриб, пастга сирғалиб туша бошлади; овози заифлашиб қолди. Қўрқиб кетган Эъён уни кўксига босди.

— Мазанг қочяптими?

Катрина ҳайрон бўлиб, қадини ростлади.

— Йўқ, йўқ... Нега энди?..

Лекин бу савол қизнинг хаёлларини бўлиб қўйди. У гангиб, қоронғиликка боқди-да, бармоқларини қарсиллатиб, яна ҳўнграшга тушди:

— Э, худойим-ей! Худойим-ей! Мунча қоронги-я!

Энди далалар ҳам, ўт-гиёҳларнинг хидлари ҳам, сўфитўрғайларнинг сайраши ҳам, улкан сарғиш қуёш ҳам йўқ эди. Энди сув босган, қулаган шахта, зимзиё тун, улар шунча кундан бери қийналаётган ертўланнинг сассиқ, қўланса ҳидидан бошқа нарса йўқ эди. Катрина ақлининг заифлашиб қолиши уларнинг аҳволини баттар оғирлаштирди. Болалигида кўрганлари: ўша қора одам — ўлган қари шахтёр, — у саёқ қизларнинг бўйини узмоқчи бўлиб, шахта ичидан чиқиб келаётгани яна Катринанинг кўз олдидан кетмай қолди.

— Эшит! Эшитяпсанми?

— Йўқ, ҳеч нимани эшитмаяпман.

— Йўқ, биласанми, бу ўша киши... Ана у... Қон томирлари кесилган ер одамлардан ўч олиш учун томирларидаги қоннинг ҳаммасини чиқариб юборди. Шу боисдан бу ерга келибди. Уни кўряпсанми? Қара! У тундан ҳам қора... Қўрқиб кетяпман.

Дир-дир титраётган Катрина жим бўлиб қолди. Сўнг у шивирлаб, гапида давом этди:

— Йўқ, буниси бошқа.

— Ким бошқа?

— Биз билан бирга тургани-да! Ўша, энди у йўқ!

Шавалнинг қиёфаси унинг кўзи олдидан кетмасди, қиз хижолат бўлиб, у ҳақда гапира бошлади. У Шаваль билан турганида ит кунини кўргани ҳақида гапириб берди. Шаваль бир марта Жан-Бартда яхши муомалада бўлибди, қолган кунлари гиди-биди, шапалоқдан бошқа нарсани кўрмабди, Шаваль уни роса дўп-послаб, яна эркалаб азоб бераркан.

— Мен сенга айтяпман-ку, у бизни ажратмоқчи деб! У яна рашк қияпти... Ҳайдаб юбор уни!.. Мени ол, бутунлай ол, тамоман сеникиман!

Катрина Этьеннинг бўйнига осилди-да, унинг лабларини топиб, лабларини босди. Қоронғилик яна ёришди, қиз яна қуёшни кўрди-да, бахтиёр маъшуқадек шарақлаб кулди. Этьен эса унинг қарийб яланғочлигини, эгнидаги шахтёрлар кийими дабдала бўлиб кетганини сезиб, титраб кетди, бирдан ҳирси қўзиб, маҳкам қучоқлаб олди. Ниҳоят улар қовушадиган тун, — мана шу чуқур қабрда, шу ифлос ерда қовушадиган тун

бошланди. Жилла қурса ўлиш олдидан бахтиёр бўлиш истаги, яшаш, сўнги марта ҳаёт лаззатидан баҳраманд бўлиш иштиёқи голиб келди. Улар яқинлашиб келаётган ўлимни ҳам ўйламай, бир-бири билан чирмашиб кетишди.

Шу билан ҳаммаси тамом бўлди. Эъён ҳамон ўша бурчакда, ерда ўтирар, Катрина бўлса қимир этмай унинг тиззасида ётарди. Орадан бир неча соат ўтди. Эъён у ухлаётган бўлса керак, деб ўйлади, лекин уни қимирлатиб кўрди-ю, музлаб қолганини сизди — Катрина ўлган эди. Шундай бўлса ҳам уни уйғотиб юборишдан ҳайиқиб, қимирламади. Катрина балоғатга етгандан кейин биринчи бўлиб мен у билан алоқада бўлдим, мендан ҳомиладор бўлиши мумкин, деган фикрдан Эъённинг меҳри товланиб кетди. Аҳён-аҳёнда у билан бирга кетгиси келар, келажакда биргаликда қиладиган ишларини ўйлаб, қувонар эди; лекин буларнинг ҳаммаси жуда хира, айқаш-уйқаш бўлиб хаёлига бирров келарди-ю, бир лаҳзали тушдек лип этиб ўтиб кетарди. Силласи қуриб боради, шу боисдан у музлаб, гўдакдек ухлаб ётган Катринанинг шу ердалигига ишонч ҳосил қилиш учун бармоқларини хиёл қимирлата оларди холос. Кўз олди жимирлашиб, тун баттар қоронғилашди. У қай вақтлигини ҳам, қаердалигини ҳам билмасди. Шундоқ қулоғи остида қандайдир гурсиллаган овозлар янграб, тобора қаттиқ эшитилаётганди. Аввалига Эъён бу тўқ-тўқларга жавоб беришга эринди: сира ҳам дармони қолмаганди; энди унинг миясига бир фикр ўрнашиб қолганди: назарида Катрина олдинда кетяпти-ю, у кетидан юриб, қизнинг ёғоч бошмоқлари оҳиста тўқиллаётганини эшитяпти. Шу алпозда икки кун ўтди, қиз бирор марта ҳам қимир этмади, Эъён эса, қизнинг тинчгина ётганига ишонч ҳосил қилмоқчи бўлгандай беихтиёр унинг баданини сийпаларди.

Эъён ер силкинганини сизди. Овозлар бўғиқ эшитилиб, жинс парчалари оёқлари олдигача думалаб келди. У лампочкани кўриб, йиғлаб юборди. Унинг жовдираган кўзлари нурни кузатарди-ю, лекин тополмасди. У қоронғиликда зўрга кўринаётган қизил нуқтадан ҳушини йўқотиб қўйди. Лекин бу чоғ ўртоқлари уни кўтариб олишганди. Унинг юмилган тишларини

йириб, оғзига бир неча қошиқ қайнатма шўрва қуйишди. У фақат Рекийяр йўлакларининг бирига етганда олдида турган инженер Негрелни таниди. Шу он бир-бирини ўлгудек ёмон кўрадиган бу икки киши — исёнкор ишчи билан ҳамма нарсага шубҳа билан қаровчи бошлиқ — ҳўнграб бир-бирининг қучоғига отилди. Икковининг ҳам баданида бор бўлган инсоний туйғулар тугёнга келганди. Бу авлоддан-авлодга ўтиб келаётган чексиз қайғу-ғам, изтироб, турмуш машаққатлари туфайли йиғилган алам, азоб ҳуружи эди.

Тепада, жонсиз Катрина ёнида ялпайиб ётган бева Маэ чўзиб, тинмай уни тортарди. Олиб чиқилган бир неча мурда — Шаваль, бир ёрдамчи ишчи, икки кончи мурдаси — ерга қатор ётқизиб қўйилганди. Шавални ҳам анави икки кончи каби кўчки тагида қолиб, мажақланиб ўлган, деб ўйлашди. Унинг миясида қатиғи қолмаган, ичи бўлса сувга тўла эди. Халойиқ орасидаги хотинлар эс-ҳушларини йўқотиб, кийимларини йиртишар, тирноқлари билан юзларини юлишарди. Лампа нурига кўникиб, бир оз дармонга кирган Этьен ҳам тепада кўринди: озиб-тўзиб, сочлари оппоқ оқариб кетибди. Ҳамма унга йўл берди: бу чол энди қўрқинчли эди. Бева Маэ йиғидан тўхтади-да, кўзларини бақрайтириб, унга тикилиб қолди.

VI

Эрталаб соат тўрт эди. Мусаффо апрель туни илиб, тонг бўзариб қолганди. Еп-ёруғ осмонда юлдузлар милтирар, шарқ томон эса тонг шафағидан қизара бошлаганди. Қорайиб турган текислик ҳам уйқуда эди, лекин у ер ҳам одатда тонг отар пайтдагидек жонланиб, ноаниқ гувиллаш эшитиларди.

Этьен катта-катта қадам ташлаб, Вандам йўлидан борарди. У Монсудаги касалхонада олти ҳафта ётди. Унинг юзи сарғайиб, ўзи жуда озиб кетди; салгина куч-қувватга кириши билан касалхонадан чиқди-да, йўлга тушди. Ширкат ҳамон шахталаридан хавотирланиб, ишчилар сафини номатлуб унсурлардан тозалаётганди; Этьенга сизни ишда қолдиролмаймиз, деб айтишди. Шундай бўлса-да, Ширкат унга юз франк нафақа таклиф қилиб, шахтадаги ишни ташласанг ҳам

бўлади, бари бир кучинг етмайди, дея оталарча мас-лаҳат ҳам берди. Лекин Этьен бу юз франкдан воз кечди. У Плюшардан жавоб олганди. Плюшар уни Парижга таклиф қилиб, йўл учун пул юборганди. Шундай қилиб, унинг бир вақтлардаги нияти амалга ошганди. Касалхонадан чиққач, Этьен жўнашидан бир кун аввал «Қувноқ» мусофирхонасида, бева Дезирникида тунаб қолди. У эрталаб барвақт турди; соат саккизда кетадиган поездга илиниб, Маршьеннга жўнаш олдидан ўртоқлари билан хайрлашмоқчи бўлди.

Этьен эрталабки қизғиш нурдан ёришиб турган йўлда бир лаҳза тўхтади. Эрта баҳорнинг мусаффо ҳавосидан тўйиб нафас олиши қандай яхши! Тонг кунининг жуда яхши бўлишидан далолат берарди. Тонг аста-секин ёришарди, қуёш билан бирга ердаги ҳаёт ҳам уйғонаётганди. Этьен қўлидаги қизил бутасидан қилинган ҳассани дўқиллатганича сийраклашган тунги туман ичидан кўринаётган текисликнинг олис ерларига тикилиб йўлида давом этди. У ҳали ҳеч кимни кўрмаганди; Маэ хоним бир марта касалхонага бориб, уни кўриб келганди: афтидан, бева бошқа бора олмади шекилли. Лекин у Икки юз зағизгон посёлкасининг ҳаммаси энди Жан-Барт шахтасида. Маэ хонимнинг ўзи ҳам ўша ерда ишлаётганлигини биларди.

Секин-аста кимсасиз йўлларда кўмир қазувчилар кўрина бошлади; ранглари бўздек оқ бу одамлар Этьеннинг ёнидан индамай ўтиб кетишарди. Одамларнинг гапига қараганда, Ширкат галабаси туфайли эришиши мумкин бўлган ҳамма нарсага эришибди. Очлик туфайли таслим бўлган ишчилар икки ярим ойлик забастовкадан кейин шахтага қайтишди, ана шунда уларни ҳақ тўлашнинг янги тарифини қабул қилишга мажбур этишди; янги тарифга мувофиқ тиргак ўрнатилганлик учун алоҳида ҳақ тўланадиган бўлди; бу маошни пинҳона камайтириш бўлиб, шахтёрлар учун ўртоқларининг қони тўкила бошлагандан бери беш баттар нафратли бўлиб қолганди. Улар ортиқча бир соатлик иш ҳақларини уриб қолишар, уларни онтларига хиёнат қилишга мажбур этишарди, ҳаммасидан ёмони шу эди. Ҳамма жойда — Мируда, Мадленада, Кручинада, Ғалаба шахталарида иш қайта бошланганди. Ҳамма ерда эрталабки туманда, йўллар ҳали қоронғи бўлган

пайтда тапир-тупир эшитиларди: булар худди кушхонага ҳайдаб кетилаётган подадек бошларини эгиб, турнақатор бўлиб бораётган кўмир қазувчилар эди. Улар юпқа бўз блузкада дийдираб, қўлларини кўксиларига чирмаштирганча лапанглаб боришарди, кўйлаклари билан блузкалари орасидаги нонуштага олган бир парча нонлари орқаларида дўппайиб турарди. Бироқ атрофларидаги нарсаларни кўрмай, яна қовоқларини солиб, тизилишиб индамай ишга бораётган бу қора сояларга қараб туриб, уларнинг ғазабдан тишларини қисганларини, юракларида нафрат тўлиб-тошиб турганини, фақат очликка чидаш зарурлигини пайқаш мумкин эди.

Этьен шахтага яқинлашган сари йўлда кўмир қазувчиларни кўпроқ учратарди. Қарийб ҳаммаси якка-якка боришарди, ҳатто тўпланиб қолишган маҳаллаларида бошқалардан ҳам, ўзларидан ҳам безор бўлгандек, дарров бир сафга тизилишиб олишарди, Этьен юзидан қони қочган бир чолни кўриб қолди, — кўзлари кўмир чўғидек чакнаб турарди; кейин бошқа бир ёшгина ишчини учратди, у қаттиқ хансирарди. Кўплари ёғоч бошмоқларини қўлларига олиб олишганди; дағал жун пайпоқ кийилган оёқларнинг ерга тегиб, майин шипиллаши зўрға эшитиларди. Бу тинимсиз оқим бутунлай тор-мор этилган, дабдала бўлган армиянинг чекинганидан далолат берарди; унинг солдатлари бошларини қуйи солиб, судралиб боришаркан, ҳар бирининг қалбида яна жанглари бошлаш, қасос олиш ҳақидаги ягона фикр жўш урарди.

Этьен ниҳоят Жан-Барт шахтасига етиб келганида унинг иморатлари эндигина қоронғиликда кўрина бошлаганди; тонг ёришиб қолганига қарамасдан ёғочларга илинган фонарлар ҳамон ёниб турарди. Қорайиб кўринаётган иморатлар устидан кўтарилаётган оппоқ ҳовур тонгги шафақдан қизғиш кўринарди. Этьен қабулхонага ўтиш учун зинадан саралаш хонасига кўтарилди.

Шахтага тушиш бошланганди, ишчилар бараклардан чиқиб келишаётганди. Этьен бу ғала-ғовурда бир неча дақиқа қаққайиб туриб қолди. Чўян полдан вагонеткалар гулдураб юрар, барабанлар айланиб, пўлат арқонларни ўраб-бўшатар, карнайдан айтилаётган буй-

руқлар янграр, сигнал аппаратларига урилаётган болгаларнинг гум-гуми, кўнғироқлар эшитилар эди. Этьен одатдагидек, одамларни ямламай ютаётган бесўнақай махлуқни яна кўрганди. Кўтарма машина кажавалари дам ўтмай пайдо бўлар, шахта улкан махлуқдек осонгина ютиб турган тирик юкни олиб, ғойиб бўлар эди. Ҳалокатдан кейин Этьен шахтани ўлгудек ёмон кўриб қолганди. У кажаваларнинг пастга тушиб кетаётганини кўрди-ю, кўнгли ағдарилиб кетди. Тескари қарашга тўғри келди. Шахта унга балодай кўринаётганди.

Бироқ Этьен ёниб битай деяётган фонарларнинг хира нури зўрға ёритаётган нимқоронғи кенг бинода бирорта чехраси очиқ кишини учратмади. Қўлларига лампочкаларини ушлаб олишган оёқяланг кўмир қазувчилар ўз навбатларини кутиб туришарди; улар кўзларини ўйнатиб, ташвиш билан унга қарардилар-да, сўнг бошларини қуйи солиб, худди хижолат бўлгандек нари кетардилар. Уларнинг ҳаммаси, албатта, Этьенни танишарди. Унга қахру ғазаб билан қараш у ёқда турсин, ундан кўрқишарди шекилли, бизни кўрқоқсанлар, деб таъна қилиши мумкин, деган фикр хаёлларига келиб, қизариб кетишарди. Бу ҳол Этьенга наша қилди; у мана шу шўрпешоналар ўзини тошбўрон қилишганини унутганди; Этьен яна уларни қахрамонларга айлантириш, халққа раҳбарлик қилиш, ўзини ўзи хароб қилаётган бу табиий кучни тўғри йўлга солиб юбориш тўғрисида ўйлади.

Яна одам билан лиқ тўла жаваба пастга тушиб кетди; бошқа одамлар бирин-сирин келишганда Этьен ниҳоят забастовка пайтидаги собиқ сафдошларидан бирини таниди; бу довюрак киши бўлиб, ишга чиққанимдан кўра ўлганим яхши, деб қасам ичган эди.

— Сен ҳам ўша ёққами, — алам билан деди Этьен.

У кишининг ранглари оқариб кетди, лаблари титради; сўнг худди кечирим сўрагандек қўлини силтаб деди:

— Нима ҳам қилардим, ахир хотиним бор-ку.

Баракдан бир тўп ишчилар тушишди; Этьен уларнинг барини таниди.

— Сен ҳам! Сен ҳам! Сен ҳам!

Ҳаммаси титраб, бу таънага жавобан сўниқ товуш билан ғўлдираб дерди:

— Онам бор... Болаларим бор... Ейиш-ичиш керак-ку...

Кажава ҳадеганда келавермади. Ишлари ўнгидан келмаган кўмир қазувчилар қовоқларини солиб, навбат кутиб туришарди; улар ҳатто унга қарамасликка ҳаракат қилиб, шахта чоҳидан кўз узмасдилар.

— Бсва Маз-чи?— сўради Этьен.

Ҳеч ким жавоб бермади. Кимдир келади, деб имо-ишора қилди. Қолганлар ачинганларидан титраётган қўлларини кўтаришди: бечора хотин! Мунчаям бахти қаро бўлмаса-я! Сукунатни ҳеч ким бузмади. Этьен хайрлашиш учун уларга қўлини узатганда, ҳаммалари гўё охирги марта қўл бераётиб, ўз мағлубиятлари учун ичларидаги ғазабларини изҳор этаётгандек, қасос олиш иштиёқида ёнаётганларини ифодалаётгандек, қаттиқ қўл қисишарди. Кажава кўринди. Улар кажавага чиқиб, пастга тушишди,— тубсиз чоҳ уларни комига тортди.

Пьеррон пайдо бўлиб қолди; унинг чарм шапкаси-га штейгерларники сингари сим тўр тутилмаган лампочка илинганди. У бир ҳафтадан бери юк ортиш хонасида бошлиқ бўлиб ишларди; ишчилар ўзларини ундан олиб қочишарди, чунки Пьеррон амалга мингач калондимоғ бўлиб кетганди. Этьенни кўришга Пьерроннинг ҳуши бўлмаса ҳам, ҳар қалай унинг олдига келди, йигит жўнаб кетаётганини айтганида эса умуман хотиржам бўлди. Улар гаплашиб қолишди. Пьерроннинг хотини энди «Прогресс» қаҳвахонасига бекалик қиларкан. Бу мартабага хўжайинларнинг кўнглини топгани учун эришибди. Лекин Пьеррон гапини тугатмади, сен юқорига чиқариб юбориш учун белгиланган вақтда отлар гўнгини тўдаламабсан, деб жаҳл билан кекса Мукка ёпишиб кетди. Чол букчайиб, койишни эшитди. Мук бобо ҳам пастга тушиб кетишдан олдин Этьен билан қўл қисилиб хайрлашди. Еган даккисидан Мук бобонинг аъзойи бадани ловилларди; Этьен чолнинг узоқ қўл қисишидан бошқалар сингари у ҳам ичидаги ғазабини босиб турганини, бўлажак исёнлардан ҳаяжонланаётганини сизди. Ўз қўлида титраётган бу тарашадек қўл, иккала боласи ҳалок бўлса ҳам уни кечирган бу чол Этьеннинг кўнглини шунчалик бузиб юбордики, у то Мук бобо пастга тушиб кетмагунча бир оғиз ҳам гаширолмади.

— Маэ бугун келмайдими? — сўради у бир неча дақиқадан сўнг Пьеррондан.

Пьеррон аввалига ўзини саволни тушунмаганликка солди, — унинг ёмон одати бор эди: қачон шу хотиннинг отини эшитса, бир корҳол бўларди. Кейин баъзи бир фармойишларни бериш баҳонаси билан кетаркан, ниҳоят деди:

— Маэми?.. Ана ўзи.

Ҳақиқатан ҳам шим, блузка, чепчик кийиб, лампочка ушлаб олган бева Маэ баракдан тушиб келаётганди. Маэ хонимга илтифот қилганди: мислсиз оғир зарбага дучор бўлган бу аёлнинг қисмати маъмурият раҳмини шунчалик келтиргандики, гарчи аёл қирқ ёшда бўлса ҳам, уни шахтада олиб қолишганди; лекин уни юккашлик вазифасига қабул қилишни ноқулай билиб, кичикроқ бир вентиляторга қараб туришни топширишганди. Бу вентилятор Тартаре ёнидаги дўзахдай жойга, шимолий йўлакка эндигина ўрнатилганди; бу ерда бошқа вентилятор йўқ эди. Маэ тириклай кабоб бўладиган қирқ даража жазирамада бели қақшаб, сурункасига ўн соат гилдиракни айлантириши керак эди. У кунига ўттиз су ишларди.

Маэ эркаклар кийимида Этьенга ниҳоятда гариб кўринди: қорни билан кўкраклари ўнгирадаги намгарчиликдан шишиб кетгандек эди. Алланечук бўлиб кетган Этьен жўнаб кетаётганини, хайрлашишга келганини қандай айтишни билмай қолди-да, кейин гўлдираб бир неча огиз сўз айтди.

У Этьенга қаради-ю, аммо гапига қулоқ солмади, ниҳоят уни сенсираб гапира бошлади:

— Бу ердалигимдан ҳайрон бўляпсанми?.. Тўғри, мен биринчи бўлиб ишга чиққан ўртоқни бўғиб ўлдираман дегандим. Мана энди ўзим ҳам ишга келянман... Нима, ўзимни ўзим бўғиб ўлдиришим керакмиди, а?.. Шундоқ ҳам қилардиму қўлимга қараб турган чол билан болаларим бор-да.

Маэ оҳиста, ҳорғин гапирарди. У ўзини асло оқламади, шунчаки бўлган воқеаларни айтиб берди: уларнинг ҳаммаси очдан ўла бошлаганди, уларни посёлкадан ҳайдаб чиқаришлари мумкин эди, шунинг учун ҳам у ишга кирди-да.

— Чолнинг аҳволи қалай? — сўради Этьен.

— Жудаям хотиржам, покиза, аммо мияси жойида эмас... Ушанда уни суд қилиб, кесиб юборишмади... Хабаринг бордир-а? Уни жиннихонага жойлаб қўйиш керак, дейишувди, мен кўнмадим; уни ўша ерда захарлаб ўлдириб қўйишарди... Ҳар қалай у қилган иш бизга жуда қимматга тушди-да, энди у ҳеч қачон нафақа ололмайди, Правление хўжайинлари унга нафақа бериш одобдан бўлмайди, дейишди.

— Жанлен-чи, ишлаяптими?

— Ҳа, уни кунбай ишга ўтказишди. Йигирма су олади... Э, мен нолимайман, бошлиқлар менга жуда яхши муносабатда, буни уларнинг ўзлари ҳам айтишди... Жанленнинг йигирмаси-ю, менинг ўттизим — ҳаммаси эллик су бўлади. Агар олти киши бўлмаганимизда, ҳаммамиз кекириб юрардик. Ахир энди Эстелла ҳам бор-да — ортиқча нонхўр, ҳаммадан ёмони — Анри билан Леноранинг шахтага ишга киришига ҳали тўрт-беш йил бор.

Этьен чидолмай қичқириб юборди:

— Улар ҳамми!

Маэнинг қонсиз ёноқларига қизиллик югуриб, кўзлари чақнаб кетди. Лекин у шу ондаёқ тақдир жабру жафолари остида эзилгандай, елкалари шалвиллаб тушди.

— Нима ҳам қилардик! Кейин уларнинг ҳам навбати келади-да... Ҳамма ҳам шундай оғир кунларни кўрган, уларга ҳам гал келади-да.

Маэ жим бўлиб қолди: вагонеткаларни ғилдиратиб кетаётганлар уларга халақит беришди. Катта, чанг босган деразалардан хира ёруғлик тушиб турарди, шу босдан фонарлар янада хирароқ ёнарди, ҳар уч минутда машина ҳаракатга келиб, арқонлар чуваларди, ҳар бир кажава одамларни олиб ғойиб бўларди.

— Эй, дангасалар, чаққонроқ қимирласаларингчи! — қичқирди Пьеррон. — Ўтиринглар кажавага, бўлмаса бугун кун бўйи ҳам тугатолмаймиз!

У Маэга қаради, лекин бева жойидан жилмади. У учинчи кажавага ҳам тушмади; кейин худди уйғониб кетган кишидек суҳбатнинг бошини эслади-да, Этьенга мурожаат этди:

— Шундай қилиб, жўнайдиган бўлдингми?

— Ҳа, бугун эрта билан.

— Сен ҳақсан. Иложи бўлса, бошқа жойга кетган яхши. Сени кўрганимга хурсандман; сендан асло ҳафа эмаслигимни жилла қурса ўзинг ҳам биларсан. Ўн вақтлар, ўша қирғиндан кейин сени ўлдирмоқчи ҳам бўлдим. Лекин мундоқ ўйлаб қарасанг, ҳеч ким айбдор эмаслигини кўраркансан... Йўқ, йўқ, бунга сен айбдор эмассан, ҳамма айбдор.

Маэ ўлганлар: эри, Захария, Катрина ҳақида хотиржам гапирди, фақат Альзирага келганда кўаларида ёш кўринди. У яна одатича хотиржам бўлиб қолди, ўз ишлари тўғрисида тадбирли аёллардек, пишиқ-пухта гапирди. Буржуйлар бекордан-бекорга шунча камбағалнинг ёстигини қурутди, — бу яхшиликка олиб келмайди. Албатта, бир кун келиб, улар товон тўлайдилар, чунки бу ёруғ оламдагиларнинг ҳаммаси жазоланади! Ушанда аралашининг ҳам ҳожати йўқ, — бутун дўконлар ўз-ўзидан осмонга отилади, солдатлар ишчиларга қандай ўқ узган бўлишса, хўжайинларни ҳам шундай отишади. Асрий итоаткорликка, Маэни яна қайтадан қаддини дол қилиб, ишлашга мажбур этган наслий одатга, ҳар қалай, адолатсизлик умрбод давом этиши мумкин эмас, агар худо бўлмаса, кимдир келиб, бахтсизлар учун қасос олади, деган ишонч ҳам қўшилганди.

Бева Маэ атрофга аланглаб, паст товуш билан гапирарди. Яқин орада Пьеррон кўриниши билан овозини баландлатиб деди:

— Хўп майли, кетадиган бўлсанг, майда-чуйдаларингни ҳам олиб ол... Уйимизда иккита кўйлагинг, учта дастрўмолинг билан эски шиминг турипти.

Этъен қўлини силкиб қўя қолди: энди бу латта-путталарни нима ҳам қиларди? Бари бир эски-тускичига топшириш керак.

— Раҳмат, менга керак эмас, болаларингизга қолсин... Парижда топиб оларман.

Яна иккита кажава пастга тушиб кетди. Пьеррон ниҳоят бева Маэга қараб мурожаат қилишга мажбур бўлди:

— Менга қаранг, пастдагилар кутиб қолишди-ку! Гапингиз тамом бўладими ўзи?

Лекин бева унга орқасини ўгириб олди. Бу ярамас сотқин мунча куйиб-пишади-а? Ишчиларни пастга ту-

шириш унинг иши эмас-ку. Уни бу ердагилар шундоқ ҳам ёмон кўришади-ку. Шу боисдан Маэ хоним лампочкасини ушлаганча Этъен билан тураверди; ёз бўлишига қарамай, у елвизакда совуқ еди.

Яна нима ҳақда гапиришни на у, на Этъен биларди. Улар рўбарўма-рўбарў туришар, юраклари шунчалик тўлиб кетган эдики, албатта бир-бирига яна бир нима дегиси келар эди.

Ниҳоят индамай туравермаслик учунгина Маэ шундай деди:

— Левакнинг хотини иккиқат, эри ҳамон турмада; Бутлу вақтинча унинг йўқлигини сездирмай турипти.

— Э, ҳа, анави Бутлу-да!

— Ҳа, айтгандай... Филомена кетиб қолди. Сенга айтмаганмидим?

— Нима, кетиб қолди?

— Ҳа, па-де-калелик битта шахтёр билан кетиб қолди. Иккита боласини менга ташлаб кетадими, деб кўркувдим. Йўқ, ҳайтовур, уларни ўзи билан олиб кетди... Қара-я? Ўзи қон туфлаб юрган, ранги мурданикидан баттар бўлса-ю, қилган ишини қара-я!

У бир лаҳза жим бўлиб қолди-да, кейин секин гапини давом эттирди:

— Менинг ҳақимда ҳам ҳар хил бўлмағур гапларни айтишди!.. Эсингдами, мени ҳам сен билан дон олишиб юради, дейишганди. Вой худойим-ей! Эрим ўлгандан кейин шунақа бўлиши осон эди, ёшроқ бўлганимда, тўғрими? Бироқ энди шу иш бўлмаганига хурсандман, кейин ўзимиз ҳам пушаймон қилиб юрардик.

— Ҳа, кейин пушаймон қилиб юрардик, — такрорлади Этъен шунчаки.

Шу билан гаплари тамом бўлди, бошқа ҳеч нима дейишмади. Маэни кажава кутарди, жарима тўлайсан, деб дагдага қилиб чақиришарди. Шундан кейин бева ниҳоят хайрлашишга жазм қилиб, унинг кўлини қисди. Этъен қаттиқ ҳаяжонланиб, унинг орқасидан қараб қолди: жуда ҳаргин, шалвиллаб қолган эди, юзида қондан асар ҳам йўқ, ўнгиб кетган кўк чепчиги остидан сочлари чиқиб турарди, серпушт аёлнинг бўла гавдаси бўз шим билан блузкада хунук кўринарди. Аёл сўнгги бор қўл қисиб жайрлашаркан, Этъен унинг бир ўртоқдек қаттиқ, узоқ индамай қўл сиқиб хайр-

лашганини сизди; аёл гўё кураш янгитдан бошланадиган кунгача хайрлашгандек эди. Эъён ҳаммасини тушурди; беванинг кўзлари комил ишонч билан ёниб турарди. Тезроқ дийдор кўришайлик, хайр! Лекин эндиги жангимиз ҳал қилувчи жанг бўлади.

— Улжудай дангаса хотин экан-да, жин урсин! — деб кичқирди Пьеррон.

Маэни ҳар томондан итариб, қисиб қўйишди; у бошқа тўрт ишчи билан вагонеткага чиқиб олганди. Сигнал арқонини тортиб: «Пўшт, мол гўшти кетяпти!» деб маълум қилишди. Казавва кўзгалиб, қоронгиликка тушиб кетди, тез айланаётган пўлат арқонгина қолди.

Шундан кейин Эъён шахтани тарк этди. У пастда, саралаш шийпондаги уюлиб ётган кўмир олдида оёқларини узатиб ўтирган бировни кўриб қолди. Бу Жанлен бўлиб, катта-катта кўмирларни «тозалаш» вазифасини бажарарди. У кўмирни оёқлари орасига олиб, болға билан ундаги сланец бўлақларини ажратарди. Унинг юзини кўмир гарди шунчалик босгандики, агар шалпангқулоқ, кичик кўзлари, кўкиш тумшуғи маймуникига ўхшаган бу бола бошини кўтармаганида, Эъён уни сира ҳам танимас эди. Бола галати тиржайди ва сўнги бор уриб, тошкўмирни майдалади-да, қора чанг булути ичида кўринмай кетди.

Эъён бинодан чиққач, бир минутча чуқур хаёлларга берилганча йўлдан кетаверди. Хаёлига ҳар хил фикрлар келиб кетарди. Аммо ҳаво тоза бўлиб, осмон мусаффо эди — у кўкрагини тўлдириб нафас олди. Қуёш уфқ узра салобат билан кўтариларди. Ҳамма ерда қувноқ ҳаёт уйғонаётган эди. Кўз илғамас текислик бўйлаб шарқдан ғарбга томон заррин тўлқин ошиқди. Ҳаммаёққа яна оромбахш ҳарорат таралди; бу ернинг нафас олиши, қушлар навоси, шалолаларнинг шалдираши, ўрмонларнинг шовиллаши эшитилиб турган ёшлик мавжи эди. Ҳар қалай ҳаёт яхши-да, бу кўҳна дунё яна бир баҳор яшашни истарди.

Шу умидда юрган Эъён қадамини секинлатди; у баҳор жилвасидан роҳатланиб, йўлнинг у ён-бу ёнига қарарди. У ўзини ўйларди, ўзини бардам сезарди, — шахтадаги ҳаёт унинг учун қаттиқ синов бўлди, шундан кейин у камолга етди. Унинг шогирдлик даври тугади; Эъён энди ўзи билиб олган, ўзи лаънат-

лаган жамиятга қарши уруш эълон қилган революциянинг онгли жангчисидек мукамал қуролланган ҳолда борарди. Плюшар билан учрашиши, Плюшардек таниқли раҳнамо бўлиши уни қувонтирарди, уни ҳозир хаёлан ирод этаётган нутқларга илҳомлантирарди. У ўз программасини кенгайтиришни ўйларди. Этьенни ўз синфидан юқори қўйган буржуа зукколиги унинг буржуазияга бўлган нафратини кучайтирарди холос. Ишчиларнинг қашшоқликда яшаши уни хижолат қиларди; Этьен уларни шон-шуҳрат шоҳсупасига кўтаргиси келарди: буюк ва ҳаққоний одамлар фақат шулар эканини, яғона нуфузли табақа, инсониятни ўзгартира оладиган яғона куч фақат шулар эканини Этьен кўрсатиб беради ҳали. У ўзини халқ шодиёнаси куни минбарда тургандек ҳис этди, — ишқилиб халқ ютиб юбормаса бўлгани.

Юқоридан эшитилаётган тўрғай навоси Этьенни осмонга қарашга мажбур этди. Тиниқ осмондаги қизғиш булутлар — тунги туман қолдиқлари тарқалаётганди; кўз олдидан Суварин билан Раснёрнинг хира қиёфалари ўтди. Ҳа, кимки ҳокимиятни ўз қўлимга оламан, деб уринса, ҳаммаси барбод бўлади. Жилла қурса, манави машҳур Интернационални олинг, жаҳонни янгилаши керак бўлган бу ташкилот ҳам энди заифлашиб қолди, мадори кетиб, ҳалокатга юз тутди, унинг шундай катта армияси ички низолар туфайли пароканда бўлиб тўзиб кетди. Демак, Дарвин: олам жанг майдонидан бошқа нарса эмас, унда бир турнинг такомиллашуви ва давом этиши учун зўрлар ожизларни емириб, ютиб юборади, деб тўғри айтган экан-да? Гарчи Этьен ўз билимларидан қаноатланган киши сифатида буни ҳал этиб қўйган бўлса-да, бу савол уни хижолат қиларди. Лекин бир фикр унинг шубҳаларини тарқатиб, уни ғурурлантириб юборди; у биринчи нутқидаёқ ана шу назария борасидаги эски тушунчаларини ривожлантиришни ният қилиб қўйди. Агар бир синф ер юзидан супурилиб ташланиши зарур бўлса, демак, навқирон, кучга тўлган халқ ёшини яшаб, ошини ошаган буржуазияни йўқотиб юборади, — бошқача бўлиши мумкинми, ахир? Янги қон янги жамият барпо этади. У мункиллаб қолган миллатини оёққа турғизиши лозим бўлган ваҳшийлар ҳужумини кутаркан, унда яна яқин-

да инқилоб, чинакам, меҳнаткашлар инқилоби бўлади, деган қатъий ишонч туғилди. Бу инқилоб шуъласи аср сўнггини чиқиб келаётган қуёшнинг қирмизи рангига бўяйди, Этьен бу қирмизи нурни осмонда кўриб турди.

Шу хаёллар билан банд бўлган Этьен қўлидаги қизил ёгочдан қилинган ҳассаси билан йўл тошларини уриб, дўқиллатиб, қадам ташларди. У атрофга кўз ташларкан, таниш жойларни кўрди. Мана, Хўкиз мўғиз деган жой: у халойиқни худди шу ердан шахталарни вайрон қилишга бошлаганди. Мана энди яна молдек ишлатиб, тинкангни қуритадиган, кам ҳақ тўланадиган иш бошланди. У назарида ер тагида, етти юз метр чуқурликда бир маромда, тўхтовсиз бўғиқ гурсиллаётган товушларни эшитаётгандек бўлди: булар унинг яна ишга чиққан ўртоқлари, унинг қорайиб кетган ўртоқлари индамай жон-жаҳдлари билан тоғ жинсларини кўчиришяпти. Тўғри, улар мағлуб бўлишди, улар пулларидан айрилишди, у ерда ўликларини қолдиришди; лекин Париж Ворёдаги отишларни унутмайди, Империянинг қони ҳам мана шу тузалмас жароҳатдан оқади. Борди-ю, кризис тамом бўлиб, заводлар бирин-кетин очилаверса ҳам, бари бир уруш эълон қилинади, чунки бундан буён ярашув бўлиши мумкин эмас. Шахтёрлар ўз кучларини ўлчаб, синаб кўришди ва ўзларининг адолатга даъватлари билан бутун Франция меҳнаткашларини ларзага солдилар. Шунинг учун ҳам уларнинг мағлубияти ҳеч кимни хотиржамликка солмади; Монсу буржуйлари ғолиб келган бўлишларига қарамай, аслида забастовка хоҳлаган кунда такрорланиши мумкинлигини ҳис қилишар, бу чуқур сукут замирида нима бор экан, кунимиз битмаганмикин?— дея сўраётгандек, ҳайиқиб атрофга аланглашар эдилар. Улар ҳар куни, масалан, эртага исён бошланиши мумкин, ана ўшанда ўзаро ёрдам кассалари бўлган ишчиларнинг умумий забастовкаси бошланади, шу касса туфайли бир ойгача қуруқ нон чайнаб, забастовка қилаверишлари мумкин бўлади. Бу галги забастовка чириган жамиятни бир силкиб қўйди холос; бу жамият оёғи остидаги замин қимирлаб турганини ҳис қилди; аммо кейин эски, нураб қолган бино Ворё шахтасидек қулаб, жаҳаннамга ағдарилмагунча силкиनावеради, силкиनावеради.

Этьен ўннга, Жуазель йўлига бурилди. У худди мана шу ерда Гастон-Марини дабдала қилишга отланган халойиқни йўлдан қайтарган эди. Узоқдан чарақлаган қуёш ёритаётган кон шахталарининг миноралари кўриниб турарди,— ўнг томонда Миру, кейин ёнма-ён жойлашган Мадлена билан Кручина шахталари. Ҳамма ерда иш қайнарди. Этьен назарида ер қаъридан чўкичларнинг гурсиллашини эшитгандек бўлди; бу гурсиллаган товушлар бутун текислик бўйлаб, у бурчидан бу бурчигача эшитиларди. Гурс, гурс, кейин яна қуёш нурида ястаниб ётган далалар, йўллар, қишлоқлар ости гурсиллади: ҳамма жойда, катта, қалин қатламлар босиб ётган ер остида машаққатли иш қайнарди: ер остидан келаётган қайғули хўрсинишларни эшитиш учун ўзинг пастга тушишинг керак. Энди Этьен зўравонлик ҳақиқатан ҳам ишни тезлата олмаса керак, деб ўйлади. Пўлат арқонлар кесилди, темир излар бузилди, лампалар чил-чил қилинди — булардан нима фойда чиқди? Яксон қилиш иштиёқида ёнган халойиқ мана шунинг учун уч миля масофага ҳаллослаб келган экан-да! У қонуният тикланадиган кун бундан ҳам даҳшатли бўлишини сал-пал биларди. Унинг ақли тўлишиб, тийраклашди, йиғилиб қолган кек-адоватини юрагидан чиқариб ташлади. Маэ хоним бу бизнинг сўнги жангимиз бўлади, деб жуда тўғри айтган экан: ҳамма хотиржамлик билан уюшиши, бир-бирини яхшироқ билиши, агар қонун йўл қўйса, союзларга бирлашиши керак; ана ундан кейин, улар куч-қувватга тўлганликларини ҳис қилиб, миллион-миллион меҳнаткаш бир неча минг ишқмас билан юзма-юз келиб қолган пайтда, ҳокимиятни қўлга олиб, хўжайин бўлиб қолиши керак. Ана ўшанда ҳақиқат ва адолат нурлари балқийди! Ана ўшанда ер остидаги муқаддас, олис маконда биқиниб бахти қора кишиларни еб, семириб, чўзилиб ётган кушанда, ёвуз махлуқ ниҳоят ўлади.

Этьен Вандам йўлидан бурилиб, катта тош йўлга чиқди. Унг томонда, тепа ёнбағрида чўзилиб, бора-бора уфқ ортида ғойиб бўлган Монсу кўриниб турарди; у Ворё харобаларига келиб қолди — мана шу лаънати ўрадан учта насос билан кечаси-ю, кундузи тинмай сувни чиқариб ташлашаётганди. Нариди, уфқда Ғалаба, Сен-Тома, Фетри-Кантель шахталари, ундан нарида,

шимолроқда эса, баланд-баланд домна печлари ва кокс печлари батареялари кўзга чалинарди; уларнинг тепасида мусаффо тонг палласида тутун бурқсиб турарди. Агар Этьен эрталаб соат саккиздаги поездга кечикмай деса, шошилиши керак, чунки яна олти километр юриши лозим эди.

Унинг оёқлари остидан ҳамон зўр бериб урилаётган чўкичларнинг гурс-гурси эшитиларди. Унинг ҳамма ўртоқлари ўша ерда эди. Этьеннинг назарида улар ҳар бир қадамини кузатишаётгандек эди. Лавлаги экиладиган далалар остида ишлаётган бева Маэ эмасмикан? У қаддини дол қилиб ишляпти, хириллаб нафас олганда, нафаси ҳуштак чалиб чиқади, вентиляторнинг шовқини унга жўр бўлади. Этьен сўлда, ўнгда, узоқда — ҳаммаёқда ишлаётган ўртоқларини танияпти; улар экинзорлар, кўм-кўк ихоталар, ёш ниҳоллар остида ишляпти. Кўк гумбазида апрель қуёши чарақлаб, момо ерга иссиқ нур сочарди. Ернинг меҳрибон бағрида ҳаёт чашмаси жўш урарди; куртаклар ям-яшил баргларга айланганди, далалар бетини қоплаган майсалар мавжланиб турарди. Ҳаммаёқда уруглар ниш уриб, ўсимликлар ер бетига ёриб чиқар, иссиқлик вана нурга ташналик билан интилар эди. Шира-шарбатлар гўё шивирлаган овозлардек сизиб оқарди, пояларнинг шитирлашлари қўшилиб, сўриб бўса олишга ўхшаб кетарди. Ишчи чўкичининг садоси борган сари юқорига яқинлашаётгандек, аниқ ва тиниқ эшитиларди. Қуёш ҳароратли нурларини сочиб турган тонг палласида ердан ана шундай садолар эшитиларди. Пайкалларда экинлар аста-секин бўй чўзарди, бўлажак ҳосилнинг даҳшатли, қора лашкарлари ўсиб, етишиб келаётганди, ана шу уруглар тез орада ер бағрини ёриб чиқиши керак.